

清 張 廷玉 等撰

明曲



中

華

書 局

卷二六八至卷二八〇(傳)

# 明史卷二百六十八

### 列傳第一百五十六

### 曹文詔 弟文耀 周遇吉 黄得功

崇禎二年冬,從袁崇煥入衛京師。 曹文詔,大同人。勇毅有智略。 從軍遼左,歷事熊廷弼、孫承宗,積功至遊擊。 明年二月,總理馬世龍畀所賜尙方劍,令率參將王

又從世龍等克大安城及鮎魚諸關。 以與復四城功,加都督僉事。 七月,陝西賊熾,擢延綏 自大塹山轉戰逼遵化,

承胤、張叔嘉、都司左良玉等伏玉田枯樹、洪橋、鏖戰有功、遷參將。

東路副總兵。

**贼渠王嘉胤人據河曲。** 四年四月,文詔克其城。 嘉胤脫走,轉掠至陽城南山。 文詔追

及之,其下斬以降, 以功擢臨洮總兵官。

點燈子自陝入 山西。 文詔追之,及於稷山,諭降七百人。點燈子遁,尋被獲,伏誅。

列 第 H Τî + 六 曹 文 詔

六八九三

米脂賊、戰懷寧川、黑泉峪、封家溝、綿湖峪、皆大捷、 將張弘業、遊擊李明輔戰死。 道江援之。 李老柴、獨行 會文詔西旋,與楡林參政 狼 陷中部 , 巡撫練國事、延綏總兵王承恩圍之。 文詔乃與遊擊左光先、崔宗廕、李國奇分剿綏德、宜君、淸澗 張 福臻 合剿,馘老柴及其黨一 掃地王授首 條龍,餘黨奔摩雲谷。副 五月,慶陽 賊郝臨菴

用被 為遊 敗之咸寧關,又敗之關 蛟者,文韶從子 濠,斬千級,生擒 楊嘉謨 屯張麻村。 變蛟 執。 一擊趙光遠所浥, 紅 、副將王性善扼之,賊走慶陽。 軍友、李都司、杜三、楊老柴者,神一魁餘黨也,屯鎭原,將犯 文詔 官軍掩擊,賊走高 ガ 也。 縦 杜三、楊老柴。 区 會性善及 乃 間 上嶺。 田 長 給其黨, 寧驛走張 甘肅 Щ 追至隴安,嘉謨、 餘黨 殺紅 副 遊擊曹變蛟、馮舉、 將李 糾 家 文韶從鄭州 軍友,遂蹙敗之水落城。 他賊掠武安監,陷 JII鴻嗣 0 其逸出 變蛟 、參將莫 間道與嘉謨、性善合。 凊 夾擊, 復敗之。 劉 水 與京等至,共擊斬 者, 成功、 華亭,攻莊 副 將蔣 平安等課 追至 平涼。 浪。 賊餘 靜寧州, 陽 五 衆數千欲走漢南, 遇之敗,都司 五年三月,大戰 而上,賊潰走。 文詔、嘉謨至, 國事檄甘肅 百二十餘級 賊奔據唐毛 李宫 總 賊 兵 儿

劉道 江 可 逐 天 飛、 圍合水。 郝 臨 庵 文韶往救。 劉 道江為 王承恩所 **贼**匿精銳,以千 敗,退保 騎逆戰 鐵角城。 誘抵南原 獨行 狼 、李都 伏大起。 司走 城上人言曹將 與 合, 17] 天飛 山山

先登,殄其衆

洪承 虎臣 橋 軍 。疇斬 固 文詔 原總兵楊麒 文詔 率 可 變蛟、舉、嘉謨及參將方茂功等追及之,大戰陷陣,賊 天 飛 持矛左右突, 李 都 破賊甘泉之虎兕凹。 司 於平涼,降其 匹馬縈萬衆 將 中 白廣恩,餘 戲復追賊安 o 諸軍望見,夾擊? 贼 口 分 竄 河 、崇信窑 文韶追 賊 大敗 復 に白茅 大 撃之隴州 敗。 僵 屍 山、皆 尋 蔽 與 野 平 寧 大 ٦, 獲。 夏 餘 鳳 總 走 間 總 銅 兵 + 督 質 ]]]

月 一戰三 敗之,遂蹙賊耀州 錐 子 山, 其黨 殺獨行 狼、 郝臨 庵 以降。 承疇戮四百 餘散

關中巨寇略平。

之。 兵部 文詔 巡 撫 在 抑 御 其功,卒不敍。 陝 史范復粹彙奏首功凡三萬六千六百有奇,文詔 西 大小 數十戰, 功最多, 承疇不 爲敍。 巡按御史吳甡推獎甚至, 功第 一,嘉謨 次之, 承恩 復粹 麒 疏 叉

中 中 天、 ·, 而 來。 興加 秦賊滅 秦將曹文詔威名宿著,士民 哈利 且盡。 七大部,多者萬 宜敕令入晉協剿。」 人,少亦半之,蹂躪 爲之謠 於 是 日『軍 命 陝西、 汾州 中 有 山西諸將 、太原 曹,西賊聞之心 平陽 並受文詔 御 史張 膽搖」。 節 宸 制 極 且 嘗 立 賊 功晉 自 秦

當

是時

贼見陝兵盛,多流

入山西,其魁紫金梁、混世

王、

姬關

鎖、

八大王、

曹操、

闖場

賊 年正 月 月,文部 抵 霍州 追 擊之,斬混 敗賊 汾河 二二 世王於碧霞村。日 一縣,追 及 於 壽陽 餘黨為猛 巡撫許鼎臣 如虎逐走,遇文詔 造謀士 張宰 先 兵 大 つ方山 軍 賊

敗。 五 盂 、定襄、壽陽賊 盡平。 鼎臣命文詔軍平定, 備太原東; 張應昌軍 一汾州 備太原

西。文詔連敗賊太谷、范村、楡社、太原賊幾盡。

涉縣 浬 寨,斬首千餘。 詔 上太行,文詔大敗之澤州。賊走潞安,文詔至陽城遇賊不擊,自沁水潛師,還擊之芹地、劉 城 剿 ()斬贼 賊徐溝、盂、定襄,所司不給米,反以礮石傷士卒。 帝以文詔功多,敕所過地多積 聞文詔破贼黎城,解去 千五百。 四月,賊屯潤城,其他部陷平順, 紫金梁、老回回自楡社走武鄉,過天星走高澤山 糗糧以犒 ·,並敕文詔速平賊。 殺知縣徐明揚。 帝卽 下御史按問。 山西監視 文詔至, ,文詔皆擊敗。 賊走, 三月, 中官劉中允言文 、賊從 乃夜半襲 他賊 河 内 重

城 兵 介於 毛 嶺 林縣,文詔率五營軍夜襲破之。 Ŧi. Щ 月 西。 ,帝遣中官孫茂霖爲文詔內中 賊旣屢敗,乃避文詔鋒,多流入河北 七月大敗懷慶賊柴陵村,馘其魁滾地龍,又追 軍。 敗犯沁水,文韶大敗之,擒其魁大虎,又敗之 0 帝乃命文詔移師 往討。 而 賊 Ë 敗 斬 鄧 老 玘 遼 口

於

濟

源

譽怒,遂以鳳儀之敗爲 敗 沒 於侯 文 詔 家 在 洪 庄 一賴文 洞 時 ٠, 詔 與 文詔罪。 里居: 馳 退 御 賊 史劉 部 甫 議文詔怙 令譽件。 解 甲,與 令譽相 勝而驕 及 是, 見,語 令譽: ,乃調之大同 按 復 河 相 南, 失。 而 文詔拂衣起,面 四 Ш 石 · 社土 官 叱之。 馬 鳳 儀 令 軍

列傳第一百五十六 曹文詔

晉 軍 還。 自 縣 賊 贖 邊 衞 已 及 七 後入豫,帝 井 當 而 年 是時 霊 令甫 坪 七 丘 月, 堡 及 **F** |應||州 河 大清兵西征 不 他 南 Щ 許。 屯 西 禍 堡多失陷 尤劇 巡 文詔 而 撫 文 吳甡 偕 插 詔 帝已 總督 漢, 以 薦 大清 允兵部 姓 張宗衡 還師 文 有 詔 兵亦 !思,竟 入大同 知 議,敕 兵善 先駐 旋。 取 道 文詔 戰, 境, 懷仁 + 太 攻拔 請 原, 馳 固 月 用之晉 字。 剿 論 爲 得 河南 罪, 性 勝 八 所 中。 堡, 文詔 月 賊 留 參將 圍 乃 、宗衡 甡 解 命 復 李全 卽 爲 抗 及 援 疏 移 一自經, 巡撫胡沾 剿 上駐鎭 力 總 爭 兵官 清請 城 逐 令 恩 挑 攻 光平 圍 立 並 戰 功 充 敗 懷

賊 擣 官 喜, 火 吾 顧 據險 滿 集 三兵至 贼 根 ,皆怖熠 卽 關 本。 Щ 巢,復從 中兵 以 賊 必先 撃賊 千 高 分 文 騎 以待將軍。」拊其背 命 加 韶夜半率從子參將變蛟、 走 Щ 隨州 逆戰,變蛟大呼陷陣,諸軍並進,賊敗走。 諸 計 漢中 陽 將 已 、鎭安、洵陽 殲 扼 ·', 而 文 要害, 而 詔 大軍 追 鳳陽 檄文詔 斬 由 告陷 馳入漢中,遏其奔軼。 賊三百八十有 潼關 而 遣之,文詔 入關, 入,反 遂 守備鼎 整兵 文詔 在 南, 奇。 躍馬去。 其後,乃令文詔 蛟、 乃馳 以八年 四月, 都 至 司 曰:「此 靈 五. 自 三月會總督 承疇 變蛟 月五 寶 [廣恩 謁 行 由 次 勇冠三軍,賊中聞大小 承 等敗 日 閿 也, 汝州 疇。 抵 鄉 商 賊深 道 洪 取 承疇 州 路 Щ 承疇於信陽。 以 林中, 回遠, 路 賊 賊去 以 至 盡 賊 維南、 入 追 將 城 在 關 至金 三十 軍 商 中 商 甚勞苦, 曹將軍 承疇 雒 • ·里,營 嶺 州 議 ]]] 聞 直 還 大

集。 分,無 戦死 於朝, |平安以下死者二十餘人。||承疇聞,拊膺大哭,帝亦痛悼,贈太子太保、左都督,賜祭葬,世廕 兵 指揮僉事,有司建祠,春秋致祭。 寧之湫頭鎭。 也。」賊喜,圍益急。文詔左右跳蕩,手擊殺數十人,轉鬭數里。力不支,拔刀自刎死。遊 水 賊不 可 秦州 未得 m 文詔聞之,瞋目大罵,亟詣承疇請行。 策應者。 知爲文詔也,有小卒縛急,大呼曰:「將軍救我」」賊中叛卒識之,惎賊曰:「此曹總 闖 間,衆且二十萬。 命。 王、八大王諸賊犯鳳翔,趨浒陽、 變蛟先登,斬首五 六月,官軍遇賊亂馬川。 將軍行,吾將由 承疇以文詔所部合張全昌、張外嘉軍止六千, 百,追三十里,文詔率步兵繼之。賊伏數萬騎 [涇陽趨淳化爲後勁。] 文詔乃以三千人自寧州 文韶忠勇冠時,稱明季良將第一。其死也,賊中爲相慶。 前鋒中軍劉弘烈被執,俄副將艾萬年、 隴州,文詔自漢中馳赴。 承疇喜曰:「非將軍不能滅此賊。 賊盡向 衆寡不 靜寧、泰安、 合圍,矢蝟 進,遇賊 柳國鎭 顧 ·敵,告急 畜 兵已 復 眞

弟文耀,從兄征討, 數有功。 河曲之戰,斬獲多。 後擊賊忻州,戰死城下。 韶予贈卹。

從子變蛟,自有傳

將 多 一勛 周 遇吉,錦州衞人。少有勇力,好射生。 戚 中官子弟,見遇吉質魯,意輕之。 遇吉曰:「公等皆紈袴子, 豈足當大敵。 後入行伍,戰輒先登,積功至京營遊擊。 何 示於 京營

無

時

練

膽

勇,爲異日用,而徒糜廩祿爲」同輩咸目笑之。

功追破 破 遇吉乃從元斌駐荆門,專護獻陵。 敗於興安,將走竹山、竹溪,遇吉復以嗣昌令至石花街、草店扼其要害,曰賊自是盡入蜀。 縣 從 胡 ,尉昌策其必窺渡鄖灘,遣遇吉扼守槐樹關,張一龍屯光化,賊逐不敢犯。 孫 崇禎 可受於淅川、降其全部。 應元等討賊河南,戰光山、固始,皆大捷。十一年班師,進秩受賚。 賊鳳陽。 九年,都城被兵。 已而旋師,敗他賊李青山於壽張,追至東平,殲滅幾盡,青山遂降。 從尙書張鳳翼數血戰有功,連進二秩,爲前鋒營副將。 楊嗣昌出師襄陽,遇吉從中官劉元斌往會。 明年與孫應元等大破羅汝才於豐邑坪。 明年秋,復 會張獻忠將至房 十二月,獻忠 又明年與黃得 出討 明年冬, 屢加太

扼 十七年正月, 其上 軍特精。 一流 五年冬,山西總兵官許定國有罪論死,以遇吉代之。至則汰老弱,繕甲仗, ,以下流蒲坂屬之巡撫蒸戀德, 明年十二月,李自成陷全陝,將犯山西。 遇吉令通防河。 會平陽守將陳尚智已遣使迎賊,諷通還鎭說降。 丽 請濟師於朝。 遇吉以沿河千餘里,賊處處可渡,分兵 朝廷遣副將熊通以二千人來赴。 遇吉叱之 練勇敢,

子少保、左都督。

曰:「吾受國厚恩,寧從爾叛逆!且爾統兵二千,不能殺賊,反作說客邪!」立斬之,傳首京 至二月七日,太原陷,懋德死之。 賊遂陷忻州,圍代州。

戰殺賊,不可勝計。 前隊死,後復繼。官軍力盡,城遂陷。遇吉巷戰,馬蹶,徒步跳蕩,手格殺數十人。身被矢 賊。」於是設伏城內,出弱卒誘賊入城,亟下閘殺數千人。 賊用礮攻城,圯復完者再,傷其四 據山巓公廨,登屋而射,每一矢斃一賊,賊不敢逼。 如蝟,竟爲賊執,大罵不屈。賊懸之高竿,叢射殺之,復臠其肉。城中士民感遇吉忠義,巷 圍轉急。 退保寧武。 遇吉先在代遏其北犯,乃憑城固守,而潛出兵奮擊。 自成懼,欲退。其將曰:「我衆百倍於彼,但用十攻一,番進,蔑不勝矣。」自成從之。 或請甘言給之,遇吉怒曰:「若輩何怯邪!今能勝,一軍皆忠義。即不支,縛我予 賊亦踵至,大呼五日不降者屠其城。遇吉四面發大礮,殺賊萬人,火藥且盡,外 其舍中兒,先從遇吉出鬭,死亡略盡。 縦火焚之,闔家盡 連數日,殺賊無算。 夫人劉氏素勇健,率婦女數十人 會食盡援絕,

歷大同、宣府抵居庸。 有 兵姜瓖降 重 兵。 自成集衆計曰:「寧武雖破,吾將士死傷多。 .表至, 倘盡 如 自成 寧武,吾部下寧有孑遺哉!不如還秦休息,圖後 大喜。方宴其使者,宣府總兵王承廕表 太監杜之秩、總兵唐通復開門延之,京師遂不守矣。 自此達京師、歷大同、陽和、宣府、居庸、皆 亦至,自成 舉。」刻期將 益喜。 遁,而大同總 遂決 贼每語人曰: 策長

遊擊。 斬首二級,中賞率得白金五十兩,歸奉母,曰:「兒以償酒也。」 由是隸經略爲親軍,累功至 年十二,母釀酒熟,竊飲至盡。母責之,笑曰:「償易耳。」時遼事急,得功持刀雜行伍 黃得功,號虎山,開原衛人,其先自合肥徙。 早孤,與母徐居。少負奇氣,膽略過人。 中,出

十三年從太監盧九德破賊於板石畈,賊革裏眼等五營降。十四年以總兵與王憲分護鳳陽、 於鮑家嶺,賊敗遁,追至潛山,擒斬賊將闖世王馬武、三鷂子王興國。 泗州陵,得功駐定遠。張獻忠攻桐城,挾營將廖應登至城下誘降。 間 號驍勇者也。 了最。八月又從擊賊馬光玉於淅川之<u>吳村、王家寨,大破之。詔加太子太師,署總兵銜</u>。 崇禎九年遷副總兵,分管京衞營。十一年以禁軍從總督熊文燦擊賊於舞陽,鏖光、固 得功箭傷面,愈自奮,與賊轉戰十餘日,所殺傷獨多。 得功與劉良佐合兵擊之 明年移鎮 三鷂子,獻忠養子,最 廬州

初,督輔史可法慮傑跋扈難制,故置得功儀眞,陰相牽制。 十七年封靖南伯。 福王立江南,進封侯。 旋命與劉良佐、劉澤清、高傑爲 適登萊總兵黃蜚將之任, 四 鎭

列傳第

百五

戰。 和 智 趸。 製而 楨 蜚 出 愚皆知 不 馬的 與 抶 意 報 得 可 方 以所殺 鬭 Ź, 法 傑 功 傑 命 時 同 人馬 馬舉鐵 監軍 傑 不 姓 亡多 傑 義 素 皆 潛 萬元 稱 忌 爲 糜。 鞭, 師 今將 兄 得 擣 恨 吉 弟 飛 功 儀眞, 復殺數十人, 和解 矢雨 軍 可 叉 移 以 法 疑圖 書 得功 之, 國 集。 令傑賞其馬 請 故 己, 不可。 兵備 捐 馬 兵 盛怒 、頗傷 跳 路, 乃 非 入 伏 常。 會得 騰 頹 う復出 精 而 而 他 垣 卒道 歸 所 得 功 騎 中 俱 功 曲 有 馳 千金為 , 中 於高 行 率 哮 母 邀 騎 喪, 三百百 聲 有 擊之。 三百 是將軍 如 驍 母 騎 可 騎 雷,追者不 赗 法 皆 由 舞槊直 得功 來 殁。 揚 收 得 弔 州 功 大 行 遂訴 , 往 前 不 名 語 敢 至 高 於天 得 之日 進, 得 土 於朝, 郵 E, 功 橋 迎之, 下 上二土 遂 大 聽之。 也。」 願 疾 方 呼 傑 與 作 馳 橋 反 得功 傑 至 之役 食 副 鬭 決 大 將 色稍 挾 軍 伏 胡 死 得 其

破 將 夢 1. 庚 妻子 明 以 於 年 淸 尚留 · |傑 銅 君 陵 側 欲 揚 解 爲 趨 州 名,至 其 何 南 童 得 功 九江 規 謀 命移家鎭 取 襲之。 病死。 中 原。 太平,一 軍 朝 詔得功 廷 中 急 立 其 遣 意 與 子 盧 辨 劉 夢庚 九 賊,論 良 德 佐 諭 守邳 命|得 功 止 加 徐 得功 左 功 趨 柱 遂 上 傑 國 移 江 死 鎭 禦 , 得 廬州 之, 功 駐 還 儀 餇 匹 荻 月 港 , |傑 左 家 良 幷

駕! 过 王 日 時 曰:「非卿無 清 陛 兵 下 死 已 守京 渡 可仗者。」得功泣 江 城, 知 臣 福 等 王 奔 猶 印 分 盡 曰:「願效死。」 兵襲 力, 奈 太平。 何 聽 得 奸 得功戰荻港時,傷臂幾墮 功 言, 方 收 倉 兵 卒 屯 至 燕 此 湖 ! 福 且 王 臣 潛 力 對 衣葛衣,以 其營。 敵, 安 能 得 扈 功

聞之,亦自經。 |叱曰:「汝乃降乎」忽飛矢至,中其喉偏左。 臂,佩刀坐小舟,督麾下八總兵結束前迎敵。 總兵翁之琪投江死,中軍田雄遂挾福王降。 得功知不可為,擲刀拾所拔箭刺 而劉良佐已先歸命,大呼岸上招降。 吭死。 得功

毎戦 黃闖子。 者少,即明白識認,亦不敢抗詞取禍矣。」時太子眞僞莫敢決,而得功忠憤不阿如此。 宮未必假冒,先帝子卽上子,未有了無證明,混然雷同者。 主逃將潰,無所一用其力,束手就殪,與國俱亡而已。 然忠義出 ,飲酒數斗,酒酣氣益厲。 得功粗猛不識文義。江南初立,王詔書指揮,多出羣小。 廬州、桐城、定遠皆爲立生祠。 始爲偏裨,隨大帥立功名,未嘗一當大敵。 天性,聞以國事相規誡者,輒屈己改不旋踵。北來太子之獄,得功抗疏爭曰:「東 喜持鐵鞭戰,鞭濱血沾手腕,以水濡之,久乃得脫,軍中 葬儀眞方山母墓側。 及專鎭封侯,不及一年餘而 其軍行紀律嚴,下無敢犯,所至人感 臣恐在廷諸臣, 諮徇者多, 得功得韶紙或對使罵裂之。 南北轉徙, 得功 抗顔 ·呼爲

者 忠勇最著,死 曹文詔 事 亦最烈,故別著於 等秉驍猛之資,所 篇。 向摧敗,皆所稱萬人敵也。 大命旣傾,良將顚蹶。

列傳第一百五十六 黄得功 校勘記

#### 校勘記

[一] 二月文詔追擊之斬混世王於碧霞村 二月,原作「六月」,置於「正月」與「三月」之間,當訛,據

級寇紀略卷一、懷陵流寇始終錄卷六改。又,混世王,懷陵流寇始終錄作「混天王」。

[二] 遇吉復以嗣昌令至石花街草店扼其要害 石花街,原作「化石街」,據明史稿傳一四五周遇吉

傳改。讀史方興紀要卷七九,穀城縣有石花街鎭。

# 明史卷二百六十九

## 列傳第一百五十七

**艾萬年** 李卑 湯九州 楊正芳 楊世恩 陳于王

程龍等

侯良柱 子天錫 張令 汪之鳳 猛如虎 劉光祚等 虎大威

孫應元

姜名武

王來聘等

鄧祖禹

尤世威

王世欽等

侯世祿 子拱極 劉國能 李萬慶

艾萬年,米脂人。 由武學生從軍、積功至神木參將。

Щ, 奇、守備孫守法伏兵含峪,渡河襲殺之。五年從參政樊一蘅討平不沾泥。 都司王世虎、守備姚進忠戰死。 崇禎四年從曹文韶復河曲。 點燈子入山西,萬年從文詔連敗之桑落鎭、花地窊、霧露 賊退屯石樓之康家山, 西距河三十里, 綏德知州 山西告警,隸文 周

列傳第一百五十七 艾萬年

詔 東討、 與李 卑一月奏五 捷,又與賀人龍敗八大王、掃地王兵。 明年, 賊將東遁, 連破之延

家山、亢義村、賈寨村,擢副總兵。

世王,獻俘京師, **贼蹂躪之慘,請錄萬年功。** 宴,殺之,幷殺通天柱於他所,而萬年 後見賊衰,相 初, Щ 西旣中賊, 繼 歸順,然陰結黨不散。 晉中巨盜略靖。 其土寇亦乘間起, 萬年適遘疾告歸,尋加署都督 豹五卽之臣也。 亦捕 巡撫戴 三關王剛、孝義通天柱、臨縣王之臣皆殘破城邑。 殺王豹五 君恩新視事,謀誅之。 與其黨領兵王,生擒 有議君恩殺降者,給事中張第元力言諸 1僉事 七年正月迎春,召王剛 翻 Щ 動 姬 關鎖

八年二月上疏言:

疇檄 撫剿 不 大小數十戰,精力盡 伏河曲,有馬鎭、虎頭巖、石臺山 極言 叉至 王 臣仗劍從戎七載,復府谷,解孤山圍,救清水、黃甫、木瓜十一 剛 、豹五 , 臣 不敢不力疾上道。 、領兵王、通天柱,解散賊一萬三千有奇。 耗。 與臣共事者李卑, 但念滅賊之法,不外剿撫,今剿撫俱未合機宜,臣不得 、西川之捷。 溘先朝露。 戰平陽、汾州、太原,復臨縣 臣病勢奄奄,猶力戰冀北。 蒙恩許臣養病, 營堡。 及蹏亭驛。日 轉戰高 mi 督臣洪承 Щ 叉

夫剿 成不息贼多,患贼走。 蓋疊嶂重巒,皆其淵藪,兵未至而賊先逃,所以難 滅,

察 措 其 前, 、故則兵寡也。 地 利,用正 多設兵,而 用奇、用伏用間、或擊首尾、或衝左右、有不卽時殄滅者、臣不信也 當事 已不可救 ,非不知兵寡,因糗糧不足,爲苟且計, 矣。 宜合計 賊衆多寡,用兵若干,餉若干,度其足用,然 日引月長, 以至於今, 雖多 後審

誅厥渠魁,宥其脅從,不傷仁,不損威,乃 賊衣食易盡,生 重 ·暮楚朝秦, 次 (則行 堅壁清野之法,困賊於死 傳食中土, 理一 絕,鳥驚鼠竄。 以剽掠爲生。 然後選精銳,據 地,然後 撫 誠
合
附
近
村 剿 良策。 可言撫。 要害以擊之; 或體陛 屯 移入城郭,儲精兵 蓋羣 **贼攜妻挈子,無城棚,無輜** 人火器 下好生之心, 以 待之,

帝深嘉之,下所司議行,然卒不能用其策也。

支,皆戰歿。 六月十四 衆 兵寡,咸自揣不敵,而勢不可止。 授 日至寧州之襄樂、遇賊大戰、斬首數百。 孤 山副總兵,戍平涼。 成功、錫命負重傷歸。 當是時,總督洪承疇迫六月滅賊之期,急進戰。 士卒死者千餘人。事聞,贈恤如制。 萬年及副將劉成功、柳國鎭,遊擊王錫命合兵三千,以 伏兵驟起,圍之數重。 萬年、國鎭力戰不 諸將見賊

李卑,字侍平,楡林 由千總擢守備。 天啓初,總督王象乾設薊鎭車營五,以卑爲都

列

司 僉 書, 統 西協 後車 營。 遷山海關遊擊,坐事罷 歸。

總兵賀 卑簡 崇 精 (虎臣 騎 時 禎 三百 羣 二年 盜 守延安,贼不敢 繿 陝 追 起, 擊 西 巡 兩 延安尤甚,卑連敗之富家灣、松樹屯。 撫 晝夜,行 劉 犯 廣生議討延 四 百里抵保安寧塞,連破之,共獲首功一千有奇。 慶回 賊 (三道進兵,命卑與遊擊伍維藩等由 四年,神一元陷保安, 旋 卑與寧夏 西路入。 起 延安

級。 遊 水 關 吳國 ,斬首六百二十餘 五 葬 年 擢 俊等斬賊魁三人於甘泉橋子溝,尋剿賊固原,斬其魁薛仁貴等三人。 孤 Щ 混 副 天猴陷宜君、鄜州, 總兵。 級。 譚雄陷安塞,據其城,卑與王承恩擊降雄,戮之,斬首五百三十餘 其 、地東限黃河,賊溺死者無算,科部卒斬混天猴以獻。 其夏攻合水。 卑及參將馬科追至甘泉山。 七月破 之延 卑及

許鼎 賊陽 遼 711 州 與楚兵敗賊蓮花坪、白溝坪,實授臨洮總兵官。 北 城之郎家山,又與艾萬年連敗之南獨泉土 臣檄卑、萬年合剿 時 聞官兵至,棄城 賊 陜 ,加都督僉事 西賊多流入山西。 走。 ", 數有 卑破之天 六年春,諸軍入城,多殺良民冒功,卑獨嚴戢其下 功。 詔 卑及賀人龍各率部卒千, 井關。 其冬,賊盡走河南,命卑援剿。 七月,臨洮總兵曹文詔改大同, 河村,復敗之苽塸村。 討賊湖廣, 賊多聚鄖、襄,總理盧象昇 隸總督張宗衡麾下。 七年春,敗賊 賊入濟源 命卑代署其 無所擾。 內鄉,馳至 會王自用陷 Щ 中, 事 已,敗 巡 協

方倚卑辦賊,六月卒於官。

**| 卑善持紀律,所至軍民安堵。** 爲人有器度,當倉猝,鎮靜如常。 贈右都督,賜

西。 級。 追賊闖天王等五華集, 剿,與左良玉 至商州返。 未幾,以河南剿賊 贼駐商、雒,謀再入山西。 湯 九州,石埭人。 已,復侵閿鄉。 等屢破賊 功,加署都督僉事 兵,賊悉渡河 崇禎時, 又敗之, 斬首六百四十餘級。 九州病、遣部將凌元機、胡良翰等搜山、悉敗歿。 左良玉迎擊於商南,九州遣部將趙柱、周爾敬逆之雒南。 爲昌平副總兵。 而南。 其冬,大敗過天星於吳城鎮, 六年夏,流賊大擾 七年擊賊嵩縣之潭頭,斬首三百二十 河北、畿南。 斬首四百二十級 九州尋赴援山 命 九州協 賊

恤、不報。 遇賊數萬, 夾擊,良玉半道歸。 令九州偕良玉扼之。尋移駐洛陽。 八年春,被劾褫官,從軍自效。 文瓊 據險攻圍。 後 亦 殉 九州以孤軍千二百人由嵩縣深入。 難。 九州勢不 ·敵,夜移營,爲賊所乘,遂戰歿。 九年二月,賊走登封石陽關,與伊 洪承疇入關,以吳村、瓦屋爲商南賊走內鄉 賊屢敗,窮追四 從孫文瓊伏闕三上書請 、嵩賊合。 十餘里,悞入深崖。 淅川 九州期良玉 要地

列

傳

第

百

Ŧ.

十

七

湯九

州

湖廣巡 都督同 蓮花坪、白溝坪、官田、石門山之捷。 阿分道進,皆大獲。 至十月,正芳督學兵千餘援雒南,戰敗,及部 贈太子少師、左都督,世廕指揮同知,再廕一子守備,賜祭葬,有司 時 一撫唐暉以獻陵、惠藩爲重,令正芳及總兵許成名專護荆州、承天。 知。 ,有楊正芳者,天啓間,以小梭從軍,屢剿貴州賊,積功至副總兵。 崇禎三年擊破定番叛苗。七年,賊陷當陽,正芳以鎭筸兵敗賊班鳩灘,復其城 陳奇瑜出師 鄖陽,正芳偕成名、 將張上選皆死焉, 鄧玘從竹山、竹溪、白 建 丽 正芳連奏金沙鋪 **敍桃紅壩功**,加署 一軍盡

溺死,餘潰走。 春,與秦翼明破劉 八年冬,敗賊孝感。 又有楊世 恩者,崇禎時,歷官湖廣副總兵。 世恩疾擊,斬鎮 國能於細石嶺,獲其魁新來虎。 九年春,祖寬大破賊滁 山虎等四十餘人。 七年春,敗賊竹溪。大雨,山水驟發,賊多漂 州 已,追賊石河口,連戰康家坪、蚋溪,功 賊陷隨州、責戴罪自贖 世恩從盧象昇馳至,復大破之。十年

世恩由 昌檄世恩及荆門守將羅安邦赴救 十二年冬,督師楊嗣昌令守宜城。 重陽坪已兩道深入,期至馬良坪合兵。汝才、登相圍之香油坪,嗣昌連發數道兵往 ,至洋坪猴兒洞, 道險甚, 會賊羅汝才、惠登相 嗣昌 分屯興山、遠安,夷陵告急。 再檄召還,而安邦 由 祚

援,皆以道遠不能進。 世恩等被困久、突圍走黃連坪、絕地無水, 士饑渴甚。 賊至, 兩軍盡

覆,世恩、安邦並死。

刀躍 將。 捕 獲海 代者至,飲于王酒暴卒。 入其舟,生擒一爵,殲其黨殆盡。 陳于王,字丹夷,吳縣人。世爲蘇州衞千戶。 盜 一功,遷都司僉書,守崇明 其子訴于王毒殺之,逮繫久不釋。 蛇山。 上官交薦,遂知名。 盗王一爵等亂海濱,于王率戰艦數十擊之<u>羊山</u>,持 旣襲職,兩舉武鄉試,授奇兵營守備。 天啓初,經略熊廷弼用爲標下參 以

却之。 守六合,守備蔣若來守江浦 入,拔其弟而出。 遂南還。 一邑賴以全。 崇禎二年,京師有警。 縋下角賊,矢著其頰,左臂傷,裹血還戰,賊乃退。 **外之,巡撫** 賊犯宿松,于王弟國計偕指揮包文達等以二千人往救。 張國維用為 巡撫曹文衡貰其罪,署前鋒遊擊,將兵勤王。 賊方圍江浦,若來急入與知縣李維樾固守。 中軍守備。 九年,賊入江北,圍廬州,陷和州。 六合無城,若來與于王掎角捍賊, 文達敗歿,于王驟馬 贼登城,若來拒 旣至,兵事已解, 國維遣于王

十年正月, 傳 第 賊分犯江浦、六合及安慶。 百 五. + 七 陳 于 X 國維造部將張載賡等援安慶,而以新募兵二千

執大刀,左右 擊,頗有殺傷。 西上。三月,贼犯太湖,副將潘可大將安慶兵九百,龍等三將將吳中兵三千六百,禦之酆家 雨,甲重不得出 命副將程龍及于王、若來分戍二邑。 要害,諸將不從,掘塹守二十四日。 賊先犯可大營,龍等至,夾擊之,賊多死。夜復至,中伏,亦敗去。 殺賊,傷重力竭,北面叩頭自刎死,閱十日面色如生。 可法偕副將許自强馳救,扼於賊,鳴大礮遙爲聲援,諸將亦呼譟突圍 明日日中,賊四面入,將士短兵接戰。 已而賊不至,國維議赴安慶,城太湖,乃提龍等三將兵 羅汝才、劉國能等七營數萬衆齊至,圍 可大戰死,龍引火自焚死。 若來服圉 監軍史可法欲退扼 人衣 .數重。 以 于王 諸將突 會天

千戶 王定遠皆力戰死。[三]百戶王弘猷為賊所執,鋸齒斷足,罵不絕聲死。 事聞,贈于王昭勇將軍、指揮使,世廕副千戶。 同死者, 武舉詹兆鵬首觸石死。 陸王猷殺賊過當,賊臠分其 餘贈廕有差。 肉死。 莫是驊、唐世 士卒脫者僅千餘 龍 及

與參議趙邦清招降奢寅黨 侯良柱,字朝石,永寧衛人。 安變。 六年五月代李維新爲四川總兵官, 天啓初,累官四 川副總兵。 討奢崇明父子,復遵義 鎭永寧。 時崇明敗奔 城。 叉

水西,與安邦彥合,貴州兵數討不克。

名 還 水寧 ,賊追 年, 之銳 總督朱燮元遣 甚。 良柱 偕 貴州總兵許成 監 軍 副 使 劉 可 名 訓 復 出 赤水 戰 小 衞, 却 崇明 成名 八邦彦 等來援, 以十 賊 餘 萬 乃 衆 據 五. 來 峯 爭 山 成 桃

出。 紅 壩 城 奔 越 鵝 數 項嶺 日 良柱 · )徑長 乘 而 賊 陿,人馬不能容。 不 備 與 副 將鄧 玘 良柱、玘 等侵早霧迫 軍至,賊 艺, 復 賊大潰, 大敗,死 成名 者 ·數萬 聞 Ш 人。 Ŀ 呼 崇明 噪聲 邦 亦

彦

與

邦彦

黨

偽都督 莫德 並

一授首

,俘其黨楊作等數

千人。

積

年巨寇平,

時

稱西

南南

奇

羽健 等, 世 與 猶 底 相 未 咸云 錦 皆 許 死。 匹 訟 衣 奏 111 邦彦 ()解職 指 良柱 變元 巡 撫 揮僉事,成名等亦優敍。 卽時授首 信之, 張 候 口 論 勘 訓 上其 功,詆燮元。 奏於 久之,御史劉宗祥 八功不 灼然非黔兵力。」帝即 朝。 及黔將。 兵部不 變元疏辯 未幾,復 能決, 成名等怒,言邦彦、德乃己部將 列 上 且 賞 爲 功 求 命獻 久 四川 狀。 去,賞遂格 不行。 俘 總 七年八月, 告廟,傳首 兵官 御史孫徵蘭言:「訊 不行。 始錄前 九邊。 良柱怨變元 趙 功, ]][ 國 中 進良柱 璽 俘囚 撫按 所 不爲 斬, 阳 及御 凝 左都督, 且 用 楊作 史毛 崇明

奇。 廣元 一, 地 明年 八 盡召諸 年 鳴者 冬,贼 夏 ,總督洪承疇 地 一,占主兵。 犯漢 兵九千有奇, 中,瑞王 大舉討 賊果 分 遣 防 入犯 使乞師。 賊, 扼險,止餘二千人。 陷 令良柱 南江、通江。 良柱 扼 督兵援,與 賊 入 )|| 帝切責良柱及巡 賊知其勢弱,五 路。 他將同 戰 鳳 縣 却 三江 賊。 月復 撫 口,斬首三百 + 王維章 年 寇川 四月 北 ) |]] 時 維章 七十 良 中 柱 地 ·有 駐 震

列

傅

第

百

五

+

七

侯

良

柱

柱死 李自 直 急 逼 於 成 成 朝 都,維章 獄 過 成 會 一天星 ,維章遣戍,追奪良柱 賊 轉掠 方守保寧,反在外,連失三十餘州 、混天星等陷寧芜,分三道入寇。 他 所 ,良柱乃撤還守隘兵,專守廣元。 縣。 良柱急 帝大怒, 拒 維章以爲 一戦於 命逮二人下 綿 州 非 計 衆 寡 上章言之。 詔 不 敵, 獄 猶 |車 未 ۲ 十月, 知 良 贼

昌言天錫所將親丁二百六十人及召募精卒五六百人皆剽悍敢戰。帝 將,自當 十三年,良柱子指揮天錫伏闕言:「臣與賊不共戴天。 隊,與賊血戰 ,下雪父恥,上報國恩。」帝深嘉之,命授遊 願捐貲繕甲,選募勁 學,赴 益嘉之,再 嗣 昌 軍 增 旅 立 及臣 功。已 秩。 父舊 嗣

夷其先 討 其 志。 類有 張令,永寧宣撫司人。 崇明 墓 功, 敗歸永寧、令結宋武 加副總兵,仍 巡撫 朱燮元言令等爲國忘家,請優 視參將事 天啓元年,奢崇明反, 等乘間 ,後實授建武遊擊。 擒 其偽 丞 擢示勸, 相 令為偽總兵,從攻成都。 何若 海,率衆 命 與武並授參將。 以降。 崇明怒,殺令一 令雖爲財用,非 後屢從大軍征

武聲華爲左右翼,拒之員山。 崇禎中,屢遷副 總兵,鎭川北。 今追至龍潭,一龍等不至,面中三矢,斬賊百餘級而還。 七年,流賊入犯,總兵張爾奇以令爲先鋒,副將陳 賊犯

略陽, 中,乃轉寇夔州。十三年二月大敗瑪瑙山,走岔溪、千江河,今復與副將方國安大破之。冷 縣,總兵侯良柱陣亡,令獲免。楊嗣昌之督師也,張獻忠等悉奔興安,爲令所扼,不得入漢 令又擊敗之,扼保寧、漢中諸要害、秦賊不敢犯。十年冬,李自成等陷四川三十餘州

時年七十餘,馬上用五石弩,中必洞胸,軍中號「神弩將」。

相持十三日,所殺傷過當,其卒僅五千耳。 將、奈何棄之」、急令參將張應元、汪之鳳從八台山進,總兵賀人龍從滿月嘈進。三月八日, 應元等先至。令方與賊鬭,呼聲動山谷。應元等應之,內外夾擊,賊乃敗去。 **贼衆官軍寡,國安爲後拒,他道逸去。 令獨深入,被圍,居絕阪中,屢射賊營,應弦斃者甚** 水遠士渴,賴天雨以濟,圍終不解。襄陽監軍僉事張克儉言於總督鄭崇儉曰:「張令健 獻忠轉入柯家坪,其地亂峯錯峙,箐深道險。令率衆追及之,分其下爲五,鼓勇爭利。 令與賊萬餘

竹箘坪,防賊逸。 時巡撫邵捷春駐重慶,遣守黃泥窪,倚令及秦良玉爲左右手。 九月,獻忠兵大至。冷力戰,中矢死,軍遂敗。 後捷春移大昌,以令守

臥,血凝臆 應元力戰。 之鳳旣解柯家坪圍,後與應元同守夔州之土地嶺,部卒多新募。 而死。 賊分兵從後山下,突入其營。應元突圍出。 踰月,令亦戰死。 軍中失二將,爲奪氣。 之鳳走他道觅, 獻忠盡銳來攻,之鳳、 山行道渴,飲斗水

列

猛如虎,本塞外降人,家榆林,積功至遊擊

賊流 郭 詔 追 以巡 大 贼 破 崇禎 入畿南,山西警漸息,如虎 四偃、碧霞村,斬混世王。四與 撫 賊 許 范村。 五 4年撃那. .鼎臣 命,由文水入山剿賊。 國威以步卒三百夜劫 紅 狼 於高平,解 仍 熱鼎臣。 其圍。 頗希牧逐賊壽陽 賊紅 又與大威 明年敗 七年剿 川 領, 賊壽陽黑山,覆姬 贼 應韶、杰由 如虎、杰及虎大威、 沁源,馘 東, 又與陳 皇落山 五. 國威 條 龍 關 剿東犯之賊。 、馬杰破來遠寨。 鎖 和應詔擊殺九 軍。 從曹文詔 並 有 條 從文

計。 賊,勞績甚著。 其 年 冬, Щ 如 虎 西 賊在河 賊 驍果善戰, 盡 平,用 十一年冬,京師有警, 南, 欲乘冰 甡 與虎 薦 加副總兵。 大威 北渡,如虎、大威 齊名。 其冬以 如虎督兵 戴君思、 防河 扼之河濱。 、勤王。 吳甡 功, 相繼爲 加署都督僉事。 明年 八年二月與大威 四 巡撫,並 月擢 薊 委任 鎭 連歲 中協 之。 國威 防河 總兵官 以功進 及援 斬 劇 剿 賊 高 泂 加

將 大饗將士於 屯要害 十三年坐事落職, 保 面 元吉自間道走 寧。 以諸 發邊方立功。 軍 進止 射洪,扼蓬溪以待 不 擢 督師楊 如虎 爲 嗣 賊 正 昌請 總 統, 賊方屯安岳界,偵官軍且至,宵 於 朝, 張 應元 令從入蜀。 副之, 率軍 十一月,監軍 趨綿 州。 遁,抵內 萬元吉 分 遣諸

列傳第一百五十七 猛如虎

南

蹙 江 可 賊 面 得 北 阻 如 夜 虎 竄 江 宿 簡 永 惟 西 驍騎 ]][ 關 立 空舍。 石 逆 追 站 而 之。 擊之, 口 及 北 元 走。 抵 古 立 可 元 盡 應 石 殄。 吉 元 賊 營 以 已先 安 永 賊 Ш 居 压 渡 知 絕 城 南 縣 地 下 溪 已 , 將 以 返走。 先遁 遭 扼 大 其 城 兵 歸 關 南 中 路 中 擣 止 ·將賀 十 二 其 丞 老 簿 人 月 巢 龍 \_\_\_\_ 軍 張 而 人。 隔 伏 獻 水 忠 兵 如 不 旁 陷 虎 擊 塞 瀘 ٠, 覓嚮導不 玉 州 賊 蟾寺, 遂 其 地 越

成

都

走

漢

Ш

、德陽

,

渡

綿

河

入

巴州

謠 將劉 路 開 自 卒 登 逐 如 從 高 悉 賊,今始及之。 巴 日 空 嗣 州 望官軍 士 明 虎 杰 年正 示 昌 至 想 子先捷 開 殺 勇敢 下 可 縣 ٠, 我 月 荆 復 見 思立 ) 官 州 左 遏。 並 無 嗣 鎭 舍 軍 戰 後 昌 功。 及 繼,密 追之, 弗 跑 死。 如 親 嗣 虎 擊 殺 統 諸 昌 ·, 我 我猛 如 所 舟 遇諸 抽 軍 死 將 虎 師 從良玉, 壯 不 鎭。」 淧 率 止六百 下 騎 能 黄 所 親 雲陽 潛 也。 陵 時 部 兵 城 行 力戦 賀 騎 扼 , 多 等谷 執 德安 檄諸 人 優 戈 日 餘皆 韶 閒 先 中 晡 部 將 黄州 兵 不 酮 左 將 已大 陸 乘 如 戰。 作,諸 良 挾 追 高 虎 玉 上 贼, 課 激 大 改 會组 馬 部 諸 呼 將 四 隸 諸 兵 馳 軍 疲 歸 如 潰 發背,不 軍 乏,請 繼 下 驕 虎 韋 所 乃 o 之。 悍 出 盡躡 恃 颭 良 不 詰 ·能戰 止 逐 玉 士 旗 口 朝 賊 如 杰 兵 Щ 制 纛 戰 後。 虎 谷 先潰 所 , 軍 退屯 當 風 所 符 元 賊 雪 過 盡 吉 軱 杰 士 承天 折 中 肆 失 杰 摧 奮 深 而 焚掠 憂之。 及 陷 目 東 咸 尋 遊 乃 返 怨 移 擊 匹 惟 收 獻 駐 郭 忠 賊 殏 旬 歸

已而 爲賊揕死。 城破,如虎持短兵巷戰,大呼衝擊,血盈袍袖。 十一月,李自成覆傅宗龍兵,乘勢來攻。 光祚及分守參議艾毓初、南陽知縣姚運熙並死之,唐王亦遇害。 如虎與劉光祚憑城固守,用計殺賊精卒數千。 過唐府門,北面 叩頭謝上恩,自稱力竭

| **祚分三道擊,大敗之,斬隔溝飛、撲天虎等六人,獲首功三百七十。又數敗賊於臨縣、永寧。** 撲天飛等詐降,光祚設伏斬之。 犯之,軍盡覆,光祚僅以身免。被徵,未行,偕諸將復臨縣,詔除其罪。 王,與何可綱等戰灤州有功,遷汾州參將。五年與遊擊王尚義敗賊張有義於臨縣。 之,命率兵援剿河南 其黨劉浩然、高加計 加署都督僉事,爲山西副總兵。 光祚,字鴻基,楡林衞人。初爲諸生,棄去。承祖廕,歷官延綏游擊。 破滅,偽乞降。 已,擊敗賊魏家灣、黑茶山。 光祚伏兵斬之。晉中羣盜皆盡,乃移光祚於宣府。 敗城崞縣,復其城。 八年,賊渠賀宗漢號活地草者,見 七年剿敗王剛餘黨,斬四百餘 六年, 賊犯石樓, 光 崇禎三年奉詔勤 賊還兵

兵還至渾河,值水漲,輜重難渡, 鎭。 大清兵薄保定,以光祚堅守,不攻而去。光祚尋從總督孫傳庭南下。 十一年連敗賊白果園、襄城。 諸將王樸、曹變蛟等相顧不敢擊,光祚恇怯尤甚。 已,擢保定總兵官,仍協討河南賊。其冬,畿輔有警 明年二月,大清 視師大 了馳還

怒 學 龍 士劉 宇亮 宇亮劾之, 論 光祚 詔 死 刨 + 軍 四 前 年,大 IE. 法。 學士范復粹 光祚 適 報 武 錄囚,力言光祚 清 捷 宇亮乃繫之武 才武, 命充為 清 獄 , 事官 TO 拜 「戴罪 疏請:

光祚舉廢將尤翟文等,帝亦從之。

祚 雖 當是· 少有克捷,而 時,城 已陷 贼 河南 勢轉盛。 、襄陽,中 及傅宗龍敗殁於項城 原 郡 縣 大 抵 殘 破。 南陽震恐。 光祚 上 馬 無幾, 光祚 督 適 師 經 丁啓容 其 地, 唐王 尤怯 邀 與

共

城陷遂死。

平陽 梃 渡 約 連 總 突 勝 711 兵 陣, 一萬餘。 之。 尤 虎 大威 世 高 七 大 滁 年,巡撫吳甡 加 明 威 鼎臣 年 榆 熞 計據岢嵐 射 從 E 林 殺 巡撫 嘉 令曹文 之,追斬 胤 許鼎 於 至,察諸 本塞外降卒,勇敢嫺將略,從 四 詔 河 出 自黎城 曲 臣 其衆五 剽 撃賊 力戰被傷。 掠。 將 中 介休 入, 百 明 惟 大威 年三月, 大威 殲其 餘黨悉平。 Ħ. 猛 如 魁 年 二將 如 虎沈毅 從 九 虎 總 條 諸 追至忻 前。 督張宗衡 軍 **咝薦二人忠勇**, 將 有 用 屬 自皐落 功, 時 代 贼 兵事,委任 累官山 去 剿 Щ Щ Щ 城 中 入, 西 臨 西参 遁 ]][ 進大威 之。 城屢 加 、潞安、陽 據 計 )將。崇禎三年 輝林、 其 馬 敗 、冬與 副 上 尋移 總 舞 武陟 城 兵。 如 三十 虎 大威守 沁水, ·冬,從 Щ 扼 其 觔 冬 長 賊

列

傳

第

百

II.

+

Ł

彪

大

戍

以扼賊功,加署都督僉事。

章請 劉 大將, 同 疏言諸將討 總 字亮、總督孫傳庭皆言大威、國柱 罪。 兵王樸 九 大威 年八月 帝不從,卒解其任。 以稱職 入衞 城,零級 畿 輔 增秩。 尋從象昇轉戰至鉅 不可 被 近兵, 率. 取 其年冬, , 師 生口 尋令從軍辦 入援。 京師 不可貪, 敢 明年 鹿 勇,身入 戒嚴。 賈莊,被圍數匝,象昇死焉,大威等潰 賊。 春 封域不 一,命援剿陝 重圍 命總督盧象昇統 可限。 , 視他將異, 西 帝採 賊,遂代王 納之。 大威及宣府總兵楊 乞令立功自贖。 忠爲 十 一 年詔 Щ 西 重 總兵官 兵部甄別諸 出。 大威 或 性、大 亦上 督 師 上

破之, 威 復 岳 戰,秦帥 之,斬首千 賊已解圍 及馮 援之, 重 開封。 又與監軍 几 大棟、張鵬翼等合擊,賊大敗。 賀 賊引去。 去 年正月, 餘 人龍軍 七月朔, 乃會 級。 道 先潰, 河南 陜 明年 任 李自成 西總督傅宗龍 棟 啓睿、文岳、大威及良玉、楊德政、 巡撫李 二月, 挫賊平峪。 大威軍亦潰, 圍 開封。 師次郾 仙風 於偃師 出 七月, 總督楊文岳遣大威及副將張德昌先率五千人渡 關討 城。 相 遂奔沈丘。 持十一 督 自成及張獻忠、 賊,文岳、大威會之。 以 師丁啓睿、 兵 晝夜,俘斬數千。 少 未敢擊賊。 賊連陷 方國安之師畢會。 總兵左良 河南 羅汝才 待文岳 鄧、許、再圍 九月次新蔡,抵孟 玉方與 攻鄧州, 賊 遂東陷 軍至,與賊戰鳴阜,大 賊鏖戰, 開 大威從文岳 啓睿欲急擊, 陳州 封。 歸德,已, 文岳 家 大威從 莊 河。 督大 擊破 文 良 將 會

玉 不從, 先走, 大威諸 軍 亦走。 帝大怒,立誅德政, 黜譴啓睿諸人。 大威時奔汝寧,出 攻贼

寨, 님 酸 死, 乃発其罪。

數十戰,卒死王事,論者賢之。 大威為! 偏 裨, 最有 聲。 及爲大帥,值賊勢益張,所將止數千人,不能大有所挫。 然身經

光山 軍 元、得功 馬監,專牧馬。 固始。 崇禎九年秋,從 孫應元,不知何許人。 行 肅 慷 然。 慨請 四 十二月大破賊鄭州,再破之密縣,先後斬首千七百。 日三捷,斬首二千九百有奇,賊乃謀犯江北。元斌、九德南趨潁 莊 行。 烈 張鳳翼 帝 帝壯之。 銳 軍畿輔,有功, 意修武備,簡 歷官京營參將,督勇衛營。 發卒萬人, 應元及黃得功、周遇吉等訓 進副 監以中官劉元斌、盧九 總兵。 再以功增秩一等。 勇衞營卽騰驤、武驤四衞也,其先隸 德, 明年正月大破 練、遂成 戒毋 明 擾民。 年,河 勁 洲,護 旅 南 之舞陽、 諸 鳳陵, 敗熾,

亦不遽叛,文燦以此擅撫賊功。

已而

京師有警,召應元等還,賊逐無所忌。

熊文燦方主撫不戰。

而

賊憚應元等,多降,降者

帝初聞禁軍屢

密遣

應元、得功督騎兵扼賊前。

自南

而北,破之方家集。

贼逐由固始走商城。

錄 功,

加 都

督僉事。

已,復

破之新野,又大破之遂平。

命

應

御

破 賊,大喜,累加 應元都督同知,賜銀幣蟒服,至是論功,遂進左都督, 加銜總兵官, 世廕錦

衣副千戶。

南 吉 南 八月至小黄河口,參將馬文豸等力戰, 約未定。 變、胡可受。 可變、可受罪,授以官,報先後首功三千人。 ,得功率副將林報國戰其北,河南兵又扼華陽關,賊遂大敗,光玉遁免。 駐馬受之。 陽 二年五月,張獻忠、羅汝才復叛,仍命元斌、九德監應元、得功軍南征。 會馬光玉屯淅川之吳村,爲乞撫,規渡漢江應獻忠。 應元、得功趨內鄉掩其背,令副將周遇吉等分道別擊之。文燦所遣陳洪範亦至。 可變卽賊改世王,可受則安世王也。 應元、得功遂進兵王家寨。賊分屯南北兩山,用木石塞道。 可受敗,呼曰:「始與許王約降者我也, 可變夜至,處之東關。 淅川 知縣郭守邦說降其黨許可 可受爲光玉 應元率文多戰其 元斌至軍,檄除 今歸命。」週 應元等馳至 所持,

綸 監軍僉事孔貞會等大破羅汝才於豐邑坪,斬首二千三百,生擒五百有奇。 及楊嗣昌督師襄陽, 應元善戰,在行間多與黃得功偕。 時稱荆楚第一 功。 令元斌、應元戍荆門,護獻陵。十三年七月與副將王允成、王之 十五年春,擊賊羅山,力戰。 應元死,得功勳益顯,故其名尤震於世。 孤軍無援,遂陣歿。 贈卹 混世王、小秦 如制。

姜名武,字我揚,保德州 人。 舉天啓二年武會試,授大同 威遠守備

右 衞 崇禎 擢通州 初, 副 遷大水 總兵。 峪遊擊。 護諸 陵 有功,以故官典保定總督楊文岳中軍,兼忠勇營團 築杏山 城 有 功, 遷宣府西城參將,擊斬大盜 王科。 練 移守宣府 事

左 進 都 人榮禄 軍 夕. ′, 其軍 堅壁 督 ,世襲錦衣百戶。 大夫、右都督, 廕外衞世襲總旗。 五. 不 年,李自成圍開封急,名武 大 動。 課,突諸營, 侵晨, 賊 疏 大至,督麾下血戰。 諸營驚潰。 上,踰月而都城陷,不果行。 從文岳往援。 其軍遂乘亂掠諸營馬贏以去,於是諸營悉奔, 其子援王來聘、甄奇傑例,乃議贈特進光祿大夫、 殺數百人,力竭被執,大罵,爲賊 時諸 軍 壁朱仙鎭者十餘萬,左良 、磔死。 玉 獨 最 名武 贈特 强。

效命 卽 彦琦 等覆閱,取百 授 疆 副總兵。 二人,而彥琦不與選。 來聘,京師人。 場爾,不捐軀 人,視文榜例,分三甲傳臚錫宴,以前三十卷進呈,欽定一甲三人,來聘居首, 武榜有狀元,自來聘始也。 崇禎四年,中武會試。時帝銳意重武,舉子運百斤大刀者止來聘及徐 殺賊,何以 帝下考官及監試御史獄,悉貶兵部郎二十二人。 報上恩」明年,孔有德據登州叛,官軍攻之久不下。 來聘旣拜命, 泫然流涕曰: 「上重武若此, 欲吾儕 遣詞臣倪 叉明年 元璐

二月 有 加 以 奇 火 藥 傑亦官 趣 城 副 城 總兵, 壞 將 隸楊文 士 踴入,輒爲賊擊退。 岳 麾下 ,從擊賊 河 南 來聘復先登,中傷 戦 死 而 死。 天 子惜 之,贈廕

黄州 之赦 言之再三,復罵曰:「若此,須換却 入城 擢 夜 半 涿 復 出 州 先是,又 **参**將。 為辰 甦,創 攻賊 賊 大 至,圍數 上 沅 有 甚 一壁山, 疏請召 參將, 告歸。 鄧 祖 重。 禹 盡 對,不許。 擒苗會飛天王、張五 崇禎 者 施所 一、蘄水 祖 初, 禹突圍保西 獲爲已有。 起宣府 人,舉萬 入朝 心肝。」 Ê 遊擊, 曆四十七 城外,賊 當事 書, 賊笑曰:「換不難 保 聲 將劾之, 斬首千 谌 衛京 復 年武 属, 圍 師。 之, 爲 請 會試 五 御史所糾下 軍 百 剿 副將 ,授瀋陽 敗被 寇 級,夷其 遂剖心剜肝而 自 申甫 執 贖。 軍 守備。 巢。 獄 賊 乃 歿, , 令 說 然 擢 祖 降,怒罵 援 嘗出 死。 帝 副 應城, 禹 頗 總 力戰 戰, 採 兵,轄德安、 將 其言 不 盧溝 中 屈 七百人 · 矢死 賊

鎭 守 牆子路。七 防護諸陵。 崇禎 世 威,榆林衞人。與兄世功、弟世祿 二年 年遷 擢總兵官, 四年代宋偉爲山海總兵官,積資至左都督。 Щ 海中 部副 鎭守居 總兵。 庸、昌平。 寧遠告警,從大 並 其冬,京 勇敢知名。 八帥滿桂 師 戒嚴, 天啓中,世威積官建昌營參將,調 赴援,力戰 七年命偕寧遠總兵官吳襄馳援 命提 兵五 城 千防順 東 有 功,增秩受賜 俄 命還

宣府。 坐擁 兵不 進,褫 職 論成。 未行, 會流賊躪河南,詔世威充爲事 官 與副將張外嘉統 關

門鐵騎五千往剿。

象昇 惜。」乃命赴象 基 Щ 뢺 氏 討 信 、羅岱 Щ 陽 功 大課。 賊 中 明 大會 避 命 ·, 以 年 **俱負重傷,軍大潰。** 之而 世: 世 正 賊至 諸 扼 威 威 月 維 將, 南 趨 昇軍 善無 一,來朝 南 賊陷 汝州 復 令分防汝、雒 蘭 自效。 士卒,曉軍機,徒以數千客旅久戍荒山,疾作失利。 草 由 鳳 逃,一軍盡歿。 陽。 藍 川、朱陽 前二日 田 及象昇戰歿,自発歸 走盧氏。 世威以二千五 **贼遂越盧氏**,走永寧。 諸 承疇亦 關之險。 要害。 世威 扼 至。 於世威,仍入商、雒 以 戒之曰 百騎赴之, 軍暴露人, 世: 時賊 威部下皆勁 :「靈、陜,賊所 見河南 事聞 大疫, 抵亳州 兵盛 旅 命解任 與賊 Щ 令與 出 中。 悉奔 會總督洪承疇出關討 戦 入, 一候勘。 參將徐來朝 失利。 入關 來朝 汝勿懈 今當用兵時, 所部三千人不肯 中 十年, 世威 承 分駐永寧、 宣大 及遊 **疇**將 及承疇旣 總督 擊劉 棄之可 入關 贼, 盧 盧 征 次 入

單弱 西安 王 世 國 ,傳檄極 五 、侯世祿 心 年以廷 洶 林招 洶 、侯拱極 臣薦, 降。 布政 使都任 總兵官王定懼, 命與弟世祿赴京候調。 王 學書、故延綏總兵李昌齡議城守。 (宝) 亟: 集副 率所部精兵棄城走。 將惠顯 召對中左門,復告歸。 、參將劉廷傑等與 時巡撫張鳳翼未至, 衆推世威爲主帥 里 居 將 明年十月,李自成陷 帥世威 。無何,賊十 及王世欽 城中士馬

六九二五

列

傳

其父 可平 萬 衆 陷延安 也。」衆然其言,乃歃血誓師,簡卒乘,繕甲仗,各出私財佐軍。 见 III 驅之戰,必非所願。楡林天下勁兵,一戰奪其氣,然後約寧夏、固原爲三師 ,下綏德,復遣 使說降。 廷傑大呼曰:「長安雖破,三邊如故。 守具未備 賊皆中州子弟,殺 ,賊已抵城下。 迭進,賊

世禄 衆來 毋近前, 行將軍衣」自成怒, 皆殺之。時顯亦被執, 大罵賊。賊惜其勇, 繫至神木, 服毒死。 協令 天下,取封侯,可乎。」衆罵曰:「汝驛卒,敢大言侮我」」自成笑,前解其縛,世欽唾曰:「驛卒 並 攻,起飛樓逼城中,矢石交至,世威等戰益厲。 被執,縛至西安。 父子及學書俱不屈死。 廷 傑募死士,乞師套部。 世威等猶督衆巷戰,婦人豎子亦發屋瓦擊賊,賊屍相枕藉。 自成坐秦王府欲降之,四人不屈膝。 賊怒|延傑勾[套部,磔之,至死罵不絕口。 師 將至,賊分兵却之,攻城甚力。 守七晝夜,賊乃穴城,置大礮轟之,城 自成曰:「諸公皆名將,助我平 官軍力戰,殺賊無算。 既而力不支,任死之,候 世威、世欽、世國、昌 賊 益

由 有 柳溝總兵官罷歸。 功,卽謝歸。十六年召對中左門,未及用而歸,遂死於賊。世國,威弟,保定總兵官繼子, 王 世欽,大將威子,歷山海左部總兵官,謝病去。崇禎八年,洪承疇起之家,擊李自成 甫數日,竟拒敗以死

世威弟世祿,爲寧夏總兵官,累著戰功,至是與世威同死。 世威從弟翟文為靖邊營副

將。 嘗從洪承疇敗闖賊於鳳翔之官亭,斬首七百餘級。 至是, 率敢死士出南門奮擊,殺傷

甚衆,中矢死。

陷自殺。

又有尤岱者,由步卒起家,至山海鐵騎營參將,數有功。 忤上官,棄職歸,守水西門,城

廷傑旣死,其父副使彝鼎聞之不哭,曰:「吾有子矣。」其弟廷夔收兄屍,亦自投閣死。

昌齡,字玉 Ш ,鎭番衞 人。 爲延綏總兵官,數有功,以剛直罷,徙居楡林。 贼至,或勸之

去,昌齡曰:「贼至而遁,非勇也。 見難而避,非義也。」起偕世威等同守城,卒同死

敢精悍,為經略熊廷弱所 侯世祿,榆林人。 由世職累官涼州副總兵。 知。 及袁應泰代廷弼,亦倚任之。 遼事亟,詔擢總兵官,提兵赴援。 世祿勇

天啓元年,應泰議復撫順、清河。 以世祿及姜爾、梁仲善各將兵一萬駐淸河。 未行,遼

陽破 官。 六年以軍政拾遺罷。 ,仲善陣亡, 世祿、爾 **俱負重傷,潰圍出。** 明年,寧、錦告警,命率家丁赴關聽調。 世祿以傷重,命立功自效。 旋命出守前屯,甫至, 尋用爲 固原總兵 令

以故官鎭山海。

免戍 奔還鎭。 崇禎 ,還籍。 事 元 聞 年移鎭宣府。 廷臣 當重 多推薦,卒不復用。 坐,以勤王先至,滅死戍邊。 明年冬,京師戒嚴,率師入衞。 十六年,李自成圍榆林,世祿與子拱極固守新 九年八月,京師被兵。 兵再潰,世祿被創。 率子弟從軍,敍功 部卒剽民間, 添門。

城陷,父子被執,俱不屈死。

以廷臣薦,應韶入都,與王洪、王世欽、尤世威召對中左門,未用遣歸。 拱極歷官參將,常從總兵尤世祿破賊河曲有功。 九年冬,任山海總兵官,尋謝病歸。後 卒與父同死。

劉 國能,延安人。始與李自成、張獻忠輩同爲盜,自號闖塌天。

瑜所蹙。 鄉、淅川犯湖廣鄖、襄、破數縣。 崇禎 走漢南,同困車箱峽。 三年大亂陝西。已,渡河 已得出,復大亂陝西,再入河南,躪江北。 明年正月入四川,陷夔州。 而 東,寇山西,轉掠畿南、河北。 折而東,入鄖陽境,爲總督陳奇 六年冬,入河南,遂由內 官軍逼之,與整

尋南走荆、襄,與總兵秦翼明數戰。 其冬,與蝎子塊等十七營窺潼關,巡撫孫傳庭扼之,引

九年復偕闖王、蝎子塊等由鄖、襄趨興安、漢中,總督洪承疇奔命

不暇。

齊王屯商

維山間

黄陂 而 南。 入木蘭 明年聞馬光玉等將犯蘄、黃、率衆會之,直趨江北。 Щ ( 轉寇) 河南 ,敗參將李春貴兵,將迫開封。 詔 官軍數道邀擊,乃不 諸將發兵援, 乃南走黃、麻 ·敢東。 還走

官, 萬 固。 撫 日 有 慶。 「愚民陷不 之,署爲守備,令隸良玉軍。 隙 逐並守鄖陽。 錄其部下將士,曰:「獻忠能立功,視此。」遂授國能 當 獨 慮爲 是時 或 或 能 能 所 從軍 分擊, 總理 纤 義 征 且十載,賴 旣而 後又與 熊文燦新 賊潰奔,遂招萬慶降。 剿,數有 李自成擾河南,復移守葉縣。 左良玉 至, 功。 公湔洗更生。 國能受約束,無異志。 賊憚之。 戰敗,乃以十一 明年二月從良玉勤王。 見其下招降令, 其秋,獻忠、 願 悉衆入軍籍,身隸麾下盡死力。」 年正月 已而張獻忠、羅汝才亦 汝才並反。 副總兵。 四 有詔,還討賊,獎勵之。 頗有欲歸正者。 日 來先就 四月,良玉會師 文燦遺國能 撫於 、隨州, 國能 降, 文燦大喜, 先與 頓首 率萬慶兵會 南陽、撃李 皆據邑 命兵部 、張獻 文燦前 自 忠 授 慰

滁 能 重 大夫,建祠 瞋目罵曰 其城,四面 初 國 能 力攻, 爲 我初 與若同爲賊,今則王臣也,何故降賊」遂殺之。 國能不能支,城遂陷,被執。 賊猶好謂之曰:「若,我故人也,何不降? 及國能歸正,自成輩深恨之。十四年九月 事聞,贈左都督,特進榮 國

險,益 王 西 一西當 蔓 大肆。 山 陝兵。 西 、畿南、 八年春 延安 已而 河 諸路之賊盡萃於陝,總督洪承疇彌歲不 ,賊七十 北 崇 渡 頑 河 初 殘 二營會滎陽, 河 與張 南 田 獻 忠、 沒 湖 議分 羅汝才等並 廣 兵隨 四 끠 所 還趨 向, 反, 能定, 鄖 令萬慶及 賊 陽 中 所 益恣, 入 稱 興安, 許 射 可 出 場 ·變助 一沒於 困 天 者 於 馬 河南 是 車 進忠、横天 箱 也 、湖廣 峽 起 陜 出

凡

五

家

雙溝 麻 藺 衰 不 っ惟 養成 敢 城 ,徙信陽 擊 迨 萬 汝 于一 順 才 慶、光玉、一龍、順 萬 率九營走均州 天王、順義王 慶等復 年春 國能 大振 、獻忠降,萬慶等大 九家 ,萬慶率 李自成 天王 最 最 著。 向 勁。 三營走光、固。 關 八月 中 而 , 萬慶得馬士秀、杜 進忠、光玉 課 萬 慶 而 及馬光玉 去,改稱十三家,勢頗 + 一大挫 月,汝才亦降,自成 、馬進忠、羅汝才、惠登 於潼關。 應金所劫 九月,鄖 衰。 左 良玉 叉 而 一賄,富 寒 大 文燦擁兵德安, 敗 相 贼 關 叉大 賀 E. 內 强, ,勢益 敗 於於

平岡 逐 龍、養成伏深山 依依 十二年正 山結壘請降。 裨將王修政趨利戰 月戰敗,徙應山、德安。 - , 登相 良玉慮其詐,謀之文燦,益調諸將陳永 遠掠秦 蜀 ,萬慶 文 人爆收二 會光玉、進忠等皆大敗,進忠懼 勢益 一營卒, 孤 文燦檄 令良 良玉 玉蹙之內鄉 福、 擊之唐 羅岱、 縣 而降,而 萬慶 姚 金聲桓 梁 等在赤眉 順 分三營肄賊, 之兵會於賈 天王 已 城 几

記

復 推可變爲主,與胡可受皆降。 四千人。 二十騎往偵,且諭 大熾。 ,大剿萬慶及光玉、可變。 士秀、應金見進忠、萬慶降而懼,復來歸。 而萬慶、進忠以徒衆旣散,無二心。萬慶願從征自效,比國能給餉。 萬慶降。 萬慶馳見,輸情國能,遂執許州叛黨于汝虎以降,處內鄉城 副將國能亦至,由張家林、七里河分擊,賊大奔。良玉遣國能以 自是羣盜大衰。 至五月,獻忠復叛, 有劉喜才者,夜取順義王首以獻,餘黨 汝才率其黨九營應之, 遂授爲副總 下者

大夫,立祠襄城。 軍潰,入城。 四年,獻忠突陷襄陽,鄖守如故。 贼攻圍之,固守五日,城陷, 明年正月, 喬年死,萬慶亦不屈死。 總督汪喬年討賊,以萬慶從。 事聞、贈都督同知、榮祿 至襄城

兵,

與國能守鄖陽。

獻忠等方大亂獨中,鄖境得無事

也。 敞, 潰陷相屬, 兵力耗 明至末季,流寇蔓延,國勢坐困,雖有奮威禦敵之臣,而 |頓,加以統馭失宜,應援不及,求無敗衄,得乎 無救亂亡。 如艾萬年等之捐軀盡節,其可悲者矣。 此非其勇不具,略 兵孱餉絀, 徒使 賊乘其 示嫺

#### 校勘記

[一] 復臨縣及蹏亭驛 蹏亭驛,寰宇通志卷八二、明一統志卷二一作「虒亭驛 明會典卷

一四五作「褫亭驛」。

莫是驊唐世龍及千戶王定遠皆力戰死 唐世龍,原作「詹世龍」, 據明史稿傳 四五陳于王傳、

**綏寇紀略卷五改。** 

再增 一秩 增,原作「贈」,據明史稿傳一 四五侯良柱傳改。

,從曹文詔追賊西偃碧霞村斬混世王 西偃,綏寇紀略卷一、 懷陵流寇始終錄卷六作「西堰」,混

世王,後書作「混天王」。

29

五 布政使都任 布 政使, 本書卷三〇九李自成傳作「副使」 國権卷九九頁六〇〇一作 兵備副

使」。

## 明史卷二百七十

### 列傳第一百五十八

馬世龍 楊肇基 賀虎臣 子讚 誠 沈有容 張可大 弟可让

# 魯欽子宗文 秦良玉 龍在田

馬世龍,字蒼元,寧夏人。

由世職舉武會試、歷宣府遊擊。

中, 力,與承宗定計出守關外諸城。 承宗出鎮、薦爲山海總兵、俾領中部、調總兵王世欽、尤世祿分領南北二部。 海 方劍,實授府銜。承宗爲築壇拜大將,代行授鉞禮,軍馬錢穀盡屬之。 抵蓋套,相度形 駐衞城,世欽南海,世祿北山,並受世龍節制,兵各萬五千人。 天啓二年擢永平副總兵。 勢而還。 敍勞,加右都督。 署兵部孫承宗奇其才,薦授署都督僉事,充三屯營總兵官。 四年,偕巡撫喻安性及袁崇煥東巡廣寧,又與崇煥、世欽航 世龍威承宗知己,頗盡 尋定分地,世龍居 明年正月賜尙

列傳第

明

「人謂其貪淫朘削,臣敢以百口保其必無。」帝以承宗故,不問 世 當 不得則大恚。 ,承宗統 士馬十餘萬,用將校數百人,歲費軍儲數百萬。 而世龍貌偉,中實怯,忌承宗者多擊世龍 以越之。 諸有 承宗抗辯於朝日 求於承宗者,率因

沒。 及 幷及承宗。 從第贊畫,力攻世龍。 言官交章劾奏, 嚴旨切責, Ŧi. 年九月,世龍 承宗不安其位去, 誤信降人劉伯澀言,遣前鋒副將魯之甲、參將李承先率師襲 世龍陰結忠賢,反削日久籍。 以兵部尚書高第來代。 令戴罪圖功。 時魏忠賢方以清君 職方主事 其冬,世龍亦謝 徐 側疑承宗,其黨攻世龍 日 久者, 病 去。 先佐第撓 取 耀 遼事 敗

震。 方 獄 劍, 崇禎 承宗再起督 二年冬,都城戒嚴。 盡統諸鎭援師 元 年, 王在 師,以 晉爲尙書。 便宜遣世龍馳諭大壽聽命。 刑部尚 書喬允升薦 世龍上疏極 世龍 論 其罪, 才, 及滿桂戰死 詔圖 有詔逮 功自贖。 世 龍, 逐令世龍代為 會祖 人不 大壽 至。 師潰 在晉罷 總理 京 始詣 賜 師 尙 大

Щ 世 ·,內地則山東、河南、南都、湖廣、浙江、江西、福建、四川諸軍 西 音 諸 三年三月進左 軍 或 聲 樑、固原楊麒、延綏吳自勉、臨洮王承 息斷絕。帝急詔 都督。時遵化、永平、遷安、灤州 四方兵勤王,昌平尤世 恩、寧夏尤世祿 威、薊鎭楊肇基、保定曹鳴雷 四城失守已三月。 ,亦先後至。 、甘肅 楊嘉謨,所將皆諸邊銳 承宗、大壽隔關門,與 并壁薊門,觀望 山 海宋偉

列傳第一百五十八 馬世龍

不進。給事 帥 宿 將,非 中張第元上言:「世龍在關數載,績效無聞,非若衞、霍之儔,功名足 世 龍 偏裨,欲驅策節 制 ,誰能甘之。 師老財 匱,銳氣 日消,延及夏秋 以服 將 有 人也。諸 不 可

耆。 帝 以 世龍 方規進取,不納 其言。時大壽於五月十日薄灤州。明 日 ,世龍等以 別將 師 會。 叉 明

五. 月, 復 其 四城 城 。十三日,遊擊靳 始復。論功,大壽最,世祿次之。世 國臣 復遷安。明日,副將 龍加太子少保,廕本衞世千戶。八月復謝病 何可綱復 永平。又二日, 復遵化。 冕

月, |奇亦 寇。 功 夏, 敗之,俘斬 ,贈太子太傅,世錦衣僉事,賜恤如制。 套寇 習其形勢,大修 斬三百 世 六 龍 年五月,插漢虎墩兔合套寇犯寧夏,總兵賀虎臣 犯 遣 一千有奇。 賀蘭山。 1餘級。 副 .將婁光先等分五道伏要害,而己中道待之,夾擊,斬首八百有奇。 戦備。 寇復犯 世龍 世龍半歲中屢奏大捷,威名震西塞。 遺降丁潛入其營,馘其長撒 明年正 河西玉泉宮,世龍復邀斬五 月,二部入犯,遣參將卜應第大破之,斬首二百有 一百餘。 見甲,斬級 戰歿,詔起世龍 無何,卒於官,年四十餘。 其年七月犯棗園堡,世龍 如前。 代之。 未幾,插部 世龍 巡撫王 大 奇。 生長 後論 叉大 舉 踰 寧 振

鄆 鉅野 楊 肇基,沂州衞 |鄒、|滕 幝, 人。 衆至數萬。 起家世職,積官至大同總兵。 巡撫趙彦任都司楊國棟、廖棟檄所部練民兵, 天啓二年,妖賊徐鴻儒反山東,連陷 增諸要地守

時城 鄒。 之驛 遊擊 屢加太子太保。 卒。 都督,廕本衞世千戶。 精 張 時肇 Щ, 圍三月,賊食盡,其黨出降,遂擒 榜 銳聚鄒、滕中道、肇基令遊兵綴賊 逐圍 戦 基 死。 方家 鄒。 彦方視 居 國 [棟等亦先後收復鄆、鉅 彦因卽家薦起之,爲山東總兵官討賊。 葬代沈有容鎭登、萊。 師兗州、遇賊。 鴻儒 肇基至, 鄒城,而以大軍擊賊黃陰、紀王 野、嶧、滕諸縣, 獻俘,磔於市, 改延綏 急迎戰, ,以擊套寇功,進左都督,廢錦衣千戶, 而 賊平。 又大破之於 令國棟 未至, 肇基 棟及 及 棟 沙河。 城,大敗賊,蹙而殪 由署都 夾擊,大敗之橫河。 國棟等攻鄒,兵潰, 乃築! 督僉事 長圍攻 進右

城。 廕錦. 崇禎 衣世千 元年移薊鎭西協。 户。 已,錄恢復四城功,加太子太師,改廕錦衣僉事。 二年冬,大清兵克三屯營。 肇基乘間收復,困守數月,卒全孤 明年卒官。 子御蕃,

見徐從治傳。

賀虎臣、保定人。天啓初、歷天津海防遊擊、登萊參將、移兗州。 六年遷延綏副總兵。

河套 崇禎二年捕誅階州叛卒周大旺等。 | 寇大舉入犯,從帥楊肇基協擊,大破之。 擢總兵官,鎭守寧夏。 加署 都督僉事 關中賊大起,王嘉胤陷清水

年,可天飛、郝臨菴、劉道江、李都司再圍合水。 急,延綏撫鎭皆東援陝西。 營,殺遊擊李顯宗,遂陷府谷。 河套數千騎挫虎臣 往討,擊之盤谷,俘馘六百 軍。 會張應昌擊敗之,賊衆 [有奇。已,擊斬慶陽贼渠劉六。[1]四年,神一元陷保安。 巡撫練國事檄虎臣及副將李卑援剿。 其黨李老柴應之,嘯聚三千餘人,攻合水。 棄城去。 虎臣偕臨洮曹文詔、甘肅楊嘉謨、固原楊麒 虎臣等前後獲首功一千九百。 虎臣等遂進圍保安,城引 總督楊鶴檄虎 延安告 明

敵,遂戰死。 井驛副將史開先、臨河堡參將張問政、岳家樓守備趙訪皆潰逃。 錄先後剿寇功,再贈都督同知,世廕錦衣副千戶。 千騎入守。 六年五月,插漢虎墩兔合套寇五萬騎自淸水、橫城分道入。 旋盡勒城中兵出擊,次大沙井。 子讚挾五十騎突重圍出。 事聞,贈虎臣都督僉事,賜祭葬,世廕指揮 寇從漢伯堡突至,虎臣 寇遂進薄靈州 守備姚之夔等不能禦, 軍未及 布 陳, 且衆 虎臣急領 第不 沙

合擊,大破賊甘泉之虎兕凹

,<br />
斬首七百有奇,<br />
賊大困

薄京師,京軍六大營分列城外,皆不敢戰,或棄甲降。 讚 ,勇敢有父風。 旣承廕, 尋舉武進士。 積官至京營副將。 讚獨率部卒迎擊,中矢死 崇禎十七年三月, 李自成

弟誠,身長 、七尺,美鬚髯,爲諸生,以忠義自許。 兄誠襲副千戶,早卒,無子,誠當襲,以

傳第

譲 其弟詮 。及賊陷保定,家人勸易衣遁。叱曰:「吾忠臣子,偸生而逃,何以見先將軍地下」

遂偕妻女投井死。

斬首六級,寇退乃還,由是知名。遼東巡撫顧養謙召隸麾下,俾練火器。十四年從李成梁 <u>漸</u>遼總督梁夢龍見而異之,用爲昌平千總。復受知總督張佳胤,調漸鎭東路,轄南兵後營。 十二年秋,杂顏長昂以三千騎犯劉家口。有容夜半率健卒二十九人迎擊,身中二矢, 沈有容,字士弘,宣城人。僉事寵之孫也。幼走馬擊劍,好兵略。舉萬曆七年武鄉試。

其城。 出塞,抵可可毋林,斬馘多。 錄功,世廕千戶。遷都司僉書,守浮屠谷。 明年再出,亦有功。成梁攻北關,有容陷陣,馬再易再斃,卒拔

銅山。二十九年,倭掠諸寨,有容擊敗之。踰月,與銅山把總張萬紀敗倭彭山洋。倭據東 人,縱火沈其六舟, 斬首十五 有容守石湖,謀盡殲之,以二十一舟出海,遇風,存十四舟。過彭湖,與倭遇,格殺數 從宋應昌援朝鮮,乞歸。日本封事壞,福建巡撫金學曾欲用奇搗其穴,起有容守浯嶼、 一級,奪還男婦三百七十餘人。倭遂去東潘,海上息肩者十年。

捷聞,文武將吏悉敍功,有容賚白金而已。

州、皮島俱遠隔大洋, 骸骨,歸,卒。 覆,遼民走避諸島,日望登師救援。 鎭。 獲濟者數萬人。 廷酮 「率一旅之師,當方張之敵,吾知其不克濟也。」無何,鎭江果失,水師遂不進。 容白當事,自請往諭。見麻郎,指陳利害。 元請特設水師,起有容統之,擒倭東沙。 張可大, 建三方布置之議,以陶朗先巡撫登、萊,而擢有容都督僉事,充總兵官,登 八月,毛文龍有鎭江之捷。 泰昌元年,遼事棘,始設山東副總兵,駐登州,以命有容。天啓改元,遼、瀋相繼覆。 字觀甫,應天人。 贈都督同知,賜祭葬。 時金、復、蓋三衞俱空無人,有欲據守金州者。 由浙江遊擊調天津,遷溫 聲援不及,不可守。 世襲南京羽林左衛千戶,舉萬曆二十九年武會試, 詔有容統水師萬, 偕天津水師直 朗先下令,敢渡一人者斬。 尋招降巨寇袁進、李忠,散遣其衆。 迨文龍取<u>金</u>州,未幾復失。 麻郎悟,呼宋使者,索還所將宋金,揚帆去。改 處參將,罷歸。四十四年,倭犯福建。 有容爭之,立命數十艘往, 有容言金州孤懸海外,登 抵鎭江策應。 四年,有容以年老乞 明年,廣寧 有容歎曰: 蒸遂為重 巡撫黃承

三十二年七月,西洋紅毛番長韋麻郎駕三大艘至彭湖,求互市,稅使高寀召之也。

列 傅 第 百 五 + 八 沈 有 容 張 可 大 六九三九 授建昌

守備 也。 大 錄 。」遷劉河遊擊, 本其貲。 遷 浙 保 江 家 都 飽 司 改廣東高肇參將。 重 崩 , 却不 分守瓜洲、 受。 葉向高 儀眞, 調浙江舟山。 赴召過儀,見而異之,曰:「此不特良將,且良吏 江洋大盜斂迹。 奉命征黎,與總兵王鳴鶴用黑番爲導, 稅監魯保死,淮撫李三才令可

搗

其

、巢,黎乃滅

竣。 年以都指揮使掌南京錦衣衞。 五 |罩湖、白沙港、茶山、潭頭,連敗之 加副總兵。 城 城內外田數千畝,海潮害稼。可大築碶蓄淡水,遂爲膏腴。 舟 Щ 、宋昌 國城也,居海中,有七十二墺,爲浙東要害。 六年擢都督愈事,愈書南京右府。 **久圯,可大與副使蔡獻臣築之,** 可大條上八議,皆碩畫。 民稱曰「張公碶」。 天啓元 兩月工 倭犯

白 涿 蓮 配 賊 不設。 崇禎 餘黨圍萊陽 元 可大盡 年出 爲登萊總兵官。 ,可大擊破之,焚其六砦,斬偽國公二人,圍遂解。京師被兵,可大入衞, 心海防,親歷巡視,圖沿海地形、兵力强弱,爲海防圖說上之。 會議裁登萊撫鎮,乃命以總兵官視登州副總兵事,而巡撫 二年冬,

化 率 關 劉 一外八千人至,强半皆遼人。 興治反東江,遂奉韶還鎮。 已而 可大慮有變,屢言於元化,不 四城 並復, 朝議復設登萊巡撫,以孫元化爲之。 聽 元

守西直

、廣寧諸門。

明年,以勤王功,陞都督同

知

几 年七月,錄前守城功,進右都督。 十月,僉書南京左府,兼督池河、浦口二軍、登人

泣留之。 未行而孔有德反吳橋,東陷六城。 可大急往剿,元化檄止之,不聽。 次萊州, 遇

元化,復爲所阻,乃還鎭。

陷。 良皆戰死。 親黨 子鹿徵奉母航海趨天津。 夫、太子少傅,諡莊節,賜祭葬,予世廕,建祠曰「旌忠」。 歲元日發兵合擊。 可大時守水城,撫膺大慟。 多,無鬭志。 歲將晏,有德暮薄城。可大請擊之,元化持撫議,不許。 燾兵半降有德, 遺歸爲內應。 其將張燾先走,可大兵亦敗。 中軍管維城,遊擊陳良謨, 至期,元化兵不發。 而以佩 解所佩印付旗鼓,間道走濟南上之。 劍付部將, 盡斬諸婢妾, 遂投繯死。 明日, 元化開門納之,可大諫,不聽。 合兵戰城東,可大兵屢勝。 可大陳利害甚切,元化期明 還家辭母,令弟可度 事聞,贈特進榮祿大 元化部 夜半賊至, 城遂 守備盛洛、姚士 卒皆遼人,

逮。 賦詩有「陰霾國事非」句,揚州 可大約束旗尉,捐奉助之,卜室處其妻子。 知府劉鐸書之扇,贈 其尙義類 一僧。 如此。 惡鐸者譖之魏忠賢, 暉、鐸俱被

可大好學能詩,敦節行,有儒將風。

爲南京錦衣時,歐陽暉由刑部主事謫本衞

知事、嘗

弟可仕,字文峙,以字行。 隱居博學,嘗輯明布衣詩一百卷。

方,諸道 正 尉 年 正 月,三善敗歿於內莊,欽等以殘卒還。 月, 、萬化,遂進營紅崖。 十月用 ,充保定總兵官。 魯 巡撫王三善大敗於陸廣,羣苗宋萬化、 欽 ! 監司尹伸、岳具仰、向日升、楊世賞各以兵從,五 欽 代文煥,命總川、貴、湖廣漢土 人。 奢崇明、安邦彦並反,貴州 萬曆 紅崖者,崇明敗走處也。 中,歷山西副總兵。 命戴罪辦財。 軍刻 何中尉等蠭起。 期 總兵張彦方 天啓元年遷神機營左副將。 解圍。 三善謀大舉深入,欽及總兵官馬炯、張 未至, 一戰,斬首萬八千,直抵大方。 在 圍中 重 欽佐三善防 已解 ', 而 總 (\*), |欽 理 馳赴 杜文煥 剿, 尋擢署 貴陽。 率諸將 稱 都督 病 三年 擒 四 僉 H 明

逆苗 劉 鳩  **田等深入織金,先後斬首千餘級** 河,斬首千五百餘級。 遣 志敏 灣後寒, 欽 及總兵官劉超救之,拔賊巖頭寨, 都勻凱里土司者,運道咽喉也,邦彥結諸蠻困其城, 、鄧玘等大敗賊汪家沖。 邦彥勢窘,渡河西奔。 亙二十餘里, 分犯普定。 搜山,復斬六百餘級。 欽、鉞督諸將窮追,夢龍等分駐三岔河岸爲後勁。 鉞及參政陸夢龍、 復一令欽與總兵官黃鉞分道禦之。 遂移師克平茶。 尹伸守普定,亦敗賊兵,與大軍會, 副使楊世賞亦大敗賊 已而邦彦盡 長官楊世蔚不能守。 |驅羅鬼,結四十營於斑 蔣義寨。 欽率部將張雲鵬 總督蔡復一 前鋒雲鵬、 共剪水外 合追至

一上其功,言:「欽廉勇。 雖名總理,權力不當一偏裨。 舊撫臣三善及諸監軍,人人

敗 爲 可 大 原,勝足錄。 帥 ,內莊失律,欽不當獨任大帥罪。 當免其戴罪,仍以功論。」從之。 臣至黔,以諸道監軍兵盡屬欽,每戰身先 明年正月、欽等渡河還,中伏,敗死者數 士卒。 欽

千人。充爲事官,立功自贖。

圖授平越 首功二千三百五十,破焚百七十四寨。 儀、楊明楷等佐之。 代爲監軍,阿秧弟阿買與天保請兵邦彥,復兄讐。復一以兵事屬鴻圖及欽,而遣參將胡 圖天保,阿秧反以情告。 反,授二酋都督,使通下六衞聲息。 二百年所未有。 自平越至興隆、清平二衞,苗二百餘寨盤踞其間,以長田之天保、阿秧爲魁。 知府。 復一旣奏功,未報而卒。 欽等三道進,大戰米墩山,生擒天保及阿買,先後斬賊魁五 斯行乃誘斬阿秧,議討天保,會以疾去。復一令貴陽 是年春,寇石阡、餘慶。 盛夏興師,將士冒暑雨,衝嵐瘴, 監軍御史傅宗龍復以爲言,乃命欽總理 監軍按察使來斯行啗阿秧,使 劇寇盡除, 同 十四人, 知周鴻 如故, 土人謂 邦彦 從 初 鴻 獲 圖

將 士逃竄,欽遂自 六年三月,邦彦復大舉入寇。 刎。 諸營盡潰,賊勢復張 欽禦之河上,連戰數日,殺傷相當。 夜半,賊直 逼欽壘。

欽 勇敢善戰 ,爲西南大將之冠。 莊烈帝嗣位、贈少保、左都督、世廕指揮僉事、賜祭葬,

建祠曰「旌忠」。

列

傳第

子宗文 承 廕 崇禎 中,以薊鎭副 認兵為 總督吳阿衡中軍。 十一年冬, 牆 子嶺失事 與

阿衡並力戰死。

南 別 玉 夫 JII 統 路 良 婦首擊敗 精 秦 良玉 戰 卒 玉 弘第 五 爲 一,忠州 人饒膽 百 [ 裹糧 之,追入賊境,連破金筑等七寨。 0 人,嫁石砫宣撫使馬千乘。 賊平,良玉不言 自隨 智,善騎 ,與副將周 射, 兼 通 功。 國柱 詞翰 其後,千 扼賊鄧 儀 度嫻 萬曆 坎。 乘為部民所 已,偕 雅。 二十七年,千乘以三千人從征 明 年正 酉陽諸軍直 गां 馭 下 訟,瘐死 月二日 嚴峻,每行 取桑木關 雲陽 賊 乘官軍宴, 軍 獄,良玉 發令,戎伍 , 大敗賊衆, 播州, 代 夜襲。 領 肅 其 良玉 然。 職。 爲 皃

泰 昌 時, 徵 其兵援遼。 良玉遣兄邦屏、弟民屏先以數千人往。 朝命賜良玉三品服,授

邦屛都司僉書,民屛守備。

所部

號白

桿兵,為遠近所憚

來,所建之功,不滿讒妬口,貝錦高張,忠誠孰表。」帝優詔報之。 詔 加 二品服,即予封 天 啓 元 年, 邦 屏渡渾河 計 子祥麟授指 戰死,民屏突圍 揮使。 出。 良玉 陳邦屏 良玉 自統精卒三千赴之,所過秋毫無犯。 死狀,請優恤 兵部尚書張鶴鳴言 0 因言:「臣自 | 渾河 征 播 以

列傳第一百五十八 秦良玉

給殘卒,而身督精兵三千抵楡關。上急公家難,下復私門仇,氣甚壯。 血戰,首功數千,實石砫、酉陽二土司功。 邦屏旣歿,良玉卽遣使入都,製冬衣一千五百,分 宜錄邦屏子,進民屏

官。」乃贈邦屏都督僉事,錫世廕,與陳策等合祠,民屏進都司僉書

扼賊歸路。伏兵襲兩河,焚其舟。分兵守忠州,馳檄夔州,令急防瞿塘上下。賊出戰,即敗 良玉斬其使,即發兵率民屏及邦屏子翼明、拱明溯流西上,度渝城,奄至重慶南坪關, 良玉上其狀,擢民屏參將,翼明、拱明守備。 部議再徵兵二千。良玉與民屏馳還,抵家甫一日,而奢崇明黨樊龍反重慶,齎金帛結

鼓行 寺、青山墩諸大巢,蜀賊底定。 命祥麟爲宣慰使,民屛進副總兵,翼明、拱明進參將。 圖關 ,復重慶。<br />
良玉初舉兵,即以疏聞。命封夫人,錫誥命,至是復授都督愈事,充總兵官。 而西,收新都,長驅抵成都,賊遂解圍去。良玉乃還軍攻二郎關,民屏先登,已,克佛 已而奢崇明圍成都急,巡撫朱燮元檄良玉討。 復以援貴州功,數資金幣。 時諸土司皆貪賊賂,逗遛不進。 良玉益咸奮,先後攻克紅崖墩、觀音 獨良玉

總兵李維新,渡河一 賊面,攘臂誇張,及乎對壘,聞風先遁。 三年六月,良玉上言:「臣率翼明、拱明提兵裹糧,累奏紅崖墩諸捷。 戰,敗衄歸營,反閉門拒臣,不容一見。以六尺軀鬚眉男子,忌一巾幗 敗於賊者,唯恐人之勝,怯於賊者,唯恐人 乃行間諸將,未覩 之强。 如

婦人,靜夜思之,亦當愧死。」帝優詔報之,命文武大吏皆以禮待,不得疑忌。

賊來襲,戰死。二子佐明、 祚明得脫,皆重傷。良玉請卹,贈都督同知, 立祠賜祭,官二子。 是年,民屏從巡撫王三善抵陸廣,兵敗先遁。其冬,從戰大方,屢捷。明年正月,退師。

給,卒不降。翼明、胙土皆被劾。 溝,擒黑煞神、飛山虎。 賊出沒鄖、襄間,撫治鄖陽苗胙土遣使招降,翼明贊其事,爲賊所 尋亦被劾解官。 而羅汝才、劉國能自深水以渡,逐大擾蘄、黃間。 走鄖西路。翼明性恇怯,部將連敗,不以實聞,革都督銜,貶二秩辦賊。已,從盧象昇逐賊 大凌河城。 見平臺,賜良玉綵幣羊酒,賦四詩旌其功。會四城復,乃命良玉歸,而翼明駐近畿。明年築 而是時翼明、拱明皆進官至副總兵。 崇禎三年,永平四城失守。良玉與蠶明奉詔勤王,出家財濟餉。莊烈帝優詔褒美,召 賊走均州,翼明敗之青石鋪。賊入山自保,翼明攻破之。連破賊界山、三道河、花園 明年,鄧玘死,以所部皆蜀人,命翼明將之,連破賊於青崖河、吳家堰、袁家坪,扼賊 翼明以萬人護築,城成,命撤兵還鎭。七年,流賊陷河南,加翼明總兵官,督軍 而良玉自京師還,不復援剿,專辦蜀賊。 已而賊犯襄陽,翼明連戰得利,屯兵廟灘,以扼漢江之淺。 帝以鄖、襄屬邑盡殘,罷胙土,切責翼明,

七年二月,贼陷夔州,圍太平,良玉至乃走。十三年扼羅汝才於巫山。 汝才犯夔州,良

譚家坪北山,三又破之仙寺嶺。良玉奪汝才大纛,擒其渠副場天,贼勢漸衰。 |師至乃去。已,邀之馬家寨,斬首六百,追敗之留馬埡,斬其魁東山虎。復合他將大敗之

計不用。 卒,可得二萬。 殪,良玉趨救不克,轉鬭復敗,所部三萬人略盡。乃單騎見捷春請曰:「事急矣,盡發吾溪峒 軍於觀音巖、三黃嶺,遂從上馬渡過軍。 然之。已而捷春移營大昌,監軍萬元吉亦進屯巫山,與相應援。其年十月,張獻忠連破官 巔,俯瞰吾營。 壑,無愚智知之。 「邵公移我自近,去所駐重慶僅三四十里,而遣張令守黃泥窪,殊失地利。賊據歸、巫萬山 之曰:「邵公不知兵。吾一婦人,受國恩,誼應死,獨恨與邵公同死耳。」遜之問故,良玉曰: 當 綿州 是時,督師楊嗣昌盡驅賊入川。川撫邵捷春提弱卒二萬守重慶,所倚惟良玉及張令 良玉乃歎息歸。 知州陸遜之罷官歸,捷春使按營壘。見良玉軍整,心異之。良玉爲置酒,語遜 鐵騎建瓴下,張令必破。今破及我,我敗尚能救重慶急乎!且督師以蜀爲 我自廩其半,半餼之官,猶足辦賊。」捷春見嗣昌與己左,而倉無見糧,謝其 邵公不以此時爭山奪險,令賊無敢卽我,而坐以設防,此敗道也。」遜之深 時搖、黃十三家賊橫蜀中。 良玉偕張令急扼之竹箘坪,挫其鋒。 有秦纘勳者,良玉族人也,爲賊耳目, 會令為賊所

張 獻忠盡陷楚地,將復入蜀。 钏 (事 第 百 五 + 八 泰 良 玉 良玉圖全蜀形勢上之巡撫陳士奇,請益兵守十三隘,士

被擒,殺獄卒遁去。

良玉捕執以獻,無脫者。

良玉 奇不能用。 孱婦蒙國恩二十年,今不幸至此,其敢以餘年事逆賊哉!」悉召所部約曰:「有從賊者,族無 馳援,衆寡不敵,潰。及全蜀盡陷,良玉慷慨語其衆曰「吾兄弟二人皆死王事,吾以一 復上之巡按劉之勃,之勃許之,而無兵可發。十七年春,獻忠遂長驅犯夔州。

翼 明旣罷,崇禎十六年冬,起四川總兵官。道梗,命不達。而拱明值普名聲之亂,與賊

贼逼招土司,獨無敢至石砫者。後獻忠死,良玉竟以壽終。

鬭死,贈卹如制。

赦」乃分兵守四境。

普名聲、武定吾必奎等征討,數有功,得爲土守備。 龍在田,石屛州土官舍人也。天啓二年,雲南賊安效良、張世臣等爲亂。 新平賊剽石屏,安效良攻霑益,在田俱 在田與阿迷

破

走之。巡撫閔洪學上其功,擢坐營都司。

文燦。 明年三月大破贼固始,斬首三千五百有奇。張獻忠之叛也,文燦命在田駐穀城,遏賊東突。 賊湖廣、河南,頻有功,擢副總兵。 崇禎二年與必奎收復烏撒。八年, 十年三月擊擒大盜郭三海。十一年九月大破賀一龍、李萬慶於雙溝,進都 總理盧象昇檄討襄陽賊,至則象昇已奉詔勤王,命屬熊 流賊犯鳳陽,詔徵雲南土兵。在田率所部應詔, 督同 知

諸 將多忌在田,讒言日興。及文燦被逮,在田亦罷歸,還至 貴州、擊平叛賊安隴

勝, 帝壯之,下兵部議,寢不行 楚、豫、皖諸寇,不滅不止。 諸將所統多烏合,遇寇卽逃,乏餉 且一歲中,秋冬氣涼,賊得馳騁。 捷二十有八,忌口 精卒九千五百,戰象 山蹊又莫敢攖, 十五 年夏,中原盜 中阻,逼臣病歸。 師老財殫, 蕩平何日。 四,戰馬二千,入楚、豫破賊。 益熾。 望速給行糧,沿途接濟。臣誓捐軀報國, 在田上疏曰 春夏卽入山避暑,養銳而 卽 課。 自臣罷,親藩辱,名城屢陷。 **滇兵萬里長驅,家人父子同志,** 三三臣 **滇兵輕走遠跳,善搜山。** 以石屛世弁,因流氛震陵,奮激 賊不敢窺江 出,故其氣益盛。 北陵寢,滇兵有 臣妄謂討寇必須南兵。 言而不效,甘伏斧鑕。」 臣願整萬衆, 非若他軍易潰也。 夫平原戰旣不 國難 力焉。 力掃秦 一, 扫 貲募 Ŧi. 載

峨,在田走大理。又明年,孫可望等至貴州,在田說令攻定洲,定洲迄破滅。在田歸,卒於家 之。 未幾,沙定洲作亂,據雲南府,在田 踰二載,乙酉 八月,吾必奎叛。 黔國公沐天波檄 不 敢擊。明年,定洲攻在田 在田及寧州 土知州禄 不下,移攻寧州,尋陷嶍 永 命協 討 擊擒

列 傳. 馬世龍等值邊陲 第 百 五 --八 多 #ij 事,奮: 任 H 其 勇略,著績戎行,或捐軀力戰,身膏原野,可 校 勘 記 六九四 九 謂 無 忝瓜

六九五〇

義有足多者。 牙之任矣。 夫摧鋒陷敵,宿將猶難,而秦良玉一土舍婦人,提兵裹糧,崎嶇轉鬭,其急公赴 彼仗鉞臨戎,縮朒觀望者,視此能無愧乎!

### 校勘記

〇一」已擊斬慶陽賊渠劉六 按本書卷二三莊烈帝紀、 殺寇紀略卷一、明史紀事本末卷七五都繫此

於崇禛四年八月。

<u>\_</u> 復合他將大敗之譚家坪北山 北山, 原作「北平」,據明史紀事本末卷七五、懷陵流寇始終錄卷

## 明史卷一百七十一

## 列傳第一百五十九

賀世賢 尤世功 董仲揆 陳策 周敦吉等

張神武等

羅 貫 劉渠 祁秉忠 滿 桂 孫祖壽 趙率教 朱國彦

官惟賢 張奇化 何可綱 黃龍 李惟鸞

金日觀 楚繼功等

賀世賢,楡林衛人。 少爲厮養,後從軍,積功至瀋陽遊擊,遷義州參將

倶死。 萬曆四十六年七月,淸河被圍,副將鄒儲賢固守。 部將二十人、兵民萬餘殲焉。 世賢駐靉陽,聞變,疾馳出塞, 城破,率親丁鏖戰城南,與參將張蘇 得首功百五十有四級。

進副總兵。

列傳第一百五十九 賀世賢

逐覆歿。 明 年 尋 楊鎬四路 擢都 督僉事 出 師 , 充總兵官, 世賢副李如柏出清河。 駐虎皮羄。 鐡嶺被圍 劉挺 深入中伏, ,世賢馳援,城已破,邀獲首功百 勸 如柏 往 | 救, 不 從 艇

當 是時, 四方宿將鱗集遼左,率縮朒不敢戰,獨世賢數角 屬有功,同列多忌之。 移鎭

餘級。

泰昌

元年九月連戰灰山、撫安堡,獲首功二百有奇。

可慮 陽 經略袁應泰下納降令。 兵部尚書崔景榮請拒勿納,而置己納於他所。 廣寧總兵李光榮疑世賢所納多 然世賢所納卒不 以狀聞 ·可散, 巡撫薛 同列遂謗其有 國用 亦奏三

突 斷 倏 勇 車 圍 精 城 · 人器· mij 中 外 騎 輕,嗜酒。 天 字擊殺 河合, 啓 弔 木石, 橋 元年三月,我大清以重兵薄瀋陽。世賢及總兵尤世 數 世賢 環城設兵, 守城 或勸 人, 旦日 戰 H 世 且却, 飲酒, 矢墜 賢走遼陽,日 馬 率親 抵西門, 而 法 死 T 甚具。 0 干, 世 身被十四矢。 吾為大將, 出 功引兵援 大清先以數十騎來值, 城 逆擊, () 亦戦 不能 期 諡: 城 H 存 死 敵 城 聞 m 世 反。 何 賢敗 功掘塹濬壕,樹 闻 世功兵歸之, 目 大清兵佯敗, 見袁經略乎」 各 鳥 獸 鼠 大木為棚 殺四人。 而 世賢乘 降丁 揮鐵鞭馳 復叛 。 鋭進。 世 列 楯

經路楊鎬言其身負重傷,才堪策勵, 世 功 亦 楡 林 人。 萬 曆 中, 舉 武 鄉試 乃補武精營遊擊。 歷瀋 陽 遊 擊 鎬四 張 承 路出 廕 之敗 Ĥij 世功隸 也, 世 功 李如柏麾下,得 脫 坐 褫 職

議三路出 尋以副總兵守瀋陽。 師,用爲總兵官。 熊廷酮代鎬,愛其才,與副將朱萬良並倚任。廷弼罷,袁應泰代, 未行,而瀋陽被兵,死於戰。 贈少保、左都督,增世廕三級,再廕

世賢旣歿,或疑其叛降,恤典故不及。 四川副使車樸爲訟冤,格衆議不果。 指揮僉事,世襲,賜祭葬,建祠曰「愍忠」。

揆力諫,不聽。 遼,與同官陳策並充援剿總兵官。 熹宗初立,經略袁應泰招蒙古諸部,處之遼、瀋二城。 仲 童仲揆, 南京人。 舉武會試, 歷都指揮, 掌四川都司。 萬曆末, 擢副總兵, 督川兵援

文傑、守備雷安民等皆死。 抵瀋陽,與城中兵夾擊,可以成功。」已,聞瀋陽陷,諸將皆憤曰:「我輩不能救瀋,在此三年 兵三千營橋南。 何爲」敦吉固請與石砫都司秦邦屏先渡河、營橋北、仲揆、策及副將戚金、參將張名世統浙 明年,天啓改元,應泰欲城淸河、撫順。 邦屏結陣未就,大淸兵來攻,却復前者三,諸軍逐敗。 他將走入浙兵營,被圍數匝。 兩人馳救,次運河。遊擊周敦吉曰「事急矣,請直 議三路出師,用大將十人,各將兵萬餘,仲睽、 副將朱萬良、姜弼不救,及圍急始 敦吉、邦屏及參將吳

先戰 前 被攻,果陷 與金、名世 戦卽 仲揆 及 敗 死 都 將 司袁見龍、鄧起龍等並死焉。 奔,金止之,乃還兵鬭。 大清兵盡銳攻浙營。 力盡 營中用火器,多殺傷。 矢竭, 萬良旣遁,經略將斬之,乞勩罪自效。 揮刀 殺十七人。 火藥 大清兵萬矢齊發, 盡,短兵接,逐大潰 及遼陽 仲揆 策

陣

廕 獄 贈 聞,贈策少保、左都督,增世廕三級,再廕本衞指揮僉事,世 一份書 都督同 級。 自遼左用兵,將士 薛三才薦 見龍等皆予贈蔭, 知, 增 世廕三級 其善火器,命從 一率望 一,祠 他副將至把總戰死者百二十餘 風奔潰, 祀。 征 金、起龍贈都督愈事 立功。 獨此以萬餘 文傑亦先褫 人當數萬衆。 職。 增世廕 襲, 人,贈廕有 及死 賜 雖 ,並得復官 祭葬,建祠 級, 力絀 差 附祀。 而 覆,時代 曰「愍忠」。仲揆 名世 贈 咸 壯之。 先 級 有 增世 罪 事

EIJ 丘 女 擒 墟 相 敦吉、先爲四川永寧參將。 世續以 攻者 事 聞 干餘 歸 敦吉、神武 年。 其部目閻宗傳 後崇明 並 論 襲 死。 職 怒,以 永寧宣撫奢效忠卒, 遼東 世 續 告警,命敦吉從軍 求 猶 主母 置 印不予。 爲 名, 大掠永寧、赤水、普市、麾尼,數 都 子崇明幼,其妻奢世統與妾奢 司 自效,及是鏖戰死, 張 神武 與敦吉謀 贈 盡掠 卹 如 其 制 積 百 世 里成

肺

武,新建人。

萬曆中舉武

會試第一。

授四川都司僉書。

旣論死,遼左兵興,用經略

帥, 日 用 袁應泰薦,詔諭從征立功。 固留 二百 欲與還戰, 之,不可,目一「奉命守遼陽,非守廣寧也。」曰一「遼陽歿矣,若何之。」目一「將 人能殲敵乎。] 曰:「不能,則死之。」 帥不從。 乃獨率所部渡河,抵首山,去遼陽十七里而軍。 神武率親丁二百四十餘,疾馳至廣寧。 前至遼河,遇逃卒十餘萬。 會遼陽已失, 將士不食已一日 神武以忠義激其 以殲 巡撫薛國 敵。」

祭之。 遇 大清兵,疾呼奮擊,孤軍無援,盡歿於陣。 詔贈都督僉事,世廕千戶,立祠祀之。 監軍御史方震孺繪神武像,率將士羅拜,爲文

赴援,至是父子並戰死。 **僉事,增世廕三級,並從祠附祀。** 叉 有楊宗業、梁仲善者,皆援遼總兵官。 仲善亦戰死遼陽城下。 宗業歷鎭浙江、山西。 宗業贈都督同知,世廕千戶 楊鎬四路敗後,命提兵 仲善贈都督

化貞 誅 秉忠以萬 明年 言於朝,加副總兵。 羅一貫, 正 人守閭陽,而一貫帥三千人守西平。 月, 甘州 大清兵西渡河,經撫戒勿輕戰。 衞人。 時化貞駐廣寧,經路熊廷弼駐右屯,總兵劉渠以二萬人守鎭武,祁 以參將守西平堡。 遼陽陷,西平地最衝,一貫悉力捍禦。巡撫王 已,定議,各繕隍 兵漸近,參將黑雲鶴 一堅壘, 出 急則互 擊。 相援,違者必 貫止之,不

列

傳

第

百

五十九

羅

貫

從 降,且遣 石盡,乃北 明日, 使 面再拜,曰:「臣力竭矣。」遂自剄。 | 來說,一貫不從。又明日,騎益衆,環城力攻。 雲鶴戰敗,奔還城,追兵殲焉。 一貫憑城固拒,用礮擊傷者無算。 都司陳尙仁、王崇信亦死之。 一貫流矢中目,不能戰。 大清樹旗招 火藥矢

大潰。 千戶,渠、秉忠少保,左都督,增世廕三級,再廕指揮僉事。 右翼,稍却,推渠、秉忠前。、渠等力戰,頗有殺傷。 會秉忠赴援,廷弼亦遣使督渠進戰,遇大淸兵於平陽。 人,乃死。 化貞知城未下,信遊擊孫得功語,盡發廣寧兵。 渠戰死。 大壽走覺華島。 秉忠被二刀三矢,家衆扶上馬,奪圍出,創重,卒於途。 得功遂降。越二日,廣寧卽破。 得功及副將鮑承先走,後軍見之亦奔,遂 以得功及中軍遊擊祖大壽爲前鋒,令 得功懷異志,欲引去。 皆賜祭葬,建祠並祀 事聞,贈一貫都督同知,世廕副 副將劉徵擊殺十餘 乃分兵為左

貫子俊傑承廕,崇禎中仕至宣府總兵官,免歸。 李自成犯甘州,城陷,死之。

光榮不能救,反斷河橋截軍民歸路,總督文球劾罷之,卽以渠代。 **渠,京城巡捕營副將也,以御史楊鶴薦,擢總兵官,援剿遼東。** 西平告急,帥鎭武兵往 遼陽被圍,廣寧總兵李

**康忠,陝西人。 萬曆四十四年爲永昌參將。** 銀定、万青以二千餘騎入塞,秉忠提兵三 援,遂戰歿。

略袁應泰薦其智勇,令率私卒守蒲河。 百拒之,轉戰兩<u>書</u>夜。 援軍至,始遁。 東忠追還所掠人畜,邊人頌之。 至則遼陽已破,命爲援剿總兵官,駐防閭陽,援西 擢凉州副總兵。 經

平,竟死。

是役,渠與秉忠繼之。 趙夢麟、開原則馬林、瀋陽則賀世賢、尤世功、渾河則童仲揆、陳策、遼陽則楊宗業、梁仲善。 自遼左軍興、總兵官陣亡者凡十有四人:撫順則張承廕、四路出師則杜松、劉綎、王宣、 朝端卹典,俱極優崇。 而價軍之將,若李如柏、麻承恩輩,竟有未膺

顯戮者。

乾所知,進石塘路遊擊、喜峯口參將。 屢遷潮河川守備。 予一官,否則賚白金五十。 滿桂,蒙古人,幼入中國,家宣府。 楊鎬 四路師敗,薦小將知兵者數人,首及桂。 桂屢得金,不受職。 稍長,便騎射。 年及壯,始爲總旗。 每從征,多斬馘。 移守黃土嶺。 叉十餘年爲百戶。 軍令,獲敵首一, 爲總督王象 後

擢 副 總兵,領中軍事。 天啓二年,大學士孫承宗行邊,桂入謁。 承宗幕下,文武輻輳,獨用陸。 壯其貌,與談兵事,大奇之。 |桂椎魯甚,然忠勇絕倫,不好聲色,與 及出鎮 山海,即

列傳第

士卒同甘苦。

之,慨然請 崇煥、茅元 城築,屹然 明 年 承宗 行。 成重鎭。 儀進曰:「滿桂 世龍 議 出 語具崇煥傳 猶疑其不可,承宗不聽。 關修復寧遠, 可。 但爲公中軍, 中。 問誰 可守者。 不敢 即日置酒,親爲之餞。 公請 馬世龍薦孫諫及李承先,承宗皆不許。 耳。 承宗曰:「旣可,安問中軍。」呼桂語 桂至寧遠,與崇煥協心 袁

相掎 結 種遠至五十里。 |桂善操縱,諸部咸服,歲省撫賞銀不貲。 尤世祿襲之大凌河。 隊東走。 角。 時蒙古部落駐牧寧遠東鄙,遼民來歸者悉遭劫掠,承宗患之。 督餉郎 桂與崇煥追斬首惡,撫餘衆 承宗 中楊呈秀侵剋軍糧 上其功。 諸部號泣西竄,東鄙以寧。 詔擢都督僉事,加銜總兵。承宗乃令典後部,與前 ,副將徐漣激之變,圍崇煥署。 而還 初, 城中郭外,一望丘墟。 拱兔、炒花、宰賽諸部陽受款而 憚桂家卒勇猛,不敢犯, 四年二月,遣桂 至是軍民五萬餘家,屯 陰懷 部趙率教 及總兵 反側。

紅夷酸,傷攻者甚衆。 六年正月,我大清以數萬騎來攻,遠邇大震,桂與崇煥死守。 再論 功,加右都督,廕副千戶,世襲。 明日轉攻南城,用火器拒却之,圍解。 桂疏謝, 並自敍前後功。 帝大喜, 始攻西南 擢都 優認 褒答,再 督 城 司 隅, 知 進左都 實 發西 授 總

督。

列傳第一百五十九 滿桂

皆 關 桂 門。 知 不 桂 和 桂 言 崇煥皆不 初 可 用 與 其 一慮同 率教深 意氣 納。 城 驕 相 或 矜, 謾罵僚屬, 閏六月乃命 得 (債事, 遂召 是役 也, 以 還。 恐壞 怒 故 其 秩 督 封 不 僉書 師 疆 親 王之臣 大計 教, 中 軍 相 府 力言性 乞移之別鎮, 責 事。 望。 未幾, 不 帝聞 可 去, 之,下 崇煥 以 而 調 亦 召 外 敕 自 命 戒 事 悔, Ė 勉。 權 下。 歸 請 率 而 仍 叉請 崇煥 敎 用 之臣 用 復 舉 之 朝 與

言。

帝

可之,命

桂

掛

即

移鎭

關

門,

兼

統

關

外

四

路

及

燕河、建昌諸軍

場場

尙

方

劍

以

重

事

權

之, 城 迎 師 大戰相當。 ,盛推桂 七年 頗 有 Ė. 殺 月 才,請仍鎭 傷, 了, 大 遂入 桂亦 清 寧遠 兵圍 身被重 寧遠。 城, 錦 州 與崇煥爲守禦計。 創。 會蒙古炒 分兵 捷聞, 略 寧遠。 花 加 諸部 太子 桂遣 離散, 太師 俄 兵救, 大清兵進薄 世 世 桂 興之臣 被圍 衣 笊 城下, 多收置之麾下。 籬 Щ o 桂 0 及崇煥休去,之臣 率 桂 副 與 將尤世 總 兵尤 威 世 ※等出 禄 再 赴

死 失 不 插 4 允。 莊 命 部遂挾賞不 崇禎 烈帝 柱 代 已嗣 元年 之。 七月,言官交劾之臣, 位,詔之臣 去。 大同 久 侍 款 桂至,編閱 **毋蹈袁應泰、王** 弛 備,插 八路七十二城堡,邊備 因 部 西侵, 及 桂。 化貞 順義 (故轍 之臣 王遂 一罷, 並 大修,軍民恃 桂 責 入境大掠。 桂 亦 召 阿 之臣 還府。 以 意。 家 楨 無 適 恐。 及巡 大同 桂遂 請 撫 總 張 兵 病 翼 渠家楨 乞 明 論

兵侯 世 明 酴 年 俱 冬十月,大清 戰 敗 逐趨 兵 都 城。 入近畿。 帝 遣官慰勞,犒萬金,令與世祿 + 月韶 諭勤王。 桂 率 Ħ. 俱屯 千騎 德勝門。 入 衞, 次順 無何 與宣府總 合 世

將卒,營安定門外。 祿兵潰 大壽並 召 桂 見,桂 一獨前 解衣示創,帝深嘉歎。 鬭 城上 一發大礮佐之,悞傷桂軍,桂亦負傷,令入休甕城。 十二月朔復召見,下崇煥獄,賜桂酒饌,令總理關、寧 旋與袁崇煥、祖

諸軍 爽,以 禮部侍郎徐光啓致祭,贈少師,世廕錦衣僉事,襲陞三級,賜祭葬,有司建祠。 登雲、孫祖壽諸大將,以十五日移營永定門外二里許,列栅以待。 鷲其營, 有死者。 ·,賜尙方 桂驍勇敢戰。 精騎四面蹙之。 劍,趣出 所部降丁間擾民,桂不能問。 師。 諸將不能支,大敗,桂及祖壽戰死,雲龍、登雲被執。 御史金聲以聞,帝亦不問。 桂曰:「敵勁援寡,未可輕戰。」中使趣之急,不得已,督黑雲龍、麻 及大壽軍東潰,乃拜桂武經略,盡統 副將申甫所統多市人,桂軍凌之。 大清兵自良鄉 帝聞,震悼,遣 回,明日昧 夜 入衛 發

孫 祖壽,字必之,昌平人。萬曆中舉武鄉試,授固關把總。 天啓二年歷官署都督僉事

爲薊鎭總兵官。

領中協,駐三屯營,轄馬蘭、松棚、喜峰、太平四路。經路王在晉、總督王象乾僉謂:「永平設 四路,駐遵化。 孫承宗行邊,議於薊鎭三協十二路分設三大將。以祖壽領西協,轄石匣、古北、曹家、 而江應詔領東協、駐關門,轄山海關、一片石、燕河、建昌四路。 馬世龍

鎭 鎭 隸之祖壽, 列 遵化。 兩鎭 本以衞 於建牙 七年,錦州告警,祖壽赴援,不敢戰, 山海。 仍鎭三屯。」章下兵部,署事 為贅。 今移之三屯,則去山海四百里, 請令世龍 仍鎭 永平,以東協 侍郎張經 被劾罷 世議 於應援為疎。 四路分隸世 歸。 如其言,承宗堅執 及是都城被兵,散家財 龍、應詔,而以中、西 遵化去 三屯 止六十里,今並 如 初。 乃命祖 招 協 壽移 回部 專

事,善體吾心,否則法不汝宥也。」其秉義執節 近婦 祖 壽 初守固 爲大帥,部將以五 關 一遘危 疾, 妻張氏割臂以療、絕 百金遺其子於家, 如 此。 飲食者七 却不受。 日。 他日來省, 祖壽生,而張氏 賜之卮酒曰「却金 旋死 逐終

曲

,從滿桂赴鬭,竟死,

贈

卹

如

制

1, 者 赴 趙 率教 軍 前 立功。 、陝西人。 率教 萬曆中,歷官延綏參將, 受知於經略袁應泰,擢 副 屢著戰 總兵,典中 功。 已,劾 軍事 龍。 遼事 詔廢將蓄家

肵 教 請 而 止 於經略 天啓元 其 年 年,遼陽破,率敎潛逃,罪當死,倖免。 王 遊擊 在晉,願收復前 魯之甲 以樞輔孫承宗令、救難民六千口、至前屯、盡 屯衞城,率家丁三十八人 明年,王化貞棄廣寧,關 以 往。 蒙古據 其 驅蒙古於郊 地 示不 外諸城 敢進, 盡 抵中前 外。 空。

別

傳

第

百

Ŧ.

十

ル

趙

終

教

牛 数 土 乃得 種 兵 一大興 來 入 助 屯 編 田 次難 前 身自 屯守始固 民 爲兵,繕 督課,至 雉堞, 丽 手 率教 足胼 謹斥堠, 軍府由是粗 )所招 胝。 流 承宗出 亡至五六萬。 關閱視,大喜,以己所 立。 擇 其壯者從軍 旣而 承宗令裨將陳練以 乘 悉 輿 贈 加 訓 練 川、湖 餘

事 萬 有学 蒙 古虎 與 一率教 墩兔 素爲 有 隙,遂以 總督 王象乾所撫。 故敗款事訴之象乾。 其部下抽扣兒者,善爲 象乾告兵部尚 書董漢儒 盗,率教捕 斬四人。 將斬 賴 招 撫僉

貽

書

漢儒

,得不死

孫 事, 諫 領前 時 加銜 承宗分關 、後部, 總兵。 內外爲五部。 部各萬五千人。 五. 年冬,承宗去,高第來代,諸將多所更置。 以馬世龍、王世欽、尤世祿領中、左、右部,而令率敎與副將 率教仍駐前屯。 四年 九月, 承宗暴其功於朝。 率教善事第,第亦委信之。 擢署都督

乃召還桂,令率教盡統關內外兵,移鎮寧遠 欲 圍, 功, 匹, 分功。 率教 追至高 再進右 六年二月,蒙古以寧遠被圍,乘間入犯平川、三山堡。率教禦之,斬首百餘級,奪馬二百 遣一都司、四守備東援。 桂不許,且責 臺堡乃還。 都督, 世廕本衞副千戶。 一其不親援,兩人遂有隙。 捷聞,帝大喜,立 桂 惡其稽緩 時滿桂守寧遠, 亦有盛名, 擢都督同 ,拒不納,以袁崇煥言,乃令入。 中朝聞之,下敕戒諭 知,實授總兵官,代楊麒鎭 與率教深相 而桂又與崇煥不和 íЦ 得。 旣 海 解圍,率教 及寧遠被 關。 尋論

列傳第一百五十九 趙率教

錦 錦 州 州 率 七年正月,大清兵 大凌 敎 與 河、中左所 中官紀用 三城,漸圖 南征 , 副 將 朝鮮。 左輔 恢 、朱梅等嬰城固 復。 率教督兵抵三岔 率 敎 移 鎭 錦 守。 河 孙 爲 護 發大 牽制, I, 礮 再 , 加 卒無功。 頗 左 3 都 擎傷。 督。 三月, 五. 相 月 持 崇煥 , 二十四 議 修 兵圍 日 築

重 始 解 時 桂 亦著功寧遠 一, 因 稱一寧、錦大捷 L\_ 0 魏 忠賢等蒙重賞。 率教 加 太子 少傅,廕錦 衣

千戶、世襲。

清兵 月 匹 崇禎元 由 日 戰 大 於 安 遵化 口 年八月移鎮永平,兼轄薊鎮 南 中 10 流矢陣亡,一軍盡歿。 率教馳援,三晝夜抵三屯營。 八路。 帝聞痛悼,賜 踰月,掛平遼將軍印,再移至 總兵朱國彦不令入,遂策馬而 卹典,立祠奉祀 一關門。 西。 明 年,大 +

率 敎 爲 將 廉 勇 7,待 士有恩 ,勤身奉公, 勞而 不懈, 與滿桂 並 稱良將。 二人旣殁,益無能

辦東事者。

朱 來 同 國 等挈家潛遁。 彦以崇禎 二年四月爲薊鎭中協總兵官,駐三屯營。 或 [彦憤,榜諸人姓名於通衢。 以所積俸銀五百餘衣服器具盡給部卒。 十一月六日, 大清兵臨城, 副將

共冠帶西向稽首,偕妻張氏投繯死。

官 惟 賢, 萬曆末,爲甘肅裴家營守備。〔三〕天啓二年以都司僉書署鎭番參將事,歷宣府

遊擊、延綏西路參將,仍移鎭番。

東,乞惟賢赴關門 範 年 糾 首 春 大破之, 斬首百 春 河套 「班記 功二百 五 銀定、賓兔、矮木素、班記刺麻 年春 土巴台吉等分道入掠。 刺麻台吉復糾松山 「有奇。 河套、松山 三兒台吉被創死,進惟賢副總兵。 八十餘級。 諸部入犯,惟賢偕參將丁孟科大敗之,斬首二百四十餘級。 一銀定、歹成及矮木素、三兒台吉以三千騎來犯。 當是時,西部頻寇邊,惟賢屢挫其鋒。 惟賢及鎭將徐永壽等亦分道拒之,共獲首功百 合土賣火力赤等由黑水河入。 其冬,銀定等以三兒之死 惟賢 其秋, 及 惟賢 王之臣督師遼 西路副將陳洪 有 挾憤圖報,益 (再敗 六十。 之,獲 明 年

龍 + 出 馬 擊,前鋒殊死戰。 里 令惟賢率維翰及遊擊張奇化、李居正、王世選、王成等往襲遵化。 世: 列三營。 龍令急援寶坻、漷縣。 明 年 ,崇順改元,惟賢至,用爲山海北路副總兵。二年冬,京師有警。惟賢入衞, 惟賢與參將陳維翰等設兩營以待, 大清兵收入城,後隊乘勢進攻,城上矢石如雨。 明年正 月九日,大清兵自撫寧向山海。 合戰,互有殺傷。 翼日 尋復遺兵出戰,惟賢陷 至城西波羅灣,城中兵 已,大清兵返撫寧, 一至鳳 凰 店,離關 總理 世

圍,佐崇煥 何 미 綱,遼東人。 捍 ,禦有 功 ,進都司 天啓中,以守備典袁崇煥寧遠道中 愈書。 明 年 再 被兵,復堅守。 軍,廉勇善撫士卒。 遷參將,署寧遠副 將 六年,寧遠被 事

崇煥 裁,一 率教 善謀 猶 解 而 用 可 綱 故 任 其 以 崇禎 ·, 宜 前 私 欲 其 也。 佐崇煥更定軍制,歲省餉 **久習遼事** 鎭 屯 黨 更置大將, (才不 之用 併 隸 臣 ,增設三 元 歸 年,巡 以爲 之。 在 仍 大壽,駐 在。 臣下。 宜 寧遠 駐 一四人,以致權勢相 撫 與山 上言:「臣昔為巡撫, 關 臣妄謂 畢自肅令典中 錦 外者,掛 臣 海麻 路,斷宜 州 向 而 所 五. 登雲 建豎 以臣 征遼前鋒 百二十萬有奇。 年奏凱者,仗此三人之力,用 一併歸前: 相易, 一實可綱 中軍 軍。 衡,臂指 掛 將軍 及崇煥再出鎮,復 定議關 何 鋒。 可 平 力,請 印,轄 綱 遼 不 總兵駐關 將軍 運。 專防 外 以春秋二防功,進職右都督 加 11: 寧遠 寧遠。 乃止 設 即。 都督僉事,仍典 內 總兵。 關外 留 者 以副 寧遠 可 而 |網仁而 總兵舊有朱梅、祖 掛 不效,請治臣罪。」 而 將領中軍 及前 其時 平遼將軍印, 以錦州 臣 鋒 魏忠賢竊柄、崔 有 中軍 勇, 二人,而 隸之。 事 廉 ,靖十三營之變。 轄 則 m 大壽。 薊 臂指之不 山、石二路, 能 帝悉從之。 鎭之費雖 遼總兵趙 勤 呈秀欲 事 梅 至 運

綱 諸 明 遂 將 年 營雙望諸山,以綴永平之師。 入 正月、永平、灤州 其 年冬,京 城。 論 師被兵,與大壽從崇煥入衞,數有功。 功,加太子 失守,可綱戰古冶鄉 、太保、 左都督。 令大壽諸軍直 及 )雙望, 已而 一趨欒州。 錦州被圍 頗 有斬獲。 崇煥下吏,乃隨 欒州 ,可綱督諸將赴救,立功郵 四月, 既復, 大壽 樞 大清 輔 孫 東潰,復 兵棄永平 承宗 令可綱 與歸朝 去, 馬山 督 可

守不下。 顏色不變,亦不發一言,含笑而死。 匹 年 築城大凌河, **外之**,糧盡援絕。 命可綱偕大壽護版築。 大壽及諸將皆欲降, 八月甫竣工,大清以十萬衆來攻,可綱等堅 獨可綱不從、 令二人掖出城外殺之, 可

綱

復

進 秋

請 副 總兵。 龍往鎭。 黃龍,遼東人。 尋論 兵部尚書梁廷棟亦薦龍爲總兵官,與元化恢復四衞,從之。 功進秩三等,爲都督僉事,世廕副千戶。 初以小校從復錦州,積功至參將。 崇禎三年從大軍復灤州,功第一,遷 登萊巡撫孫元化 以劉興治亂東江,

徐敷奏主之。 先是,毛文龍死,袁崇煥分其兵二萬八千爲四協,命副將 後改為兩協, 繼盛領東協, 興治攝西協。 語詳崇煥傳。 陳繼盛,參將劉興治、毛承祚、 興治兇狡好亂,與繼

列 傳 第 一 百 五 十 九 善 黄 龍

興祚 掠。 亂 鰲 將 盛 咸 盛 乃定。 如 周 誣 不 "', 而 故 島去 文 興 相 郁 祚 繼盛 能。 令 登 詐 四 大 興治 將印 州 死, 年三月復作亂, 至 其兄參將 四 ,伏兵執之,並執 及 鎭 十里。 ,令撫定 東江 以謀叛誣 興祚 時登萊 興治。 舉 陣亡,繼盛誤聽諜報 杖其弟興基 朝大駭, 陷己者, 總兵官張 理 會永平已復, 餉 經 以海 逐殺 歷 , 劉 可大赴援永 外未 繼盛 殺參將沈世魁家 應鶴等十一人。〔三袖出 興治稍戢,返 追詰 及 , 謂未 應鶴等。 也 平, 死。 帝 興治與諸弟兄放 東江 衆。回 興治憤, 又僞爲島 用 廷棟言,趣 世魁率其黨夜襲殺興治 龍莅皮島受事,興治猶桀 擇 中商 書,宣於衆 H 爲 可大還登州 舟 民 興祚治 . 長 奏 Щ ,詭言 島 通 喪, 肆 諸 授 此 優 副 殺 卹 將

通 孔有 之。 高 裕 率 成 部卒假索餉名圍 ,疏請正 "德反, 其冬, 友 龍急 遊 / 者據 擊耿仲明 遣 仲明 以五 有德 旅順 尚 可 罪。 等欲 年正 斷 喜 之黨李梅者,通洋 龍署,擁至演 、金聲桓 會元化劾龍 棄登州 關寧、天 一月陷 登州 等撫定諸 走入海, 津 援 記 剋 餉 致 武場 招島 師 事 龍造 中 了,折股去耳鼻,將殺之。 島, 覺, 龍繁之獄。 酯 諸將 兵譁, 令遊 而躬巡 副將襲正 擊李維鸞偕 帝命充爲事官, 旅順 其 地、慰 副 祥率舟師四千邀之廟島 仲明 將 商民, 陳 弟 可 有 都司 喜等擊走之,卽 諸將爲救免。 時、廣鹿島 而覈 誅叛黨 仲裕 仲明主使狀。 在龍軍 , 縱 副 將 火 未幾 移 ,謀作亂 焚其 毛承 駐 颶 ()龍捕 其地 風 仲明 禄皆 舟 破 舟 一接始 十月 往 遂 斬 賊 ), 压 仲 黨 從

祥陷贼中。 後居登州,謀爲內應,事露被殺。 初,龍駐旅順大治兵。 賊拘龍母妻及子以脅

之,電不顧。

順,邀擊之。有德幾獲而逸。斬賊魁李九成子應元,生擒毛承祿、蘇有功、陳光福及其黨高 志祥等十六人,獲首級一千有奇,奪還婦女無算,獻俘於朝。帝大喜,磔承祿等,傳首九邊, 復龍官。承祿,文龍族家子也。 六年二月,有德、仲明屢爲巡撫朱大典所敗, 航海遁去。 龍度有德等必遁, 遁必經旅

祭葬,予世廕,建祠曰「顯忠」,惟鸞等附祀。 破。 能脫,自剄死。 虛,遂引大淸兵來襲。 若速持吾印送登州,不能赴,卽投諸海可也。」應華出,龍率惟鸞等力戰。 有德等大憤,欲報龍。 。惟鸞及諸將項祚臨、樊化龍、張大祿、尙可義俱死之。 龍數戰皆敗,火藥矢石俱盡,語部將譚應華曰:「敵衆我寡,今夕城必 會賊舟泊鴨綠江,龍盡發水師剿之。七月,有德等偵知旅順空 以副總兵沈世魁代龍爲總兵官 事聞、贈龍左都督、賜 圍急, 知不

戰而 援。 月,廣鹿島副將尙 走。 有德等來襲,世魁戰敗,率舟師走石城,副將金日觀陣 世魁本市僧,其女有殊色,爲毛文龍小妻。 世魁亦陣亡,士卒死傷者萬餘。 可喜降於我大淸,至島中勢益孤。 從子副將志科集潰卒至長城島, 世魁倚勢橫行島中,至是爲大帥。 十年,朝鮮告急,世魁移師皮島爲聲 歿。 登萊總兵陳洪範來援,不 欲得世魁敕印。 七年二

島 監 雖 軍 副 有 使黃孫茂不予,志科怒殺之,並 殘 卒,不能成軍 朝 廷亦 不 置 大 殺 帥 迎餉 以登萊總兵遙 通 判 邵 啓。 領 副 之而 將白登庸遂 E 明 年 率所部降 夏 楊 嗣 昌 大 決 清。 策 虚 諸

徙

其

〈兵民

寧、錦

而

諸

島

空。

金 H 觀,不知何許 人。 天啓五 年以將才授守備, 劾 力關 門。 擢鎭標中 軍 遊 擊, 加 參 將

行

薊鎭

東

路

遊

學事

,專領南

兵

守不 州 軍復 君 將 同 援 吳應 於 、玉皇二山, 知 副 總兵。 遵化。 總 崇禎 不屑 下。 理 龍等結 馬世 朝 初 爲之下。 廷 錄 加 營毛山 功 龍。 獎其功,驟 進攻馬蘭城甚 副 ,進左都督。 總兵, **今參將王世選等赴救,兵乃退。** 總督曹文衡劾 , 規 守馬蘭峪。 加都 取 羅文 急。 時總 督 同 谷關 日 日 兵 知 觀 觀器 鄧 0 堅守, 一年正月,大清兵破京 玘 四 師 轄馬蘭 月 小易盈, 敗 與副 親 日 然 觀 大礮。 將謝尚 遣 松 恃功驕縱, 尋復 二將馳 棚 二路, 以二千餘騎 政 酸炸,焚頭 東列 、曹文詔等攻復大安城,遂偕諸 援 日觀 帝特戒飭 城。 亦 敗 應受節制 死 目 歿。 兵部侍郎 攻, 手 而 足、意 大清 E Ë 觀偕世選等死 劉 以 兵乘 氣不 **外之,移**萊 之綸 珇 銜 勝 衰 都督 遣部 據 府

明、尚 祿大夫、太子太師,世廕錦衣副千戶,建 登庸尋帥所部降。 + 可喜等先攻鐵山。 ·年春, 大清 兵攻朝鮮, 日觀偕諸將楚繼功等相 四月分兵攻皮島,水陸 命從登萊總兵陳洪範往救,駐師皮島。 祠。 持七晝夜,力不支, 繼功等贈 一夾攻。 卹有差。 副 將白登庸先遁,洪範 陣殁, 島城隨破。 大清遣 孔有德、 亦 避走石城 贈特進光 耿仲

廟算不定,僨事者不誅,文墨議論之徒從而撓之,徒激勸忠義無益也。 帥,委身許國,見危不避, 贊曰:古人有言,彼且爲我死,故我得與之俱生。 可謂得死所者與 1 於時優 卹之典非不 故死封疆之臣,君子重之。 甚渥, 然而 無救於危亡者 觀遼左諸

#### 校勘記

- 旣 而承宗令裨將陳練以川湖土兵來助 陳練, 本書卷二五〇孫承宗傳、 明史稿傳一 二九趙率
- 教傳都作「陳諫」。
- 爲 甘肅裴家營守備 裴家營,原作「斐家營」,據明史稿傳一二九官惟賢傳 改。
- 並 執理餉經歷劉應鶴等十一人 劉應鶴,原作「楊應鶴」,據明史稿傳一二九黃龍傳、懷宗實錄

記

崇順三年四月乙卯、國權卷九一頁五五二八改。

152 殺參將沈世魁家衆 沈世魁,懷宗實錄卷六崇顧六年九月壬寅條、國権卷九二頁五六一六、濟

太宗實錄卷三四崇德二年四月條都作「沈世奎」,本書卷二三莊烈帝紀、 懷宗實錄卷十崇禎十

年四月辛亥條都作「沈冬魁」。

II.  $\cup$ 七年二月廣鹿島副將尙可喜降於我大淸 二月, 本書卷二三莊烈帝紀、 清太宗實錄卷一七天

聰八年(崇禎七年)正月甲寅條都作「正月」。

# 明史卷二百七十二

### 列傳第一百六十

金國鳳 楊振 楊國柱 曹變蛟 朱文德 李輔明

劉峰基 乙邦才 馬應魁 莊子固

帝大喜,立擢署都督僉事,爲寧遠團練總兵官。 兵屢登屢却,遂分兵攻塔山、連山,令銳卒分道穴城。 礮,臺堞俱摧 金國鳳, 宣府 城中人負扉以行。 人。 崇禎中,以副總兵守松山。 國 鳳 間 出 兵突擊,輒敗還,乃以木石甃補城壞處。 再論功,署都督同知,廕錦衣衞千戶。 十二年二月,大清以重兵來攻, 國鳳多方拒守,終不下,閱四旬 環 圍解。 城發

矢盡力竭 是年十月,大清兵復攻寧遠。 ;與二子俱死。 帝聞痛悼,贈特進榮祿大夫,左都督,賜祭葬,有司 國鳳憤將士恇怯,率親丁數十人出據北 Щ 岡鏖戰。 建祠,增 世 移時 . 職

列傳第一百六十 金國鳳

及國鳳父子柩歸,帝念其忠,命所過有司給以舟車,且加二祭。其妻張氏援劉綎例,乞加宮 及統兵出戰,惟總兵官令是聽。庶軍心齊肅,戰守有資,所係於封疆甚大。」帝卽允行之。 才力短也,由營伍紛紜,號令難施,而人心不一也。乞自今設連營節制之法,凡遇警守城, 非其才力優也,以事權專,號令一,而人心肅也。 迨擢任大將,兵近萬人,反致隕命。 部議格不行,而請於世職增級外,再廕本衞試百戶世襲,以勸忠臣。帝可之。 總督洪承疇上言:「國鳳素懷忠勇。 前守松山,兵不滿三千,乃能力抗强敵,卒保孤城。 非其

弟夜行畫伏,渡鴨綠江入皮島。 人堅守,援軍即日至矣。」一顾詣城下致振語,城中守益堅。 軍盡覆。 當松山被圍,巡撫方一藻議遣兵救援,諸將莫敢應。 振 ,義州衞 振被執,令往松山說降。 人。 世爲本衞指揮使。 毛文龍知其父子才,並署軍職。 未至里許,踞地南 天啓二年,河東失守,歸路梗,其母自縊 向坐,語從官李祿曰:「爲我告城中 振、祿皆被殺。 獨副將楊振請行,至呂洪山遇伏, 文龍 死,振歸袁崇煥,為寧 事聞,命優恤 振隨父及

之, 遠 千總。 擢副總兵。 崇禎 二年從入衞。 監視中官高起潛招致之,不往。 救開平有功, 進都司 愈書。 中以他事,落職。 郵馬 山之戰, 用一藻薦,復官,及是 以遊擊進參將。

死難

充為 昇敗歿, 事官, 振從父國柱,崇禎九年爲宣府總兵官。十一年冬,入衞畿輔,從總督盧象昇戰賈莊,象 國柱當坐罪。 戴罪圖功。 十四年,祖大壽被困錦州,總督洪承疇率八大將往救。 大學士劉宇亮、侍郎孫傳庭皆言其身入重圍, 非臨敵退却者比。 國柱先至松 び

大清兵四面呼降,國柱太息,語其下曰:「此吾兄子昔年殉難處也,吾獨爲降將

軍乎!突圍,中矢墮馬卒。事聞,贈卹如制。

山、陷伏中。

品夫人,有司月給米石,餼之終身。 國柱二子俱殀。 妻何氏以所遺甲胄弓矢及戰馬五十三匹獻諸朝。 帝深嘉歎,命授

雖死,老回回、過天星、大天王、蝎子塊、闖場天諸渠未滅。 友等於張麻村、隴安、水落城、唐毛山,又破劉道江等於銅川橋,勇冠諸軍。 進參將。 曹變蛟,文詔從子也,幼從文詔積軍功至遊擊。 文詔移山西,變蛟從戰輒勝。 及文韶改鎭大同,山西巡撫許鼎臣 崇禎四年從復河曲。 變蛟驍勇絕人,麾下健兒千百, .言:「晉賊紫金梁 明年連破賊紅軍 以御史吳姓薦,

七年,羣賊 傅 第 入湖廣 百 六 + 命變蛟南征。 曹 變 蛟 文韶困於大同,又命北援。 七月遇大清兵廣武,有戰 六九七五

才乃文詔

亞,乞留之晉中。」從之。

功。其冬,文詔失事論戍,變蛟亦以疾歸。

追 級。 原 逐 詔 絕 北 旣 靖 大嶺 三十 戰 叉 明 、躍昌 | 廣衞 歿 與 年 、總兵左 餘 文 變蛟 ,復擊破之。 夜. 里。 ,轉戰安定、 詔 出 收潰卒,復 起討 朱陽 光 叉 先 與 |陜 關 敗 副 西 會寧 將 迎 賊 光先戰不 が 尤 成 變 丁,抵 霍文、 乾 \_\_\_\_ 州。 軍。 蛟 靜 以 寧 遊 利,賴 迎祥 總督 故 擊孫守 固 官 寧 中箭 洪 從。 變蛟陷 ", 賊 承 法 走, 大捷 疇 屢挫。 追 薦 陣, 闖 斬 金嶺 爲 王 首 乃 副 其秋 高 獲  $\stackrel{\cdot}{=}$ 總 JII 迎 百五 全。 鏖 兵, 祥 追 混 真寧之湫 置 十餘 九 與 天星等,敗 廖 年 戦 下 破闖 級。 鳳翔官亭, , 與 頭鎭 將 已 高 之蒲 澄 而 一,皆爲 傑 迎祥 城 破 斬首 城 賊 軍鋒。 偕 自 關 賊 光 華 七 Щ 陰 先 一百餘 西 鎭 走 等 南 文

算,食 急還, 疇 變蛟、光先 傳庭共 光先 虚 賊 年二 引 逐 矢滅 顯祖 燙。 及祖 遁。 月 、巡撫孫 皆無 賊。 九月 大朔、孫顯 傳 庭 ",階州 功, 傳庭戰於東,承疇 已誅 傳庭部卒許 獨 迎祥 變蛟降小紅 陷, 祖 合擊。 與光先 ,其黨闖將混 忠叛, 四月望,入山 並停俸。 狼 戰於西, 勾賊混十萬謀 餘 天 、賊竄 星、 俄 東賊幾盡 擢 遇 走徽州、兩當、成、鳳間 過天 都 賊 督 郭家壩,大雨。 犯 星 踞洮 西安。 賊在 、岷、階 西者 變蛟方西追 洮 り復由 總兵官。 諸將 、文深谷間 一,不 階、成 力戦 敢 過 大逞。 當是時, が、賊 天星, 出 西 承疇 死 和 傷 聞 承 遣 無 亂

賊瞷蜀中虛

陷

寧羌州,

分三道

連陷三十餘州縣。

承疇率變蛟等由沔縣歷寧

羌,過七 盤 、朝天 關。 山高道 狹, 士馬饑疲,歲暮抵廣元 賊已走還秦。 變蛟等回 軍邀擊,

斬首五百餘級。

時 兵 部 尙 書楊 嗣昌創「四正六隅」之說,限三月平賊。 年四月以滅賊踰期,普議降

罰`變蛟、光先並鐫五級,[I] 戴罪辨財。

自 設 成 憚 及 不 餘 連戰 過 三覆 變蛟 敢 成 賊 爭管王復走成縣、階州, 天 六隊 妻 潰 斬首 出 星 賊之 於潼 ,惟六隊勢猶 女 ,乃走漢中, 入塞。 及其黨 俱 一部仍 六千 再 關 失,從七騎遁去。 入秦 之南 伏 大 七百有奇。 祁總管避秦兵, 復謀 階、 丽 也, 駐洮 原。 又爲光先所扼。 張。 文, 其渠 州 變蛟 六月, 獨闖將李自成 魁 番地乏食, 為變蛟所 (追及) 號六隊者, 扼戰不力。 餘皆降。 光先自固 大呼斫贼。 六隊、祁總管皆降,惟自成 犯蜀, 扼。 賊多死亡。 是時,曹兵最强,各鎭依之以爲固 與大天王、混天王、爭管王四部連營東犯, 以三月自 乃走入岷 其別部 原進兵, 副將馬科、賀人龍拒之。 伏盡起,賊 洮州 號三隊及仁義王、混 州及 變蛟轉戰千里, 賊 Ë 出 西 奔隴州、淸水。 番 和 屍相 地。 禮縣 東遁。 枕藉。 承 川 身不 嚋 中。 令變蛟偕 將還走階 承疇令變蛟 天王降於 村民 解甲者 光先追 變蛟還剿, 錄 用用 關中平財功, 大 至 二十 賀 文及 光先, **棒** 秦州,六 人 窮追,而 龍追之, 湿 擊逃者。 七晝夜。 賊伏 西鄉 天星、 m 隊 自 置

變

蛟

進

變蛟

左

都

督

明

儉 秦 將 乞令 卒 士 各 + 思 變蛟 有 歸 賜 月 兵西還,帝不 多逃 京 未 師 幾 亡者, 戒 戰 嚴, 渾河 追斬 許 召 承疇 尋用 之乃定。 無 功 入 爲 ; 衞 再 東 協總 時 戰 變 太 蛟及光先 張 平砦 兵官 獻 忠 北 羅汝才旣 從之。 小 有 斬 明 降復叛 獲。 年 二月, 及 陝 解 嚴,留 抵 西 近 再用 畿 屯 兵。 遵化 帝遣 總督 使 麾下 迎勢, |鄭|崇 皆

大清 兵。 軍 兵狀 兵 馬 合 科 兵 帝然之,敕 十 關 退 叉請 三年 、寧遠總兵 內 屯 外 解 |義 五 見卒十五 肇基 州 月, 所 司 吳三桂、 錦州 任,代 承疇 速 一措 萬 告急。 議 以王 給 人備戰守。 遣變蛟、光先 遼東總兵劉 一廷臣 從總督 遣光 承疇 用 肇基 、科之兵 承疇言, 先 出 西 , 關, 遇 歸 大清 入關 師行 代以白 駐 寧遠。 兵於 養銳,留三桂、肇基 糧從, 廣 黄土 恩。 七月 必 臺 芻糧足支一 部 與援剿 及松 議 咸從 Щ 總兵左光先、 於松 之,而 杏山 歲, 一、杏間 然 請 互 後 調 一,佯示 有 山海總 旁 口 殺 議 近 傷 益 邊 進

蛟 徵 廣 宣 恩 府 先 總 兵 後 楊 出 國 關 柱 , 合三桂 、大同 總兵王樸、密雲總兵唐通各揀精兵赴援。 、廷臣凡八 大將,兵十三萬 馬馬 四萬、並 駐 寧遠 以十 四 年 三月 偕

總 救 兵李輔明代之。 錦 州 承 嚋 主 七 月二十八 持 重 而 承疇命變蛟營松山之北,乳峰山之西,兩山間列七營,環以長壕 朝 日,諸軍次松山 議 以 兵 多餉艱, 營西 職 方郎 北 岡 張 、若麒 數戰, 趣 戰。 圍不 承疇 念祖 八月, 大壽被 國柱 圍 戰歿,以 人,乃 俄 議 11 西

伏, 斗、姚恭、 副 我太宗文皇帝親臨督陣,諸將大懼。 廷 廣 應援俱絕矣。 將 臣 思 大敗,僅以 夏成 聞 輔 敗, 明 德爲 王之楨, 相 馳至松山 繼 身発。 內應、松山 九月,承疇、變蛟等盡出 走。 副將江翥、 , 先後喪士卒凡 自杏山 與承疇固守。 逐破。 迤 饒勳、 南沿 承疇、變蛟、廷臣及巡撫丘民仰, 海, 五萬三千七百餘人。 三桂、樸奔據 朱文德,參將以下百餘 及出戰,連敗,餉道又絕。 城中馬步兵,欲突圍出 東 至塔山, 杏山。 爲大清兵邀 自是錦州圍 越數日,欲 人皆被執 ,敗還。 撃, 樸先夜遁,通、科、三桂 故總兵祖大樂, 溺 守半年,至 益急,而 走還寧遠。 見殺,獨承疇與大樂 海 死 者無算。 松山 明 兵備 至高橋遇 年二月, 亦被圍, 變蛟 道張

斥罷。 文德、義州衛人、後家錦州。 + 一年起故官。及城被圍,領前鋒拒守甚力,城破竟死。 崇禎時, 積功至松山副將。 忤監視中官高起潛,爲所中, 獲発。

高 氏以贈廕請,乃贈榮祿大夫、太子少保,世廕錦衣指 三月,大壽遂以錦州降。 杏山、塔山 連失,京師 大震。 揮 **t**僉事 詔賜諸臣祭葬,有司建祠。 變蛟

何 反加 ,念守寧遠功,與輔明、廣恩、通皆貶秩,充爲事官 法 提督? 司 會鞫 | 兵部尙書陳新甲覆議,請獨斬樸, 勒科軍令狀, 再失機即斬決。 王樸罪。 御史郝晉言:「六鎭罪同,皆宜死。 三桂 實遼左主將,不戰而逃,奈 三桂失地應

列

或 破 柱 賊於滁州。 ,竟敗。 輔 明,遼東人,累官副總兵。 十六年爲援剿總兵。 敍功,加都督僉事。 是冬,大清兵薄寧遠,輔明馳援,軍敗猶力戰,歿於陣。事 崇禎八年從祖寬擊賊,連蹙之嵩縣、汝州、確山。 十二年擢山西總兵官,被劾罷。明年從承疇出關,使代 明年追

聞,贈特進榮祿大夫、左都督,世廕錦衣副千戶,賜祭葬,列壇前屯祀之。

象昇入衞,方戰欒城、東鹿間。 九年秋,都城被兵,詔樸入衞,賚蟒衣彩幣,竟無功。十一年加太子太保。是冬,從總督盧 六千、監以中官楊應朝、盧九德、屢有斬獲功,進右都督。 世威傳中。 樸,榆林衞 樸由父廕屢遷京營副將。 人。父威,官左都督,九佩將印,爲提鎭者五十年。 或言大同有警,即引兵歸。 崇禎六年,賊躪畿南,命撲與倪龍爲總兵官,將京軍 明年代曹文韶鎭大同,進左都督。 及是救錦州,以首逃下詔獄。 兄世欽,里居殉難,見尤

殿, 命從大學士吳甡南征,不果行。 科 ,起偏裨至大帥,戰功亞變較,與三桂同守寧遠有功。十六年春,督兵入衞 明年三月從李建泰西征。 李自成兵至,科逐降,封懷 ,賜宴武英

五

年五月伏誅。

廣恩,初從混天猴爲盜。 旣降,屢立戰功。松山敗還,代馬科鎭山海關。 是年十一月, 列傳第一百六十 曹變蛟

之入 破 孫 犒 吳 旨 京 傳 譙 其 甡 餇 廣 戒嚴, 庭 將 用用 責 軍 恩 辨 南 西 爲 且 而 賊 征 奔 諭 廣恩 武 冀 密 經 以溫 固 其 十月, 請 え 原 略 後 旨。 帝 衞 效 :嚴旨 廣恩 賊 郟縣 資銀 將 特 廣 」逮治 恩 追 以 命 師 幣羊酒。 躡 逐 帝 敍 覆, 及之, 驕 , 而 功。 頻 戮 加廣 不爲姓 己力救,率之剿寇。 大將,己又多過, 明 卽 俄戦 恩盪 年 開 四 門降。 龍 用,大掠 寇 月合 王口 將 八鎭 軍 自 , 臨洺 稍 成 俾 兵戰 懼 有 大喜 緣 關 廣 不 斬 道 敢 螺 思 獲, 一,握 收 徑歸 感 至 Щ 潰卒 甚。 手 9 以 悉潰敗 假 陝 捷聞 共 索餉 以保 西。 飲 無 何 封 潼 名, 帝 ·',帝 帝 總 桃 關 不 始 督 遣 頓 源 得 惡 中官 眞 伯 趙 Ë 未 廣 定。 光抃 幾 恩觀 齎 命 潼 大學 請 隸 望, 萬 督 帝 關 降 金 亦 召 師

協 性 西 Ш 移守 協 未 東 而 行 通 通 命 居庸 帝 而 尾 通 П 斥 顧 專轄 之 辯 ,封定 通 功 而 無 厚 令 中 南 勇 ·,有。 西伯。 協 通 略 抵 蟒 轄 青州 薊鎭 十月 衣 旣 敗 玉帶之賜,召見稱 無 何 , 西 歸 迄 關 財賊 協 不 仍 外 敢 犯 鎭 有 五. 一戰。 關 密 警, 月 卽 雲。其年冬,奉 汰密雲總兵官 命 偕 明 卿 率 中官杜之秩 年 師 而 復 不名, 赴 尾而 援, 詔 命 錫之宴,獎勞備 以銀牌二百爲賞功 北, 入 迎降,京 兼 衞 戰 轄 螺 命守禦三河 # Ш 師 協 遂陷 匹 敗 至。 路。 績。 用。 已,命 平谷。 明 尋 年,賊逼宣府 用 事 孔希 定,復 從姓南 大清 貴 移鎭 於西 兵下 征

陳 永 將 福 也,與賊 者, 守開 角 封 陝西 射 功 李自成中目。 最 多。 自 遼左 及自成陷 遣還,廢不 山西,令廣恩諭 用。 後 聞 廣 之降。 恩 從 賊, 永 福懼誅,意 亦詣 賊降。

猶 豫。 自 成 折 箭 以示信 ,乃降,封爲文水伯。 後自成敗還山西, 永福為守太原 ,殺晉府宗室

殆 盡

警,始 崇禎 有 未幾 功 一世 七年 劉 還 而 肇 山海, 其部 威 從世威援宣 基,字鼎維,遼東人。 罷,肇基 下皆邊軍 竟坐前 及遊擊羅岱 府 罪 小人 ",又從 解 戍 職,令從 思 剿中 歸,與寬 分 嗣世職指揮愈事,遷都 將其兵,與祖寬大破賊 征 原 自效。 贼 軍課 進遊 俄 而 以固守永平 走。 擊, 總理 戍雒 司 汝州 盧象昇乃遣之入秦。 愈書, 南 功復 關 草川 ,斬首千六百有奇。 隸山 職,屢遷遼 0 海總兵官尤 明 年 遇 東 賊 副 其秋、畿輔 總兵 世成 戰 後從 敗 廖 傷臂。 寛數 下。 有

松 赴 Щ 松 帝怒, 、杏山。 Щ 十二年冬,薊遼總督洪 爲聲援。 下宗 九月,復戰杏山,肇基軍稍 龍獄,擢 三桂 困 松、杏間,肇基救 肇基都督僉事 承 疇 請 用 爲 任之。 却。 署總兵官,分練寧遠諸 出之,喪士卒千人。 承疇 明年三月, 甄 別諸將,解肇基 錦 州 七月 營卒。 有 警。 與 職 承疇 兵部 ,代以王廷臣 曹變蛟等戰黃 命吳三桂 尙 書傅宗 偕 龍 土 稍 臺 肇 及

屢加 十七年春,加 左都督、太子太保。 都督同 知,提督南京大教場。及福王立,史可法督 可法議分布諸將,奏薦李成棟、賀大成、王之綱、李本身、胡茂 師維 、揚、肇基請從 征 自

則 基 楨 駐高 用 爲總兵官。 張 天祿駐瓜洲。十一月,肇基、棲鳳以可法命謀取宿遷。 家集,李棲鳳駐睢寧,以防河。 成棟鎭徐州,大成揚州,之綱開封。本身、茂楨隸高傑麾下,爲前鋒。 棲鳳 本甘肅總兵,以地 失留淮、揚間 初八日渡河, 也。 復其城。 閣 標前鋒, 而 越數 令肇

日

,大清兵圍邳州,軍城北,肇基軍城南,相持半月,大清兵引

去。

而 妻子。 城破 應魁、莊子固等皆同 順治二年三月,大淸兵抵揚州,可法邀諸將赴援。 了。率所部四百人巷戰,格殺數百人。 旣入城,請乘大淸兵未集,背城一戰。 死。 後騎來益衆, 力不支, 一軍皆沒。 可法持重、肇基 獨肇基自白洋河趨赴,過高郵不 乃分守北門,發礮傷圍者。 副將乙邦才、 · 見

邦 功乃得出。 逐賊,陷淖 邦才,青州人。崇禎中,以隊 中。 邦才授以己馬,分矢與之,且走且射,殪追騎十餘人,始得及其軍。 賊圍而 射之,馬斃, 得功徒 長擊賊於河南、江北間。 少鬭。 天將暮,僅餘二矢。 大將黃得功與賊戰霍山,單騎 邦才大呼衝賊走,得 得功自是知

於 重 中日 時 有 張 衡者,亦 為 ک |邦才、張衡者。]兩人入謁,即牒補副將,以其兵授之,曰:「爲我入六安, 以驍 敢 么名。 賊圍六安急,總督馬士英救之。 甫至 一,斥 其 左右 副 將 加 號

列

傳

第

懈 取 \_! 知 州 城 中 狀 人喜 來 報 守益 兩 人 堅。 出 , 兩 卽 人 簡 促 ·精騎二百,夜衝賊陣而 知 州 署狀,復奪圍 出 不不 入, 遶城大呼, 日 損 騎 一、「大 軍至矣, 固 守勿

時 潁 壽 六安 霍 Ш 諸 州縣數被寇 了,邦才大小十餘戰,咸有 功。 及可法鎭揚州, 攜之

行。

至是戰敗,自

刎

死

毎戦 魁 大 披 聲 馬 白 日 應魁,字守卿,貴池人。 .甲,大書「盡忠報國」四字於背,至是巷戰死。 「勿怖死! 死,命也。」連發二矢殪二賊,賊 初爲小將,率家丁五十人巡村落間。 卽 退。 可法 因 拔為 猝遇賊,衆懼欲奔。 副總兵,俾領 (旗鼓· 應

兵,俾 兵許 三日 而至。 定國 莊 興屯 子 救 固 於徐州、歸德間 城將破 開封,軍 ,字憲伯,遼東 、欲擁 半道譟歸,定國獲罪。 可法出城,遇大清兵,格 人。 子固募壯 年十三,殺人亡命。 士七百人,以赤 子固 鬭 輯 後從軍有功,積官至參將。 死。 餘 衆, 心報國 得発議。 爲號。聞揚州被圍, 後可法出 鎭, 嘗從 率衆 用 Щ 爲 、馳救, 西總 副總


李大忠、孫開忠,都司姚懷龍、解學會等十餘人,皆以巷戰死。 他 若副將樓挺、江雲龍、李豫, 參將陶 國祚、許謹、馮國用、陳光玉、李隆、徐純仁,遊

於挫敗,遂至謀勇兼絀,以身殉之。蓋天命有歸,莫之爲而爲者矣。 贊曰:金國鳳之善守,曹變蛟之力戰,均無愧良將材。 然而運移事易,難於建功,而易

校勘記

(二) 變蛟光先並鐫五級 五級,原作「五官」,據懷宗實錄卷一一崇禎十一年四月丙申條、國權卷九

六頁五八○六改。



# 明史卷二百七十三

### 列傳第一百六十一

左良玉 鄧玘 賀人龍 高傑 劉澤清 祖寛

急,詔昌平軍赴援,總兵尤世威護陵不得行,薦良玉可代率兵往。已,恂薦爲副將,戰松山 塹山,直抵遵化。 死,良玉坐削職回衞。已,復官。 左良玉,字崑山,臨淸人。官遼東車右營都司。 論恢復四城功,與文詔等俱進秩,隸昌平督治侍郎侯恂麾下。 總理馬世龍令從遊擊曹文詔援玉田、豐潤,連戰洪橋、大 崇禎元年,寧遠兵變,巡撫畢自肅自經 大凌河圍

兵往剿,大指專辦河南。 多智謀, 良玉少孤,育於叔父。 撫士卒得其歡心,以故戰輒有功。 會賊寇修武、清化者竄入平陽,因檄良玉入山西禦之,頗有斬獲。 其貴也,不知其母姓。 時陝西賊入河南,圖懷慶。 長身顏面,驍勇,善左右射。 廷議令良玉將昌平 目不 ·知書, 列

兵,帝令良玉受尚璟節制,與文詔同 加 ·南巡撫樊尙璟以良玉駐澤州,扼豫、晉咽喉,可四面爲援兵。 心討賊,有急則秦兵東,豫兵西,良玉兵從中 韶從之。 。時曹文詔將陝 横 西

已而 勢孤 敗。 擊越效忠,追參將陶希謙,希謙墜馬死。良玉擊之萬善驛,至柳樹口大敗之,三擒賊首數 人,賊遂西奔。 甚。總兵鄧玘方立功萊州,乃命將川兵益以石砫土司馬鳳儀兵馳赴良玉,與共角賊。 鳳儀以孤 尚璟罷,以太常少卿玄默代之。三月,賊再入河內,良玉自輝縣逐之。 六年正月,賊犯 軍戰沒於侯家莊 河南額兵僅七千,數被賊,折亡殆盡。 濕州 陷陽城。 良玉敗之於涉縣之西陂。二月,良玉兵與賊戰武安,大 良玉將昌平兵二千餘,數戰,雖有功, 賊奔修武、殺遊

萬善。 卑身經 以中官楊進朝、盧九德監其軍,「三」 、良玉等先後與賊戰,勝負略相當。 樸體 ,又自葉縣追至小武當山,皆斬賊魁甚衆。 當是時,賊勢已大熾,縱橫三晉、畿輔、河北間。 百戰,位反在 良玉又扼之武安八德,斬獲尤多。 相 敵 京營兵至,共擊賊, 龍、樸下,恐聞 而別遣 而解體。」 數有功。 良玉、斑辨河南、屢破之於官村、於沁河、 中官監良玉等軍。 會帝命倪龍、王樸爲總兵,將京營兵六千赴河 良玉 乃令良玉、卑署都督僉事, 然諸將以中官監軍,意弗善也。 敗賊 諸將曹文詔、李卑、艾萬年、湯 濟源 河內,又敗之永寧青山嶺銀 職方郎 中李繼貞日 爲援剿總兵官,與 良玉、李 於清化,於 九州、鄧 南, 洞

泉、 請。 兵待之境上。 猛 諸 其冬, 贼 虎村 將 俟 以朝命 賊 四 贼 奔者復折 張 乃竄 不出 妙 手、 盧氏 戰。 賀雙全 而 Щ 東。 會天 中,由 等三十 良玉 寒河 此 九九州 自 冰 六家 順、襄 合, 扼其前, 詭 賊逐 入 詞  $\prod$ 乞撫於 從澠 中 京營兵尾其後,財 ·, 折 池 分巡布 徑 而 掠秦 渡, 巡撫 、隴,復 政 司 默 常 出 率 道 大困,官 沒川 良玉 立 中、湖 因 九州 監 軍 連破 軍 北 、卑、玘 進朝 '',以 之 犯 柳 以

河

南

中

原

益

大殘

破

而三晉、畿

輔

獨

不

受賊

渦

者十年。

進,皆 餘 者 1-陽 他 無 里。 以 里 將 事 自 陳治 賊 趨 因 旣 重 旣 糧 鄖 乏, 0 邦駐 渡 而 陽 宿 督 奇 河 飽 以故多畏賊。 汝州 撫檄調,不時應命,稍 瑜 去,良玉 īfij "我兵寡備多,饋餉不 失李自成於 出 陳 關 與諸 永 趨 福 间 而良 將 扼南陽,皆坐甲自保 車箱 南 分 玉在 地 趨 守 廷 稍露跋扈端矣。 河南 一懷慶時,與督撫議 繼。 議 陳奇瑜 合晉、豫、楚、蜀 者又分為三, 賊 介馬馳,一 、盧象昇 而 Ë, 日 方角 郡邑所在告急 不合,因是生 不能 兵四 夜 月遇賊於磁山,大戰數十,追奔百 數百里,我步 賊秦、楚, 大 面 創 剿 賊 之。 也。 心,緩追養寇, 賊 七 良玉 賊 乃 兵 年春夏間, 毎 分 多,騎 營數 扼 軍 新安 少,行 萬 八澠池 中州 多收降 兵番 向 數 幸

能 救。 八 年 匹 .月 正 月, 督 師 河 南賊破潁州 洪 承 在 汝 州 毁鳳陽皇陵。 令諸 將分地遮賊。 其陷鹿邑、柘城、寧陵、通許者, 尤世威守維南,陳永福控盧氏 良玉在許州不

刑

/事

箒

百

六

-

左

ß

陽 永 鄧 湖 走 靈 良 月 Ŧi. 廣, 偃 玉 干 寶 關 寧 珇 自 師 ,不能支,陝州陷。 賊 地 人扼之。 與寬大敗賊汝西,令裨將破 尤翟文 姚援 於姚之 也。 巡撫 鞏, 默 十一月,李 之,乃去。 獻忠走嵩、汝。 )神屋· 張 被 未 逮未 幾, 應昌 Ш 鄧 去, 泊 成 珀 許 十月,良玉 賊東下攻洛陽 賊 以 成 檄良玉 連營數 兵譁 名遏 出朱陽關,張獻忠久據 良玉 死 湖廣。 自內 出維 賊於宜陽黃 抵 十里,番休更戰,以疲我兵,良玉 一而 靈 良玉 追 鄉 寶, 曹文 以吳村、瓦屋 迎 與 祥 合遼東總兵祖寬兵剪財 陳治邦 詔討 、寬從巡 自 澗 陜 口 成, 、馬良文等援盧氏。 賊 靈 寶、闖 撫 寬分擊獻忠救汝。 乃內鄉、淅 敗沒 陳 必謙 於 王 高 眞 救洛 寧。 迎祥 Ш 收其軍 要 於 陽 賊益 亦 澗 地 八月敗賊 城乃 與 口 會總 令良玉 前 合。 張 焦村。 去。 止。 , 理盧象昇 遂超盧 良 與湯 於 迎 玉 賊 鄢陵, 焦村,朱 一种、自 、寬禦之 再攻密, 九州 氏 成 奔 以

昇 與 良 其 河 、驕亢 遣祖 良玉 玉 賊 兵 九 至 寬、李 夾剿。 抵 難 年二月, 田 開 用 家營 封 用用 重鎭 良玉 孔 賊敗於登封部 良玉渡河擊之,斬獲頗衆。 隨 道 一中道 由 興代 陝 登封 西 近 總 其偏將 歸 之唐莊 督洪承 城鎖 九 趙柱 州 深 嚋 乘勝 入擊賊 走石 駐 西 靈寶 行。 窮 陽 追 自 九月 良玉 關 四 防維 辰 + 與伊 軍最 ,巡撫楊繩武 鏖至申 里, 西; 良 無援敗 强 嵩 賊 玉 之賊合。 叉 與 不 八率中 殁, 羅岱駐宜 対良 支西 州 良玉 故總 走。 玉避賊、責 人, 反 永 兵九州 故獨 陳 以 防防 永福 捷聞 久 雒 令戴罪自 由 留之。 方 東。 嵩 敗 五 縣 賊 月, 七月 深 mi 於唐 以 象

玉 道 + 剿 年 殺 正 南 月 陽 ٠, 賊老 土 寇 楊 回 兀 回 合曹操 侯馭民 闖 郭 塌  $\equiv$ 海 天 諸部 急 抵 沿 六安. 流 東 下 與 ٠, 賊 安慶告 遇 部 警, 將 岱 詔 良 道 玉 興 乘 從 中 勝 州 連 戰 救

破 良 賊 賊 走 霍 潛山 會馬 爌 劉良 佐 亦 屢 敗 賊 於 桐 城 、廬州 、六安 賊在 滁 和 者 亦 西 遁

入

月

中 詔 監 江 落 州 軍 北 警 士 職 太 戴 監 大 少 夫 罪 力促 息。 合疏留己。 葬復 之, 應 天 之。 始 巡 北 撫 賊東 去, 帝 張 國維 知 賊 下 出 襲六合,攻天長, 巳 良玉 三檄良 )飽掠 意, 入山 玉 不 矣。 能 山 奪也。 搜 已,淅 分掠 剿 瓜 不 JII 洲 應, 陷 , 儀 總 放 良玉 眞 兵掠 理 熊 破 擁 文燦 婦 肝 兵 胎 女。 不 救。 至 一安慶 良 屯 玉 舒 以 六安 堅 城 部 不 檄 肯 破 餘 以良玉 救, 賊 河南 令

月

軍 焉 良王 輕文燦不 爲 用

諸 調 救 良 贼, 良 以 玉 玉 觅 適 ╁ 良玉 於 至 遂 陝 年正 逃之 與 疑 孙 洪 而 月, 穀城。 範 急召之, 賊 及 良 乘 副 玉 盧氏 未 將 與 幾 獻忠逸去。 龍 總 虚 清請 在 兵 一, 遁 (陳洪範 田 降, 入内、 學破 良玉知 淅 追 之雙溝營, 大 及 破 o 其偽 賊 是月 發 於 兩 鄖 矢, 許州 斬首 力請擊之, 西 中 Ö 兵變, 二千餘級。 其 張 獻 肩 忠假官 文燦 良玉 復 揮 一家在許、 不許。 十二月, 刀 旗 擊之, 號 襲南陽, 九 殲焉 河南 月 面 文 流 巡 Ú 燥剿鄖 屯 撫 於南部 常道 其 部 立 寒 下

監 盧 九 德 疏 年二 聞 月, 詔 令戴 良王 率降將 而 劉 破 國能 賊馬進忠於鎭平關 入 人援京 師 ,韶還討 進 河 忠降。 南 賊 叉 兵 颠 渦 或 灁 能 頭、吳橋 再 破 賊 李萬慶 大掠, 於 太

重 張 縣 家 急 林 矢盡被獲。 里,至羅猴 里 泂 萬 良玉 慶亦降。 Щ 大敗奔還,軍符印信盡失,棄軍資千萬餘,士卒死者萬 , 至軍乏食。 七月、獻忠叛去、良玉與羅岱追之,使岱爲前鋒、己隨其後。 伏起,岱馬掛於藤 ,抽刀斷之,蹶 加 復進,棄馬登山 事聞,以 賊賊 逾

賊 兵 走 乃 操 何 渡 死 而 贼 輕 門得食? 寧昌 來能 合則 險任 請 秦界耳。 令良玉駐兵興平,別遣偏將追剿, 、過天星等十營,伏障、房、興、遠間 進 分 《爲三:西則 從漢陽、西鄉入蜀追之。 十三年春、督師楊嗣昌薦良玉雖敗、有大將才、兵亦可用、遂拜平賊將軍。長立當是時、 貶三秩 遏之耶? 强,分則弱。 其奔軼,後難制。 ,入歸、巫,與曹操合,我以大將尾追,促賊反楚,非算也。」良玉報曰:「蜀地肥衍 況鄖兵扼之於前,秦撫在紫、興扼之於右,勢必不得逞。 將軍從漢陽、西鄉入川,萬一賊從舊路疾趨平利,仍入竹、房,將何以禦?不 張獻忠,踞楚、蜀郊;東則革裏眼、左金王等四營,豕突隨、應、麻、黃,南 今當出其不意疾攻之,一大創自然瓦解,縱折回房、竹間,人跡斷絕,彼從 今已留劉 且賊入川則有糧可因, 國能、李萬慶守鄖,若再分三千人入蜀,即駐興平,兵力已薄, 嗣昌謀以 良玉不從。 閏 陝西總督鄭崇儉率賀人龍、李國奇從西鄉入蜀,日 正月,良玉合諸軍擊賊於枸坪關,獻忠 回鄖則無地 嗣昌檄良玉 可掠,其不復竄楚境明矣。 曰:「賊勢似不能入川,仍當 岩寧昌、歸、巫險且遠,曹 敗走,良玉 則曹 ", 賊 則 走

操. 、獻忠 不相 下。 倘窮 而 歸 曹 必 內 相 吞 ·其亡立見。」良玉已於二月朔涉蜀界之漁溪渡矣,

嗣昌度力不能制,而其計良是,遂從之。

坪, 月 鼠 之, 地 兩軍 連營百里。 興、歸 王 良玉 曰 一 吾 見瑪瑙· 曹威 ·夾擊, 時 獻忠營太平 界 乘勝擊過天 、白馬 上。 知 賊 Щ 誻 陣 所 峻 軍憚 鄧 是役也, 堅不 以 險, 天 破 Щ 縣 星,降之。 王 賊 將據之。 F 險, 大 矣。」分 等渠魁十六人。 動。 竹河, 良玉 崖 鏖戰 一功第 而 良玉 所進道 良玉 不 過天星者,名惠 攻。 久之, \_\_<u>.</u> 始 駐漁 爲 抵 久 之, 事聞? 獻忠妻 賊大潰, 三,己當 Щ 溪渡。 下, 獻忠自 加 賊 登 太子 妾亦 未幾, 墜崖 其二, 已 相 踞 被擒 ,旣降,遂始終爲 興、房走白羊 少 洞者 保。 Щ 總督崇儉引其 秦 遁入興 兵當: 「無算, 四月, 乘高 其 Щ 追 良 鼓 0 Щ 歸州 課。 奔 玉 良玉 而 兵 進屯 四 令 西, 來 自言 + 良玉 之山 會。 部 與羅 里。 興安、平利 將 聞 10 中 賊 鼓 馬 汝才合。 良 移 郭 罄 周 玉 軍 自 覽 兵 而 諸 九滾 鹽 者久 斬 上。 井 掃

良玉 酯 所 內 部 恨 代 跋扈 良玉。 多 初, 一般掠 當獻忠之敗走也, 良 不 玉受平賊將軍 而 可 及 使 良玉奏瑪瑙 閣 部 勸 猜 嗣 且 昌 專。 印,寖驕,不肯受督 追 令 川 前 且 捷 無 及; 重 嗣嗣 獻忠, 躃 昌 遣其黨 贼, 語 卽 後軍 人 公 馬 龍 滅 ·繼之, 元 須 師 不 利 後 約 久 命。 束。 操 矣。」 而身從間道出梓潼 重 一寶唱 而賀 人 龍 良 良 玉 大 人 龍 恨 心 玉 動 日 屢 具 「獻忠在 ,縱之去。 破 以 贼 扼 前語告良玉 有 歸 功 以 一,故公 一嗣 監 俟濟 昌 軍 萬元 見 私 師 良玉 重 許 古 嗣 以 亦 知 公

列

不 用 賊 旣 入 蜀 之 巴州 人 龍 兵 課 而 四 歸 召 良 玉 兵 合撃 ·, 九 檄 皆 不 至

忠陷 關 股 耆 攻 置 無秦 良 ら、楚、 う負 泌 玉 自成 陽 鄖 兵 十 人 重 良 破之。 蜀 玉 西 先 旗 四 傷 乃 玉 辦 消 潰 幟 年 輟 素 夜 掠 贼 息 正 、驕蹇不 圍 遁 總 而 中 地 良 月 良 兵猛 至 斷 與 玉 諸 玉 而 信 喬年 至 是 用 遂 如 兵 軍 陽 南陽 時 前 命 虎 追 以 , 戰 屢 故 , 計 潰 部 賊 襄 李 勝 賊 也 紿 韋 開 無 陽 自 遁 鬭 縣 而 入 出 城 成 寒 去 之 驕 志 外。 方 月 陽 黄 嗣 殘 獨 良 陵 城 昌 良 襄 士杰 喬 詔 玉 玉 方 城 年 城 良 悔 襄 乃 不 軍 孤 玉 戢 王 從 韋 不 參 盡 軍 削 南 士 用 被 良 將 ٠, 覆 職 玉 陽 執 劉 元 廼 泌 戴 治言, 良 於 進 士 密 罪 人脫 嗣 玉 兵, 圆 杰 選 昌 不 城 深 平 壯 於 復 而 能 不 入, S 賊 士 食卒。 賊 獻 救。 大 自 潛行 者, 忠 破 所 幾 贖 之, 已 當 陷 帝 遇 箐谷中 席卷 披 賊 旣 0 降 官官 會 五 瀕 靡 斬 陝 軍 月 其 死 出 賀 西 衆 無 復 獻 JII 人 獻 乘 一總督 數萬 瞧 縱 忠 龍 忠 高 西 類 登 陷 以 大 迄 汪 絕 高 南陽 肅 呼 以亡 喬 獻 旣 新 望 軍 馳 年 忠 開 而 下 出 獻 驛 見 中 或 卽

玉 見 五. 賊 萬 疾馳八十里。 犒 五 良玉 年 四 一營將 月 夕 自 拔營遁 士,激 賊已於 成 復 勸 重 其前穿塹深廣各 衆 之。 開封。至 軍 望 良 見 玉 乃釋故 皆 及 虎 潰 大威 自 尙 一尋, 書初 成 、楊德政 戒 環繞百里, 士 薦良玉 一卒待 會師 良玉兵過,從後 者侯恂 朱 自成 仙 鎭,賊 於 親率衆遮於後。 獄 營西 ٠, 起 「撃之。 爲 官官 督 軍 師 官 營 良玉 軍 北 幸 迁 追 良 金

良

九 良玉走襄陽。 大亂,下馬渡溝,僵仆溪谷中,趾其 月, 開封 以 河決 帝聞· 而亡, 良玉 敗, 帝怒恂,罷其官, 韶恂 拒 顚而 河 圖 過。 贼, 不能罪良玉也。 而 贼從而蹂之,軍大敗, 令良玉以兵來會。 開封旣亡,自成無所得,遽引兵 良玉畏自成、遷延不至。 棄馬騾萬匹,器械 無算,

,謀拔襄陽

爲

根

望,叫呼更生,曰:「左兵過矣」」良玉旣東,自成遂陷承天,傍掠 將 其貲,幷及其子女。 玉 大掠,火光 師,左步 退兵南岸,結水寨相持,以萬人扼淺洲。 大半死,而 畤 良玉壁樊城,大造戰艦 右騎 照 江 而 降人不奉約 下。 中。 自十二月二十四日抵武昌,至十六年正月中,兵始去。 宗室士民奔竄山谷,多爲土寇所害。 至武昌,從楚王乞二十萬人餉,曰:「我爲王保境。」 束, ,驅襄陽一 良玉亦漸衰多病,不復能與自成角矣。 郡人以實軍,諸降賊附之,有衆二十萬。 賊兵十萬爭渡, 驛傳道王揚基奪門出,良玉 不能 諸州 遏。 自成 良玉 王 乘勝攻 不應, 乃宵遁, 居人登蛇 良玉 然親 良玉 引其舟 山以 兵掠 一縦兵 良良 軍

邦華 俱。 湖 四十里,泊舟三山、荻港,漕艘 一被召 南京 當是時,降兵叛卒率假左軍號恣剽掠 う道湖 諸文武官及操 口 ,草檄告良玉 江 都御史至陳師 ,以危詞 鹽舶盡奪以載兵。 動之。 江上爲守禦,士民一 ,蘄州守將王允成爲亂首,破建德, 而令安慶巡撫發九江庫銀十五 聲言諸將寄帑南京,請 夕數徙,商旅 不 以 行 親 劫 萬 信三千 池 兩,補六月 都 陽, 御 史李 去燕 人與

列

糧 其能定變。 軍 宁 乃 於江、坐視 定。 良玉卒留 邦華 入見帝,論良玉潰兵之罪,請歸罪於王允成。 允成 不救 於 軍 中,不 誅 也。 良玉 留安慶久之,徐湖九江 帝乃令良玉 上。 誅允成,而 聞獻忠 破 湖 獎

廣

沅

逆王

器 爲 遣 從 昌 忠援袁州 其 功。 副 荆 諸 代 淫 將 侯恂 河 府 掠,傲歸之, 八 入蜀, 盧 月乃 大器無兵不能 光 爲 ,馬士秀援 入武 祖 總督,恂 良玉遣兵追之,距荆州七十里。 上隨、棗、承德,而 【昌,立 丽 解任,中道 自 岳 州。 **募土** 救,良玉 軍 府招徠, 人為 土秀 亦不援。 逮 成字。 惠登相自均、房,劉洪起 率 下獄 下流粗定, 水 師 會賊 敗賊 進忠與賊戰嘉魚,再失利,良玉軍 良玉 陷 岳 知其爲己故,心鞅鞅,與大器 分命副將吳學禮援袁州。 州城 荆、襄諸賊 長沙、吉州 下,二城遂並復。 自南陽,掎賊後,收其空虛 因自成 ,復陷袁州、岳 入關,盡懈。 時帝 州、二回良 江西巡撫郭都賢 遂 齒1 命兵部侍 不振 齬。 良玉偵知,乃 玉 賊 會獻 地 連 郞 遣 以自 呂 陷 馬 惡 忠 建 大 進

吾擊之」以巨艦置礮斷江,衆乃定。 江 中 南 左 自 懋第便道督戰, -立 七 君 年三月,詔封良玉爲寧南伯,仁己界其子夢庚平賊將軍印,功成世守武昌。 ,請引兵東下。 良玉乃條日月進兵狀以聞。 良玉 慟哭, 誓不許。 疏 副將士秀奮曰:「有不奉公令復言東下者, **入**, 未奉旨,聞京師被陷 一諸將 洶 命給事 [洶,以

間 鎭,俱廕子世襲,而以上流之事 稍 復楚西境之荆州、德安、承天。 立,晉良玉爲侯,廢一子錦衣衞 專委良玉 而湖廣巡撫何騰蛟及總督袁繼咸居江西,皆與良玉善, 正千戶,且 ,尋加太子太傅。 並封黃得功、高傑、劉澤清 時 李自成敗於關門,良玉 劉 良佐 得 以其 爲諸

南都倚

爲

屏蔽

仰視。 令 夜宴僚佐,召營妓十餘人行酒,履舄交錯,少焉左顧 傑最强,不及良玉遠甚。 不 色,山谷爲滿。 復 良玉兵八十萬,號百萬,前五營爲親軍,後五營爲降軍。 其統馭· 相懾。 有體,爲下所服多此類。 良玉家殲於許州,其在武昌,諸營優娼歌舞達旦,良玉塊然獨 軍 法用 然良玉自朱仙鎭 兩 人夾馬馳,曰「過對」。馬足動 而是時,良玉已老且病,無中原意矣。 之敗,精銳略 而欬,以次引 盡,其後歸者多烏合,軍容雖 地般 如 每春秋肄兵武昌諸山 雷 世。 ,聲聞數里。 賓客肅: 處,無姬 然, 諸鎭 左右莫敢 兵惟 壯, Щ 嘗 法

良玉 史黃澍挾良玉勢,面觸馬 好,而陰忌之,築板磯城爲西防。 反意乃決,傳檄討 良玉之起 躊 躇弗 由 應。 侯恂。 亡何,有北 馬 恂, 阮。 士英,自漢口達蘄州 故東林也。 旣返,遣緹 來太子事,澍借此激衆以報己怨,召三十六營大將與之盟 良玉歎曰:「今西何所防、殆防我 馬士英、阮大鍼用事,慮東林倚良玉 騎逮澍,良玉 ,列舟二百餘里。 留 澍不遣。 良玉疾已劇,至九江,邀總 耳。」會朝事 澍 與諸將日 一爲難, 日 以清 非, 謾語 監 君 側 軍 御 修

四 城 督 袁繼 が縦 月 也 火 咸 礈 諸 入 其 將 舟 城 中 秘 而 ٠, 不 去 袖 發 喪, 中 良 出 共推 玉 密 望 諭 其子 城 中 云 夢庚 自 火 光 皇太子, 一, 曰 爲 留 後 予負袁 劫 諸 七日 將 公。 盟 軍 繼 東 圖 咸正鮮 下 血 ٠, 數 朝 升 命 拒 黄得 是 之。 夜 功 死 部 渡 將 江. 時 郝 防 效 順 剿 忠陰 治 年 入

江 檄 登 初 其 相 而 爲 軍 去 日 賊 初 返 夢庚 諸 旣 留 將 降 夢 此 乃 自 庚 以 議 爲 立 待 見黑旗 旋 良玉 伴語 後 師 軍。」 o 副 ·船西· 繼咸 時大清兵已下 將。 登 相大詬 Ŧ, 至 裕 池 索輕 軍 州 自 候旨 日 彭澤 舸 一、「若此 泗州 追及之, 下, 抵 通 池 連 則 陷 , 儀眞矣。 登 我 繼咸 建德、 相 反 不 與 密 東流 相 如 以 夢庚 前 見 疏 大慟 爲 聞 逐 殘 流 偕澍 安慶 道 賊 以 時 梗 城 以衆降 示 夢庚 矣, 得 獨 如 不 池 達 先帥 於 足 州 九江 事 惠 不 末 引引 破 登 命 相 兵絕 何 胎 書

績 河 裨 濱 將 玘 楊 四川人。 魯欽敗 明 楷 歿, 劉 志敏 賊犯 天 啓 張 初,從 威 清。 雲鵬 軍,積 並 玘 驍勇,不 夜 祈 功得守備。 營走賊,進都 得 爲 大 安邦彦反,玘追 將,惟玘 司 愈書。 以 功 討 名 敗 敗織金,勇冠 苗 偤 李 阿二。 諸 將。 自 貴 已, 州用 敗

秩 |永 Ju 眞。 城 崇禎 加 初 五 署 年春、叛將亂登、萊、王洪等無功。 屢 都 (遷四 督僉事 JIJ 副 す。世 總兵 **廕**千戶。 與侯 良柱 尋擢 共 總兵官,鎭守 斬安邦 **迎自請行** 彦。 遵化。 京 師 命為援剿總兵官 有警,率六千人勤王, 戰喜峯口 及洪 山、並 與洪及劉 共 有 边,進 (復遵、 國柱

禦 賊 沙 加 戰 相 當 前 遁 走, 賊 乘 大敗。 尋與諸將 金國 奇 等復登、萊二城,錄 功 進

都督同知。

沙河 移 走 Ш 而 林 師 行 畿 縣 賊 玘 賊 犯 南 卽] 給 戍 章 臨 遵化 玘 賊 事 敗賊 湯 城, 紫 部 中 陰, 金 將 范 久, 敗 白 楊遇 梁 淑 之 草 迅 思歸 泰 也 魚 被 關 春 劾 、柱嶺 困 邀城 頃 迅 土 賊 及登、 之,賊 虐民, 一樵窩 犯 平 中 ,二四良 萊 Щ 伏 逼 帝 磁州 死。 事 不 敗之紅 竣, 問 玉 賊 ,二言拒 旋遣 復 救 用 子 以 其 乃 店、 爲言。 発。 旗 却 近 之彭 侍 馬種 弁誘 監 城 會賊 其 Ш 殺 共 鎭。 軍 他 破 入 賊 賊官 將 與 加 班 遁 左 北,言者請 至 自 青石 村 良 濟 是輕玘。 源 玉 領 沁 一撃賊 河 敗 射 殺 清化 公之紅澗. 令 清 俄 王自 玘 池 與 剿, 萬善 良玉 用 柳 村 於 玘 齊 莊 了二色 怏 逐 善 漢 賊 陽 賊 怏

渡 湄 州 合印 池 扣 而 當 諸 是 子 軍 莡 Щ 帥 時 至宜陽、 殄 ·, 賊 各有近侍 賊。 蔓 河 羣 朔 盧氏 爲 帥 及畿 中 勢 軍 相 而 南 還。 軋, ...天子 事 易 彼 是月 掩 此 特遣 飾, 觀 以 望 倪 所 龍、王樸 託 報 功 Щ 多 深 不 將京 道 兵官,代梁甫 以實 岐 軍,而 以 也。 自 解 保定 十 一 莫 梁甫 月, 利先 賊南 入, 河南 賊逐 遁 左良玉 玘 由 追 澠 湯 敗 池 之 南 九

上 飛 抓 七 年 Щ 正 虎 月 、雙翼 以 賊 杰 入鄖 剿 房縣 襄, 竹山 命 迎 援 南漳 剿 解南漳圍 贼, 戦獅 子崖 尋敗 一、石漳 賊 胡 Щ 地 斬 沖,斬 隻虎 闖 天王、 滿 九條龍、

列

傳

第

百

六

+

左

良

玉

擊 馭 贼 軍 洵 軍 陽 賊 心 印 乜家 亦 不 溝 附, 功。 連 譟 戰 於 十一月,賊 皆捷, 鄖 西 现 獲首 大 渡 马一 入河南,命玘 河 以避之,總督 千有奇。 八月敍 陳奇 瑜 五拳 犒 慰 111 乃定。 破 城功 奇瑜 進右 集諸 都 督。 將 討竹山 玘不善

援

剿

溪

諸

頻

有

担懼 援安 一、登樓 四月, 慶。 年 及桐 春 越牆 承 賊陷 疇 城 墮 至 被圍 新 地 汝州 蔡,知 死 迎竟不 令 玘 縣王 至。 戍 信罵 樊城, 御史錢守廉 賊死,迅追 防 漢江。 幼玘 敗 是月. 賊羅山。 剿 賊 部將王允成 羅 山, 是時, 殺 賊陷 良冒 以 剋餉 鳳陽, 功 命總 鼓 談課 命理自 殺 督 洪 其 黄州 承 二僕。 疇核 速

庇 赶 由 小校, 無所憚。 大 小 其死也,人以爲逸罰 數 白 I戰,所, 向克捷。 云。 以久戍觖望,恣其下淫掠。 大學士王應熊以鄉里

西。 年夏 賊 勞以酒,伏兵 垣 曲 一,從 從巡撫陳奇瑜討平延川賊,俘斬一千有奇。 賀 人龍,米脂 福 絳縣 臻擒 擊斬三百 賊 進 孫守法。 人。 都 司 二十人。 初以守備 愈書。 其秋,以所 叉 其冬,張 隸延綏巡撫洪承疇麾下。 連 破破 賊水 部援剿 福臻代承疇, 遺人龍剿 頭 鎭、 Щ 西。 花池塞、 奇瑜擢總督,以人龍自隨 六年 ·春,與總兵尤世祿 湯湖 崇禎四年,承疇受賊降, 村。 贼 党雄 會 Щ ,斬獲 西城幾盡, 復 三百 遼州 有 命人 已,敗 陝 明

山走。 縣。 箱 龍等死。 商 月,鳳陽陷,總督洪承疇遣人龍馳救, 將高傑移書令反,人龍 王永祥 峽 、洛賊馬光玉等薄 ,陷隴州 承疇追至王 邀賊之北,張全昌從咸陽繞興平東。 年 七月,高迎祥、張獻忠掠秦安、清水,人龍偕全昌破之張家川。 八月, 四月擊賊隰州 西去,奇瑜遣人龍救之。 高傑降, 渠鎭 西安,距大軍五十里。 ,賊方掠南山。 不報。 ,擒剋天虎,進參將。 承疇令人龍及遊擊孫守法挾之趨富平,乘夜擊敗賊。 固守兩月, 人龍、成功等與戰, 敗賊 南入隴州,李自成復至**,** 左光先救至,圍始解。 惟州。 承疇命人龍入子午谷, 賊以此不敢南遁,盡走武功、扶風,又渡渭 奇瑜追賊鄖、襄、興、漢, 進副 總兵。 追奔三十里,至大泥峪,賊棄馬登 環攻。 承疇以陝西急,率人龍 十二月敗賊中莊 邀賊之南,別將劉 人龍 以人龍 已而 並 失利, 有 同 人龍尋移守 里開, 都司 明 贼 成 入 年正 田 軼 功、 應 其

平、鳳 紅狼 往撃 率人龍等往援。 圍 ,戰於賈家村。 九年七月從巡 漢中 人龍 躡 ,瑞王告急。 至 柳林 歲暮 撫孫傳庭 追奔,為賊所 ··, 不 至廣元, 利。 承疇率人龍兵 大破賊盩厔,擒迎祥。 賊已逼成都 賊窺西安,人龍禦之,斬獲多。 截,川將曾榮耀等來援,敗去,人龍 由 ,自成別由松潘還陝右 兩當趨救,賊解去,詔 九月, 惠登相等屯寶雞,承疇遣人龍等 其冬,自成、登相 復 人龍官。 坐褫官立功。 徽 入四川, 秦逸賊 十年,小 東趨

延綏。

列

傅

第

百

六

+

左

良玉

崇儉率人龍、國奇軍會剿。十二月,人龍擊賊,大敗之。 忠、羅 降 祁 日 贼 總 至 管降,自成幾滅。 自成 汝才叛,謀入陝。人龍及副將李國奇等扼之興安,乃入川東。 Щ 引 年, 西而 殘卒入塞, 竄 承疇督 課,尋撫定。 人龍等自階、文窮追,自成走入西羌界, 詳 變蛟傳。 山中,謀 抵京,與變蛟等奏捷於太平。 入四川,爲人龍及馬科所追。 其冬,京師戒嚴,擢人龍總兵官,帥師 明年事定,還陝西。 人龍 突漢中,扼於左光先。 與 楊嗣昌檄陝西總督鄭 曹變蛟等大戰二十七 入衞。 人龍所 其秋、張獻 其黨 部 多

敗,人龍竟還陝。 將張應元、汪雲龍、張奏凱專主追擊。及應元軍入變,營土地嶺, 相 汝 一關,賊乃退。十二月,嗣昌至重慶,三檄人龍會師,不至。 東 了、登相犯開縣,總兵鄭嘉棟擊之仙寺嶺,人龍擊之馬弱溪,共斬首一千二百。汝才、登 西走,追之不能及。 十三年二月與左良玉大破賊瑪瑙山,人龍得一千三百餘級,降賊將二十五人。六月, 已而獻忠、汝才陷劍州,趨廣元,將從問道入漢中。 時賊盡集於川,監軍萬元吉令川將守巴、巫諸隘,人龍、國奇及楚 人龍逗留不至,諸軍遂大 人龍拒之陽平、百丈

隔 水不擊。賊遂越成都走漢州德陽,人龍軍大譟而歸。 人龍大觖望,效良玉所爲,不奉約束,嗣昌亦不能制。 初 ,嗣昌惡左良玉,許人龍代爲平賊將軍。 及戰瑪瑙山,良玉功第一,嗣昌語人龍姑待 賊陷瀘州而北,人龍屯小市廂,

列傳第一百六十一 高傑

忠遺 及孫 國 周 從。 多 大 卿 龍 在 國 明 參將孫守法 卿 稍 賊 戰 至襄 戰 ,函送其首。 傳 庭 將 自 中 歿。 不 兀 , 未 安。 督 勝 城 年三月 精卒二 , 遇 師 九 可輕發,在道佯上疏曰:「人龍臣 亦走, 贼, (月,總) 傳庭至陝,密與巡撫張爾忠謀, 陝西,帝授以意。 百 先入涇陽, 嗣 他部將高傑、高汝利 復不戰 人 宗龍 昌 督傅宗龍 與同 卒,丁啓睿代, 遂殁。 走, 黨魏大亨、 質 喬年 統 其妻子。 人龍 十五 人龍 亦 駐咸陽 賀國 歿。 年正月,總督 令人龍 國奇軍 、 賀 勇 或 賢、 帝大怒, 卿 董 虞 窮 舊將, 高 以五 出 國 禍, 學禮等十四人俱仍故官, 關 進 奇 謀 汪 欲誅 庫 曉夜 出當 月朔召 願貰 皷 次新蔡, 喬 等將逃還涇陽 大亨等以 年出 陽, 爲 之, 其 人龍 備 罪, 慮其 遇 關 擊 擊 賊 敗 俾從 傳庭 計 降。 自成 贼, 爲 孟 事 變, 家 辺 • 臣 取 爾忠 數 於 莊 人龍 其 自效。」 龍 姑 其罪 孥, 霊 密 及 奪職, 將 寶 家米脂, 鄭嘉 軍乃定。 聞之大亨, 與賊 斬之。 戰 Щ 帝亦 中 戴 棟、牛成虎 人 爲 罪 佯 許 之。 龍先走, 其部 其宗族 亂 視 遂 龍 事 爾 將 0

城 龍 兩 救 月不 隴 高 傑, 州 拔 米脂 被 自成 軍 人。 大 心疑 困 與李自成 傑 自 成 遗 令傑遺 別 同邑, 部將往代 書約 司 起 人龍 ) 傑歸守營。 爲盜。 反, 崇禎七 不 報。 自成 年閏 使 妻邢氏趫 者 八月, 歸 先 總督 見傑, 武多智, 陳奇 後 瑜遣參 見 掌 自成 軍資 將 毎 賀 此 韋

來 支糧 三年 歸 仗。 洪承 張 傑 獻 過 嚋 忠 氏營,分合符驗。 以 敗於瑪瑙 付 人龍 Щ 使 鼠鼠 其 興、歸界上,傑隨 遊擊孫守 氏偉傑貌,與之通,恐自成覺,謀歸 法 挾 以 人龍 破 贼, 及副將李國奇大敗 取 立 效 爲 信, 降。 自是傑常隸 之鹽 次年 井 八月遂竊邢氏 人龍

救 西 遶出官軍後。 逆之。 + Ŧi. 年 傳庭以傑與魯某爲先鋒,遇於塚頭,大戰 龍以罪誅 後軍 左數望見賊,怖而 ,命傑爲實授遊擊。 先奔,衆軍皆奔,遂大潰,傑所亡失獨 十月,陝西總督孫傳庭至南陽,自成 敗賊,追奔六十里。 汝才見 小 與羅汝 自 成 敗 才

不可 安,賊將李過追 Z 不 軍 傑 而 敗 自 乘 尤凶 恩旣敗,走固原, 不 勝 Щ 支矣。」亦麾 救己,亦擁衆不肯救。 西渡 深 暴。 傳庭 年 入,乏食。 進副 以廣恩爲怯, 朝 河,轉入潼關,廣恩已先至。 廷 傑。 以 總兵, 衆退。 傑為 爲賊將追及,遂以城降。 傑東走宜川,河冰適合,遂渡, 降 與總兵白廣恩為 自成 將李際遇 廣 軍遂大奔,死者數萬。 恩不懌, 所 廣思戰敗,關遂破,傳庭被殺。 切齒 通 賊, 故 引所部 命隸 自成 軍 十一月,自成 拳, 遁去。 傳庭辨賊。 帥 十七年進傑總兵。 网 精 廣恩走汝州不救,傑乃隨傳庭走 人皆降將也。 騎 入蒲津以守。 大至。 官 攻關,廣恩力戰。 軍 九月從 接戰,陷伏中。 傳庭 自成破西安, 廣恩 問計 傳庭克寶豐,復 帝令總督李化熙率傑兵馳 賊至,冰解不得渡,乃免。 意驚驚 於諸將,傑請戰, 而傑怨廣恩以 傑登嶺上望之日 據之。 素不奉 郟 傑北 河 縣。 約 北。 東,而 走延 廣恩 寶豐 時官

救 Щ 西 一,而 蒲州、平陽 已陷久,傑退至澤州 ,沿途大掠 ,贼遂 薄太原

兼 傑 斬 不 兵科 可 不 攻 納 京 加太 給 師 意 事 傑 陷 稍 子 中 攻城急, 傑 怠。 少傅 監 南 其 走, 閣 際 軍 部 日 匹 福 \_ 子 掠 史可 討。 王 厢 封 法 村 傑興 世 徐 議 嫦 州 襲錦 以瓜 女,民 平伯 土 衣 賊 州予傑,乃 程 | 僉事 益惡之。 列 繼 於 孔 四 被擒 「鎭,領 止 知 至 府 京師 湯州 ル 馬 月命傑移 鳴 乘李自成 騄 駐 城外。 、推官湯 駐徐州 亂逃 傑固 來賀 歸, 欲 以 堅 入城, 守月 左 中 二月 揚州 允衛胤 餘 )、傑擒 傑 民 文 知 畏

清 臣 傑 時 ূূূ 尤狡横難任 自 可法 提兵 介 初 介 頗爲 傑伏 前 直 趨歸、開, 事。 所窘。 兵 0 要擊黃得功於土橋, 臣 可法 知知 至是,傑感可法 不 報君 且 得已,調劉良佐赴徐 顾 雪恥而已,安能 宛、洛、荆、襄, 忠, 得功幾不免, 與謀恢復。 以為 與 同 與傑為聲援 列 根 較短 本。 兩鎭 議調 長哉! **遂具疏上之**,語激切。 遂相仇怨, 事見得功傳。 得功與劉 然得功終不欲為傑後 澤清 二鎭 赴 且云 郊 宿 「得功與 傑爭揚州 勁,而澤 防 河

國 定 會 不\* 益 國 疑,無離 順 應。 不 治 聽, 二年正 復邀巡 雕意 遂入 月, 城。 撫越其杰、巡按 傑固促之行,定 傑抵歸 + -日,定 德。 陳潛夫 國 總兵許定 國怒,夜伏兵傳礮大呼。 置酒享傑。 同往 國 方駐 惟州,定國始郊逆。 傑飲酣,為定 睢州 有言其送子渡河者。 其杰等急遁走,傑醉臥帳 或 刻 行 其杰諷傑勿入城,傑 期,且微 及送子 傑招定 事 中未 國來 ìÙ 定 輕

列

傳

第

死。 起, 國 偽 衆擁至定 恭 明 順 日 傑部 多選 國 妓 下至,攻城,老弱無孑遺。 所 殺 侍傑,而 之。 先是,傑以定國將去雕,盡發兵戍開封,所留親卒數 以二妓偶 卒 寢。 定國 卒盡醉,及 走降大清 聞 軍 礮 欲 起, 爲二妓所掣 + 人 亦 而 得脫,皆 已。 定

辰 諸 元爵 、姜埰、熊 鎭 襲興平 與 傑 聞 爲 或 人淫毒,揚民聞 伯 開元、 是,故傑屢條 金聲 沈正宗等。 奏救降賊者, 其死,皆相賀。 大抵其時武臣風尙多類此。 及請 然是行 釋武愫於獄, 也, 進取 意甚銳,故時有惜之者。 不允。 傑死 復疏 薦吳甡 贈 太子太保,以 一、鄭 三俊、金 始朝 以其子 廷許

光

州。 總兵。 功。 遇大 大清 兵, 八 加 兵攻 劉 年 澤淸, 左 五 力戰, 都 年以 詔 鐵 督、太子 統 廠 曹縣 Щ 侵剋軍糧被劾, ,欲據以 自辰至午不決。 東 人。以將材授遼東寧、前衞守備、遷山東都司僉書,加參將。崇禎 兵防漕。 太師 絕豐潤糧道。援守三屯總兵楊肇基遣澤淸來援,未至鐵廠 九 年,京師戒嚴,統兵入衞,令駐新城爲南北控扼,復命留守通 韶立功衝要地。 得濟師,轉戰至遵化, 六年遷總兵。 夾擊,遂得入城。 其冬加左都督, 敍功, 恢復登州 加二級至 <u>一</u>士 三年, ·五里, 副 有

十三年五月, 山東大饑,民相聚爲寇,曹、濮尤甚。 帝命澤清會總兵楊御蕃兵剿捕之。

八 月 降 右 都督,鎮守 Щ 東防海。 澤淸以生長山東, **久鎭東省非宜,請辭任。** 帝令整旅渡河,

合諸鎭星馳援剿。

殺傷 疏水環之,欲以次結 澤清 年二月, 卽 命 拔營去,惶擾 城圍 八寨達大堤,築 開封 久,澤淸赴援。 奔 迸,士 甬 道 爭舟,多溺 一,饋 以朱家寨去汴八里,提五千人南渡, (譲城 死者 中。 壁 量未 成, 賊來爭。 相 持 倚 日 泂 爲寨,

馬嘉 命 赴 保定 澤清 植皆謀奉 剿 爲 財,不從,日 人 使南 性 惟怯 歸。 ,懷私觀望。 大掠 如愈常劾澤清, 臨清。 嘗妄報大捷邀賞賜,又詭稱墮馬被傷,詔賚藥資 率兵南下, 過東昌 ,澤淸遺人殺之於道,無敢 所至焚劫一空。 寇氛日急, Ŀ 聞 給 者 事 中 四十 韓 如 愈 兩

侯恂 宗 紛 故 不 輔 以 周 如 及 周 上供、恣其所 京 紀 臣 其 延 師 綱 卽 儒 子方域,朝廷皆曲意從之。 陷 盡裂,而 卸 助 澤清 職 餉 。」朝廷不得已,溫 贓 用 走南 銀 澤淸所言尤狂悖。 置置 都, 一封疆 都 御 福王以爲諸 兵事 史劉宗周劾諸 詔 切 解 不問。 王初立,即援靖康故事,請 之。 鎭之一,封 將跋扈狀, 又請禁巡按不得拏訪追贓,請 與廷臣 東 平伯、駐廬州。 互分黨援,干預 澤清遂 兩疏劾宗周, 以今歲五 時 朝 政, 武 臣 法 月改元, 排 各 且曰:「上若誅 司嚴緝故 擠 占 、異己, 分 7地,赋 又 奏牘 請 宥

順 治 列 傳 年四 第 月, 百 六 揚州 + 告急, 高 傑 命澤淸等往援,而澤淸已潛謀輸款矣。 七00七 大清 惡其反覆,磔

誅之。

澤清笑曰 故 人子, 澤清 酌酒金甌 :「君怖耶。」命取囚撲死堦下, 頗涉文藝,好吟咏。 中, 甌 可容三升許,呼猿捧酒跪送客。 嘗召客飲酒唱和。 剜其腦及心肝,置 幕中蓄 兩猿,以名呼之卽 猿狰 甌中,和酒,付猿捧之前。 一瓣甚, 客戰掉,逡巡不 至。 一日,宴其 较 飮 酮, 取。

顏色自若。

其兇忍多此類

祖寬,遼東人。 少有勇力。 給侍祖大壽家,從軍有功,累官寧遠參將。 部卒多塞外降

人,所向克捷。

臣爲 死戰, 督僉事。 之,遂與劉 率兵抵昌邑。 前 崇禎 大敗 鋒。 再敍功,世廕外衞副千戶,進副總兵。 五年七月,叛將李九成等圍萊州急,詔發關外兵討之。 (贼兵) 逐北抵城下, 立解萊州圍。 澤淸等築長 寬至 巡撫朱大典 沙河與賊遇,衆寡不敵,稍却。 圍以 養贼書,約寬等爲內應,以示寬等,皆誓滅賊以自 困登州。 明年二月,賊始平。 是月晦,進兵黃縣。 會國臣至,拔刀大呼直前,寬、大駒、韜咸 語詳大典傳。 寬與靳國臣、祖大弼、張韜 賊傾巢出戰,寬等復大敗 寬以解圍功,進都 明,乃用寬 國 殊

又從總理盧象昇 入鄖、襄,餘衆三萬匿 椒,遂圍滁州。 破之。 湯開 斬馘一千有奇。 祥、自成兵,與寬戰龍門、白沙,截官軍爲二。 寬自斷後,士卒殊死關,自晨至夜分,復大捷, 劉肇基、羅岱遇賊汝州圪料鎭,復大敗賊,伏屍二十餘里,斬馘千六百有奇。 自 破之,新馘五 成、獻忠皆走。 遠令與左良玉抵靈寶,至則挫張獻忠於焦村。 寬赴救 ,自晨至晡,賊 賊奔嵩縣九阜山,寬伏二軍於山溝誘之。賊趨下,伏發,斬馘九百有奇。 年秋,命爲援剿總兵官,督關外兵三千討流賊。 ,賊解而 一百八十有奇。自成等遂東走廬州,攻圍七晝夜。 南京太僕卿李覺斯、知州劉大鞏力禦之。 破 迎祥、自成乃走窺光州,寬督副將李輔明躡其後。 良玉追迎祥,而寬分擊獻忠,夜督副將祖克勇等趨葛家莊,黎明遇賊,大 賊 趨靈寶,斷良玉、寬軍不相應,遂東陷陝州,攻洛陽。 大敗。 內 七頂山 鄕 、淅川 從城東五里追至關山之朱龍橋,橫屍枕藉,水爲 ,殲自成精卒殆 Щ 中。 象昇命寬與祖大樂等入山搜討 盡。 象昇移軍南陽,命寬備鄧州。會賊渡漢江 無何、高迎祥、李自成至、與獻忠合攻闋 十月至河南、巡撫陳必謙、監紀推官 而寬等軍至,奮擊大呼,諸軍無不 明年正月,寬等至,贼奔全 賊走攻確山, 寬等馳救, 良玉、寛至,迎祥、 獻忠憤,合迎 不 流。二月, 尋與副將

大

口 ,棄輜重,即縱 邊軍 强 憨,性異他卒,不可 之去,謂之「打活仗」。 以 法 繩 邊軍不通言語,逢賊卽殺,故多勝 往時官軍 多關中人,與賊 鄉里,臨陣相 然所過焚廬舍, 勞苦, 抛生

承疇 寛卒 督,賚銀幣。 [[] 淫 ·婦女, 方過 亦請之,寬等遂移軍 ,冀卸責,衆益思歸。 恃 河, 功 譟 不 定,命赴寧遠協守。 戢 而 逸。 ッ; 叉 利野戰,憚搜 象昇激勸 ·陜西, 象昇 隸 乃力陳 再 承疇 Щ̈; 座 入 始 且. 下。 Щ 聽 見 搜剿 命。 賊遠竄, 八 月, 之難,請令寬、 至黨 京師被兵, 非旬朔可定, 子 口 , 仍 重鎭 按 召入衞。 領不 自 赴 以爲客將, 關 行。 中 錄滁州 討 而 賊。 總 兵 功,進右 無持 會 李 總督洪 重鎭 久心。 素

+ 年冬, 詔 寬 率 師 援 畿 輔。 及 Щ 東告急, 寬逗遛。 明年正月,濟南失守,褫職被逮,

寬 敢 戦 有 功,稱驍將。 性剛使氣,不爲文吏所喜,卒致大辟,莫爲論救。 坐

失陷藩

封,竟

棄

市

事

取 兵 以 犯 致潰。 之時,寬受誅於力戰赴援之後,死非其罪,不能無遺憾焉。 闕 贅 日 而 當 一一左良玉以驍勇之材,頻殲劇寇,遂擁强兵,驕亢自恣,緩則養寇以 不 顧 時 也。 以不用命罪諸將者屢矣,而 高傑、祖寬皆 剛悍難馴, 良玉偃蹇僨 恃功不戢,而 (事,未 傑 不正刑章. 尤爲兇鰲。 ·, 姑 息釀 然傑被戕於銳意進 思,是 貽憂,急 以卒 則 至 棄甲 稱

戰松 Щ 杏山下 松山, 原作 「香山」, 據清太宗實錄卷四五崇德四年三月丁卯條改。 [與|杏

14 均 在 遼東 廣寧中 屯衛,見本 書卷四 一地理志。

至柳樹 口 大敗之 柳 樹 口,原 作「柳善口」、「善」字沿上文「萬善驛」之「善」字誤,據綏寇紀略卷

、懷陵流寇始終錄卷五 改

= 以中官楊進朝盧九德監其軍 楊進朝,原作「楊應朝」,據本書卷三○九李自成傳、 懷陵流寇始

終錄卷六、綏寇紀略卷一改。 下同。

29 七月良玉兵抵開封 七月,懷陵流寇始終錄卷九作「八月」。

T. 至羅 猴 Щ 羅猴 山,參見本書卷二五二楊嗣昌傳校記〔三〕。

ベン 平賊 十三年春督 將 軍, 本書卷二四莊烈帝紀、 師楊嗣昌薦良玉至遂拜平賊將軍 國権卷九七頁五八五一、懷陵流寇始終錄卷一二、明史紀事 十三年春,疑當作「十二年十月」。 按左 良玉拜

<u>\*\*\*\*</u> 卷七五都繫於十二年十月。

Ħ. 嗣昌謀以陝西總督鄭崇儉率賀人龍李國奇從西鄕入蜀 三楊嗣 ~~~ 卷二六〇鄭崇儉傳、 又卷三〇九張獻忠傳,懷陵流寇始終錄卷一三,明史紀事 李國奇,原作「李國安」,據本書卷二

本末卷七五改。

列 傅 第 百 六 -|-校 勘

記

- . . . . 圍 良 玉 於 郾 城 郾 城,原作 「偃城」,據本書卷四 二地理志改。
- ナセ -五 年 四 月 自 成 復 圍 開 封 四 月,原 作「三月」 據 本 ·書卷二 四 莊烈帝紀、 又卷二六〇丁啓睿傳了

懷宗實錄卷一五崇禎十五年四月丙午條改。

- 以後,與傳文所敍時間 五. 分 命副 明史紀事本末卷七七, 將吳學 醴 援袁州至會賊陷 先後不同 農民義 長沙吉州復陷 軍 攻陷 長沙 袁州岳州 岳 州 在八 月 按國権卷九九頁五九八六至五 吳學禮 援袁州在十月袁州 被 攻陷 九九
- 繫於十七年三月 十七年三月 又卷一〇七功臣 韶 封良玉爲 让世表, ,據改。 海南伯 懷宗實錄 卷 三月,原作「正月」。 七崇禎十七年三月壬辰條, 按良玉封寧南伯,本書卷二四莊烈帝紀、 國権卷一〇〇頁六〇三四都
- 射殺王自用於善陽 Щ 善陽山,原脫「山」字,據明史稿傳一五一 {鄧 {野 (傳 國権卷九二頁五六一

**綏寇紀略卷一** 

萬逼 賊逼磁州 磁州 原作「走賊礘川」。 懷陵流 [寇始終錄卷六「一字王、黑蝎子、闖 礘川 ,磁州,形近而誤。 塌天等九營十餘萬賊,是日 **綏寇紀略卷一、崇禎六年五月、「賊十餘** 逼 磁州

**玘被困土樵窩** 土樵窩,原作「上樵窩」,據綏寇紀略卷一改。 懷陵流寇始終錄卷六的六月戊

改。

二三 已共破賊官村沁河清化萬善 清化,原作「清池」,據本卷上文、綏寇紀略卷一、懷陵流寇始終

## 明史卷二百七十四

## 列傳第一百六十二

史可法 任民育等 何剛等 高弘圖 姜日廣 周鑣

雷縯祚

其子從質曰:「我家必昌。」從質妻尹氏有身,夢文天祥入其舍,生可法。以孝聞。 史可法,字憲之,大興籍,祥符人。世錦衣百戶。祖應元舉於鄉,官黃平知州,有惠政。 舉崇禎

元年進士,授西安府推官,稍遷戶部主事,歷員外郎、郎中。

明年,祖寬破賊滁州,賊走河南。 安慶、池州、監江北諸軍。 八年遷右參議,分守池州、太平。其秋,總理侍郎盧象昇大舉討賊。 黃梅賊掠宿松、潛山、太湖,將犯安慶,可法追擊之潛山天堂寨。 十二月,賊馬守應合羅汝才、李萬慶自鄖陽東下。 改可法副使,分巡 可法馳

十年正月, 列 傳 第 賊從間道突安慶石牌,[] 百 六 + = 史 可 法 尋移桐城。 參將潘可大擊走賊,賊復爲廬、鳳軍 七〇一五

駐太湖,扼其衝

劉 黨 左 所 搖 良 良 扼 佐 天 玉 口 擊 動 敗 桐 敗 别 之 城 之 爲 楓 挂 香 掠 營, 驛 車 几 ٠, 境 河 而 賊 乃竄 合八營二十餘萬 知 縣 潛 陳 Щ 爾 銘 太 嬰 湖 城 Щ 衆, 守 中 分屯 可  $\equiv$ 法 月 桐 與 城之練潭、石井 可 可 大 大 剿 及副 捕 將 賊 程 走 陶沖。 龍 廬 敗歿 , 於 犯 總兵官 宿 潛 松 Щ 牟文綬 可 賊 法 分 其 與

州 牙 大 將 可 江 法 汪 光山 代以王 北 雲 東 賊 當 南 是 鳳 已 旭 固始 東 時 馬也 敗 都 家 陷 禦 賊 震驚。 醎 陝 潛山 和州 羅田 ,賊稍 || 窓聚潭 祖寬關外 京軍 含山 湖廣 稍 1 月 避 寧, 其 復 、定遠、六合,犯 擢 之蘄 兵亦 鋒。 連破 可 分犯 法 州 老 北 <del>|</del> 右 岷 廣濟 僉 口 歸。 ※ 秦、 年 都 回 夏,以 舒 黄梅 未幾 御 天長、肝胎 史,巡撫安慶、廬 城、廬江 一上復 楚、 江 平 賊 應、 西之德化 一,賊 以 踰 院, , 熊 期 趨 遁 戴 文燦代 羣 盜 入 河 罪 Щ 南 湖 州 遍 立 太平 家 口 野。 功 時 可 諸 禎 監 法 縣 奏 池 軍 專 總 提 発被 僉事 州 撫 理 督 盧象昇 25 贼 湯 府 災 軍 務 開 田 , 及 賊 遠 旣 設 盆 租 泂 善 狂 改督宣 南 額 足。盤 冬,部 擊 之光 兵 萬

設 部 不 漕 先 右 /禦,以 儲 侍 可 道 郎 法 一人,大濬南河 兼 短 故 右 小 得 精 僉都御 1 悍, 死 力。 面 史。 黑,目 連敗 代朱 漕 爍 政 賊 爍有 大 大 英山 燈。 典 總 光。 、六合,順 督漕 拜南 廉 信 運 京兵部尚書,參贊機務。 巡 與 天 王 下 撫 一乞降。 均 鳳 勞苦。 陽、淮安、揚州 十二年夏,丁 軍行 , 士不 因 劾罷 武 外 飽不 備 艱 督 去 糧 先 食, 奏行 道三人 服 闋 未 起 更新 授 戶 增 衣

麒。 衞 昭 何 朝 朝 謁 亦 酗 推 土 立 英 勃 孝 及 閣 以 酒 出 議 與士英、弘 誠 錦 臣, E 不 然 陵 爲 孔 + 戰 張 議 日 衣 與黃 意伯 昭 然。 -守 孝 奉 愼 衆 監 衞 舉 年 言し 先 舉 國 諸軍 大鋮 卽 劉 得 虐 四 鳳陽 殿, 可 事 印 我 孔昭 呂大器 月朔 圖 功 下 法、高 法 悉 、不讀 並命。 總督 不 劉 出居: 日;王 張愼言曰 可法曰:「先帝 门,聞 可,馬 曰:「今日 入 良 "、 姜 曰 馬 弘 內守備 伍 佐 書 賊 圖 土 可 士英 操練。 犯 宜 英潛 姜曰 法 劉 干 素服 闕,誓師 廣等日 既定, 預 仍 澤淸、高傑發兵送 府。 何 國 掌 與 有 廣 錦衣 郊 欽定逆案, 虚 不 阮 司 兵部事,士英仍督 羣臣 次, 可 誰 無 勤王。 大鉞 也。 人,子 東西 福 孔 敢復更?」 發師 入 王 乃 昭攘臂欲並列, 潞 可 計 朝,王色 兩司 由崧、神宗 弁推 渡江 遂 護 E 毋復言。」 北 常 即大位。」 征,示 、房,及南北兩鎭撫司官, 福王 主 士英。 抵浦 涝 可法日 )赧欲 立 神宗 師 至儀眞 福王 口,聞 天 孫 越二日 鳳陽。 避 又議 下以必報讐之義。」 也, 衆 可 姪 一,咨 徐之。」 法 以 北 倫 也 起 可 於是 本 拜 日 可 序當 都旣陷,編衣發喪。 , 乃定京營制, 廢 法 朝 "「太子存亡未 法 賢 乃退。 日 可法 無勛 明 推 可 立, 法等迎 न् 當 鄭三俊、 禮 王姆 法 立。 而 臣 不備設 部尚 以 叉 入閣 有 王 避, 七不 明 王。 七 加 移 書兼 日 唯 下, 倘 不 北 劉宗周、 例,遏之。 牒 宜 王 唯 可 口 Ŧi. 都 以杜 刵 正 告之。 會 東閣 月 故 監 法 受。」 明 貪 事 南 南 朔 國 徐石 印 來 日 都議 大 , 旣 孔 王 學 廷 若 再 而 法

列

傳

安人心。

壽,駐 尚書 、 北, 刨 即遣使訪大行帝后梓宮及太子二王所在,奉命祭告鳳、泗二陵。 經理 當是時,士英旦夕冀入相。 臨淮、經理陳、杞一路。 武英殿大學士。 可法逐請督師,出鎭淮、揚。 Щ 東一路。 總兵官高傑轄徐、泗,駐泗水, |士英即以是日入直,議分江 靖南伯黃得功轄滁、和、駐廬州、經理光、固一路。 及命下,大怒,以可法七不可書奏之王。 十五日,王卽位。 北爲四 經理 明日 開、 鎭 ,可法陛辭,加太子太保,改 歸一 東平伯劉澤淸轄淮 路。 總兵官劉良佐 而擁 兵入覲,拜表 可法啓行 海、駐淮 兵部

怠荒 木馭 思東 解, 動。 裹足,祖宗 孔昭卒扼姓不用。 北諸 二祖 · 朽,何以忽避危亡,早朝晏罷,則念先帝之克儉克勤,何以卒隳大業。 若躬謁二陵,親見泗、鳳蒿萊滿目,雞犬無聲,當益悲憤。 可 法去,士英、孔昭輩益無所憚。 陵魂魄之未安;享玉食大庖,則思東北諸陵麥飯之無展 怨恫,天命潛移,東南 列宗將默佑中興。 可法祭二陵畢,上疏曰:「陛下踐阼 若晏處東南,不思遠略 隅未可保也。」王嘉答之。 孔昭以慎言舉吳姓、譁殿上、拔刀逐慎言。 )賢奸 初,祗謁 無辨、威 願愼終 " 膺圖 孝陵,哭泣盡 斷 不靈,老成投簪,豪傑 如始,處深宮廣厦 受籙,則念先帝之集 戰兢惕厲, 哀, 可法 道路感 馳疏 無時 一,則

得功、 澤清、傑爭欲駐揚州 傑先至,大殺掠,屍橫野。 城中恟懼,登陴守,傑攻之浹

檄必取 背。 澤清 傑。 可法坦懷待之,接偏裨以溫語,傑大喜過望。然傑亦自是易可法, 視 而 傑素憚可法,可法來,傑夜掘坎十百,埋暴骸。 亦大掠淮上。臨淮不納良佐軍,亦被攻。朝命可法往解,得功、良佐、澤清皆聽命。 後行。 可法夷然爲具疏,屯其衆於瓜洲,傑又大喜。傑去,揚州以安,可法乃 旦日朝可法 帳中, 用己甲士防衛,文 辭色俱變,汗浹

開

府揚州

罰無赦!王優詔答之。 比,必專主討 因言:「邇者人才日耗,仕途 領 法 其事 請 頒 六月,大淸兵擊敗敗李自成, 。八月出巡淮安,閱澤淸士馬。 監國、登極二韶、慰山東、河北軍民 賊復讐。 舍籌兵籌餉無議論,舍治兵治餉無人才。 日淆,由名 自成棄京師 心勝而實意不修, 返揚州 心。 西走。 ,請餉爲進取資。 開禮賢館,招四方才智,以監 青州諸郡縣爭殺偽官,據城自保。 議論多而成 有摭拾浮談、巧營華要者 士英靳不發,可法疏趣之。 、功少。 今事勢更非昔 紀推官應廷吉

得解。 法認典南 南歸之心。」又言:「北都之變,凡屬臣子皆有罪。 初 北 ,可法虞傑跋扈,駐得功儀眞防之。 樞,臣 都降賊諸臣南還,可法言:「諸臣 士英叨任鳳督,未能悉東南甲疾趨北援,鎭臣澤清、 原籍北 九月朔,得功、傑搆兵,曲在傑。 在北 土者,宜令赴吏、兵二部錄用,否則 者應從死, 豈在南者非 傑以兵力不支,折而南 賴 人臣? 可法 調 卽 恐 劑,事 臣 絕 同 其

列

傳

第

百六

+

史可法

舉而概繩之,豈散秩閒曹,責反重於南樞、鳳督哉。 並從之。 污,身被刑辱,可置勿問。 是首應重論者,臣等罪也。 其逃避北方、徘徊而後至者,許戴罪討賊,赴臣軍前酌用。」廷議 乃因聖明繼統,鈇鉞未加,恩榮疊被。而獨於在北諸臣 宜摘罪狀顯著者,重懲示儆。若僞命未 毛

進至白洋河,今總兵官劉肇基往援。大淸兵還攻邳州,肇基復援之,相持半月而解。 北征。可法赴清江浦,遣官屯田開封,爲經略中原計。諸鎭分汛地,自王家營而北至宿遷, 最衝要,可法自任之,築壘緣河南岸。 傑居揚州,桀驁甚。 可法開誠布公,導以君臣大義。傑大感悟,奉約束。十月,傑帥師 十一月四日,舟次鶴鎭,諜報我大清兵入宿遷。

時自成旣走陝西,猶未滅,可法請預討賊詔書,言:

討賊之詔不聞達燕、齊。 嬉,頓成暮氣矣。 宋之南也,其君臣盡力楚、蜀,而僅保臨安。 神,枕戈待旦,合方州物力,破釜沉舟,尚虞無救。 遽能自立者也。 自三月以來,大讐在目,一矢未加。昔晉之東也,其君臣日圖中原,而僅保江左, 大變之初,點黎洒泣,紳士悲哀,猶有朝氣。 河上之防,百未經理,人心不肅,威令不行。 君父之讐,置諸膜外。 蓋偏安者,恢復之退步,未有 夫我卽卑宮菲食,嘗膽臥薪 以臣觀廟堂謀畫,百執事經營,殊未 復讐之師不聞及關、陝, 今則兵驕餉絀,文恬武 志在偏安,而 ,聚才智精

鼓。 盡 夏少康不忘出竇之辱,漢光武不忘爇薪之時。臣願陛下爲少康、光武,不願左右 夫將所以能克敵者, 氣也, 君所以能禦將者, 志也。 廟堂志不奮,則行間氣不

在位,僅以晉元、宋高之說進也。

秦關、懸上爵以待有功,假便宜而責成效,絲綸之布,痛切淋漓,庶海內忠臣義士,聞而 感憤也。 得而甘心,況在朝廷,顧可漠置。臣願陛下速發討賊之詔,責臣與諸鎭悉簡精銳,直指 南諸臣、討賊者復少。此千古未有之恥也。庶民之家,父兄被殺,尚思穴胸斷脰,曰 先皇帝死於賊,恭皇帝亦死於賊,此千古未有之痛也。在北諸臣,死節者無多,在

之物力、盡幷於選將練兵一事、庶人心可鼓、天意可回。 滅,卽有深宮曲房,錦衣玉食,豈能安享!必刻刻在復讐雪恥,振舉朝之精神,萃萬方 費,朝夕之燕衎,左右之進獻,一切報罷。 今恩外加恩未已,武臣腰玉,名器濫觴。 自後宜慎重,務以爵祿待有功,庶猛將武夫有 所激厲 國家遘此大變,陛下嗣登大寶,與先朝不同。諸臣但有罪之當誅,曾無功之足錄 兵行最苦無糧,搜括旣不可行,勸輸亦難爲繼。請將不急之工程,可已之繁 即事關典禮,亦宜槪從節省。蓋賊一日未

可法每繕疏,循環諷誦,聲淚俱下,聞者無不感泣。

洲 士英 將各 兵李本身爲提督,統傑兵。 也, 大亂 河 諸 上 鎭 陷 ·分地, 忌可法 ,屠睢 二月,可法還揚州。 逡巡無進 此 贼 南還, 旁近二百 詔良佐 威名,加故 兵 又立傑子元爵爲 師 傑請爲己監 下邳 意 得 且 [里殆 功 數 宿 中允衞胤文兵部右侍 未至 盡。 率師 可法 相 軍 本身者,傑甥 攻。 世子 扼潁 • 變聞 飛章 得功來襲興平軍 傑死,胤文承士英旨,疏誚 丁,請恤 明年,是爲大清 、壽,傑進兵歸、徐。 ,可法流涕 報 於朝。 也。 士英 郎,總督興平軍,以奪 謂 以胡茂順 頓足歎曰:「中原不可 軍乃定。傑軍旣還,於是大梁以 城城 人日 順治之二年,正 中 :「渠欲 大 爲督師 傑至 懼 可法。 0 敍防河將士功耳。」 離州 可法遣官講解,乃 中軍 月 , 餉缺,諸軍皆饑。 士英喜, 故有是命, 李成棟爲 爲矣。」遂 爲許定國 可法權。 所 胤文,傑同 如 徐 慢弗 引 徐州 南 州 皆不守。 總 部下兵 兵,諸 頃之, 駐|揚 以總 鄉 而

舊城 高 俄 屯 稱 班 氏 報 兵 西 犯 部 肝 時 門險要,可法自守之。 大兵已取山東、河南北 胎 点 曲 闕 已降大清,泗州 ,召可法入援。 明 城中 日 À 總兵 悉斬關 、李棲鳳 援將 渡江 出 舟 、 監軍 侯 作書寄母妻, 抵 通 楫 方巖 燕子 淮 副 南。 空。 磯,得功 全軍沒。 使高 可法 四月朔 岐鳳 且曰:「死葬我高皇帝陵側。」 已敗良玉軍。 可法 檄各鎭 拔 可 浴 僧 出 \_\_\_ 法 移軍 兵,無一 日 降,城 夜奔還揚州。 駐 可法乃趨天長,檄諸 中勢益單。 泗州, 至者。 護 二十月 祖 訛傳 越二日,大清兵薄 陵。 諸文武 定 大大 將行,左良玉 國 清 兵 將 分陴拒守。 兵 將 救 肝胎 至,殲 大

巃 日 城 下 兩 我史督 淮 鹽 城 運使楊 師 西 也。 北 振 隅,城 逐 熙 殺 監餉 之。 遂 破 揚 知縣吳道正,江 州 可 知 法 府 自 任 刎 民 不 育 殊, 都縣 同 参將 丞 知 Ē 曲 志端, 從 擁 直 可 法 王 賞 出 纘 、功副 小 爵,江 東門,逐被 將汪 都 思 知 誠, 縣 執。 周 幕客盧渭 志 可 畏 法 羅伏 大 阷

皆

死

郭 在 大 給 觥 妾。 法 兼 外之 怒 太子 將 爲 思先帝,泫 日 相 士 督 太 可 梅 可 公此 息 太 師 法 無 行行 誰 花 法 日 初 師 可 嶺 犯 夕臥 死, 以定策功加 '佐者, 不 擒 吾令」將士述民育 然 王事 覓其遺骸。 張 劇 其後 示不 淚 盗程 盖 下 方殷,敢 功 易得也。」命鼓 四方 ٠, 食 繼孔 取 凭 少保兼太子太保,以太后 不 鹽 几臥 弄兵者 天暑, 重味, 功加 豉 爲 兒 下 ō 女計 之。 太傅, 此 ,多假其名 意 夏不箑, 衆屍蒸變, 人仍 明 乃獲発。 乎!歲 可 , 皆力辭,不允。 將 法 撃 士 素善飲 冬不 四 號 集轅 除遺 不 鼓, 嘗 以 裘, 可 門外, 行 孑 戒 文牒, 至加 辨 數斗 ),故 處鈴 左 寢 識。 右 不 後 少傅兼 時 門 至 不 閣 册 以 解 踰 謂 亂, 夜 不 驚 或 宮 衣 年 可 半, 啓, 舟 太子 相 殿 家 法 在 中 成 公 年 倦 不 左 軍 人 四十 太傅,敍 索酒。 死 右 中 舉 加 有 須 遙語 云 太師 絕 袍笏 言宜 臾, 餘, 飲 其故 警備 庖 可 江北戰功 招 無子 力辭 法 人 是夕 魂, 報 寤 ٠, 者, 葬 其妻 聞 功 知 殽 府民育 於揚州 日一命 進 允 加 肉 鼓 數 欲置 已 少 分 師 同

可 列 法 傅 無子 第 ,遺命 百 六 以副 + 將 史德威爲之後。 史 可 法 有弟可程,崇禎 十六年 進 土 擢 庶 苦士。 京師

陷 降 跋。 贼 敗 南 歸 可 法 請 置之理。 王以可法故,令養母 可程 遂居南京 後流 寫宜興,

閱四十年而卒。

堂上 屯 事 ,遂見殺,闔家男婦盡 任 眞定 民 育 字字 失,南還。 時澤,濟寧人。 福 王 赴井 時, 授亳 死 天啓 州 中鄉舉,善騎射。 知 州 以才 擢 揚州 眞定巡撫徐標請於朝, 知府 可 法 倚 之。 城 用 破 爲 緋 贊畫, 衣 端 理 坐

代 好 氣 三月 從直, 、
數遭 遼東 傑將 振熙, 士 人, 窘 臨 與 海 辱 其 人。 子 求 死 解 道 東門。 正 職 餘 會伏 姚 纘 爵, 人。 韶 至, 鄞 志端 人,工部尚 可 孝豐人。 法 命 代 書佐 之。 思誠、字純一 孫。 伏龍,新 志畏,亦鄞 喻 人。 ' |貴 池 故 人, 梓 人 進 潼 士, 知 縣 年 少

終 北 餘 轅 人 渭 爲 不 通 渭生, 圳 納 7、推官 居 長 禮 洲 二知 賢館 諸 縣。 生 次,可 甫 미 二旬 法 法才渭。 出 ٠, 鎭 城陷 淮、揚、 渭方歲貢 , 渭 渭 監 等伏闕 守 鈔關, ,當得官,不受 上 投於 書, 言「秦檜 河。 一職,而 肥 死 擬授崑 在 西 內, 門, 李綱 從 Щ 死者 歸 居 昭 外 等二

時 同守城死者,又有遵義知府何剛、庶吉士吳爾燻。 而揚州諸生殉義者,有高孝纘、王

應昌、舟子徐某,並自盡。 上琇、王纘、王績、王續等。 他婦女死節者,不可勝紀。 又有武生戴之藩、醫者陳天拔、畫士陸愉、義兵張有德、市民馮

俊,與康陽許都善,語之曰:「子所居天下精兵處,盍練一旅以待用。」都諾 何剛,字慇人,上海人。崇禎三年舉於鄉。 見海內大亂,慨然有濟世之志。交天下豪 而去。

帝壯其言,即擢 大寇可平。」因薦都及錢塘進士 光書,繼光數言義烏、東陽兵可用。誠得召募數千,加之訓練,準繼光遺法,分布河南 之,講韜鈐,練筋骨,拓膽智,時召而試之。學成優其秩,寄以兵柄,必能建奇功。 以戡亂也。 十七年正月入都上書,言:「國家設制科,立資格,以約束天下豪傑。 今日救生民,匡君國,莫急於治兵。陛下誠簡强壯英敏之士,命知兵大臣 剛職方主事,募兵金華。 姚奇胤、 而都作亂已前死,霖亦爲賊用,剛 桐城諸生周岐、陝西諸生劉湘客、絳州舉人韓霖 此所以弭亂,非所 不知,故並 臣讀戚繼 薦之。 那縣, 教習

下才,智者決策,廉者理 訓 緩急,募卒二千人,至是令剛統之。 練 )從之。 剛 出都,都城陷,馳還南京。 剛 乃上疏言「臣請陛下三年之內,宮室不必修,百官禮樂不 財,勇者禦敵。 先是,賊逼京師,剛友陳子龍、夏允彝將聯海舟達天津,備 子龍入爲兵科,言防江莫如水師,更乞廣行召募,委剛 **曾賞無出此三者,則國富兵强,** 大敵 ·必備。 可服。 惟日 若以驕 求天

議 梟 悍之將 東 南 論 雄 亦省 爲 人 (滿,徙之)江北,或賜爵,或贖罪,則豪右皆盡 盜 馭 Z 矣。 無制 賊,是株守以待盡 分遣 之兵,空言恢復,是却行 使者羅草澤英豪, 也。 惟 廟堂不以浮文取 得才多者受上賞, 而求前也。 力南 優游 士,而 畝 則梟傑皆畢命 歲月,潤色偏安, 而 以實績 軍 ·
餉亦充矣。」 課 队人,则 封疆 眞 錮豪傑於草 , 而 時不 (才皆 盜 能 魁 爲 亦 用 或 ·間,迫 少 用,而 矣

圍 佐 出 尋 可法 剛 進 遵 本司 拒 義 守。 知 員外 府。 城 郎,以其兵隸史可 破,投井死 可 法 垂涕曰: 「子去,吾誰仗?」 法。 可法 大喜得剛, 剛亦泣,願 剛亦 死生無相背。 自喜遇 可法 知 踰 万, 士英惡 揚 州

被

婦 遂 我 留 餉 多 吳 自言 軍 軍 爾 事。 壎,崇德人。 福王妃。 我 他 其父之屛方督學福 H 不 爾燻因守臣附疏以進, 歸, 崇禎十六年進士,授庶吉士。 以指葬可 建,爾燻斷一指畀故人祝淵曰:「君歸語我父母,悉出 也。 從高傑北 韶斥其妄言, 逮之, 征至睢州, 賊敗南還,謁 傑被難,爾 可法為救免。 可法,請從軍贖罪, **燻流寓祥符**。 後守揚州新 可法 遇 私 財

城

投井死。

高 弘圖、字研文、膠州人。 萬曆三十八年進士。 授中書舍人,擢御史。 **柧棱自持**,不依

麗人。

罪,又嘗語刺崔呈秀。 事,忠賢方導帝遊幸, 都,則楊連、左光斗、魏大中等已下詔獄,鍛鍊嚴酷。 不 遂令閒住 霆不宜頻擊」,「詔獄 能 無望,代還,移疾去。 天 啓初,陳時政八患,請用鄒元標、趙南星。 諸臣, 不悅,矯旨切責之。 呈秀、應甲皆忠賢黨,由是忠賢大怒,擬順天巡按不用。 魏忠賢亟攻東林,其黨 生殺宜聽司敗法」,則頗謂忠賢過當者。 後諫帝毋出蹕東郊, 以弘圖嘗與南星有隙,召起 巡按陝西,題薦屬吏,趙南星糾之,弘圖 弘圖 果疏論 叉極 南星,然言「國 論 疏中又引 前 陝西 弘圖故官。 巡撫喬 漢元 是已明,雷 弘圖乞歸, 帝 應甲 乘船

來會, 拜左僉都御史,進左嗣都御史。 莊 弘圖恥之,不與共坐,七疏乞休。 烈帝卽位,起故官。劾罪 五年遷工部右侍郎。方入署,總理戶、工二部中官張彝憲 田韶、劉志選、梁夢環。擢太僕少卿,復移疾去。 帝怒,遂削籍歸,家居十年不起。 三年春,召

請不 尚書兼 俟釋服 十六年召拜南京兵部 東 閣 日 大學士。 御 講 筵。 疏 陳 新政 右侍郎,就遷戶部尚書。 ) 設記注。 八 事。 請召詞臣入侍,日記言動。 ,宣義問。 請聲逆賊之罪,鼓發忠義。 明年三月,京師陷,福王立,改弘圖 ,睦親藩。 請如先朝踐 一,勤聖學。 禮部

列

東 山 極 陵 故 田 租 事 一,毋 , 遣官 使賊 嚴章 齎 徒 奏。 璽 藉 書慰 口 請禁奸 0 問 0 , 擇 宄 小 議 詔使。 人借 廟 祀。 端妄言, 請遣官 請權附列聖神主於奉先殿, 招諭 脫 罪 朝鮮,示牽制之勢。 ·僥倖 , 收人心。 仍於孝 並 請鐲 褒納焉 江北 躞 |側望 河 元 南、山 列 聖

閣 捷 之, 乃命 以 姜 可 謝 廷 日 翻 士英 推 大鉞假 尋 ,大鉞 廣笑曰:「公哭東林者,亦 當 陞 是 以 簡 之疏 意解。 太后 時,朝 用。 、士英並怒。 冠帶陛 出,朝端盆 中官議設東廠,弘圖 至,進太子太保 而 廷 大議 劉宗周劾 見。 多出 大 水火矣。 鋮 日 弘圖 疏 閣 入見,歷 東林 自外至, 中語 手。 內札 爭 耶』士英日 亦 及 馬士英疏薦阮大鍼、弘圖 陳冤狀,以弘圖不附 得。 用戶 大鍼宣言曰廣實 故庶吉士張溥,士英曰:「 部侍郎 遂乞休,不 一、「我非 張有譽爲尚書, 畔 許, 使之, 東林者 東林引 加太子 於是士英怒不可 不 ,東林拒 我故 爲證 可。 少師, 弘 圖 人 士英 封還, 我 也,死,酹而 弘 改戶 (日:「 耳。 圖 則 部 具 止 弘 我自任之。」 力言逆案不 尙 奏力諫,卒 圖 書,文淵 哭之。」 而 因 薦張 一級臾

其 年 ·十月, 弘圖 四疏乞休,乃許之。 弘圖旣謝政,無家可歸,流寓會稽。 國破、逃野寺

中

絕粒而卒。

不 攜中國一物往,不取朝鮮一錢歸,朝鮮人爲立懷潔之碑。 姜曰 廣,字居之,新建人。 萬曆末, 舉進士,授庶吉士,進編修。 明年夏,魏忠賢黨以曰廣 天啓六年奉 使例 東 鮮

削其籍。

年起詹事 崇禎 ,掌南京翰林院。 初, 起右中允。 九年積官至吏部右侍郎。 莊烈帝嘗言:「曰廣在講筵,言詞激切,股知其人。」每優容之。 坐事左遷南京太常卿,遂引疾去。 十五

圖協 後行。」 首曰廣。 日廣 至江 異議不 Ŀ 北都 心輔政。 明 乃改曰廣 日至奉先殿,諸勳臣語侵史可法,日廣呵之,於是羣小咸目攝 變聞,諸大臣議所立。 於是文武官並集內官宅,韓贊周令各署名籍。 用,用史可法、高弘圖、馬士英。 III 士英挾擁戴功, 禮部尚 書兼東閣大學士,與鐸並命。 日廣、呂大器用周鑣、雷縯祚言,主立潞王,而諸帥奉 內結勛臣朱國弼、劉孔昭、趙之龍, 及再推詞臣,以王鐸、陳子壯、黃道周 鐸未至,可法督師 曰廣曰:「無恩遽,請祭告奉先殿 外連諸鎭劉澤凊、劉良 日廣。 揚州, 廷推 日 名上,而 閣臣,以 廣 與弘 福 而

佐等,謀擅朝權,深忌曰廣。

未幾,士英特薦起阮大鋮。曰廣力爭不得,遂乞休,言:

之定力,反陛下數日 前見文武交競 ,旣慙無 前 之明 詔。 術 調 臣請以前事言之。 和;近睹逆案忽翻,又愧不能寢弭。 臣觀先帝之善政雖多,而 遂棄先帝十 以堅持逆 七年

列

傳

第

百

六

+=

姜日

匮

所得 所得言官,則貪橫無賴之史些、陳啓新 之溫體仁、楊嗣昌也,偸生從賊之魏藻德也;所得部臣 用大將用言官內傳矣。 :勛臣 尤美,先帝之害政間有,而以頻出 則力阻 南遷盡撤守禦狂釋之李國禎,所得大將, 而 所 得閣 臣 也。 口宣爲亂階。 則淫 凡 此皆力排衆議 貪 7万猾 之周 用閣臣內傳矣,用部 ,則陰邪貪狡之王永光、陳 延儒 則統絝支離之王樸 ,<br />
簡自中旨,<br />
後效可睹 也,逢君胺 民奸 臣 勳 倪寵 險 臣 新甲 內 刻毒 傳

今又不然。 不必愈同,但 一水面 對,立談 取官。 陰奪會推 之柄,陽避中旨之名,決廉

恥之大防,長便佞之惡習。此豈可訓哉!

臣 待罪綸扉,茍好盡言,終蹈不測之禍。 聊取充位,又來鮮恥之譏。 願乞骸骨還

郷里。

得旨慰留 士英、大鋮等滋不悦。 國弼、孔昭遂以誹謗先帝,誣衊忠臣李國禛爲言,〔三爻章

也。 興 而 薦 所 張 恃 乃下部議,竟不許。 劉 捷 在 澤清故附東林,擁立議起,亦主潞王。 一政府。 、鄒之麟、張孫振、劉光斗等。 今用 輔臣,宜 一令大 帥僉議 已,又請免故輔周延儒贓。 。」日廣愕然。 至是入朝,則力詆東林以自解免。 越數日 澤淸疏 日廣 曰 「是欲漸干朝政 劾呂大器、 雷縯祚, 且曰:「中

列傳第一百六十二 姜日廣

諸鎭 英熟視曰廣,詈曰:「我權奸,汝且老而賊也。」旣出,復於朝堂相詬詈而 日 理,必謙、鑣以是逮。 .廣曰:「微臣觸忤權奸,自分萬死,上恩寬大,猶許歸田。 臣歸後,願陛下以國事爲重。」 | | 統鐁復劾曰廣五大罪,請幷劉士楨、王重、楊廷麟、劉宗周、陳必謙、周鑣、雷縯祚置之 《疏攻劉宗周及曰廣,以三案舊事及迎立異議爲言,請執下法司,正謀危君父之罪。 日 嘗與士英交詆王前。 曰廣旣連遭誣衊,屢疏乞休,其年九月始得請。入辭,諸大臣在列。 宗室朱統顕者,素無行,士英啖以官,使擊曰廣。 澤淸又假 頃

而 反江西,迎曰廣以資號召。 日 . ) ) ) ) 骨鯁,扼於險邪,不竟其用,遂歸。 聲桓敗,日廣投偰家池 其後左良玉部將金聲桓者,已降於我大清,旣

奸 熊開元 何 而 京 無濟, 所 高 戶部主事 弘 極 周 羅罪。 圖 也。 遵,等仲馭,金壇人。父秦峙,雲南布政使。 m 、金鉉罷,王坤 陳于廷、姚希孟、鄭三俊皆蒙譴。 ,権稅燕 言官言出禍隨,黃道周諸臣薦賢 每讀邸報,半屬內侍溫 湖 用而 憂歸,服闋,授南京禮部主事。 魏呈潤、趙東曦斥,鄧希詔用而曹文衡罷閒,王弘祖 綸。 自今鍛鍊臣子,委褻天言,祗徇 不效,而惠世揚、劉宗周 每奉嚴諭, 率皆直臣封章。 鐮舉鄉試第一,崇禎元年成進士,授南 極論內臣言官二事,言:「張彝憲 勿獲進,華允誠諸臣 中貴之心,臣不知 自今播棄忠良,獎 、李曰輔 用

成 育小,祗快奸人之計,臣 益不知何所極矣。」帝怒斥爲民,鑣由是名聞 天下。

林 郎 中,爲吏部尚書鄭三俊所倚。 ··, 矯 初 樹 鏣 名節 世 父 尚書應秋、叔父御史維持,以附魏忠賢並麗逆案,鐮 及被放,與宣城沈壽民讀書茅山,廷臣 然為 人好名,頗飾 傷,給事中韓如愈疏論 多論薦之。 十五年起禮 恥之。 之,罷 通籍後,即交東 歸 部 主事

鋮 亡何,左良玉稱兵檄討士英罪,言引用大鹹,搆陷鐮、縯祚,鍛鍊周內。 萬 鐮 因 亦逮治。 謂 飼 獄 |鐮實召良玉兵,王乃賜鐮、縯祚自盡,鍾棄市 急,屬御史陳丹衷求解於士英,爲緝事者所獲,丹衷出爲長沙知州。 希大鉞指,上疏 鏣 福 、縯祚等皆曰廣私黨,請悉置於理,遂令逮治。 王立於南京。 阮大鍼居金陵時,諸生顧杲等出留都防亂公揭討之,主之者鑣也,大鍼 痛 馬士英旣逐呂大器,以鐮及雷縯祚 抵纏。 而光祿 卿祁逢吉,鑣同邑人,見人輒詈鑣,遂得爲戶部侍郎。 而士英劾鑣從弟鍾從逆,幷及鑣,鍾 曾主立潞王議,令朱統鎭劾曰廣, 士英、大鍼益怒。大 於是察處御史羅 以故恨鐮

舉 派 人貢 得刑部主事。 雷 生就試教職者、悉用爲部寺司屬推官知縣、凡二百六十三人、號爲庚辰特用。 續祚,太湖人。 崇禎三年舉於鄉。 十三年夏,帝思破格用人,而考選止及進士,特命 明年三月劾楊嗣昌六大罪可斬,鳳陽總督朱大典、安慶巡撫鄭二陽、河南 Im 縯

巡撫高名衡、山東巡撫王公邴宜急易,帝不悅。

兵淫掠 ,折除軍餉,搆結 Ħ. 年擢武 一德道 0兵備: 大黨。 僉事 帝 0 心善其言, 山東被兵,縯 以淫掠事責兵部, 祚 守德州,有 詔 獎勵。 而令縯祚 乃疏 再 幼督. 陳。 「師范· 志完者,首 志完縱

輔

周

延

儒

門生

也,縯祚意有所忌,久不奏。

避首 嚴嵩 是。 無算。」 原之勢,片語 避入德州 皆其黨也。 師非入城官 一、薛國 大僚 輔 明 延儒 年 五 城。 則 觀 薊州 與 月,延儒 方德州被攻,不克去,掠臨清,又五日,志完始至。 尚書范景文等,詞林則諭德方拱乾等,言路則給事中 操生 自待也。 舉 漏三下,邀臣議。 國 失事, 死之權, [媚附· 下廷議,縯祚乃奏言:「志完兩載僉事, 臣外藩 時局,略進一言。 由降 稱功頌德,編於班 1 小吏,乙榜孤蹤,不言不敢,盡言不敢,感陛下 內潰, 臣不聽,志完 志完不 至中樞主計請餉必餽常例,天下共知, 聯。 ·懌而 乃偕流寓詞臣拱乾見臣南城古廟。 去。 臣不忍見陛下 若夫座主當朝,問利曲 驟陟督師, 聞後部破景州, 以周、召待 朱徽 、沈胤培、袁彭年等, 非有 虚懷 大臣 大黨, 庇,隻 則大懼, 一,而 俯納,故 他乾沒更 臣告以 手有 大 何以至 臣 督 欲 不 燎 以

張嘉言罪,而 疏 入, 帝盆 召 縯 心動。 祚 陛 見。 命議舊計 越 數 日, 臣李待問、傳淑 抵京。 又數日入對, 訓,樞臣張國維及戶科荆 召志完、拱乾質前疏中語,拱乾爲 永祚,兵科沈迅、

列

僡

第

百

六

+

蓌

日

赝

完,而令縯祚還任。 爲功。 志完辨,帝領之。 考選臺諫, 問練 盡收門下。 縯祚尋以憂去。 於稱功頌德者誰,對曰:「延儒招權納賄,如起廢、清獄 凡求總兵巡撫者, 必先賄幕客董廷獻。」 帝怒, 蠲 逮廷獻, 租,皆自居 誅志

者。 因良玉兵東下,故大鍼輩急殺之。 福 王 時,統鐁劾曰廣,因及之,遂逮治。 明年四月與鐮同賜自盡。 故事,小臣無賜自盡

蓋明祚傾移,固非區區一二人之所能挽也。 力圖 不保,志決身殲,亦可悲矣!高弘圖、姜曰廣皆蘊忠謀,協心戮力,而扼於權奸,不安其位。 興復。 贊曰:史可法憫國步多艱,忠義奮發,提兵江滸,以當南北之衝,四鎭棊布,聯絡聲援, 然而天方降割,權臣掣肘於內,悍將跋扈於外,遂致兵頓餉竭,疆圉 日蹙,孤城

## 校勘記

賊從間道突安慶石牌 安慶府懷寧縣有石牌市。 石牌,原作「石碑」,據懷陵流寇始終錄卷九、讀史方興紀要卷二六改。 記

 $\subseteq$ 

誣衊忠臣李國禎爲言 及本書卷一四六季濬傳、明史稿傳一四九姜曰廣傳改。 李國禎,原作「李國楨」,國權卷一〇〇頁六〇五四同。

**今據本傳上文** 

# 明史卷二百七十五

## 列傳第一百六十三

張愼言 子履旋 徐石麒 解學龍 高倬 黄端伯等

### 左懋第 祁彪佳

有能聲。 張愼言,字金銘,陽城人。 調繁曹縣,出庫銀糴粟備振,連值荒歲,民賴以濟。 祖昇,河南參政。 慎言舉萬曆三十八年進士。 除壽張知縣,

且先徙以爲望,選侍不卽移宮,計將安待。」無何,賈繼春以請安選侍被譴, 誰 黨與,所以全父子之情,然必摘發奸謀,所以明君臣之義。至先皇踐阼, 餌之奸旋發。 秉國成,一至此極!若夫鼎湖再泣,宗廟之鼎鬯爲重,則先帝之簪履爲輕。 泰昌時,擢御史。 崔文昇投涼劑於積憊之餘,李可灼進紅丸於大漸之際,法當駢首,恩反賜金 踰月,熹宗卽位。 時方會議三案,愼言言:「皇祖召諭百工,不究張差 蠱惑之計方行,藥 慎言抗疏救之。 雖神廟鄭妃

列

傳

第

百

六

十

Ξ

張傾

言

帝怒,奪俸二年。

|像墾田三千餘畝,其溝洫廬舍之制,種植疏濬之方, 犁然具備, 可倣而行。 」因列上官種 歸,銓屬曹欽程論劾,誣盜曹縣庫銀三千,遂下撫按徵贓,編戍 無家之衆,墾不耕之田便。」詔從之。 種、民種、軍種、屯種五法。 天啓初,出督畿輔屯田,言:「天津、靜海、興濟間,沃野萬頃,可墾爲田。 又言「廣寧失守,遼人轉徙入關者不下百萬。 。嘗疏薦趙南星,劾馮銓, 福州 銓大恨。 五年三月,愼言假 宜招集津門,以 近同知盧 個 觀

言屢疏陳奏, 右都御史事 陳八議,其後卒不能行。 考功,報可。 下吏,尋落職歸。久之,召爲工部右侍郎。 莊烈帝卽位,赦免。 悉根本計。 旋擢太僕少卿,歷太常卿、刑部右侍郎。 崇禎元年起故官。會當京察,請先治媚璫者附逆之罪,其他始付 大學士楊嗣昌議改府州縣佐為練備、練總,愼言以更制 由左侍郎遷南京戶部尚書,七疏引疾,不允。 國用不支,廷議開採、鼓鑄、屯田 就改吏部尚書, 、鹽法諸 事 事。 歷 愼 思

親藩 廢籍,慎言薦吳甡、鄭三俊。 ,日開屯,日叛逆,日僞 十七年三月,京師陷。 命,曰褒卹,曰功賞,曰起廢,曰懲貪,曰 五月,福王卽位南京,命愼言理部事。 命性陛見,三俊不許,大學士高弘圖所擬也。 上中與十議: 「漕稅。 皆嘉納。 勳臣 日節鎭,日 劉孔昭、趙 時大起

列傳第一百六十三 徐石麒

職掌。 薦無不當。 參駁歸言官,不聞委勳臣以糾劾也。 銜,何嘗不用武。年來封疆之法,先帝多寬武臣,武臣報先帝者安在。祖制以票擬歸閣臣, 慎言欺蔽罪。」慎言疏辨,因乞休。 萬象又言:「首膺封爵者,四鎭也。 生具在、性素有清望、安得指爲奸邪。」孔昭等伏地痛哭、謂慎言舉用文臣、不及武臣、囂爭 之龍等一日朝罷,羣詬於廷,指慎言及姓爲奸邪,叱咤徹殿陛。 不已。 奈何廷辱冢宰。」弘圖等亦以不能戢和文武,各疏乞休,不允。 又疏劾愼言,極詆三俊。 諸臣痛哭喧呼,滅絕法紀,恐驕弁悍卒益輕朝廷。」御史王孫蕃言:「用人, 吏部 · 且謂:「愼言當迎立時,阻難懷二心。乞寢蛙陛見命,且議 使勳臣得兼糾劾,文臣可勝逐哉 給事中羅萬象言:「愼言平 」 史可法奏:「慎言疏 新改京營,又加二鎭

蕪湖、宣城間。 性旣不出,慎言乞休得請,加太子太保,**廕一子。山西盡陷於賊,慎言無家可歸**, 國亡後,疽發於背,戒勿藥,卒,年六十九。 流寓

**愼言少喪二親,鞠於祖母。** 子履旋,舉崇禎十五年鄉試。 及爲御史,計聞,引義乞歸,執喪三年以報。 賊陷陽城,投崖死。 事聞,贈御史。

徐石 麒 字寶 摩,嘉思 興 天啓二年進士。 授工部營繕主事 ,筦節愼庫。 魏忠賢兼領

下 詔 薪 獄 司 <del>万</del> , 所 麒 爲 悉從 盡 力。 庫 發, 忠賢怒,執新 石 麒 輒持故事 城侯王昇子下 格 之。 其黨 獄 課於庭,不 令 誣 賄 石 爲 麒, 動 捕繫其家 御 史黃尊素 勒完 坐件 忠賢

削

其籍

焉。 讞吏 之。 寶卿 煊 會推 部 、應天府丞。 崇禎 召 閣 石麒官南京 奪 臣 尙 對 書李 可 三年起 便 日宣 肚、致、三謨及讞 殿 日宣等獄 十餘 南京禮部 石麒 十一 再推 獨 年,至是始 年春 , 不赴。 因 帝日 主 及副 入賀。 獄 事 ,就遷考功郎 『枚ト大典, 左侍郎惠世 都 及是帝怒,戍日宣及 入爲左通政,累遷光祿 三俊 御 史房可 時 爲 一揚官。 壯 日宣 中。 刑 、工部右侍郎宋政、大 部 稱詡徇 尚書,議侯恂 八年佐尙書鄭三俊京察,澄 石麒代世 吏科 卿、通政使。 私。 都 揚 給事 石麒予輕 掌 獄 部 不 中章 事 中 / 理寺卿 -·,得 ,旋進左 正宸 Ŧ. 比 罪。 年 貶 張 擢 河 汰至公。 三謨,石麒 刑 石 南 秩 部 麒 道 疏 右 御史張 先是, 侍 救 歷尙 冷釋 息 與

時 校 未 IÈ 中,可 未 今斷 法 當 是 赫 有 覆擬。」乃論新甲陷邊城四,陷腹城七十二,陷親藩七,從來未有之奇禍。 身 獄 時,帝 然,無敢倖免者。 在 之不合於律者十餘章,先以白同 朝廷, 以 威 刑馭 不告君父而 下,法官 兵部尚 專擅 引 書 律,大抵深文 陳新 便 宜 甲下 者。 官。 獄 新 ",朝士 附 以 甲私款 次審 會,予 多營救。 理 辱 ·重比。 十三 國, 司囚 當失陷 石麒 石麒 持之日「人臣 奉命清獄 多寬減。 城寨律, 推 斬。 然 廉 明 當 無境外 公, 帝 律 一臨敵

缺乏,不依期進兵策應,因 m 失誤軍機者斬。 奏上,新甲棄市,新甲黨皆大 恨

情 怒其 石麒再疏留,不納。埰、開元旣 下 復鞫訊。 令石麒 事 獄 、失出,召詰都御史劉宗周,對曰:「此獄 石麒 改讞詞,棄之市。 刑官所執者法耳,法如是止,石麒非私裕民也。」帝曰:「此奴欺罔實甚,卿等焉知。」 帝欲殺之,初令三法司同鞫,後專付刑部,石麒議戍烟瘴。 帝責對狀,石麒援故事對。 尋擢本部尚書。 無何,宗周以救姜埰 中官王裕民 下詔獄,移刑部定罪。 帝大怒,除司官三人名,石麒落職閒 坐劉元斌黨、元斌縱 非臣讞。」徐曰:「臣雖不與聞,然閱讞詞,已曲 、熊開元獲嚴譴,僉都御 石麒據原詞擬 軍淫掠,伏誅,裕民 奏成,署院寺名以 開元贖徒,埰謫戍,不 史金光辰 住。 以欺隱不 救之,奪職。 進。 躯 帝

鼎 馳驛歸 鼎、給事 嚴起廢、明保舉、交堂廉七事。 亦 兩 福 疏劾石麒,并言其枉殺陳新甲。 王 中陸朗於外。 |監國,召拜右都御史,未任,改吏部尚書。 朗賄 奄人得留用,石麒發其罪。 時方考選, 石麒疏辯,求去益力。 與都御史劉宗周矢公甄別, 奏陳省庶官、愼破格、行 朗恚,詆石麒, 馬士英擬嚴旨,福王不許,命 石麒 以年例 稱疾乞休。 久任、重名器、 出 御史黃耳

田 成 輩納 石麒 剛 賄 請 方清介, 扼於權奸, 悒悒不得志。 石 麒悉 拒 不 應。 由是中外皆怨,搆之去。 士英挾定策功,將圖封, 去後以登極思, 石麒議格之。 加太子太保。

列

傳

第

百

六

+

=

徐

石

麒

中,以閏月二十六日朝服自縊死,年六十有八。 明 年 ,南都亡。 石麒時居郡 城外, 城將破, 石麒曰:「吾大臣也, 城亡與亡」復入居城

解 學龍,字石帆,揚州 興化人。 萬曆四十一年進士。 歷金華、東昌二府推官

置廊 多所乾沒。 廟,必能表正百僚,裁決大務。」失忠賢意,不報。已,劾川 天啓二年擢刑科 學龍三疏發其弊, 給事 中。 國縉逐獲譴。 遼東難民多渡海聚登州,招練副使 王紀忤魏忠賢削籍, 貴舊總督張我續貪淫漏網, 學龍言:「紀亮節 劉 國縉請帑金十 萬振 弘猷,召

新總督楊述中縮朒卸責,帝不罪。 學龍通曉政務,上言:

汰之, 萬。 奇。 竄 入 新 神祖 遼兵盡潰,關門宜募新兵。 遼左額兵舊九萬四千有奇,歲餉四十餘萬。今關上兵止十餘萬,月餉 歲可得餉數十 營, 時,文增至 而舊額又 一萬六千餘,武增至八萬二千餘矣。 萬。 如故,漏卮可勝言。 裁冗吏,核曠卒,俾衞所應襲子弟襲職 薊鎭 舊有額兵,乃亦給厚糈召募。 國初,文職五千四百有奇,武職二萬 今不知又增幾倍。 而不給俸, 舊兵以其餉厚, 乃二十二 又可得數 誠度冗 八千 悉 者 ·有

列 傳 第 百 六 + Ξ 解 袓

犬,遂削籍 下 積 卒,漕卒欺官司,官司欺天子,展轉 其 與兵之食衷之, 是又化有用之六,爲無用之一 所司 制 加 斛 銀 ,溝涂之界,各樹土所宜木,小可獲薪果之饒,大可得抗扼之利 京邊米一石,民輸則非一石也。 而 有 四 固 錢,以易錢則 議 志。 竟中格。 兵之一, 昔吳璘守天水,縱橫鑿 稍進右給 好 米 國之三。 値 矣。 一錢百, 事 中。 臣 相欺,米已化為糠粃 總計之, 惡米止三四十 以爲莫如修屯政,屯政修 以民之費與國之收衷之,國之一 渠,綿亙不絕,名曰「地網」,敵騎不 五年九月,御史智疑劾學龍及編修侯恪爲東林 民費其六,而 錢, 沙 又其下腐 土; 兵食其 兼濕 則地 臭不 0 熱蒸變,食不 闢 一、敵雖 而民 況 可 ,民之三。 食。 小民作奸 强, ·能逞。 有樂土, 以 何 國 施平。 可 今倣 Z 關餉 欺 咽 漕 栗

帝

亟

賊 叉 E 重兵, 20%滅 臣所 足餉 故 崇禎 終無及額之日也。 學龍 部 十六事。 元 年 州縣七十八,而坐逋賦降罰者至九十人。 以爲言, 起 歷戶科都給事中。 帝皆採納。 詔 增置千人。 請 別 遷太常少卿、太僕卿。 新舊,酌多寡,立帶徵之法。」可之。 以民貧盜起,請大淸東治。 討平都昌、萍鄉諸盜,合閩兵擊破封山妖賊張 由數歲之逋責於一 五. 年改 右僉都 尋劾薊撫王應豸剋餉激變, 四方盜 御 史, 歲,數人之逋責於 巡撫 起,江 江西。 普薇等, 儿 疏 獨

帝怒、徵下獄、責其黨庇行私,廷杖八十、削其籍、移入詔獄、竟坐遣戍。十五年秋、道周召 十二年冬,擢南京兵部右侍郎。明年春,將解任,遵例薦舉屬吏,幷及遷謫官黃道周

還,半道請釋學龍,不聽。

**傲唐制六等定罪。**學龍議定,以十二月上之。 十七年五月,福王立於南京,召拜兵部左侍郎。十月擢刑部尚書。 時方治從 賊之 獄,

程,御史李振聲、喻上猷,山西提學參議黎志陞,陝西左布政使陸之祺,兵科給事中高 翔漢,潼關道僉事楊王休,翰林院檢討劉世芳十一人也。 其一等應磔者: 吏部員外郎宋企郊, 舉人牛金星, 平陽知府張嶙然, 太僕少卿曹欽

一等應斬秋決者。刑科給事中光時亨,河南提學僉事躍焴,庶吉士周鍾,兵部主事

方允昌四人也。

國遴,襄陽知府王承曾,天津兵備副使原毓宗,庶吉士何胤光,少詹事項煜七人也。 三等應絞擬贖者:翰林修撰兼戶、兵二科都給事中陳名夏,戶科給事中楊枝起、廖

郎侯恂 郭萬象,給事中申芝芳、金汝礪,舉人吳達,修撰楊廷鑑及黃繼祖十五人也。 四 ,山西副使王秉鑑,御史陳羽白、裴希度、張懋爵,禮部郎中劉大鞏,吏部員外郎 等應戍擬贖者:禮部主事王孫蕙,翰林院檢討梁兆陽,大理寺正錢位坤,總督侍

Ŧi. 一等應徒 擬 流贖者: 通政 司 參議宋學顯, 諭德方 洪乾 工部主事繆沅, 給事 中 呂兆

龍 傳振鐸,進士 吳剛思 ,檢討方以智、傅鼎銓,庶吉士張家 玉 及 沈 元龍十人 也

曜,行取 六等應杖 知縣周 擬 壽明,進士徐家麟及向列星、李棡 演讀者: 工部員外郎潘 同春, 禮 部 八人 員 外郎吳泰 也 來, 主事 張琦,行 人王于

御史涂 侍郎 黄紀、孫襄十九人也 黨崇雅 其留北俟後定奪者:少詹事何瑞徵 必泓、張鳴駿, ,更部侍郎熊文舉, 司業薛所蘊,通政參議趙京仕, 太僕卿葉初春, 、楊觀光、太僕 給事 中冀鼎孳、戴明說 編修高爾儼, 少卿 張若麒, 戶部郎中 副使方大猷, 、孫承澤 衛周祚及 、劉昌) 戶部

郎左 謙、梁淸標、楊棲鶚、張元琳 懋熙及王之牧、王皋 懋泰,禮部郎中 其另存 再議者: 、梅鶚、姬琨、朱國壽、吳嵩胤 吳之琦,兵部員 給事中翁元益、郭充,庶吉士魯奧、吳爾燻、史可程、王自超、白胤 、呂崇烈、李化麟、朱積 外郎鄒明魁,行人許 、趙頻 作梅, 、劉廷琮,吏部 進士胡顯, 郎中侯佐,員外 太常博士襲

二十八人也

得旨 周 行 取 知 鍾等不 其已奉旨錄用者:兵部尚書張縉彥,給事 縣 黃國 當緩 琦 決,陳 、施鳳儀,兵部郎中張正聲,內閣 名夏等未蔽厥辜,侯恂、宋學顯、吳剛思、方以智、潘同 中時敏,諭 中書舍人顧大成 德衛 胤文、韓四維,御史蘇京, 及姜荃林等十人也。 春等擬罪

列

傅

第

百

六

+

 $\equiv$ 

解 學

韻

未 合。 新榜進 土盡 汚 僞 命 ,不當復玷班聯。」令再議。 惟方拱乾結納馬、阮,特旨免 其罪

楊維 仍執 削 且請 籍。 垣 前 停 明 聲言欲劾學龍,學龍引疾。 律。 年 刑 E 鐸卽擬 月,學龍奉韶擬 當是時,馬、阮必欲殺 兪旨,褒以詳慎平允。 周鍾、光時亨等各加一等, 周 命未下,保國公朱國弼、御史張孫振等詆其 鍾。 學龍欲緩其死,謀之次輔 士英聞之大怒,然事已無及。 潘 同春諸 臣皆候補 王 鐸, 乘士英注籍 大鉞 小臣, 曲 暨其 受僞 庇行私、遂 黨 張捷、 無據, 上之,

吳嵩胤、姜荃林,皆未詳其官 等以下俱爲民,永不敍用。 正刑辟也。 大鍼旣殺鍾、時亨,即傳旨二等罪斬者謫充雲南金齒軍、三等罪絞者充廣西邊衛軍 黃繼祖、沈元龍、向列星、李棡、黃紀、孫襄、王之牧、王皐、梅鶚、 然學龍所定案亦多漏網,而 所擬 一等諸犯,皆隨 賊西行 |姫||琨 朱國壽 ·)實未嘗 了, 四

學龍歸,南都旋失。久之卒於家。

高倬,字枝樓,忠州人。 天啓五 年進士。 除德清 知 、縣、調 金華

**崇**顧四年, 徵授御史。 薊遼總督曹文衡與總監鄧希 詔相訐奏。 韶殫力幹濟,以 副委

倬 壞 不 封 愈 少 疆 乃 退。 上疏言:「文衡骯髒成性, 事 使 重 人 疏 一,宜 效希認 入, 貶 撤 希韶安文衡 一、督撫 秩 視 、之展 事 o ら 布 巡 必不 益難 若文 視 草 能 場, 衡 仰鼻息於中官; 卽 不 坐失 諸 足 邊督 用 火 下 撫 宜 吏 如 更 文衡 置 希詔睚眦 廷 臣 亦 勿 使 申 不 中官參之。 救 炒 未忘,何能 了,不 ,使 納。 人效 文衡 逾 諸 化 年. 邊 戈 熱審 矛 鎭 將 爲 邊 臣 二, 給 事 同 如

之

廢

希

詔

氣。

任

事

中

吳

甘

來

以

爲言

分始

釋

歸

起

上林署丞

一,稍

遷

大

理

右

寺

副

報, 屢 師 陷 遷 六年 大者旬 南京 + 太僕 月擢 年 , 小 五. 右愈 卿。 月,火 者 五 太僕 都 H 星 御 o 一逆行、 | 放駐 | | | 史, 其奉 提督 旨 詔 修省。 覆 州 操江。 讞 滁 者 爲 | 倬以 了,或 五 南 其 秋 都 近 日 西北 , 三月 操 者刑 江 門戶。 改任 獄 務 滋繁, 俾 武臣 請募州 積 案盡 劉 法 孔 官務停閣 疏,囹 人 昭, 爲 召悼别 兵, 吾 保障 衰 ,請敕諸 减 用 鄉土, 帝 未 司 爲 赴 剋 從 採 期 而 納。 京 奏

設 金 不 納 玉 稲 諮 王 立 寶, 明 南京,拜倬工部右侍郎。 年二月, 計 貨數十 由 左侍 萬 倬請 郎 拜刑 談裁省。 部 尙 御 書。 光 用 祿 監內官請給工料銀,置龍 寺辨 國 破 () 倬投 御 用 器 緩 至萬 死 五 千七 鳳几榻諸器物 百有奇,悼又 以 及宮殿陳 爲 言。

是 時 臣殉難者 |倬 與 張捷、楊 維 垣 ,庶僚則有黃端伯 劉 成治 、吳嘉胤、龔廷祥

勘 歸。 ,避居廬山。 服闋 端伯 入都,疏陳益王居建昌不法狀。 字元公,建昌新城 不出,捕繫之。 福王立,大學士姜曰 人。 崇禎元年進士。 廣薦起之。 王亦劾端伯離間 明年三月授儀制主事。 歷寧波、杭州二府推官。 親藩 及出 妻酗 万. 酒諸事 月,南都 行 取赴 o 都,母憂 破,百官 有詔 候

將出降,入戶部封府庫。 成治,字廣如,漢陽 人。 成治憤,手搏之,之龍跳而免。 崇禎七年進士。 福王時,歷官戶部 成治自經 郎中。 國破,忻城伯趙之龍

閱四月,諭之降,不從,卒就戮。

皆迎降。

端伯

嘉胤 ,字繩如,松江華亭人。 由 鄉舉歷官戶部主事。 奉使出都, 聞變, 還謁方孝孺祠,

投繯死。

廷祥,字伯興,無錫 人。 馬世奇門人也。 崇禎十六年進士。 爲中書舍人。 城 破,衣 冠

步至武定橋投水死

時 ·又有欽天監博士陳于階、國子生吳可箕、武舉黃金璽、布衣陳士達,並死焉。

左 崇禛四年進士。 授韓城知縣,有異政。 遭父喪,三年不入內

寢,事母盡孝。

馬上 策, 令天下 速 傳。 年擢戶科給事中。 贖罪 叉請 者盡輸栗,鹽 嚴禁將士剽掠,有司朘削。 疏陳四弊,謂民困、兵弱、臣工委頓、國計虛耗 筴復開中之舊, 請散米錢,振輦 令輸粟邊 塞充軍食。 下饑民,收養嬰孩。 彗星 見, 也。 詔 停刑 又陳 明 年 貴粟之 懋第請 ·正月,

剿

餉

罷

徵,亦請馬上速行,恐遠方吏不知,先已徵,民不

沾

實

惠。

帝

並

採

納

其奸 請 見衰 從 餉 不 然, 於 輕 練三餉 门以以 典。 極 止 三月, 下共知 豊 陛 「荒州縣,下詔速停,有司息訟,專以救荒爲務。」帝曰:「然。」於是上災 信陛下之明詔。 何 豊 停 也? 並 大 下 之,而 風 停,中災六十八州縣止徵練餉,下災二十八州 有其 刑 由 霾 可止彗,解網不可 蠲 文未修其實乎? 餉獪 停者止一二。 帝 布袍齋居,禱之不 未省,何也? 而 刑 獄 則 存留 以睿 以 臣敢 返 諦 之賦,有司迫考成,催 慮之疑信,定諸囚之死生,諸 風 自今因兵徵餉, 以實 止。 乎? 進。 懋第言:「去秋 且陛 練餉 下屢沛 之加,原 預使天下 大恩, 縣秋成督 星變, 徴 非 未敢緩,是以莫救於 四方 知應 得已。 朝停刑而 疑於 徵 死 加之數, 者猶枕 乃明 心與疑信 七 夕即滅。 十五 旨減 官吏 藉,盜賊 州 兵 半者,悉 無所逞 、縣新、 凶荒 以 **今**者 省 未

四。 爲 墟。 米石 + 其 儿 、他饑疫 銀 年督催漕運,道中馳疏言:「臣自靜海抵臨淸,見人民饑死者三,疫死者三,爲盜者 二十四四 死者, 屍積 兩,人死 水涯,河爲不流,振排安可不速。」已又陳安民息盜之策,請核荒 取 以食,惟聖明垂念。」又言:「臣自魚臺至南陽,流寇殺戮,村市

列

米石二十兩,而河南乃至百五十兩,漕儲多逋。朝議不收折色,需本色。今淮、鳳間麥大 效安在。奈何使衆心瓦解,一至此極乎」又言:「臣去冬抵宿遷,見督漕臣史可法,言山東 言練餉之害。三年來,農怨於野,商嘆於途。如此重派,所練何兵。兵在何所。剿賊禦邊, 科左給事中。 熟,如收兩地折色,易麥轉輸,豈不大利。昔劉晏有轉易之法。今歲河北大稔,山東東、兗 田,察逋户,予以有生之樂,鼓其耕種之心。又言:「臣有事河干一載,每進父老問疾苦,皆 二郡亦有收。 誠出内帑二三十萬,分發所司,及時收糴,於國計便。」帝卽命議行。屢遷刑

旅、偕山東撫臣收拾山東以待、不敢復言北行。 紹愉偕,而令懋第經理河北,聯絡關東諸軍。馬紹愉者,故兵部郎官也,嘗爲陳新甲通款事 因是返匶葬,請行。乃拜懋第兵部右侍郎兼右僉都御史,與左都督陳弘範、「三」太僕少卿馬 天、徽州諸府。時大清兵連破李自成,朝議遣使通好,而難其人。懋第母陳殁於燕,懋第欲 卿、副懋第。 至義州而還。 十六年秋,出察江防。明年五月,福王立,進兵科都給事中, 且紹愉臣所劾罷,不當復與臣共事。必用臣經理,則乞命弘範同紹愉出使,而假臣一 懋第言: 臣此行致祭先帝后梓宫,訪東宫二王蹤跡。臣既充使臣,勢不能兼理 新甲既誅、紹愉以督戰致衄、爲懋第劾罷。及是紹愉已起官郎中,乃進爲少 如用臣與弘範北行,則去臣經理,但銜命而 旋擢右僉都御史,巡撫應

往, mi 罷紹愉勿遣。」閣部議止紹愉,改命原任薊督王永吉。 王令仍遵前諭

望時 灣, 言。 瞻 高 本朝傳令止 時 王令齎白金十萬 皇之弓 懋第 整頓 瀕 )劍,則 士馬, 必能渡河而 行言:「臣此行,生死未卜。 許百人從行。 思成祖列聖之陵寢何 兩、幣帛數萬匹,以兵三千人護行。八月,舟渡淮。 戰,始能 扼河 存,撫江上之殘黎,則 請 以辭闕之身,效 而 守; 必能扼 河 一言。 而守, 念河 北、山東之赤子誰 願陛下以先帝仇恥爲 始能畫 江 十月朔, 而安。」衆 卹。 次張家 題其 心 更

哭而 俱 叱 其 留懋第等勿 出之。 以不降誅,而紹愉獲免。 從弟懋泰先爲 奠之。 懋第衰経 至閏月十二日, 遣。 卽以是月二十有八日遣還出都。 入都門,至則館之鴻臚寺。 吏部員 於是自滄州追還懋第,改館太醫院。 (外郎,降賊,後歸本朝授官矣,來謁 與從行兵部司務陳用極, 請祭告諸陵及改葬先帝,不可,則陳太牢於旅所, 弘範乃請身赴江南招諸將劉澤淸等降 游擊王一斌,都司張良佐、劉統、王廷佐 順治二年六月,聞南京失守, 懋第。 懋第曰:「此非吾弟也。」 附,而 慟哭。

祁彪佳, 字弘吉, 浙江山陰人。 列 僔 第 祖父世清白吏。 彪佳生而英特,丰姿絕人。 弱冠,第

天啓二年進 授興化府推官。 始至,吏民易其年少。 及治事、剖決精明、皆大畏服。 外

隙開水火,其患顯 **資,冒濫之竇雖可淸,獎拔之術或未盡。** 臣所慮於小臣者此也。 監司守令多貶秩停俸。 威,競迎合以保名位。 之習不可不破。」帝卽命議行。又言:「九列之長,詰責時聞,四朝遺老或蒙重譴。 帷 幄 崇禎 一大臣,而陷敵衝鋒之士不預,何以勵行間。 四年起御史。 ,潛通交結,其患深。 臣所慮於大臣者此也。 疏陳賞罰之要,言:「點功因一級疑,稽三年之敍,且恩及督撫總帥 國家聞鼙鼓思將帥,苟得其 臣子精神才具無餘地,展布曷由。急功赴名之心不勝其掩罪匿瑕。 臣所慮於內臣者此也。」件旨譙責 臣所慮於武臣者此 方伯或一二考,臺員或十餘載,竟不得遷除, 山東之變,六城連陷,未嘗議及一官, 人,推轂築壇,禮亦宜之。 也。 撫按則使中官監視 若必依序循 諸臣 「忧嚴 欺蒙

善其言,下之所司。 贓,曰欽提,曰 其要於戢行伍以節餉 楚、粤之山賊,浙、閩、東粤之海賊,滇、黔、楚、蜀之土賊爲四大勢。 尋上合籌天下全局疏,以策關、寧,制登海爲二大要。分析中州、溱、晉之流賊,江右、 隔提,日 出按蘇、松諸府、廉積猾四人杖殺之。 ,實衞所以銷兵。 計訟,日窩訪,日私稅 復陳民間 ,日私鑄,日解運,日馬戶,日 十四四 大苦: 日里甲, 日虚糧 宜興民發首輔周延儒祖墓,又焚 極控制駕馭之宜 鹽 一日行 丁,日難民。帝 一,而歸 日 搜

覈 翰 降 林 陳于鼎、于泰廬, 俸 尋以侍 養 歸 亦發其 家居 九 、祖墓。 年, 母 彪佳 服 終 捕治 召召 掌 如法, 河南 道 ılı**j** 事 於延儒 十六年佐大 無所徇,延儒 八計,問 憾之。 遺莫敢 口 及門 道考

刷卷南畿,乞休,不允,便道還家。

事 煜 傑 理 寺丞 H 及 兵 時 大 擾 北 揚州 敏 理 都 旋 家 寺 變聞 擢 ,燬其三代 正 民 錢位 右僉都御 入奔避江 謁 福王 坤、通 .四棺。 史, 南, 於 政 南京。 奸民 巡撫 司 參 彪 議 佳 江 乘 王 宋學 請 南。 機剽 監國 議 蘇州諸 從 、顯、禮部 放,命彪佳 逆諸 或請登極。 臣罪,而 生檄討其鄉官從賊者 員外郎 往宣諭,斬倡 彪佳 治 湯 焚掠 有 請發喪,服滿議 慶之家皆被 之徒以 亂 者數 奸 加等,從之。 人,一 焚劫。 民 和之。 其儀, 方逐 常 少 熟 安。 從 之。 詹 叉 /焚給 事 遷 大 高 項

門。 衣 狗 而 五 受杖。 苞 年 其 直 兇 改 刑 舉 詔 儀 彌 人 朝 設 具 盛 投 本 變 盡 廠 送囚 無 爲 司 知 衞 欲清奸 其枉 爲 緝 可 厮役、赤手 刑 殺 錦 事官。 部。 心之罪! 一面 衣 宄, 衞 法 是祖 彪佳 面 鉅 · 岩掌 乃蒙必 司 萬。 無敢 奸 制 上言:「洪武 宄 原 直 益 飛 無認 死之刑。 雪。 一駕侍 多。 誣 慘 及於善良,招承出 獄 衛等事 也。 此 酷等來、周 初 朝廷受愎諫之名,天下反歸忠直之譽。 緝 了官民 後 事之弊也。 ٠, 未嘗 乃 以 有 平反 | 令網 羅 犯,或收緊錦 織 於私拷,怨憤 無徐 古者刑 事 爲 也。 事 社。 , 雖 不 永樂間 衣 日 上大夫。 衞 此 朝 滿 詔 ,高皇帝 廷 設 乎京畿。 獄 爪 立東廠 之弊也。 牙, 逆瑾 見非 實爲 用事 , 始開 欲 此廷杖之 絕苞苴, 法 洪 權 了始去 凌虐, 告密 武 奸 鷹

列

弊也。」疏奏,乃命五城御史體訪,而緝事官不設。

李 大 四千戍 開 統 輔 人其地。 浙 部將劉肇基、陳 兵斫鎭兵馬,鎭兵 之奎御軍嚴。 可立、張應夢、于永綬駐京口,浙江入衞都司黃之奎亦部 與相擊,射殺大開。 四將兵恣橫,刃傷民,浙兵縛而投之江,遂有隙。 亂兵大焚掠,死者四百人。 彪佳至,永綬 已而 水 守備 陸兵

等遁去。

彪佳劾治四將罪,賙

卹被難家,民大悅。

薂 衝 日:「傑閱人多矣,如公,傑甘爲死! 風渡,傑大駭異,盡撤兵衛,會彪佳於大觀樓。 羣小疾彪佳,競詆諆,以沮登極、立潞王爲言, 高 傑 駐瓜洲,跋扈甚,彪佳剋期往會。 公一日在吳,傑一日遵公約矣。」共 至期,風大作,傑意彪佳必無來。 彪佳 彪佳竟移 |披肝膈,勉以忠義,共獎王室。 灰去。 明年五月, 飯 而 別 彪佳攜數卒 南 都失守。 傑感 唐

王贈少保、兵部尚書、諡 六月,杭州 繼失,彪佳卽 忠敏 絕粒 至閏 月四日, 紿家 人先寢,端坐池中 而死,年四十有四。

從容展布 贊 目 "張慎言、徐石麒等皆北都舊臣,剛方練達, 所建白悉有裨時政。 ,庶幾乎列卿之良也。 而 遭時不 造,內外交訌,動輒齟齬,雖老成何能設施幹濟 令其受事熙朝,

#### 校勘記

「一〕河南道御史張煊 張煊,原作「張瑄」,據本壽卷二五四李日宣傳、 國權卷九八頁五九三一、明

進士題名碑録崇禎戊辰科改。

與左都督陳弘範 陳弘範,國権卷一〇二頁六一二七——六一三一、石匱書後集卷二九、明通

(典傳有名陳洪範者,崇禎五年爲昌平總兵官,疑卽此人,「弘」字當作「洪」。

鑑附編卷一下附記一下、南疆逸史卷九、小腆紀年附考卷七都作「陳洪範」。

本書卷二七六朱大

列

	# <b>3</b>				
	#ic				ਰ
ξ¥					
	48				
		12			
				<b>3</b>	
		\$			
		89-			

# 明史卷二百七十六

### 列傳第一百六十四

朱大典 王道焜等 張國維 張肯堂 李向 中 吳鍾

繬

朱永佑等

曾櫻 朱繼祚 湯芬等 余煌 陳 函輝 王瑞梅 路 振 飛

何楷 林蘭友 能汝霖 錢肅樂 劉中藻 鄭遵謙

沈宸荃 邑子履祥

除章丘 功,廕錦衣世襲,大典抗疏力諫。 朱大典,字延之,金華人。 知縣。 天啓二年擢兵科給 家世貧賤。 事 五. 年 中。 出爲 中官王體乾、魏忠賢等十二人及乳嫗客氏,假保護 福 大典始讀書,爲人豪邁。 建副使,進右參政,以憂歸。 登萬曆四十四 年進

崇禎三年起故官,蒞山 列 傳 第 百 六 + 四 東,尋調 杂 火 i,iř 天津。 五年四月,李九成、孔有德圍 七〇五七 萊州。 山東巡撫徐

牟文 撃柏 請 從治 千八百 賊 ( )總督 斬 撫 綬 中酸 王 永 洪 福 何何 餘 劉宇 及 人合剿之。 死, 維忠等教之,殺賊魁 劉 故總兵吳襄 國 烈被 擢 柱, 大典 逮 詔逮治之。 右僉都御史代之,詔駐青州,調度兵食。 以總兵金 乃罷 、襄子三桂等,以中官高 總督及登萊巡撫 國奇將, 兵部尚書熊明遇亦坐主撫誤國,罷去。 陳有時,維忠亦被殺。 率副將靳 不設, 起 國臣 潛監 專任 劉 八月, 護軍餉,抵 大典,督 邦 域,參將祖 巡按 七月, 主、客 徳州 監軍御 登萊 兵數萬及 大弼、祖 三賓復抗疏 賊 史謝三賓至昌邑, 巡 復 撫 犯 關 謝璉復 寬 平 外 、張 度, 勁 新,遊 副 陷於 旅 四

等逐 遁, ত 總兵 以 檄 濟。 遊 (陳洪 擊賊黃縣,斬首萬三千,俘八百,逃散及墜海死者數萬 擊徐元亨等率萊陽師來會,以牟文綬守新河。 或 」始解。 奇 祖寬至沙河, 等至昌邑,分三路。 守者疑贼誘,礮拒之。 副將劉澤清、方登化, 有德迎戰。 國奇等關外兵為前鋒,鄧玘步兵繼之,從中路灰埠進。 寬先進, 起潛遣中使入諭、闔城相慶。 從南路平度進。 國臣繼之,賊大敗,諸軍乘勝追至城下。 諸軍皆攜三日糧, 盡抵新 參將王之富、王文緯等從北路海 明日 ,南路兵始至。 河東岸, 賊夜 廟進。 公半東 國奇 亂流 昌平

海 賊 分番戍、賊不能出,發大礮,官軍多死傷。 鬒 歸登州 國臣等築長圍守之。 城三面 李九成出戰相當。 距山,一 面 距 海, 牆三十里而 十一月,九成搏戰 遙, 東西 降者 俱 抵 列傳第一百六十四 朱大典

**攻圍旣**久,賊糧絕,恃水城可走,不降。 也 洩 其謀。 一,及是殺 官軍合擊之,馘於陣,賊乃曉夜哭。 其二。 帝嘉解圍功,進大典右副都御史,將東陞賞有差。是月,國奇卒,以襄代。 及王之富、祖寬奪其水門外護牆,賊大懼 賊渠魁五,九成、有德、有時、耿仲明、毛承祿

光福 錦衣百戶,巡撫如故 之,城崩,官軍入。賊退保蓬萊閣,大典招降,始釋甲,俘千餘人,獲秉忠及偽將七十五人, 遁, 自 縊 官軍遂入大城。 帝震怒,斬監守官,刑部郎多獲罪。 一及投海死者不可勝計,賊盡平。 六年二月中旬,有德先道,載子女財帛出海。 蘇有功,斬李應元。 攻水城,未下。 惟有德、仲明逸去。乃獻承祿等於朝。磔之先一日,有功脫械 遊擊劉良佐獻轟城策,匿人永福寺中,穴城置火藥,發 有德等走旅順,島帥黃龍邀擊,生擒其黨毛承祿、陳 未幾被執,伏誅。敍功,進大典兵部右侍郎,世廕 仲明以水城委副將王秉忠,己亦以單舸

北 是 揚四郡,移鎭鳳陽。 年四月以平 ,謀竄茶山。 大與會總理盧象昇追襲,復破之。 八年二月,流賊陷鳳陽,毀皇陵,總督楊一鵬被逮。 **跋踰期,再貶三秩。** 大典與安慶巡 時江北州縣多陷。 撫史可法提兵遏之,賊乃 尋敍援剿及轉漕功,盡復其秩。 急還兵遏賊衆於鳳陽,賊始退。 明年正月,賊圍滁州, 一西遁。 詔大典總督漕運兼巡撫廬、鳳、淮、 大典先坐失州縣,貶秩視事。 連營百餘里, 十一年,賊復入江 總兵祖寬大破

事 潁 江 中 亳 北 方 及 間 上 河 亮 南 年 大 御 典 湖 河 史 率 南 廣 剣 總 軍 賊 崑 務 兵 大 劉 入湖廣 貞 仍鎭 等所 良佐 鳳 劾 等 陽 擊 大 詔 破 典遣將救 專 削 之, 辨 籍 流 候 敍 賊 勘 資 援, 有 而 事 差。 屢 以 未 有 可 竟 功, 法 大 一,而 典 代 進 有 東 督 左 陽 保 漕 侍 許 障 運。 郎 都 功 事 賊 明 然 發 帥 年六 不 袁 能 時 月 持 中 命 廉, 衆 大典 數萬, 屢 總督 爲 給 横

募 者 光 不 許 散 先 都 聞 者 於 大 諸 典聞 朝 生 行得 負氣 旨 急 逮 馳 治,籍 歸。 憤 縣令苛 知 其 縣 家 徐調元 充餉 斂, 作 闥 且. 亂 都 令 , 督 兵 崖 籍 赋 金 給 華。 有 事 萬 中 化 大 韓 名, 典 子 如 遂言大典 愈 萬 趣 化 之。 募健 縦 見禦之, 交贼 賊 平 巡 丽 按 御 所

城 大 郎 鋮 固 入 踰 E 見 月 而 ?,進尙 唐 舟 京  $\pm$ 中 師 ·, 誓 聞 陷 書 力戰。 就 福 總督 加東閣 王 立 上江 得 大 功 有白 軍務。 學士,督師浙東。 死,王 其 誣 一被擒 左 者,而 良 玉 兩 興 大 (兵,命 人 典亦 逐走杭 踰 年 自 ·監黃得 - 城破 結 州 於 馬 功軍 ,闔門死之。 會潞 士英、阮大鍼 樂之。 王 一亦降, 福 王 乃召爲 典 奔 八乃還 太平 兵 一,大典 鄉 (部左 郡 侍 與

唐 江 Ш Ė 知 綵 其 孫縣方召 時 紹興 浙 東 則 西郡 有 若夫諸生及布衣殉義者 兵部主事 縣 前 後失守死 高岱、葉汝茝 事 者、杭 っ會稽潘集、周ト 一、衢 州 則 孙 有 則 同 有 巡 知 按 王 E 道 年, 景亮、 焜、 Щ 錢塘知 陰朱瑋, 知府 伍 縣 經正 顧 諸暨傅日 咸 一、推官 建、 炯 臨安知縣 鄧巖忠、

趙 景麟 浦 江 張 君正 ,瑞安鄒欽堯,永嘉鄒之琦,其尤著云

還。 內底 光 澤寇發,其父老言 定。 及杭 王 道 莊 州 烈帝破格求賢,盡徵天下賢能吏, 失守,遂投繯 字 昭平 1非道焜 ·,錢塘人。 死 不能平。 以天啓元年舉於 撫按 為請, 撫按以道焜 部改 鄉。 邵 崇禎時,為南 武 同 名聞。 知 ,知光澤 方待 平知縣, 命而都 縣 事 遷 南雄 撫剿 城陷,微服 同 兼 知 施 境 南 會

犒 護 官, 子,獨守官不 行賂,兵 "; **乃** 事 聞京. 顧 斂 寧 咸 乃不 威 而 師 建, 去。 民
発
株
連
。 陷 入城。 去。 字漢石, 亡何,馬士英擁兵至。 人情恟 潞王 四鄉多被淫掠, 恟。 崑山 旣降、咸建不至。 及南都失守, 人,大學士鼎臣曾 咸建戢奸宄, 嚴警備 城中 鎭江守將鄭彩等率衆還閩, 頃之,大將方國安兵亦至。 尋被執,死之。 得無擾。 孫也。 巡按御 時監 崇禎 司 十六年進士。 史彭遇颽 及郡縣長吏悉逋竄, 緣道 咸建謀於 以貪殘激變, 劫掠。 授錢塘知 上官,先期遣 咸建 咸建散 賴 縣。 出 私 咸 遣 甫之 財 建 使 妻 迎 調

敕, 陰部署為 唐自綵, 變,遂被捕獲。 達州 爲臨安知縣。 自綵麾階豫走,不從,竟同 杭州 失守, 自綵與從子階豫逃山中。 死 有言 其 受 魯王

刨 高岱,字 絕粒 祈 魯瞻,會稽 死 子 剧 知父 人。 意不可 崇禎 中,以武學生舉 回,先躍入海中死。 順天 鄉試、魯王 岱聞 之曰:「兒果能先我 授爲職方主事。 乎 及紹 !自是不 興失

列

傅

甮

百

六

+

四

朱

大

典

復言,數日亦卒。

葉汝磑, 字衡生,岱同邑人,由舉人爲兵部主事。 聞變, 與妻王氏出居桐塢墓所, 並赴

水死。

江陵人。 翼亦死之。 金、 衢二府、兼視學政。 王景亮,字武侯,吳江人。 由 鄕 舉爲推官。 伍 經 |衢州破, 正 安福 崇禎末登進士。 經 人。 正赴井死, 由 貢 生 仕福王爲中書舍人。 景亮、巖忠皆自縊死。 爲西安知縣, 唐王超 唐王立,擢 擢 魯王 知府 所遺鎭 事。 御史,巡撫 鄧 將張鵬 嚴忠,

可以一人故,致闔城被殃。」 方召,宣城人。 署江山縣事。 遂封其印,冠帶向 金華被屠, 北拜、赴井死。 集父老告之曰:「兵且至,吾義不當去。 士民爲收葬,立祠祀 然不

張 國維,字玉笥,東陽人。 天啓二年進士。 授番禺 知縣。

體,爲國家營職業者。 政 Ŧ. 事,言:「陛下求治太銳,綜核太嚴。 崇禎元年擢 刑科 給 故治象精明,而腹心手足之誼實薄,此英察宜斂也。 事 中 一,劾罷 副 都御史楊所修、御史田景新,皆魏忠賢黨也。 拙者跼蹐 以避咎, 巧者 委蛇以取容,誰能 祖宗朝,閣 已,陳時 展 臣有 布 四

之度乎。此上下宜洽也。」其二條、請平刑罰、溥膏澤。 傳 倘 封還詔旨者,有疏揭屢上而爭一事者。今一奉詰責,則俛首不遑,一承改擬,則順旨恐後 天語,莫睹拜颺。 處置失宜,亦必不敢執奏,此將順宜戒也。召對本以通下情,未有因而獲罪者。 臣同官熊奮渭還朝十日,旁措一詞,遂蒙譴謫。 帝不能盡用。 不可稍加薄罰,示優容 進禮科都給事中。 今則惟 京

師

地震,規弊政甚切,遷太常少卿。

年, 復 崖 地 Щ 圍,遣守備朱士胤趨潛山,把總張其威趨太湖。 賊乃攻潛山, .民 江 王 犯江浦 浦 亦 一夕鬚髮頓白。 、桀石以投贼, 七年擢右僉都御史、巡撫應天、安慶等十府。其冬,流賊犯桐城,官軍覆沒。 ,遣守備蔣若來、陳于王戰却之。十二月,賊分兵犯懷寧,可法及左良 陷宿松 副將程 知縣 等三縣。 龍及岩來、于王等拒守。 賊多死,乃越英山、霍山 趙士彦重傷卒。 明年正月率副將許自强赴援, 國維乃募土著二千人戍之,而以兵事屬監軍史可法。 攻太湖, 諸城 而遁。 知縣金應元、訓導扈永寧被殺。 並全。 士胤戰死,自强遇賊宿松,殺傷相當。 九月,賊復由宿松入潛山、太湖, 遊擊潘可大、知縣陳爾銘等守桐不下。 又圍望江,遺兵援之,亦解去 玉、馬爌遏之。 明年 國維 國維 至,解桐 Ė 他賊掃 一月,贼 安慶 方壯

攻陷六合,知縣

鄭同

元潰走,賊遂攻天長。

國維見賊勢日熾,請於朝,

割安慶、池州、太平

十

年三月,國維

率龍等赴安慶,禦賊酆

家店

,龍軍數千悉沒。

賊東陷

和州

、含山、定遠、

護江南,不

別設 巡撫,以可法任之。 安慶不隸江南巡撫,自此始也。 議者欲幷割江浦、六合,俾國維專

侍 郎 兼 塘及 平望內外塘、長洲至和等塘,修松江捍海堤,濬鎭江及江陰漕渠,並有成績。 或 右 [維爲人寬厚,得士大夫心。屬郡災傷,輒爲請命。 · **僉都御史,總理河道。歲大旱,漕流涸,** 國維濬諸水以通漕。 築太湖、繁昌二城,建蘇州九里石 山東饑, 遷 振活窮民 工部右

之。 撃降之, 護漕,非亂也。 數萬,據梁山濼,遣其黨分據韓莊等八閘,運道爲梗。 上嚴世職、酌推陞、愼咨題等七事,帝皆報可。 四年夏,山東盜起,改兵部右侍郎兼督淮、徐、臨、通四鎭兵,護漕運。 獻俘於朝,磔諸市。 延儒許言於朝,授以職。 兵部尚書陳新甲下獄, 而青山竟截漕舟,大焚掠,迫臨淸。 會開封陷, 帝召國維代之。乃定戰守賞罰格 周延儒赴召北上,青山謁之,言率衆 河北震動,條防河數策,帝亦納 大盜李青山衆 國維合所部 列 兵

江督練兵輸餉諸務。 功 解 職 了。尋下 六年四 獄 月,我大清兵入畿輔 0 帝念其治 出都十日而都城陷 河功,得釋。 國維 召對中左門,復故官,無右愈都御史,馳赴江南、浙 機趙光抃拒螺山 ,八總兵之師皆潰。 言者詆 國

位,衆議歸國維。 福王召令協 馬士英不用,用張捷。 理戎政。 尋敍山東討賊功,加太子太保,廕錦衣僉事 國維乃乞省親歸 吏部尚書徐石麒去

富陽 不可支,作絕命詞三章,赴水死,年五十有二。 安 卽 持久計。 日 亦自金華至。 移駐紹 、於潛,樹木城緣江要害,聯合國安及王之仁、鄭遵謙 南都覆,踰月,潞王監國於杭州,不數日出降。閏六月,國維朝魯王於台州,請王監國 順治三年五月,國安等諸 興,進國維少傅兼太子太傅、兵部尙書、武英殿大學士,督師江 馬士英素善國安,匿其軍中,請入朝。 軍乏餉潰,王走台州航海, 國維劾其十大罪,乃不敢入。 、熊汝霖、孫嘉績、錢肅樂諸營,爲 國維亦還守東陽。 上。總兵官方國 六月知勢 連復

張肯堂,字載寧,松江華亭人。 天啓五年進士。 授濬 縣 知縣。

遲, 則保留 作秦、越之視,帝不問。 多踰數月。 崇禎 久任, 意所欲避, 則 七年擢御史。 加 番 更移 出按福 明年春,賊陷鳳陽,條上滅賊五事。 易 地借才。 輒 建,數以平寇功受賚。 加 番擾害。」帝是其言。十二年十月,楊嗣昌出督師。 今歲燕、秦,明歲閩 還朝,言:「監司營競紛紜,意所欲就, 、粤,道路往返,動經 俄以皇陵震驚,疏責輔臣不宜 數 千,程限稽

列傳

第

百

六

+

四

張

肯

堂

必仍用 堂奏言:「從古戡亂之法,初起則解散,勢成則剪除,未有專任撫者。 令,專務剿除 故 技,佯搖尾乞憐。 有進招撫說者,立置重典。」帝以偏執 而 失事 諸 臣,冀掩 從前 敗局,必多方熒惑,仍 臆見責之。 今輔臣膺新 進撫 命而出,賊 請特申一

分賊 之外 樞糾 戰守可以擇利乎? 追 陽 擢 年 請 剿 失守,禍 萷 右僉都御史,巡撫 督撫以自解,督撫又互相委以謝愆,而疆事 IIII 大計 召還建言譴謫諸臣, 更有撫治,總督之上又有督師。 ,專提出境之師乎? 辨, 几 年四 ,在先釋嗣 以焦頭 中親藩,督師職掌安在。 月言:「流寇隳城破邑,往來縱橫,如入 、爛額爲事乎? 今爲痿、保二督者,將兼顧提封,相爲掎角之勢乎,抑遇 凡此肯綮,一切置不問,中樞冥冥而決,諸臣瞶 福 昌之權。」 建 今爲撫者,將一稟督師之令,進退惟其指 乃復給事中陰潤、李淸、劉昌、御史周一敬官。 疏入而嗣昌已死。 試問今爲督師者,將居中而運,以發蹤指示爲功乎,抑 位號雖殊,事權無別。今楚自報捷,豫自 不可問矣。」帝納其言,下所司詳議。十五 十二月復言: 「今討 無人之境,此督師嗣昌受事前所未有。 瞶而任。 揮乎,抑氣視 賊 肯堂遷大理丞,旋 不可謂 至失 報 無人,巡 胈 敗 地喪師,中 ",甚至· 勢之急,

賊

南

撫

會櫻至,言官請令櫻掌吏部,乃令肯堂掌都察院。 兵鄭鴻逵擁唐王聿鍵入閩 ,與其兄南安伯芝龍及肯堂勸進,遂加太子少保、更部尚 肯堂請出募舟師,由海道抵江南,倡

義 旅 ,而王由仙霞趨浙東,與相聲援。 乃 加 少保,給敕印,便宜從事。 芝龍懷異心, 陰沮之,

不成行。

十餘 乘天霧集螺頭門。 月。 順治 城破,肯堂衣蟒玉南向坐,令四妾、一子婦、一女孫先死,乃從容賦詩自經。 三年,王敗死,肯堂飄泊海外。六年至舟山,魯王用爲東閣大學士。 定西侯張名振奉王 航 海去,屬肯堂城守。 城中兵六千,居民萬餘,堅守 八年,大清兵

衞李 部主 都督 順 天 顧 事 張 開 時 名揚。 國 同死者,兵部尚書李向中、禮部尚書吳鍾巒、吏部侍郎朱永佑、安洋將軍劉 明楫,自諸生福建林世英,錦衣指揮王朝相,內官監太監劉朝。凡二十一人。 福建林瑛、蘇州江用楫,禮部主事會稽董元,兵部主事福建朱萬年、長洲顧珍、臨山 ,工部主事長洲顧中堯,中書舍人蘇州蘇兆人,工部所正鄞縣戴仲明,定西侯參謀 又有通政使會稽鄭遵儉,兵科給事中鄞縣董志寧,兵部郎中江陰朱養時,戶 世 . 勛、左

部尚 兵備 不至,捕卽至,何也。」向中從容曰:「前則辭官,今就戮耳。」 副使。 書,從至舟山。 李 向 中,鍾祥人。 唐王以爲尚寶卿。 及是破,大帥召向中,不赴。 崇禎十三年進士。授長興知縣,調秀水。 **閩事敗,避海濱** 發兵捕之,以衰絰見。 魯王監國,召爲 右愈都御史,從航海,進兵 福王時,歷車駕郎中,蘇松 大帥呵之曰「聘汝

死賊 往來普陀山 木主自焚死。 立 興 ,遷禮部主事 照 難 磨。 吳鍾 ,吾以遠臣不得從死。<br />
今其時矣」乃急渡海,入昌國衞之孔廟,積薪左廡下,抱孔子 巒 踰 中。 字字 年,移桂 仲達者,江陰李應昇,鍾巒弟子,忤魏忠賢死黨禍者也 巒稚 o 大清兵至寧波、鍾巒慷慨謂人曰 抵南雄、閩南都失、轉赴福建、痛陳國計。 林推官。 一武進人。 聞京師 崇禎七年進士。 變,流涕日 授長興知縣。 "「昔仲達死璫禍,吾以諸生不得死。 馬君常必能 魯王起兵,以鍾巒爲禮部尚書, 死節。」 以旱潦,徵練餉不中額,謫紹 已而世奇果死。 福王 君常

破被 一執,願爲僧,不許,乃就戮。 朱 永佑、字爰啓。 崇禎 七年進士。 授刑部主事,改吏部,罷歸。 事唐王,後至舟山。 城

名揚,名振弟。城破,母范以下自焚者數十人。

朝 相 聞 城失守,護王妃陳氏、貴嬪張氏、義陽王妃杜氏入井,用巨石覆之,自刎其旁。

開國母,瑛、明楫妻皆自盡。

會櫻,字仲含,峽江 人。萬曆四十四年進士。授工部主事,歷郎中。

天啓二年稍遷常州知府。 諸御史巡鹽、倉、江、漕及提學、屯田者、皆操舉劾權,文牒日

櫻牒南京都察院曰:「他方守令,奔命一 巡按, 獨南畿奔命數巡按。 請 切戒飭,罷鈎

訪取贖諸陋習。」都御史熊明遇爲申約束焉。

其家 起視事。 事,爲文祭之, 言恐之,答曰:「僚屬已盡,無可糾,止知府無狀。」因自署下考, `汝」,卒不屈。 人,賴櫻以免。 櫻持身廉,爲政愷悌公平, 織造中官李實迫知府行屬禮 無錫 出其子及僮僕於 高 武進孫愼行 攀龍,江陰繆昌期、李應昇被逮,櫻助昌期、應昇貲,而經 獄 不畏强禦。 忤忠賢,當戍,櫻緩其行。 0 宜興毛士龍坐忤魏忠賢遣戍 一,櫻不 從。 屯田 御史索屬吏應劾者姓名,櫻不應。 實移檄以「爾」「汝」侮之,櫻亦報 忠賢敗,事遂 杜門待罪。 ,櫻諷士龍逃去。 解 撫按亟慰留 紀攀龍 以「爾」 御史危 上官捕 死後 了, 乃

是,紅夷寇興、泉,櫻請巡撫鄒 熊文燦欲得芝龍為援,維璉等以香與芝龍有舊,疑不遣。 盡。 感櫻甚。 崇禎 士民 為櫻 元年 建 以右參政分守漳南。 河祠 母 憂歸。 維 服闋 連用 九蓮山 ,起故官, 副總兵鄭芝龍為軍鋒, .贼犯上杭,櫻募壯士擊退之, 夜搗 分守興、泉二郡。 櫻以百口保芝龍,遂討滅香,芝龍 果奏捷。 進按察使, 及劉香寇廣 分巡福 其巢, 東, 殲馘殆 寧。 總督 先

於他疏微白 + 年 冬,帝信東廠言,以櫻行 有詔 詰問 因 具言櫻賢,然不知賄所從至。 賄謀擢官,命械赴京。 御史葉初春嘗爲櫻屬 韶至閩 ,巡撫沈猶 龍、巡按張肯 吏, 知 其

列

傳

第

百六

+

四

曾

樱

堂閱 貧, 之。 爲醵金辦裝, 廠檄 四臣 有 乃妄言, 奸 人黄四 **耆老數千人隨至闕** 致有 臣名。 此事。」 芝龍前白日:「四臣,我所遣。 **猶** 、肯堂以入告,力白櫻冤,芝龍 下,擊登聞鼓訟冤。 帝命毋入獄,俟命京邸。 我感樱恩, 亦具疏請罪。 恐遷去, 令從都下訊 士民 削芝龍 以櫻

都督銜,而

令櫻以故官巡視海道

分守登、萊。[三 兩 賊已殘十餘 人 方 尋 坐事 以 衡 州 罷官,以櫻言並起用。櫻乃調芝龍剿賊,賊多降,一方遂安。遷山東右布政使, 、永多寇,改櫻湖廣按察使,分守湖南,給以敕。 、縣,而 永州知府推官咸不任職。 櫻薦蘇州同知晏日曙、歸德推官萬元吉才。 故事,守道無敕,帝特賜之。 時

十日而 **青、澄、萊三府失州縣無幾,盡以實奏。** 初被兵,巡撫王永吉所部濟、克、東三府州縣盡失,匿不以聞。兵退, + 京師陷,賊釋諸囚,櫻乃遁還。 四年春,擢右副都御史,代徐人龍巡撫其地。 及論罪,永吉反擢總督,而櫻奪官,逮下刑部獄。 明年遷南京工部右侍郎,乞假歸。山東 以恢復報。 而櫻所部

不

衞。 子太保、吏部尚書、文淵 []越五年,其地被兵、遂自縊死。 其 後唐王稱號於福州 閣 芝龍薦櫻起工部尚書兼東閣大學士。 王駐延平,令櫻留守福州。 大清兵破福州、櫻挈家避海外中左 無何,令掌吏部,尋進太

列傳第一百六十四 朱繼祚

朱繼祚,莆田人。 萬曆四十七年進士。改庶吉士,授編修。 天啓中,與修三朝要典,尋

罷 去。 崇禎初,復官。累遷禮部右侍郎,充實錄總裁。給事中葛樞言繼祚嘗纂修要典,得

鄉。 罪淸議,不可總裁國史,不聽。 魯王 福王時起故官,未赴。南都失,唐王召爲康閣大學士,從至汀州。 |監國,繼祚舉兵應王,攻取興化城。 繼祚旋謝病去。 旣而大淸兵至,城復破。 起南京禮部尚書,又以人言罷去。 繼祚及參政湯芬、給 王被擒、繼祚奔還其

事中林膚、知縣都廷諫並死之。

知縣。 尋 以監司分守興泉道。城破,緋衣坐堂上,被殺。 膾,字小眉,繼祚同邑人。 芬,字方侯,嘉善人。 崇禎十六年進士。 福王時,爲史可法監紀推官。 蘇州失,歸仕唐王。至是自縊死。廷諫,杭州人。 莆田知縣 唐王以爲 由進士爲吳江 御史。

失,邑人給事中鄢 海澄、連江、長樂等二十七縣,軍聲頗振。及是得者復失。海澄失,知縣洪有文死之。 王自監國二年正月至長垣,迨次年正月,連克建寧、邵武、興化三府,福寧一州, 正畿、御史林逢經俱投水死。 長樂失,邑人御史王恩及服毒死,妻李氏同 漳浦 永福

死。<u>建寧失,守將王</u>祈巷戰不勝,自焚死。

內艱歸。服闋,起左中允,歷左諭德、右庶子,充經筵講官。給事中韓源劾禮部侍郎吳士 國祥請借京城房租,煌爭,不可,乞假歸。遂丁外艱。服除,久不起。 元、御史華琪芳及煌皆與修要典,宜斥,帝置不問。煌疏辯,帝復溫旨慰諭之。戶部尚書程 余煌,字武貞,會稽人。 天啓五年進士第一。 授翰林修撰,與修三朝要典。 崇旗時,以

過江,王航海遁。六月二日,煌赴水,舟人拯起之。居二日,復投深處,乃死。 宗廟未享,請廕,則當思先帝子孫未保,請諡,則當思先帝光烈未昭。」時以爲名言。大清兵 守無資。諸臣請祭,則當思先帝烝嘗未備,請葬,則當思先帝山陵未營,請封,則當思先帝 書,始受命。 魯王監國紹興,起禮部右侍郎,再起戶部尚書,皆不就。 時諸臣競營高爵,請乞無厭。煌上言一今國勢愈危,朝政愈紛,尺土未復,戰 明年以武將橫甚,拜煌兵部尚

誓衆倡義。 陳 函輝,字木叔,臨海人。 會福王立,不許草澤勤王,乃已。尋起職方主事,監軍江北。 崇禎七年進士。授靖江知縣,為御史左光先劾罷。北都陷, 事敗歸,魯王擢爲

相 軋 啓釁。 王 瑞旃,字聖木,包 瑞梅 調 劑 得 宜,歲省浮 永嘉人。 費三萬 天啓五年進士。 . 金, 上官 爲勒石著令。 授蘇州推官, 兼 貴 人弟奸 理兌運。 法 軍民 執 問 交 是,恒 如

其

人中之當

道,將議調,遂歸

大著。 使然 官左 獻 十 一 相 局 今良玉 忠恃文燦庇己,不聽。 成 也。 瑞 定良玉 年春 崇禎 具列 栴 及 服闋,未及用 百一 (諸將賈 文燦 七 張獻忠據 將俟其 上官姓名及取賄月日,而題其末曰:「不納我金者,王兵備一人耳。」由是瑞梅名 年 不從。 賊 起 未 河 一選、周仕鳳之兵俱在 至, 創 間 m 穀城乞撫,總理熊文燦許之。 瑞栴乃列 推官、遷工 而遽撫、彼將無 執之。 都城陷 明年,獻忠叛,瑞栴先已丁憂歸。 文燦固 上從征 一部主事,調兵部,轉職方員外郎,擢湖廣兵備僉事,駐 執 所懼。惟示以必剿之勢, 、歸農、解散三策,文燦亦不 以爲 近 境,誠合而擊之, 不 可。 瑞梅 瑞梅 言 以爲 獻忠留書於壁,言己之叛, 何患不捷。」 城城 非計,謀於巡按林銘 乃心折 以計愚我, 用。 不敢貮。 瑞栴自為 文燦怒,責 我不 非相 檄諭 ·可爲 球 以撓撫 撓,實 獻忠, 寒陽。 所愚。 總理 總兵

列

傳

歸 及 稲 闔 王 地 時 盡失,溫州 召 爲 太僕 亦不守,避之山 少 卿 極 陳 有 司 虐 中。 民之狀,旋 有欲: 薦令出者, 告歸。 唐王召赴 乃拜辭家廟, 福建, 從容入室自經死 仍 故官 未 幾復

事緩, 未 振 飛執 幾 ()陳時 崇禎 路 知 不 振 顯 從。 四 飛,字見白 患 事十大弊,日 年 而 徴 授 邑人 忘 隱憂,求治 御史。 張 曲 問達件 務苛 周 疏劾 人。 奄, 事 細 周 而 而 天啓五 坐追 志 延儒 鮮 治 政 贓十萬。 體 卑污奸 人,責 年進士。 一喪廉 外 險, 重 恥 振 除涇陽 飛 一而責 而 黨邪 故遷延 壞官 內 醜 知 輕, 方, 正 縣。 一、奄敗 嚴 民愈窮 祈 大東諂 於 立斥以清揆路,被 事 小 解 而 而 魏忠賢,將建 寬於 赋 流賊 愈 大, 亟, 入 臣 、境,擊 有 事 日 当日 洞 偸 急 切 涇陽, 却 而 而 責。 主 無

結 權 Ш 東 樹 兵叛 私 人,秉銓以來, 刻巡 撫余大 成、孫 吏治 日 元 壞 化,且論 洪學 自 延儒曲庇罪,帝不問。 引 去。 廷推 南京吏部 已, 尚 書 劾 謝陞 吏部尚書閔洪學 爲 左 都 御史,

振飛歷詆其醜狀,陞遂不果用。

日

疑,有韶旨

而

無奉行

疏

入,詔

付

所

司

韶賜銀幣。 年巡 按 福 俸滿 建。 ,以京卿錄 海賊 劉 香 數勾紅夷入犯, 用 初,振飛論海 振飛懸千金勵將士,遣遊擊鄭芝龍 賊情形,謂巡撫鄒維 **璉不能辦,語侵之。** 等 大 破

維 璉 罷 去,命甫下,數奏捷,振飛乃力暴其功,維璉復召用

謙益、瞿式耜爲奸民張漢儒所訐,體仁坐振飛失糾,擬旨令陳狀。 揆,銜之。 已而 體仁等公論俱棄,宅揆以後,民窮盜 體仁恚,激帝怒,謫河南按察司檢校。 八年夏,帝將簡輔臣。 振飛按蘇、松,請除輸布、收銀、白糧、收兌之四大患,民困以蘇。會常熟錢 振飛言:「枚卜盛典,使夤緣者竊附則 |興,辱己者必不能正 入爲上林丞,屢遷光祿 天下。」時延儒已斥,而體仁方居首 不光。 振飛白謙益無罪,語刺體 少 卿 如向者周延儒

場,命軍士人射三矢,乃解磔之。 用 武 聲 延接之。 卒數萬。 所 愫 桓 親 爲 等十七人分道防河、由徐、泗、宿遷至安東、沭陽。 十六年秋 田 賊防禦使招撫徐、沛,而賊將董 仰 四月初,聞北 福、周、潞、崇四 一乃罷 ,擢右僉都御史、總督漕運,巡撫淮、揚。 振 飛。 都陷,福王立於南京。 振飛 王避 亦 賊, 遭母喪,家無可 縛愫徇 同日 學禮據 抵 諸 淮。 市 ,鞭八 宿遷。 大將劉澤清、高傑等亦棄汛 河南 歸,流寓蘇 十、檻 副 振飛擊擒 使呂 且團練鄉兵,犒以牛酒,得 明年正月,流賊陷 車獻諸 州 弼周爲賊節度使來代振飛,進士 尋錄功,卽家 **殉周、愫,走學禮。** 朝,伏誅。 山西。振飛遣將金 地南 五.月 加 右 下。 馬 副 竿剛周法 兩 都御史。 振飛 士英欲 淮 間 悉 勁

之。 振飛 上 远 乞 概 **寬罪宗**, 竟得請。 順治二年,大兵破南京,書鍵自 立於 福州 ,拜爲 左都御

振

飛

初

督漕

謁

鳳陽

皇陵

望氣者言高牆

有天子氣。

唐

王

聿

鍵

方

以

罪

錮

守陵,中官虐

列

傳

第

百

六

+

四

路

振

飛

之效。 汀州 皆臣所甚憂也。」其言曲 學士。 史。 上不改操切,亦未 功,廕錦衣世千戶 募能 破 至則 喜怒輕發,號令屢更。 ,走居海島。 致 大喜, 振飛者官五 0 必 與宴,抵夜分,撤燭送歸,解玉帶賜之,官一子職 明年赴永明王召,卒於途。 能中興也。 王每責廷臣怠玩, 品 中王短云。 ,賜二千金。 見羣臣庸下而過於督責,因博覽書史而務求明備,凡 上有愛民之心,而未見愛民之政,有聽言之明,而 三年,六清兵進仙霞關,聿鍵走汀州 振飛因進曰:「上謂臣僚不改因循,必致 振飛乃赴召, 道拜太子太保、 方員 吏部尚 ,振飛追赴不能及。 外郎。 書兼 放亡。 未 文 又錄 上 淵閣 收聽言 一所長, 守淮 臣

何楷,字元子,漳州鎮海衛 人。天啓五年進士。 值魏忠賢亂政,不謁選而 歸

贖。 仁奏辯,明自引門生姻婭。 賊 鵬、巡按吳振纓罪,而 犯皇陵 情 崇禎 面 重、祖、 神 時,授戶部主事 人共憤。 宗陵寢爲輕;朋比深,天下 刺輔 陛下 ,進員外郎,改刑 臣溫體仁、王應熊, 刑官瞻徇、實由於此。 輟講避殿,感動臣民。 剂科給事· 護刺不 言一振纓,體仁私人,一鵬, 中。 泣。 乞宣諭輔臣,毋分別恩仇 二輔臣 流賊陷鳳陽,燬皇陵。 件旨, 鐫 獨漫視之,欲令 秩 視 事。 應能 鵬、振 ,以國事爲戲。 又言: 應熊、體 楷劾巡撫楊 座主 纓戴罪自 也 逆

應熊 應 推 勞 能 永 自 復奏辯。 嘉代 陳, 應能 應元 楷言:「臣疏未奉旨 竟 則言登萊巡撫 由 是去。 吏 部 本贅 尙 ,應熊先一日摭引 書謝陞 員。 楷 言登、 亦 疏 萊 駁之。 要 臣疏詞,必有漏禁中語者。」 地, 楷 巡撫 叉請 陳 給 應元 贈 都 引 御史高攀 疾, 宜 允 帝 龍官 其 意 去 動, 一語賜 令 及

左

光

斗

諸

臣

一盆,石

還

惠

世

揚。

疏

多

見聽。

屢遷

工科

都給

事

中。

耳。 楷 叉 田 劾 興 與 南 之,忤旨,貶二秩爲 至永 事 + 京 欲借 年五 平二年馬皇后事,更不 御 史林蘭友先後言其非。 以 月 申招 ,帝以火星逆行, 撫之說, 南京國子 引太平 知指斥安在。」帝方護 監 減膳修省。 楷言:「嗣昌引 丞。 興國 母憂歸。 連年兵敗事,欲借以 兵部 服闋 建武款塞 尙 書楊 嗣 ,廷臣交薦,召入京, 昌 嗣昌方主款議, 示 事,欲借以申市賞之說 聽 申不可用兵之說,徒 踰 月 ,嗣昌· 歷引前 都 1奪情 城 Ê 史 入閣 陷 引元和 巧 以 附會 進

楷 而 知 都 卒。 不 言 破 泛龍 爲所容, ,楷走杭州 稲 王 擢楷 無人臣 連請告去。 戶 禮。 部右侍郎, 從唐王入閩, 王獎其風節, 途遇贼, 督理錢法, 擢戶部尚 截其一耳,乃芝龍所使部將楊耿也。 命掌都察院事 命棄工部右侍郎。 書。 鄭芝龍、 o 鴻逵扇 鴻逵 連疏 殿上,楷呵 兄弟横甚, 請告, 不許。 止之,兩 郊天時, 漳州破 順治二年, 人猛怒。 ,楷遂抑鬱 稱疾不 出 楷 南

楷博綜羣書,寒暑勿輟,尤邃於經學。

列

傳

第

百

六

+

四

何

楷

賊敗, 南還。 周、劉同升、趙士春稱「長安五諫」。遷光祿署丞。京師陷,薙髮自匿。爲賊所執,拷掠備至 至發、薛國觀,東部尚書田惟嘉等,因論嗣昌忠孝兩虧。 林蘭友,字翰荃,仙游人。 唐王用爲太僕少卿,遷僉都御史。 崇禎四年進士。授臨桂知縣。 事敗,挈家遁海隅,十餘年卒。 **貶浙江按察司照磨,與楷及黃道** 擢南京御史。 疏劾大學士張

忠義. 廷臣 失,言:「自偏裨至副將,歷任有功,方可授節鉞。今足未履行陣,幕府已上首功。胥吏提 禍 千人駐襄陽、城破輒走者,監紀主事余爵也。「吾爲嗣昌援引、遭襄藩之陷、重賂陳新甲 虎旅,紈袴子握兵符,何由奮敵愾。 鄖撫袁繼咸者,今解任候代之宋一鶴也。 氣。 .推擇有誤,宜用文吏保舉連坐法。」帝納其言。 已,言:「楊嗣昌未罪,盧象昇未褒,殊挫 熊汝霖,字雨殷,餘姚人。崇禛四年進士。 至爲嗣昌畫策練餉、驅中 ·原萬姓爲盜者,原任給事中沈迅也。 若大將之選,宜召副將有功者,時賜 皆悞國之臣,宜罪。」 授同安知縣。 擢戶科給事中。 一不報 面對,擇才者用之。 爲嗣 昌 疏陳用將之 運籌、以三

京師戒嚴,汝霖分守東直門。 嘗召對了言:「將不任戰。 敵南北往返,謹隨其後,如厮隸

門延 況 遠宗人劾宰輔,中外紛紛,謂將復廠衞。 日討 費 紛 嚴 之於貴官,負弩前驅,望塵靡及。何名爲將,何名爲督師 」帝深然之。已,言:「有司察處 武臣,而 節,未觅府怨。 之內,而遽以藩籬視之。」頃之,言:「臣竊觀目前大勢,無論恢復未能,卽偏安尙未可必。 宜 四 紛 一鎭之餉多至六十萬,勢必不能供。即倣古藩鎭法,亦當在大河以北開屯設府,曾奧窔 鎭 「數百萬金錢以養兵,豈欲毒我赤子。」帝惡其中有「飲泣地下」語,謫爲福建按察司 以來,臣疏凡二十上。 敵 究兵餉戰守,乃專在恩怨異同。 以殺掠獲封爵,我何憚不爲。 入都,皆云避兵,不云避敵。 福 王 濫 叛降跋扈, 衆 立,召還。 舉邊才,監司察處者,不得 口 諠傳; 前事不遠,後事之師。 肩背相踵;先帝委任勳臣,而京營銳卒徒爲寇籍;先帝倚任 上疏言:「臣自丹陽來,知浙兵爲邊兵所擊,火民居十餘里。 先帝不次擢用文臣,而邊才督撫,誰爲捍禦,超遷宰執,羅拜賊 援剿機宜,百不行一。 霸州之破,敵猶不多殺掠,官軍繼至,始無孑遺。 臣意四鎭必毅然北征,一雪此恥,今戀戀淮、揚,何也? 勳臣方鎭,舌鋒筆鍔是逞,近且以匿名帖逐舊臣,以疏 遽躐巡 且先帝篤念宗藩,而聞寇先逃,誰死社稷,先帝隆 夫廠衞樹威牟利,小民雞犬無寧日,先帝止此 撫。 庶封疆重任,不爲匪人借途。」又言:「 而所揣敵情,不幸言中矣。 比者外縣 一內臣, 邊帥有言, 照磨。 朝 而 難民 自戒 廷 重 知 開

前

日之所以

失,即知

今日之所以得。

及今不爲,將待何時。」疏奏,停俸。

尋

補

吏科右給

事中。

置有用地,不宜處中朝。」不聽。踰月,以奉使陛辭,言:「朝端議論日新,宮府揣摩日熟。 朝佳麗,復見今時。 少宰樞貳悉廢廷推,四品監司竟晉詹尹。 人,一官外遷,輒訾當事爲可殺。置國恤於罔聞,逞私圖而得志。 初 ,馬士英薦阮大鍼,汝霖爭不可。 獨不思他日稅駕何地耶。」不報。 蹊徑疊出,謠該繁興。 及大鍼起佐兵部,汝霖又言:「大鍼以知兵用,當 黄白充庭,青紫塞路,六 一人未用,便目滿朝爲 黨 自

王立 兵。 本官兼東閣大學士。 閩 魯王監國,擢右僉都御史,督師防江,戰屢敗。 未幾,南京破, 中,遣劉 中藻頒詔,汝霖出檄嚴拒之。 士英竄杭州。 又明年春,鄭彩憾汝霖,遣兵潛害之,幷其幼子投海中。 汝霖責其棄主,士英無以應。 順治三年進兵部尚書,從魯王泛海。 入海寧募兵萬人,進兵部右侍郎。 杭州亦破,與孫嘉績 明年 同 唐 起

授太倉 白 .榜列善惡人名,械白榜者階下,予大杖。 錢 知州。 肅樂,字希聲,鄞縣 豪家奴 與點吏爲奸,而兇徒結黨殺 人。 臨江知府若賡孫,寧國知府敬忠兄子也。 **外之,杖者日少。** 人, 焚其屍。 嘗攝崑山、崇明事,兩縣民皆 肅樂痛懲,皆斂手。 崇禎十年成進士, 叉 以朱

立 碑 頌德。 遷刑部員外郎,尋丁內 外艱

圧航 紹 史,畫錢塘 王 舉 華 一次長 興、台州三郡田賦,不能繼,恒缺食。已,加 夏、董志寧等遮拜肅樂倡首,士民集者數萬 人 司 海 張煌言奉表 知治府 順治 垣,召爲 ,肅樂亦之舟山。 二年,大兵取杭州 丽 事 守。 兵部尚書,薦用 請監國。 肅樂索取倉庫籍,繕完守具, 尋進右副都御史。 唐王召之, 甫入境, 王已沒。 會紹興、餘姚亦舉兵,王乃赴紹興行監國事。 層郡 劉沂春、吳鍾巒等。 多迎降。 當是時,之仁及大將方國安並加封爵,其兵食用寧波、 **閏六月,寧波鄉官議納款,肅樂建議起兵。** 人,肅 兵部右侍郎。 與總兵王之仁締盟共守。 明 樂乃建牙行 年拜肅樂東閣大學士。 逐隱海壇 明年五月,軍食盡,悉散去。 事。 Щ [ , 採山 郡 中監 召肅樂為 薯爲食。 聞魯王在台州,遺 司守令皆逃,惟 右僉都御 明年,魯 諮 魯 生

登華遂降。 日 福清黃蘗山 海上豈有天子? |唐 Ŧ 一雖歿,而其將徐登華爲守富寧, 鄭彩 專柄, 舟中豈有國公。」肅樂致書:「將軍獨不聞南宋之末二帝並在舟中乎。」 連殺熊汝霖、鄭遵謙。 魯王遣大學士劉中藻攻之。 肅樂憂憤卒於舟,故相葉向高曾孫進晟葬之 登華欲降, 疑 未 决,

劉中藻,福安人。 列 傳 第 Ħ 六 + 由進士官行人。 四 錢 繭 樂 賊陷京師,薙髮,被搒掠。 賊敗南還,事 唐王。

魯王,攻降福寧守之,移駐福安。 大清兵破城、冠帶坐堂上、爲文自祭、吞金屑死。

從王航海,與汝霖並爲彩害。 鄭遵謙 ,會稽人。 爲諸生。 潞王以杭州降大清,遵謙倡衆起兵,事魯王,崎嶇浙 、閩間

疾之。 臥 以 帝,生何以對陛下。 即加二人極刑,不爲過。 失機,先帝拔爲總督,擁兵近甸,不救國危。 周 五 家園 報國讎,乃贼塵未揚,輒先去以爲民望。 、劉同升、葛世俊、徐汧、吳偉業等。又言:「經略山東、河南者,王永吉、張縉彥也。 事,皆切時病。 沈宸荃,慈谿人。 明年 乎 ,」疏入,謙、祖德等皆命逮治,永吉、縉彥不罪。 以年例出爲蘇松兵備僉事。 已,論羣臣醜正黨邪,請王臥薪嘗膽,爲雪恥報讎之計。 昌平巡撫何謙失陷諸陵、罪亦當按。都城旣陷、守土臣宜皆厲兵秣馬, 崇禎十三年進士。授行人,奉使旋里。 陛下屈法用之,而永吉觀望逗遛,縉彥 未赴,南都破,宸荃舉兵邑中 如河道總督黃希憲、山東巡撫丘 縉彥官部曹,先帝驟擢典中樞,乃率先從賊。 時朝政大亂 福王立,復命。 狼狈 一、宸荃獨持正,要人多 南 鼠。 祖德,尚可容偃 尋薦詞臣黃道 死 擢御史, 疏陳 何 以 對先

魯王監國,擢右僉都御史。 已而事敗,宸荃棄家從王海外。 王次長垣,連擢至大學士。

從王於舟山,又從泛海抵厦門、金門。 後騰舟南日山、遭風、没於海。

其邑子沈履祥嘗爲知縣,監國時,以御史督餉台州。 城破、避山 中,被獲死之。

抱區區之義,徒假名號於海濱,以支旦夕。 贊曰:自甲申以後,明祚既終,不踰年而南都亦覆, 而上替下陵,事無統紀, 勢固無可爲矣。 欲以收偏安之效,何可 朱大典、張國維等

## 校勘記

定西侯參謀順天顧明楫 明楫,原作「民楫」,據本傳下文及明史稿傳一五二張肯堂傳、小腆紀

年附考卷一七改。

分守登萊 是「東」當作「登」。 登萊,原作「東萊」。 據明史稿傳一五二曾櫻傳改。 按下文王永吉主管濟、克、東三府, 曾櫻主管青、 登、萊三府,

櫻翠家遊海外中左衞 按本書卷九〇兵志福建都司所轄無「中左衞」,有中左千户所,簡稱中左

列傳第一百六十四 沈宸荃所。疑「衞」字爲「所」字之譌。

校勘

記

「□」王瑞栴字聖木 王瑞栴,原作「王瑞柟」。按明史稿傳一五二王瑞栴傳、又傳一八三張獻忠傳、明

逃去題名碑録天啓乙丑科都作「王瑞栴」。 栴是紫檀香木,與字「聖木」相應,作「栴」是。 據

改。下同。卷目照改。

八五二 監紀主事余爵也 余爵, 原作「俞爵」,據明史稿傳一五六熊汝霖傳、本書卷二九三李乘雲傳附

余酹傳改。

## 明史卷二百七十七

## 列傳第一百六十五

袁繼咸 張亮 金聲 江天 一 丘祖德 溫璜 吳應箕

尹民

興等

沈猶龍 李待問 章簡 陳子龍 夏允彝 徐孚遠 侯峒曾

閻應元等 朱集璜等 楊文廳 孫臨等 陳潛夫 陸培 沈廷揚

林汝翥 林垐 鄭爲虹 黄大鹏 王士和 胡上琛 熊緯

袁繼咸,字季通,宜春人。天啓五年進士。授行人。

謂一此令行,上自藩臬,下至守令,莫不次第參謁,屛息低眉,跪拜於中官之座,率天下爲無 春, 擢山西提學僉事。 崇禎三年冬,擢御史,監臨會試,坐縱懷挾舉子,謫南京行人司副,遷主客員外郎。七年 未行、總理戶、工二部中官張彝憲有朝覲官齎册之奏。 繼咸疏論之,

傳第一百六十五 丧繼咸

列

能。 恥 咸,斥孫 事 ,大不便。」彝憲大惠, 而巡按御史張 振 諸生隨至都,伏闕訴冤,繼咸亦列上孫振請屬狀及其贓賄 孫振 以請屬不應,疏誣繼咸 與繼咸互訐奏。 帝不聽,乃孑身赴任。 隇 私 事。 帝怒,逮繼咸,責姓 **外之,巡撫吳甡** 、數事。 回奏。 詔逮孫振 姓 賢 繼 薦其廉 · 坐

六千餘 餘 人。 丈。 年除 詔 兼 湖廣 **僉事,分巡武昌、黃州。** 參議,分守武昌。 以兵搗江賊巢興國 擊退賊老回 回、革裏眼等七大部黃陂、黃安, 、大冶 山中,擒賊首呂瘦子,降其黨 築黄岡城

謫戍,繼咸得復官

年四月擢 十二年移淮陽, 右 愈都御史,撫治鄖陽。 忤中官楊顯名,奏鐫二秩調用。 未一年,襄陽 陷 ,被逮,戍貴州 督師楊嗣昌以其知兵,引參 軍 事。 明

湖廣 威仍督屯政。 玉 排 、應天、安慶軍務,駐 兵東下。 五 年,廷臣 繼咸 大器、良玉不協,長沙 交薦,起故官 遇良玉於蕪湖,激以 九江。 ,總理河北屯政。 擢繼咸兵部右侍郎兼 、袁州 忠義 俱陷 良玉 ,仍推繼咸代之。 未赴,賊逼江西。 即還,恢復武昌。 右僉都御史以行。 甫抵鎭 廷議設 延議 而 賊已陷 京 肾上大器-重 師 臣 陷 武昌 總督江西 來代,繼 一,左良

朝 高傑新封與平伯。 福 扩 南 祁 ..., 頒 韶武昌, 繼咸曰三封爵以勸有功。 良玉不 - 拜詔 繼咸致書言倫序正,良玉 無功而封,有功者不勸。 功 拜 跋扈而封,跋扈 受 詔。 繼 成

列傳第一百六十五 袁繼咸

悉停寢 逮治。 萬金給之,且代澍申理,以良玉依仗澍爲言。 高宗用黃潛善、汪伯彥事,語復侵士英。 法 慮,臣當星馳 曰:左良玉雖無異圖,然所部多降將,非孝子順孫。 臣 愈多。」王曰:「事已行,奈何?」繼咸曰:「馬士英引傑渡江,宜令往輯。」王曰:「彼不欲往, 史可 法願 **澍與良玉謀,陰諷將士大譁,欲下** 冬春間 往。」繼咸曰:「陛下嗣位,固以恩澤收人心,尤宜以紀綱肅衆志。 回鎭。」許之。 ",淮上未必無事。 因赴閣責可法不當封傑,士英嗛之。俄陳致治守邦大計, 臣雖駑,願奉六龍爲澶淵之舉。」王有難色。 南京索餉、保救澍。 會湖廣巡按 士英不得已,免逮澍。繼咸旣與士英隙,所奏 陛下初登大寶,人心危疑,意外不可 御史黃澍劾奏士英十大罪, 繼成 為留江 漕 干 因詣榻 乞振精 萬 石、餉 士英 前密 引宋 十三 |擬旨 中,中 輔 奏

異 經 豁達大度 戒 以 先帝 同。 諭 周宣 臣 明 平、勃 年正 焚毁,何 工 之未央問 一,亦 後 月,繼咸言一元朔者,人臣拜手稱觴之日,陛下嘗膽臥薪之時。 其 迎立 私 大臣公忠善謀,翊贊其美。 必復理其說。 鬭 夜爲可 漢文,不聞 而 急 公讐。 法,以 窮治朱虚之過,房、杜決策秦邸,不聞力究魏徵 書尚未進,宜寢之; 晚近長夜之飲、角觝之戲爲可戒。 臣每歎三十年來,徒以三案葛藤血戰不已。 請再下寬大之詔,解圜扉疑入之囚,斷草野株連 即已進,宜 省土木之功,節浮淫 至王者代興,從古亦多 若要典一 念大恥未 之非 固 書,已 雪,宜 之費。 其君

明

之案。」王降旨兪其言。

玉立 良 檄。 戰 子之事, 而 玉 言 艦 一他宗, 不還, 繼 耄 要典宜再焚。 「爲則」 咸 小皆 良玉 以 良玉不從云。 議 令不行 不 不 一爭不 更造, 喜 妨從容審 繼 得, ,疏劾 咸、汰 檄九江 江東 遂與士英輩有隙。 士彦。 其軍 處,多召東宮舊 良玉 人乃由是交口言繼 僉 嘗 事 餉六萬,軍 葉士彦 不拜 士彦 監 司 年御史黃耳鼎 於 或 臣 中有怨言,繼咸 繼咸疏 詔 江流 一辨識 咸、 ,聞之益疑懼,上疏明 裁買 ,以解中外之疑。」疏未達,良玉已反 良玉倡和,脅制 言:「太子眞偽,非臣所能 材 木。 亦劾 疏 繼咸,言繼咸 士彦家蕪 爭不得。 朝 與繼咸 廷矣。 湖, 叉 八以江 有心腹 與諸商 無隙,耳 會都 懸揣 上 一兵寡 將校 下 暱, 鼎受 眞則 文 鄭 封 有 勸 望行 ?指使 偽 左 還 鴻 太 良 其

岸, 胎· IF. 良 咸 舟 土 正 元等援袁州 久 中,良玉語及太子下 色日 乃曰 晉陽之甲,春秋惡之,可同亂乎。」遂約與俱拒守。 初,繼 書繼 密論 三 吾約不破城, 咸聞 咸,願握手 防賊 李自成兵敗 何從來? 曲 岳州 獄事,大哭。 別,爲皇太子死。 改檄 先帝舊德不可忘,今上新恩亦不 南下, 、長沙 爲疏, 命部 入江西 次日,舟移南岸,良玉袖 駐軍候旨。」繼咸 將 境。 郝效忠、陳麟、鄧林奇守 九江 旣已登舟,聞良玉反,復還九江。 士民泣請繼咸往,舒 歸,集諸將於城 而效忠及部將張世勳等則已出 ·可負, 出皇太子密諭 密諭 九江,自統副 一方難 樓 何 而 從來。 灑泣 劫 繼 將汪 諸 良玉 咸 日 良玉色變, 兵 會 將 碩畫、李 良玉 盟 舟在 與良 (諫非 繼 於 北

良玉。 大事去矣。」副將李士春亦密白繼咸隱忍,至前途,王文成之事可圖也。繼咸 玉 合兵,入城殺掠。 良玉已疾篤,夜望見城中火起,大哭曰:「予負臨侯」臨侯,繼咸別號也。 繼咸聞之,欲自盡。 黄澍入署拜泣曰:「寧南無異圖。 公以死激成之, 以爲然,遂出責 嘔血數升,

遂死。 其子夢庚秘不發喪,諸將推爲帥,移舟東。

效忠紿赴 月,終不屈,乃殺之。 林奇、碩畫、士元毋爲不忠事, 中朝皆疑繼咸、良玉同反。 其軍。 將及湖口,而夢庚、效忠降於我大清, 而南都時已破, 諸鎭多納款。 林奇、碩畫、士元避皖湖中,遣 遂執繼咸北去,館內院。 繼咸勸夢庚旋師, 人陰逆繼咸。 不 至明年三 繼 咸 聽。 已爲

遣

安慶 賊, 可 乘 頻有功。 ,請解 , 亮被執 有 張亮者, 職視 -夢庚北行,挾亮與俱,乘間赴河死。 七年擢右僉都御史,巡撫 賊所向,督兵進討, 四川 人。 舉於鄉。 從之。 崇禎 時,歷楡林兵備參議,用薦 其地。 尋召入京議事, 福王旣立 一亮聞 復遣還任。 李自成 改安廬 兵敗 明年四月,左夢庚陷 兵備 西奔,奏言眬 監 禁軍討 勢

唑 + 在 遭 左 遇 破 右 下 立 翼、宜 月,大清 聖明, 格用之耳。 金聲字 賜 裁許 戍以重兵。 日 Ē 夜 兵逼 希 爲 臣所 \*,休寧 都 陛下憂念天下事。 城 知申甫有將才。 人。 而天津漕艘所聚,尤宜 ,聲慷慨乞面 好學,工舉子業,名傾一時。 陳急務,帝卽召對 今兵逼京畿,不得不急爲君 臣願仗聖天子威靈, 亟防。 今天下草澤之雄,欲效用 平臺。 崇禎元年成進士,授庶吉士。 與練敢戰士,爲 退具 一父用。 、疏言 「臣書生素矢忠義 夫通州、昌平 國家捍强 國 家者 一,都城 不少, 明年

召見, 卽 總 皆市井游 非 者惶懼 理滿桂 、喋血 命 聲調 申 奏對稱旨,超擢 甫 力戰不 不能轉,殲戮殆盡,甫亦陣亡。 護。 手, 一節制諸軍 者,僧也,好談兵,方私製戰車火器。 所需軍裝戎器又不 至此。 亡何,桂殁,甫連敗於柳林、大井,乃結 ,,甫不肯爲下。桂卒掠民間,甫軍捕之,桂輒索去。聲以 帝亦傷之,命予恤典。 副總兵,敕募新軍 時給。 聲痛傷之,言甫受事日淺,直前衝鋒,遺骸 ,便宜從事。 而是時大清兵在郊圻久, 勢當速戰, 帝納聲言,取其車入覽,授都司僉書。 改聲御史,參其軍。 車營盧溝橋。 大清兵遶出 甫倉猝募數千人, 兩 急出營柳林 軍不和聞,帝 矢刃殆徧 其後,御車 卽 日

旅 爲劉之綸奇兵,收桑楡之效,不許。 恥 無功, 請率參將董大勝兵七百人,甫遺將古壁兵百人,及豪傑義從數百 俄以清核軍需告竣,奏繳關防,請按律定罪,再疏 人,練成一

請 絡 東 罷 斥 江 · 張 不 海 許 外形 東江 勢。 帝雖 自毛文龍被殺, 嘉其意,亦 不果 兵力弱, 用 勢孤。 擊因東宮册立,自請頒詔朝鮮

厭薄 華、令京卿、翰林 及 遂屢疏 時進見。 ,品量畢呈。 才長短 之。 乞歸 E 政事 臣愚妄謂陛下泰交尚 疏言:「陛下曉夜焦勞, ·得失, 程量不爽,方可 諸臣 、臺諫及中行、評博等官, 才不才, 軍民利 病, 及才長短,豈 未般, 斟 廟堂舉錯, 日 酌 親 位 顧問 天下 置。 輪番 之事 尚未數, 往者 得逃聖鑒。」 邊塞情形 入直, , 陛下數召 實未嘗日習天下之人。 木 **一,皆與臣工考究於燕閒** 得謂 博咨廣 帝未及報,聲再疏懇言之,終不 I對羣 召 詢 對 一臣,問 無 益 而 內外 也。 無 所得, 願 有職業者 必使天下才不才, 自 之間 鮮當 今 間 一,亦得 聖 日 歲 S) 御 月旣 甪, 不 文 遂

貴州 玉諱 復 年冬,廷臣交薦,即 枫 激變, 兵討 疏 後 力 大學士 賊,迂道掠江西,爲樂平吏民所 謂 聲及徽 一徐光啓薦聲同修曆書,辭不就。 鄕 郡 多盜 命召用,促入都陛見,未赴而 州推官吳翔鳳主使。 ,聲團練義勇,爲 拒擊。 , 捍禦。 士英 以聞, 京師 比抵 十六 以御史召, 徽州 陷。 年, 聲 兩 鳳陽 境,吏民以爲賊,率衆破 疏 亦不赴。八年春, 陳辨。 總督馬士英遣使者李章玉 帝察其無罪,不問。 起山東 走之。 僉事 其 章 徵

福 王立於南京, 超擢 聲左僉都御史,聲堅不起。 大清兵破南京,列郡望風迎降。

列

倳

第

百

六

+

Ŧi.

金

熞

通 集 表 民保 唐 王 一,授聲 績 溪 黄 右都 Щ , 分 御史爺 兵扼 兵部右 六嶺。 侍郎,總督諸 寧國 丘 祖德、徽州 道 軍 o 温璜 拔旌德、寧國 、貴池吳應箕等多 「諸縣。 九月下 應 之。 旬,徽故 乃遣 使

御史黃澍降於大淸,王師問道襲破之。

公殉 義 聲被 乎 執 遂偕死。 至江寧 · , 語門 人江 唐王 贈聲禮部 天一日 尙 子子 書,諡 有老母, 文毅 不可死。」 天一,徽諸生。 對日三天一同公起兵,可不同

守。 典, 散。 分 巡 解職候勘。 十五. 東昌。 會中軍梅 丘 祖 年 德,字念修,成都人。 調官沂州 111 應元叛,率部卒索印 東土窓 事白,以故官代王永吉撫 猖 0 其冬用兵部 獗 帝 因給事 崇禎十年進士。 ,祖德乃南奔 尙 中張元始言, 書張 Щ 東。 國維薦 京 授寧國推官,以才 擢 師 令祖 覆,賊遣 右僉都御史,巡撫保定。 德及東克道 使招降。 調 李恪專任 濟南。 祖德斬 用薦. 招 之,謀 十六 撫, 超 擢 發 寇 年罣察 | 僉事 兵拒 多解

成 沈壽薨等各舉兵應之。 都 亦陷,無家可歸,流寓 福 Ŧ 時,御史沈宸荃劾祖德及河南總督黃希憲輕棄封疆,詔削籍提訊,久之獲釋。 時郡城已失,祖德駐華陽,三衡駐稽亭,他遙起者又十餘部,約共攻 寧國 金聲起兵績溪,祖德與寧國 舉人錢文龍,日諸生麻三衡 而

恒 郡 一、阮 衡 城。 軍 善長 敗,亦 不 克,壽薨陣 劉鼎 死 甲、 壽 胡 薨,都督 殁,祖德退還 美 球、馮 1有容 百 家 子。 Щ 與俱 F|1 = 衡 起,號七家 大清 布 兵攻拔其寨,被獲,磔死, 政 使溶 軍,皆 孫 也。 l 諸生 三衡 也 兵旣起,  $\equiv$ 一衡旣 其子 敗,太平等亦 亦 旁近吳 死。 太平 越 四 阮 日,

黄澍 溪 明 生 璜 年, ,有學行 溫璜, 以 南京 與掎角,且轉餉給其軍 城 獻 0 亦 初名以介,字于石,烏程人。 ,磺趨歸村舍,刃其妻茅氏及長女,遂自剄死。 覆。 崇禎十六年秋 知府 秦 祖襄及諸僚屬皆遁, 舉進士,授徽州推 ,而徙家屬於村民舍。 大學士體仁再從弟也。 官。 璜乃盡攝其 甫 未幾, 莅 任,聞 印,召 聲敗,璜嚴 京師陷,亟 士民 母陸守節被旌。 慰諭 兵自守。 練民兵, 之。 郡中 金聲 爲保 璜久為諸 學兵績 故 障計 御史

謀殺 敗 聯 羲、長洲楊廷 絡南 走山中,被獲,慷慨就死。 周 吳 鑣 北 應箕,字次尾, 附璫失職諸人,劫持當道。 應箕 樞等爲留都防亂公揭討之,列名者百四十餘人,皆復社 獨入獄護 貴池人。 視。 大鍼聞, 善今古文,意氣橫厲一世。 應箕與無錫顧杲、桐城左國材、蕪湖沈士柱、餘姚黃宗 急遣騎捕之, 應箕夜亡去。 阮大鍼以附璫削籍,僑居南京, 南都不守,起兵應金聲, 諸生 也。 後 大鋮 得志,

其 同 時 舉兵者 有尹民 興、吳漢超、龐昌胤、謝球、司石磐、王湛、魯之璵。

召對, 爲陳啓新所訐,謫福建按察司檢校。 大清兵攻破城,初浣死之,民興走免。 名,久之始釋。 民 言多當帝意,即擢本司 興,字宣子,崇禎 福王立,起故官,尋謝病歸,流寓涇縣。 初舉進士。 郎中。 歷知 十五 周延儒出督師,命從軍贊畫。 唐王以爲御史,事敗歸,卒於家。 (寧國、涇二縣,除奸釐蠹,有神明之稱。 年春,疏陳時務十四事,帝喜,召爲職 南京失,與諸生趙初浣等據城拒守。 延儒被譴,下民興吏,除 方主 行 取 入都, 數

也。 棄家 徐淮者部署之。 夜緣南 剖其腹, 膽長三寸。 走涇縣,從尹民與起兵。 漢超,宣城諸生。 城登。 兵潰,城中按首事者。 漢超與合,連取句容、溧水、高淳、溧陽、涇、太平諸縣。 崇禎十七年聞都城變,謀募兵赴難,會福王立,乃已。明年,南都覆, 妻戚自擲樓下死 兵敗,匿華陽山中。 漢超已出城,念母在,且恐累族人,入見曰:「首事者我 先是,丘祖德、麻三衡諸軍潰,保華陽,有 明年正月襲寧國

昌胤 西充 人。 崇禎十年進士。 授靑陽知縣。 南京覆,走匿九華山,謀舉兵。 事洩被

球,溧陽諸生,僉事鼎新子也。毀家募兵。兵散,被執而

執,

夜死旅

店中

石磐,鹽城諸生,與都司酆某同舉兵,兵敗被執。 酆言:「此儒生,吾劫之爲書記耳。」石

磐曰:「吾首事,奈何諱之!」繋獄六十餘日,與酆偕死。

湛,太倉諸生。 之璵,歷官副總兵,駐福 城已下,與兄淳復集里 Щ 蘇州旣降,諸生陸世鑰聚衆焚城樓。 人數百圍城。城中兵出擊,淳赴水死,湛被斫死。 之璵率千人入城,與

大清兵戰,潰走,之璵戰死。

覆,台輔視其廩曰:「此吾所樹,盡此死。」明年,粟盡,北面再拜,自縊死 等臥薪嘗膽、食不下咽時,顧置酒大會耶!」左右欲鞭之, 王時,東平伯劉澤清、御史王燮張樂大宴於睢寧。 柱,抱石投水死。 其時以諸生死者,有六合馬純仁、邳州王台輔。 台輔、當崇禎末、聞宦官復出鎭,將草疏極諫。 台輔衰經直入,責之曰:「國破君亡,此公 南京既下,六合即歸附, 變日 "「狂生也。」命引去。 甫入都,都城 陷,乃還。 純仁題銘橋 及南京 福

沈 猶龍,字雲升,松江華亭人。 萬曆四十四年進士。 除鄞縣知縣。 天啓初,徵授御史,

出爲河南副使。

傳

第

百

六

十五五

沈

循龍

崇禎 元年召復故官,進太僕少卿,拜右僉都御史,巡撫福建。 江西妖賊張普薇等作亂,

猶 龍 遣遊擊黃斌 卿 協 剿 ,大破之。 增秩賜金,以憂歸。 服闋,起兵部右侍郎兼右僉都 御史,

總督兩廣軍務,兼廣東巡撫。

吳凇 乃偕里人李待問、章簡等,募壯 巷戰踰 人傳凝之參志葵軍事,兵敗,赴水死。 南門,城破,俱被殺。 月,大清兵至,二將敗於春申浦,城遂被圍。 一江陰城下,令說城中人降。 總兵官吳志葵自海入江,結水寨於泖湖。 十七年冬, 時,世祿中四十矢,被獲,死之。 福王召理部事,不就,乞葬親歸。 華亭教諭眭明永題詩明倫堂,三投緩死。 志葵說 士數千人守城,與二將相掎角,而參將侯承祖守金山 之,蜚不語,城迄不下,後皆被殺。 承祖亦被獲,說之降,不從,遂被殺。 大清兵遂攻金山, 未幾破,猶龍出走,中矢死。 會總兵官黃蜚擁千艘自無錫 明年,南京失守,列城望風下。 承祖 與子世祿 諸生戴泓赴池死。 猶 待問守東門,簡守 固守。 至, 志葵、蜚旣敗, 與 合。 閨六月, 城旣破, 嘉定舉 **猶** 

待 問,字存我,崇禎末進士。 授中書舍人。 工文章,兼精書法。簡,字坤能。舉於鄉,

官羅源知縣。

陳子龍,字臥子,松江華亭人。 生有異才,工舉子業,兼治詩賦古文,取法總、晉,駢體

妙。 崇禎 十年進士。 選紹興推

當。 保南砦。 以撫標 陷 中, 東陽 會者萬 東陽 子龍嘗薦 兵,命子龍爲監軍討之,稍有俘獲。 、義烏 諸 生 、浦江、遂逼郡城、旣 許都 諸上官,不用 或告監司王雄 者, 副使達道 ,東陽 曰:「都反矣。」雄遽遣使收 孫 而 令以私憾之。 也。 引去。 家富, 巡撫董象恆 而遊擊蔣若來破其犯郡之兵,都乃率餘卒三千 任 適義鳥 恢好 施 坐事逮,代者未至,巡按御 捕, 奸人假 陰以兵法部勒賓客子弟, 都 遂反。 中貴 名招 旬日 兵事發,都葬母 間 聚衆 史左光 數萬, 思得 連 Щ

死。 糧 六十餘人於江 ,奈何。」子龍 **遂挾都見雄。** 雄 欲 漁人無財 滸。 曰:「都,舊 語子龍曰:「賊聚糧據險,官軍不能仰攻,非曠日不克。 子龍 復挾都 爭 走山 不能 識也,請往察之。」 中, 得 散遣其衆, 乃單 而 以二百人降。 騎 入都 營,責數其罪, 光先與東陽 我兵萬· 諭 令歸降, 令善,竟斬都等 待 止 以 Ŧī.

不

H

策莫 恤 語 及 且 陳 過 以 追罪 新 定 水 亂 甲 師,海舟議 嘗 主款 功,擢 劾 新 事 兵科給 甲 不可緩,請專委兵部主事 者。 王曰: 事 廷臣 中。 如如 懲劉 此, 命甫 孔昭 新甲當 下而京師陷,乃事 L 殿 上相 位。 何 爭事,不敢言。 剛 廷臣 訓 練,從之。 無應者, 福王於南京。 獨 太僕少卿馬紹愉奉 子龍與同官李清交章力諫 少詹事 其年六月,言防江之 陳盟 目可。 使陛見, 因命予

列

僡

第

百

六

+

五

陳

子

髄

事獲已。

所終。 明年二月乞終養去。 私自搜採 復舊物。 又言:「中使四出搜巷。 未幾, 其始皆起於姑息一二武臣,以至凡百政令皆因循遵養,臣甚爲之寒心也。」亦不聽。 ,甚非法紀。」乃命禁訛傳誑惑者。 今入國門再旬矣,人情泄沓,無異昇平。 列上防守要策,請召還故尚書鄭三俊,都御史易應昌、房可壯、孫晉, 凡有女之家,黃紙貼額,持之而去,閭井騷然。 子龍又言:「中興之主, 莫不身先士卒, 故能光 清歌漏舟之中,痛飲焚屋之內,臣不知其 明旨未經有 並可之。 司,中使

王部院職銜,結太湖兵,欲舉事。事露被獲,乘間投水死。 子龍 與同邑夏允彝皆負重名,允彝死,子龍念祖母年九十,不忍割,遁爲僧。尋以受魯

溥、楊廷樞等慕之,結文會名復社。允彝與同邑陳子龍、徐孚遠、王光承等亦結幾社相應和 方岳貢等力稱其賢,將特擢。會丁母憂,未及用。 居五年,邑大治。吏部尚書鄭三俊舉天下廉能知縣七人,以允彝爲首。帝召見,大臣 崇禎十年, 與子龍同成進士, 授長樂知縣, 善決疑獄。 夏允彝,字彝仲。弱冠舉於鄉,好古博學,工屬文。是時東林講席盛,蘇州高才生張 他郡邑不能決者,上官多下長

制 司主事。 ,以兩人皆東林也。 北都變聞,允彝走謁尚書史可法,與謀興復。 疏請終制,不赴。 兩人實未嘗赴官,無可罪。 御史徐復陽希要人旨,劾允彝及其同官文德翼居喪授 職爲 吏部尚書張捷遽議貶秩調用。 聞福王立,乃還。 其年五月擢吏部考功

中 而 同社徐字遠、舉於鄉、因松江破、遁入海、死於島中。 賦絕命詞,自投深淵以死。 未幾,南都失,徬徨山澤間,欲有所爲。 允彝死後二年,子完淳、兄之旭並以陳子龍獄詞連及,亦死。 聞友人侯峒曾、黄淳耀、徐汧等皆死,乃以八月

侯峒曾,字豫瞻,嘉定縣人。 給事中震暘子也。 天啓五年成進士,授南京武選司主事,

丁父憂。

勢方熾,歲試黜兩宗生,王怒,使人誚讓,峒曾不爲動。 稽勳郎中遷江西提學參議。 分守嘉 三俊舉天下 崇禎 湖。 七年入都。兵部尚書張鳳翼薦爲職方郎中,峒曾力辭,乃改南京文選司 賢能 漕卒擊傷秀水知縣李向中,峒曾請於撫按,捕戮首惡,部內肅然。 監司五 人, 峒曾與焉。 給事中耿始然督賦至,他監司以屬禮見,峒曾 召爲順天府丞,未赴而京師陷 遷廣東副使,不赴。 獨與抗禮。 起浙江右參政 吏部尚書鄭 主事。 益王 曲

列

曾拜 皆舉人。 城中 乞師 偕里人黃淳耀 家 矢 於吳淞總兵官吳志葵。 福 石 廟,挈二子元演、元潔並沈於池。 王 時, 俱 用圓官秀水教諭。元調、全昌、雲蛟並諸生。 。盡。 用爲 、張錫眉、董用圓、三 七月三日大雨,城隅崩,架巨木支之。 左通 政,辭不就。 志葵遣遊擊蔡祥以七百人來赴,一戰失利,東甲遁,外援遂絕, 馬元調、唐全昌、夏雲蛟等誓死固守。大淸兵來攻,峒曾 及南京覆,州縣多起兵自保。 錫眉、用圓、元調、全昌、雲蛟皆死之。 明日雨益甚,城大崩,大清兵入。 嘉定士民推 錫眉、用圓 峒曾爲倡, 峒

其時聚衆城守而死者有江陰閻應元、崑山朱集璜之屬。

元往禦,手射殺三人。 賊退,以功遷<u>英</u>德主簿,道阻不赴,寓居<u>江陰</u>。 應元,字麗亨,順天通州人。崇禎中,爲江陰典史。十七年,海賊顧三麻入黃田港,應

下。 不勝,瑞龍水軍亦敗去,明遇乃請應元入城,屬以兵事。 陳明遇主兵,用徽人邵康公爲將。 徽人程壁盡散家貲充餉,而身乞師於吳淞總兵官吳志葵。 明 年五月,南京亡,列城皆下。 而前都司周瑞龍泊江口,相掎角。 <u>閏六月朔,諸生許用倡言守城,遠近應者數萬人。 典史</u> 志葵至,壁遂不返。 戰失利,大淸兵逼城 康公戰

大清兵力攻城,應元守甚固。 東平伯劉良佐用牛皮帳攻城東北,城中用礮石力擊。 良

來益 佐 乃移營十方庵,令僧陳利害。 衆 ,四圍發大廠,城中 死傷 無算, 良佐旋策馬至,應元誓以大義,屹不 **猶固守。** 八月二十一日,大清兵從祥符寺後城入,衆 動。 及松江破,大清兵

**猶巷**戰 ,男婦投池井皆滿。 明遇、用皆舉家自焚。 應元赴水,被曳出,死之。

子婦先縊 訓導馮厚敦冠帶縊於明倫堂,娣及妻王結袵投井死。里居中書舍人戚勳令妻及子女、 , 乃舉火自焚, 從死者二十人。 舉人夏維新,諸生 王華、呂九韶 自 刎 死

江北。 告之期,命取襲衣自斂,趺坐而逝。 陷,兩人逸去。 貢生黃毓 其子大湛、大洪被收,兄弟方爭死。 祺者,好學,有盛名,精釋氏學。 明年冬,趨偵江陰無備, 率壯士十四人襲之。不克,皆死。 而毓祺以敕印事發,逮繫江寧獄,將刑,其門人 與門人徐趨舉兵行塘,以應城 毓祺旣逸去,避 內 兵。 及城

朱集璜,字以發,崑山 · 貢生。學行爲鄕里所推,敎授弟子數百 人。

遊擊 舊將 寺後 土百 王佐 河 孫 人 南京既亡,崑山 爲 死。 志 才爲 尹 助。 、戰歿。 門 佐才亦邑人,嘗官狼山副總兵,年老矣。 帥 人 孫 ,集璜及周室瑜、陶琰、陳大任等共 城陷,永言遁去。 道民、張 議拒守, 謙 同 而縣丞閻茂才已遣使迎降。 日死。 佐才縱民出走,而 室瑜、琰、大任亦死之。 舉 兵。 己冠帶 大清兵至,宏勛 參將陳宏勛 縣 人 坐帥府, 共 室瑜子朝鑛、大任子思翰皆 執殺茂才,以六月望,推 、前知 被殺。 率舟 師 縣楊永言率壯 集璜投東禪 迎戰,敗還,

列

同死。室瑜舉於鄉、官儀封知縣。琰、大任皆諸生。

沈徵憲、朱國軾。救母死者,徐洛。自盡者,徐溵、王在中、吳行貞。 時 以守禦死者,蘇達道、莊萬程、陸世鏜、陸雲將、歸之甲、周復培、陸彥沖。 代父死者,

附之。 文驄善書,有文藻,好交遊,干土英者多緣以進。其爲人豪俠自喜,頗推獎名士,士亦以此 事,歷員外郎、郎中,皆監軍京口。以金山踞大江中,控制南北,請築城以資守禦,從之。 御史詹兆恒劾其貪汚,奪官候訊。事未竟,福王立於南京,文驄戚馬士英當國,起兵部主 楊文驄,字龍友,貴陽人。浙江參政師孔子。萬曆末,舉於鄉。崇禎時,官江寧知縣。

遠等兵南岸,與大清兵隔江相持。 之,悉潰。 爲克敵也,日奏捷。 山,扼大江而守。 明年遷兵備副使,分巡常、鎭二府,監大將鄭鴻逵、鄭彩軍。及大清兵臨江,文聰駐金 文聰走蘇州。 五月朔,擢右僉都御史,巡撫其地,兼督沿海諸軍。文驄乃還駐京口,合鴻 初九日,大清兵乘霧潛濟,迫岸。 十三日,大清兵破南京,百官盡降。 大清兵編大筏,置燈火,夜放之中流,南岸軍發礮石,以 諸軍始知,倉皇列陣甘露寺。 命鴻臚丞黃家鼒往蘇州安撫, 鐵騎衝

文驄襲殺之,遂走處州。時唐王已自立於福州矣。

及鼎 也。 侍 郎兼右僉都御史,提督軍務,令圖南京。 卿上謁,王以故人子遇之,獎其父子,擬以漢朝大、小耿。 士英遣迎福王,遇王於淮安。 初,唐王在鎭江時,與文驄交好。至是,文驄遣使奉表稱賀。 王貧寠甚、鼎卿賙給之、王與定布衣交、以故寵鼎卿甚。 加其子鼎卿左都督、太子太保。 然其父子以士英故,多爲人 鴻逵又數薦,乃拜兵部右 鼎卿, 士英甥

明 年,衢州告急。 誠意侯劉孔昭亦駐處州,王令文驄與共援衢。 七月,大清兵至,文驄 詆

洪

不能禦,退至浦城,爲追騎所獲,與監紀孫臨俱不降被戮。

臨,字武公,桐城人,兵部侍郎晉之弟。

文驄招入幕,奏爲職方主事,竟與同

福 王時,謁史可法於揚州。 其時起兵旁掠郡縣者有吳易,字日生,吳江人。生有膂力,跅弛不羈。 可法異其才,題授職方主事,爲己監軍 崇禎末,成進士。

爲 生 梗。 沈自駉、自炳,武進吳福之等謀舉兵。 明 年奉檄徵餉江南,未還而揚州失,已而 唐王聞之,授兵部 右侍郎兼右僉都御史,總督江南諸軍。 旬日得千餘人,屯於長白蕩,出沒旁近諸縣, 吳江亦失。易走太湖,與同邑舉人孫兆奎,諸 文驄奏易斬獲多,進爲兵 道 路

例

傳第

百六十

五

楊文聯

部尚書。魯王亦授易兵部侍郎、封長興伯。

**奎被獲,一軍盡殲。** 福之,鍾巒子也。 八月,大清兵至,易遂敗走。父承緒、妻沈及女皆投水死,自駉、自炳、福之亦死焉,兆 明年,易鄉人周瑞復聚衆長白蕩,迎易入其營。 八月,事洩,被獲死之。 械至江寧,

死之。

陳潛夫,字元倩,錢塘人。 家貧落魄,好大言以駴俗。崇禎九年舉於鄉,益廣交遊,爲

豪舉,好臧否人,里中人惡之。 友人陸培兄弟爲文逐潛夫,潛夫乃避居華亭。

式部將,縛巡按御史蘇京去。 压。 有勸潛夫弗往者,不聽,馳之封丘。會叛將陳永福率賊兵出山西,其子德爲巡撫秦所 十六年冬,授開封推官。 潛夫募民兵千,請於所式及總兵卜從善、許定國,令共剿,皆 大河南五郡盡為賊據,開封被河灌,城虛無人,長吏皆寄居封

不肯行。

賊 所 設偽巡撫梁啓隆居開封,他偽官散布郡邑間甚衆,而開封東西諸土寨剽掠公行,相攻 潛夫 乃以十七年正月奉周王渡河居杞縣,檄召旁近長吏,設高皇帝位,歃血 固

容臣 數十,李際遇最 江 楚,西控秦關,北臨趙 何事多兵,督撫紛紜,並爲虛設。 警,前後救援,長河不足守也。 命藩 城堡俾自守,而我督撫將帥屯 興 已敗走山西,而南陽賊乘間犯西平,洪起引還,潛夫亦隨 萬,潛夫兵三千,俘杞僞官,啓隆聞風遁去。 躬往說之。 殺 往 無已。 淮亦未 . 自將,臣當荷戈先驅,諸藩 當是時 鎭,以一軍出潁、壽,一軍 進取,王業不 福王立南京,潛夫傳露布至,朝 潛夫轉側杞、陳留間,朝夕不自保。 可 , |開 保也。」 五月五日方誓師, 而都城失守。 封、汝寧 ·偏安。 諸 帥 衞,上之則恢復可望,下之則江 間 中 山東、河南地,尺寸不可棄。 列寨百數,洪起 獨 洪起欲效忠,潛夫請予挂印爲將軍 出 銳師要害以策應之。 **汴梁一路,臣聯絡素定,旬日** 鎭爲後勁, 淮 若不思外拒,專事退守, 徐,則衆 中大喜,卽擢監軍御史,巡按河南。 最大; 河南 心競奮,爭爲我用。更頒爵賞鼓舞,計遠近,畫 **遂渡河而** 報至,乃慟哭, 聞西平寨副將劉洪起勇而好義,屢殺 五郡可盡復。 南陽 寬則 列寨數十,蕭 豪傑結案自固者,引領待 北,大破賊將陳德於柳園。 淮 耕屯爲 加 永安,此今日 舉土地甲兵之衆致之他人,臣恐 南 令其下編素。 可集十餘萬 五郡旣復,畫河 食,急則披甲 o 馬 應 士英不聽,而 訓 至 最大; 潛夫乃入朝言:「 計 人。 洪起兵萬, 也。 乘墉,一方有 誠稍給糗糧, 爲 洛陽 官軍 固,南連荆 兩 時李自成

財材有

功,

號五

誠

分

中

淮之上,

用

其

姻

列

案亦

英怒, 心。 旗前 諸將。 鎭 姬越其杰 兵 潛夫 導 無 冬盡,召潛夫還,以凌 出 其冬, 至 過諸 者。 巡撫 三傑喜 應訓復南陽 寨,皆鐃吹送迎,其杰問 其杰老憊不 河 南 過望,往謁 潛夫 及 自 知 駉代。 泌陽 九月 兵。 其杰。 、舞陽、桐柏 兵部 入覲, 潛夫亦遭外艱 其杰故 過之,諸寨皆閉 尚書張縉彦 便道省親,甫五 爲尊嚴,厲辭詰責 ,遣子三傑獻 歸 總督 門不 河南、 日卽 捷。 Щ, 馳 Щ 八抵爲 潛夫 赴河 東 其杰恚,譖潛夫於士英。 軍 授告身,飲之酒 賊。 務 上。 三傑泣 止 所 提空名, 建 白皆 而 出,萌 不用 鼓 不 吹 能 異 旌 馭

婦 車 令議 逮 馬 騶 潛夫罪。 明年三月,給事 下 從傳 獄 治之。 呼皇后來 先是, 中林有本疏刻 小,亦稱 有童氏者,自言福 臣 一朝謁。 御史彭遇 及童氏 王繼 **颽**,並及潛夫。 入都,王以爲假冒, 妃,廣昌伯劉良佐具禮送之。 士英以遇颽己私人,置 下之獄。 **遂責潛夫私謁妖** 潛夫 至壽州 不問,獨 見

潰 軍, 潛夫走至山陰化龍橋,偕妻妾二孟氏同赴水死,年三十七。 乃自 未 幾,南都不守,潛夫得脫歸。 募三百 人列 營江上。 尋進大理寺 聞魯王 少卿,兼御 監國紹興,渡江往謁,命復故官,加太僕少卿,監 史如 故。 順治三年五月晦,江上師盡

始爲文逐潛夫者陸培,字鯤庭,舉進士,爲行人,奉使事竣歸省。 南京既覆,聞潞王又

降,以繩授二僕,從容就縊而死,年二十九。」培少負俊才,有文名,行誼修謹,客華亭,嘗却

奔女於室云。

沈廷揚,字季明,崇明人。好談經濟。崇禎中,由國子生爲內閣中書舍人。

候東南風,轉栗至天津,又候西南風轉至寧遠。廷揚請從登州直達寧遠,帝用其議,省費 帝大喜,即加戶部郎中,往登州與巡撫徐人龍計海運事。初,寧遠軍餉率用天津船,自登州 且 一輯海運書五卷以呈。帝喜,卽命造海舟試之。廷揚乘二舟由淮安出海,抵天津,僅半月。 十五年命再赴淮安督海運,事竣,加光祿少卿,仍領其事 十二年冬,帝以山東多警,運道時梗,議復海運。廷揚生海濱,習水道,上疏極言其便,

所執。 魯王航海之明年,廷揚督舟師北上,抵福山,次鹿苑。夜分颶風大作,舟熮於沙,爲大淸兵 里。 後航海至舟山,依黃斌卿。 及京 諭之降,不從,乃就戮。 師陷,福王命廷揚以海舟防江。尋命兼理餉務,餽江北諸軍。 唐王在福建,授兵部右侍郎,總督水師。 南京失守,走還鄉 魯王授官亦如之。

林汝翥,字大葳,福清人。 舉於鄉,授沛縣知縣。天啓二年,戰却徐鴻儒兵,緝妖人王

普光黨有功,特擢御史。

罵不已,汝翥收繫之, 家,用大錐錐其主,刑官不敢問。 不聽,卒杖之,削籍歸。 殺萬璟。 四年六月巡視京城。民曹大妻與人奴角口,服毒死。 汝翥大懼,逸至遵化。巡撫鄧渼爲代題,都御史孫瑋、御史潘雲翼等交章論敕。 亦請受杖,復杖之。 汝翥捕得進,進懼劾,請受杖,遂杖之五十。 魏忠賢大怒,立傳旨廷杖汝翥。 火者曹進、傅國興率衆大掠奴主 先數日,羣奄毆 國興邀於道,

時,起雲南僉事,已而解職。魯王 執,諭降不從,繫之,吞金屑而死。 崇禎初,起官右參議,分守溫處道,不赴。久之,起瓊州道,坐奸民煽亂,貶秩歸。福王 一次長垣,召爲兵部右侍郎,與員外郎林奎攻福寧,戰敗被

以 千人,奎捕殺之。 城孤不能存,引去。 <u>李</u>,字子野,汝翥同邑人。崇禎十六年進士。授海寧知縣。 南都覆,杭州亦不守,卒乘機乞餉,環署大譟。 唐王以爲御史,改文選員外郎,募兵福寧。 邑有妖人以劍術惑衆,聚 聞王被殺,大慟,走匿山 如其請

有五。 直入,爲虹亟還浦城,縱士民出走,自守空城。 然是時芝龍已懷異志,盡撤守關將,仙霞嶺二百里間無一人。順治三年八月,大淸兵長驅 巡撫上遊 立,召爲御史。 鄭爲虹,字天玉,江都人。 四府, 兼領關務。鄭芝龍部將奪民舟,回為虹叱責之。 芝龍訴於王,王為 部民相率乞留,有十不可去之疏。乃令以御史巡視仙霞關,駐浦城。 崇禎十六年進士。 無何,被執,與給事中黃大鵬並死之,年二十 除浦城知縣。 唐王道浦城,知其康 一及自 諭解。 尋令

守延平者爲王士和,從走汀州者有胡上琛 中,從至建寧,令與爲虹共守仙霞嶺,竟同死。 大鵬,字文若,建陽 人。 崇禎十三年進士。 、熊緯、皆以死事著。 時王在延平, 爲義烏知縣,有能聲。 聞仙霞關失守,倉猝走汀州。 唐王召爲兵科給事

司務。 和,字萬育,金谿 疏陳時政闕 列 傳 第 百 六 失,凡數千言,唐王刊賜文武諸臣,且召士和入對,嘉獎備至,擢兵部主 十 Ŧī. 崇禎中,舉於鄉。 林 汝 蓊 鄭 爲 虹 南京既覆,江西亦被兵,士和避 入閩,授 更部

泣,士 之,正色曰:「君子愛人以德,姑息何爲。」從容正 事 和 未 召父老曰:「吾雖一月郡守, 和 亦泣。 月 擢 延平 退入內署,謂友人曰:「吾一介書生,數月而 知 府。 八月, 王走汀州,留兵部侍郎曹履泰偕士和 當與城存亡。 若等可速出, 衣冠,閉戶投繯死 忝二千石,安敢偸生。」其友勸止 毋使數萬 居守。 生靈盡膏斧鑕。」衆 俄警報疊至,

官錦 耶 「一吾世臣,不可苟活,爲我採毒草來。」妾劉 」途整冠帶與妾共飲藥酒而卒。 衣衞指揮,遷署都督僉事 上琛,字席公。 世襲福州右衞指揮使。 ,充御營總兵官,從至汀州。 好讀書,能詩。 年二十,願同死。 王被執,上琛奔還福州 旣襲職,復舉武鄉試。 上琛喜曰:「汝幼婦 唐王 謂 亦能死 家人

友 人語之曰:「昔狼瞫有言『吾未獲死所』,子旣有志,曷求所乎。」乃赴延平謁唐王,擢給事 尋扈行至汀州,遘變,從官皆散,緯仍奔赴。 緯,字文江,南昌人。 崇禎十六年進士。授行人。 遇大清兵,死之。 兩京旣覆,每飲酒,輒涕泗交橫下。

心離勢渙,敗不旋踵,何尺寸之能補。 贊曰: 廢興之故,豈非天道哉。 金聲等以烏合之師,張皇奮呼,欲挽明祚於已廢之後, 然卒能致命遂志,視死如歸,事雖無成,亦存其志而

校勘記

祖德與寧國舉人錢文龍 錢文龍,明史稿傳一五三、小腆紀傳卷四六丘祖德傳都作「錢龍文」。

[二] 華亭教諭眭明永題詩明倫堂 眭明永,明史稿傳一五三、小腆紀傳卷四六沈猶龍傳作「睦明

永」。

=

**並用圓** 小腆紀年附考卷一一同。明史稿傳一五三侯峒曾傳、南疆繹史卷三六龒用偃傳、小腆

紀傳卷四六黃淳耀傳都作「襲用圓」。

鄭芝龍部將奪民舟 部、原作「步」、據小腆紀傳卷四九鄭爲虹傳改。

122

列

傳 第

а				
	25	S)		
	ेश: -	30°		w or g
			•	

# 明史卷二百七十八

### 列傳第一百六十六

楊廷麟 彭期生等 萬元吉 楊文薦 梁于涘 郭維經

姚奇胤

詹兆恒 胡夢泰 周定仍等 陳泰來 曹志明 王養正 夏萬亨等

曾亨應 弟和應 子筠 掲 重 熙 傅鼎銓 陳子壯 麥而炫

朱實蓮 霍子衡 張家玉 陳象明等 陳邦彦 蘇觀生

楊廷麟,字伯祥,淸江人。 崇禛四年進士。改庶吉士,授編修。 勤學嗜古,有聲館閣

間,與黃道周善。

列

傳第

百

六十六

楊

廷

麟

筵,問保舉考選何者爲得人。 十年冬,皇太子將出閣,充講官兼直經筵。 廷麟言:「保舉當嚴舉主,如唐世濟、王維章乃溫體仁、王應熊 廷麟具疏讓道周,不許。 明年二月,帝御經

所薦。 今二臣皆敗 而舉主不 問。 是連坐之法先不行於大臣,欲收保舉效得乎。」帝爲動

不從中制。 之罪,俾將 言之痛心。 倡和款議,武備頓忘,以至於此。 才,謀之不臧,以國爲 其冬,京師戒嚴。 士畏法, 夫南仲在內,李綱無功 此今日 急務也。」 無有二心。 戲。 廷麟上疏劾兵部尚書楊嗣昌, 嗣昌及薊遼總督吳阿 召見大小諸臣,咨以方略。 今可憂在 ;潛善秉成,宗澤殞命。 外者三,在內者五 衡 內外扶同,朋謀誤國。 言:「陛下有撻伐之志, 乞陛下赫 諭象昇集諸路援師,乘機赴敵 0 督臣盧象昇 然 怒,明 與高起潛、方一藻 以禍 大臣無禦侮之 正向者主和 或 責樞臣,

昌意廷麟亦死,及聞其奉使在 部 職 方主事,贊畫象昇軍。 時 嗣昌 意主和 議,冀紓外患,而廷麟痛詆之。 象昇喜, 外,則爲不懌者久之。 即令廷麟往眞定轉餉濟 嗣昌大惠,跪薦廷麟 師 無何, 知兵。 象昇戦 死賈 帝改廷麟兵 嗣

秩,調之外。 出 廷麟指 初 ,張若麒、沈迅官刑 因 黄道 與 嗣昌比 周 獄 起,詞連廷麟,當逮。 而 捧廷麟。 曹, 謀改兵部, 會廷麟報軍 御史涂必弘 未至而 中 曲 道周已釋,言者多 折 沮之。 嗣昌 擬旨責 必泓,廷麟 以欺罔。 一薦 廷麟 同里 也。 事 平, 兩 貶 疑 廷 疏

十六年秋,復授職方主事,未赴,都城失守,廷麟慟哭,募兵勤王。 福王立,用御史祁彪

佳 薦, 召 為左 庶 子, 辭不 就。 宗室朱統鎭誣劾 廷麟召健兒有不軌謀,以姜曰廣 爲 內 應。 王

不 問 山 廷 麟 所 募 兵 亦散

江。 士,賜 月, 酒 大兵屯 已 同 順 劍, 升 治 而 萬元吉至贛。 自 二年 便宜從 泰 零都 和, 南 至 事。 副將徐必 都 贄, 破 十月, 與 十二月,同升卒。 江 延麟 西 達戰敗,廷麟、 大兵攻吉安, 諸郡惟贛州 謀 大 舉。 乃偕巡撫李 存。 同 必達 升 唐王 戦敗 乘 虚復吉安、臨 手 永茂集 赴水 書加廷麟吏部右侍郎,劉 死。 紳 士 江 會 於 廣東援兵至,大兵退 明 加 倫 兵部 堂, 尚 勸 書兼 輸 同 兵 升 東 餉 閣 國 市峽 子 大 祭 學 九

師 散 使 往 悉潰。 不支,走西城,投水 其 調 迎 王,而 兵 廣 西 年正月,廷麟赴 以六月入贛,與元吉憑城守。 及汀州告變,贛圍已半年,守陴者皆懈。 狼 以元吉代守吉安。 兵,而 身往雩都 死。 ) 贛,招 同守者郭 趣新 峒 無何,吉安復失,元吉退保赣州 蠻 軍 張安等四營降之,號龍武新軍。 張安來救。 維 經 未幾,援兵至,圍 彭 期生 五月 輩皆死。 十月四 望,安戰梅林,再敗, 暫解 日 ,大兵登城。 ,已,復合。 几 廷麟聞 月 大兵逼 退保雩都。 八月,水 廷麟督 王將 城 由 下, 汀赴贛,將 戰,久之, 師 戰敗,援 廷麟 廷麟 乃 遣

期生,字觀我,海 列 傅 第 六 鹽人,御史宗孟子。 六 登萬曆四十四年進士。 崇禎 初,爲濟南知府,坐

百

+

楊

廷

麽

湖 囚 西 I兵備 謪 布 僉事 政司 照磨 ,駐吉安。 量移 吉安不守,走贛州,偕廷麟招降張安等,加太常寺卿,仍視 應天推官,轉南京兵部主事,進郞中。 十六年,張獻忠亂江西,遷 兵備

城

破

,冠帶自縊

死

被戮。 龔棻 乃今知我 參將陳烈 劉孟鍧 ,戶部主事林琦,兵部主事王 劉 鄉官盧觀 時同殉者,職方主事 無二心也。」遂就戮。 數 應試,推官署府事吳國球,監 力戦 象盡 衆 以其弟已降,疑之,烈益奮勇疾鬭。 驅 男婦大小入水,乃自沉 周瑚 、磔死。 其家、黎遂球 紀 通判王明汲,編修兼兵科給事中萬發祥 通判 死。 、柳昂霄、魯嗣宗、錢謙亨,中書舍 郭寧登,臨江推官胡縝,贛 舉人劉日佺偕母妻弟 及見執,不屈,顧謂贛 婦 縣 知縣林逢 子 姪 人曰:「而後 人袁從鶚 同 日 春,皆 死。

嗣昌 黨。 夕安枕。 崇禎 薦其才 萬元吉,字吉人,南昌 嗣昌卒,元吉丁內艱歸。 兀 ,改大理 年大計,謫官。 右評事 人。 十一年秋,用會櫻薦,命以永州檢校署 ,軍前 天啓五 監紀。 十六年起南京職方主事,進郎中 年進士。 嗣昌倚若左右手,諸將亦悅服, 授潮州推官,補歸 推官 德。 事。 捕 馳驅兵間,未嘗 大盜李守志,散其 居 一年,督 師楊

室。 |文追尊故號、祀之寢園、以|建文配、而速褒靖難死事諸臣,及近日北都四方殉難者,以作忠 卿,監視江北軍務。一元吉身在外,不忘朝廷,數有條奏。 令保江、淮。 乃渡江詣諸將營。 傑與黃得功、劉澤淸方爭揚州, 元吉與得功書, 得功報書如元吉指,乃錄其藁示澤淸、傑,嫌漸解。 福 王立,仍故官。 四鎭不和,元吉請奉詔宣諭。又請發萬金犒高傑於揚州,諭 請修建文實錄,復其尊稱, 廷議以元吉能輯諸鎭,擢太僕少 令共獎王 以大義 幷還懿

先帝天資英武,銳意明作,而禍亂益滋。 寬嚴之用偶偏,任議之途太畸也。

從之。又言:

先帝之寬;而先帝之嚴,亦每激於諸臣之玩。臣所謂寬嚴之用偶偏者此也。 競賄賂,肆欺蒙,每趨愈下,再攖先帝之怒,誅殺方興,宗社繼歿。 來,小人用嚴之效如是。 使在朝者不暇救過,在野者無復聊生,廟堂號振作,而敵强如故,寇禍彌 土,敵入郊圻,束手無策。 先帝初懲逆璫用事,委任臣工,力行寬大。諸臣狃之,爭意見之異同,略綢繆之桑 。先帝亦悔,更從寬大,悉反前規,天下以爲太平可致。 先帝震怒,宵小乘間,中以用嚴。於是廷杖告密,加 蓋諸臣之孽,每乘於 張。 派 諸臣 十餘年 い抽練, 復

損益。 或 殿上之彼己日 步艱難,於今已極。 爭,閩外之從違遙制,一人任事,衆口議之。 乃議者求勝於理,卽不審勢之重輕,好伸其言,多不 如孫傳庭守關中,識 顧事之

列

傳

第

百六十

六

吳三 害亦 勢燎 者 事 所 俱謂 後 謂 無全 桂 而 原 ",廷臣 觀 任議之途太畸者此 兵 不 · 宜輕 「一蔵 利,當局者非樸誠通達,誰敢違衆獨行,旁持者競意氣筆鋒,必 隨 追 一或勸南幸,或勸皇儲監國南都,皆權宜善計,而 樞 出,而 輔 恨議者之誤國。 迎 已有 撃 先帝召對 以逗撓議之者矣。 也 倘事幸 時, 羣臣 不敗,必共服議者之守經。 亦曾及此, 贼旣渡河,臣語史可法 而 已有以 已有以 蹙地議之者矣。 一、姜曰 邪妄議之者矣。 大抵天下事,無全 一欲强 廣急撤關、寧 人從我 及賊 由

仍請 濫 然 後 賞縱罪者 可任 於任 乞究前 之以寬也。 事之人,嚴覈始進,寬期後效,無令行問再踵藏垢,邊才久借然灰,收之以嚴, 非寬,辨邪 事 之失,爲後事之師,以寬爲體,以嚴爲用。 正、綜名實之謂嚴,而鈎距索隱者非嚴。 蓋崇簡易、推眞誠之謂寬,而 寬嚴得濟,任議乃合。

臣

詔 褒納之。

安

,遇永茂。

永茂遂奔赣

新軍者也,遣復撫州 月,又取建昌。 明 年五 育, 惟贛州孤懸上游, 南 京覆 南赣巡撫李永茂乃命副將徐必達扼泰和,拒大兵。 了,走福建,歸唐王。六月,我大清兵已取南昌、袁州、臨江、吉安。 兵力單寡。 會益府永寧王慈炎招降峒賊張安,所號龍武 未幾,戰敗,至萬

列傳第一百六十六 萬元吉

營遍

Щ

麓

が指

爲空營。

兵民從大營中至,言敵

勢盛,輒叱爲間

諜,斬之。

江西巡撫劉

遠生令

元

素有才,涖事

,精敏。

及失吉安,士不用命,昏然

坐城

上,對將吏不交一言。

隔

河大

張琮者,將兵趨

湖東。

及贛圍急,遠生自出城,召踪於雩都。

右侍郎,以張朝綖代。甫任事,擢元吉兵部右侍郎兼右副都御史,總督江西、湖廣諸軍,召 六年進士。 月,叛將白之裔入萬安,江西巡撫曠昭被執,知縣梁于涘死之。于涘,江都人。 時唐王韶適至贛,永茂乃與楊廷麟、劉同升同舉兵。未幾,王召永茂爲兵部

朝綖還,以同升代。元吉至贛,同升已卒,遂以元吉兼巡撫。

胡 蔑視雲南、廣東軍,二軍皆解體。 極言雲南兵棄城罪,其衆遂西去。 兵逼吉安,諸軍皆內攜,新軍又在 兵,至是抵江西,兩京已相繼失,因退還吉安。廷麟留與共守,用客禮待之。 、贛間峒 一青頻立功,而元吉約束甚嚴,諸將漸不悅。時有廣東兵亦以赴援至。 給事: 順治三年三月,廷麟將朝王,元吉代守吉安。 中楊文薦奉命湖南,過贛,入城共守禦,城中賴之。 賊四營之一,驍勇善戰,旣降,有復撫州功,且招他營盡降。元吉以新軍足恃也, 湖西。 然安卒故爲賊,居贛淫掠,遣援湖西,所過 四月,大兵逼皂口,元吉不能禦,入赣城。 城中軍不戰潰,城遂破。 初,崇禎末,命中書舍人張同敞調雲南 文薦,元吉門生 元吉退屯皂口,檄諭贛州 殘破。 而新軍張安者, 大兵乘勝抵城 也 其將趙印選、 及是,大

解,未 入 往 舟 舟 湖 多多 城,與元吉同守。 拘 西者, 幾復 遠 死 於 生 合,城 妻子。 水。 聞吉安復 遠生 中守如初 俄遠生率琮兵至,贛人乃大悔。 自遠生敗,援軍皆不敢前。 失, 憤 甚,五月朔,渡 仍還雩都。 廷麟 河再戰,身先 躬往 邀之,與大兵戰梅林,再敗,乃散遣 六月望,副將吳之蕃以廣東兵五 琮軍渡河,抵梅林,中伏大敗,還至 士卒,遇大 兵,被獲, 復逃歸 千至 其軍 而 新軍 一,圍 河,爭 ·, 而 先 身 漸

散亡, 選、胡 來援。 經 謂 狼 遁 進 募砂兵三千,吏部主事襲蒸、兵部主事黎遂球募水師四千,皆屯南安,**不** 湿灵, 部 ),豈能 兵八千人踰嶺,亦不卽赴。 元吉日 卒四 E 舟中火藥戎器盡失。 得數千。 一青率師三千,大學士蘇觀生遣兵如之。 維 聞 如 . 干餘· 「水師帥羅 經 贛 《約。」不 與御史姚奇胤沿途募兵,得八千人。元吉部將汪起龍率師數千,雲南 重 人,城 久, 獎勞之, 賜名忠誠府, 加元吉兵部尚書, 文薦右僉都御史, 使尚 先後至贛,營於城外。 聽。 外僅水師後營二千餘人。 明受海盗也,桀驁難制,蒸、遂球若 及八月,大兵聞水師將至,即夜截諸江,焚巨舟八十,死者 於是兩廣、雲南軍 會聞汀州破,人情益震懼 諸將欲戰,元吉待水師至並擊。 不戰而潰,他營亦稍稍散去。 參將謝志良擁衆萬餘<br />
雩都不進,廷麟調廣西 兩 廣總督 慈母之奉驕子。 丁魁楚亦遣兵四千。 · 敢下。 而中書舍 且今水涸,巨舟難 城中僅起龍、維 廷 主 無算,明 書郭 事 入 麟 援 八來從諤 將 Ì 叉 八收集 其实 維經 趙印 受

吉禁婦, 及城 破 十月初,大兵用嚮導夜登城,鄕勇猶巷戰。黎明,兵大至,城遂破,元吉死之。 部將 女出 城。 擁 元吉出 其家 人潛載其妾縋城去, 城。 元吉歎曰:「爲我謝贛人,使闔城塗炭者我也,我何可 元吉遣飛騎追還, 捶其家人, 故城中無敢出者。 獨存」遂 先是,元

赴水

死,年四

一十有

四。

粒而卒。 楊文薦,字幼宇,京山人。 由進士爲兵科給事中。 城破時,病困不能起,執送南昌

弊,中有所舉刺。帝責令指實,乃極稱順天府尹劉宗周之賢,力詆吏部尚書王永光 三小臣爭口舌,角是非。平章之地幾成聚訟,可謂有才邪。」帝切責之。憂去。久之,起故官 用之排正人,不用之籌國事。 用人顚倒罪,帝置不問。六年秋,溫體仁代周延儒輔政,維經言:「執政不患無才,患有才 北都變聞,南都諸臣有議立潞王者,維經力主福王。 郭維經,字六修,江西龍泉人。天啓五年進士。授行人。崇禎三年遷南京御史,疏陳時 國事日非,則委曰我不知,坐視盜賊日猖,邊警日急,止與二 王立,進應天府丞, 仍無御史,巡 谿 刻 而 及

列傳

製。 慢不切要之務,盈庭而議。 横於鳳、泗,悍卒搶攘於瓜、儀,焚戮剽掠之慘,漸逼江南,而廊廟之上不聞動色相戒,惟以 視 **吏部右侍郎** 一以辦賊復仇爲事。」報聞。 中城。 明年二月,隆平侯張拱日、保國公朱國弼相繼以他事劾罷維經,維經回籍。 俄上言 ::「聖明御極將二旬,一切雪恥除兇、收拾人心之事,絲毫未舉。 乞令內外文武諸臣洗滌肺腸,盡去刻薄偏私及恩怨報復故習, 專遷大理少卿,左僉都御史。 命專督五城御史,察非常,清輦 唐王召爲 今為官縱

江西 萬元吉協守。 「廣東、浙江、福建軍務,督師 順治三年五月,大兵圍赣州。 及城破,維經入嵯峨寺自焚死,奇胤亦死之。 往援。 王乃命維經爲吏、兵二部尚書兼右副都御史,總理湖廣、 維經 與御史姚奇胤募兵八千人入赣州,與楊廷麟

爲事、政聲大起。 奇胤,字有僕,錢塘人。 入爲兵部主事,改監察御史,巡按廣東。 由進士授南海 知縣。 地富饒,多盜 未任,與維經赴援,遂同死。 贼。 奇胤絕苞苴,力以 河盗

詹兆 恒,字月如, 廣信永豐人。 父士龍,順天府尹。 兆恒舉崇禎四年進士。 由甄寧知

新 行 縣 叉 明 徴 徴 旅 舊 授南京御史,疏陳盜鑄之弊,帝下所司察核。 年 阻 逋 秋 絕 四四 斷 賊 陷 方餉 無從 廬州,臨江欲渡,陳內外合防策。 出, 金滯中途者, 請多方蠲貸。 至數 帝 百 並 萬,請急發京軍 采納。 明年, 再劾 十四年夏,言燕、齊二千里間,寇盜 剿 斗光, 請以 贼陷含山,犯無為,劾總督高 滅。 又言楚、豫之疆盡 史可法代, 斗 光逐 青燐 獲譴。 泊骨プ 一縦横, 斗光

秋,奉命祭告,尋進本寺少卿。使事竣,卽旋里。 氣 支 哉 llX 羣 福 一兇,第 王 疏奏, 立 擢|兆 一美政。 命取逆案進覽,兆恒即上進。 恒 大理 今者大仇未報,乃忽召大鍼,還之冠帶, 豈不上傷先皇靈, 下短忠義 一寺丞。 馬士英薦阮大鋮,令冠帶陛見。 而士英亦以是日進三朝要典,大鍼竟起用。其 兆恒言:「先皇手定逆案,

時

江

北

民

避亂,盡走南京。

兆恒

慮賊諜闌入,處之城外,爲嚴保伍

,察非常,奸**宄**無所

匿

保。 尋進攻衢州之開化縣,兵敗,歿於陣。 唐王立,拜兆恒兵部左侍郎,佐黃道周協守廣信。 廣信破,奔懷玉山,聚衆數千人自

劫於其子,姑出一疏,言天下不治由守令貪汚,以陰詆夢泰。 怙 勢不 胡 輸 夢泰, 賦。 字友蠡,廣信鉛山人。崇禎十年進士。除奉化知縣。邑人戴澳官順天府丞, 夢泰捕治其子,其子走京師, 愬澳, 令劾去夢泰。 及得旨,令指實。 澳念州民不當劾長 其子卽欲計 支,而

列

傳

第

百

六

+

六

詹兆

恒

夢泰,而澳念夢泰無可劾,乃以嘉興推官文德翼、平遙知縣王凝命實之。 給事中沈迅為兩

人訴枉,發澳隱情。澳下詔獄,除名。夢泰聲益起。

破,欲得廉能者治之,諸行取者悉出補。 十六年夏,東部會廷臣舉天下賢能有司十人,夢泰與焉,行取入都。帝以畿輔州縣殘 夢泰得唐縣。京師陷,南歸。

定仍等守城。圍數月,城破,夫婦俱縊死。 唐王時,授兵科給事中,奉使旋里。 順治三年,大兵逼城下,夢泰傾家募士,與巡撫周

右僉都御史,巡撫其地。 定仍,南昌人。崇禎十六年進士。 城破,死之。 與萬文英、胡奇偉、胡甲桂舉兵保廣信,唐王卽以爲

不赴。 文英,亦南昌人。 唐王授爲兵部員外郎,監黃道周諸軍,協守廣信。 初爲鳳陽推官,以子元亨代死,得脫歸。 諸軍 敗於鉛山,文英舉家赴水死。 福王時,起禮部主事,丁艱

奇偉,進賢人。歷官兵部主事。 唐王授爲湖東副使,守廣信,兵敗,死之。

以 募兵至,相與議城守。 道 甲桂,字秋卿,崑山人。 梗改廣信。 至則南昌、 已而道周敗歿、勢益孤、甲桂效死不去。城破被執、諭降不從,幽別 袁州、吉安俱失。 崇禎十二年以鄉試副榜貢入國學,授南昌通判。 廣信止疲卒千人,士民多竄徙。 遷永州同知, 會黃道 周以

室,自經死。

有畢貞士者,貴溪人,舉於鄉。 同守廣信,城破,赴水。 家人救之,行至五里橋,望拜祖

坐`觸橋柱死。

守方略,召對中左門。至軍中,奏界嶺失事狀,劾副將柏永鎭論死。 敕二臣參預,報可。泰來又自請假兵一萬,肅清輦轂。 都城戒嚴,泰來陳戰守數策。總督趙光抃言泰來與同官荆祚永素晰邊情,行間奏報,宜 歸。 陳泰來,字剛長,江西新昌人。崇禛四年進士。由宣城知縣入爲戶科給事中。十五年 福王時,起刑科左給事中,不赴。 帝壯之,卽改授兵科,出視諸軍戰 以功遷吏科右給事中,

昌,守將出降,泰來走界埠,志明等從上高移軍會之,進攻撫州,兵敗皆死 兵起,泰來與相結。十二月攻取上高、新昌、寧州,殺國士妻子,遂取萬載 使漆嘉祉、舉人戴國士持不可。 敗走武昌,其部下散掠新昌境,泰來大破之。初,益王起兵建昌,泰來欲從之。同邑按察 唐王擢爲太僕寺少卿,與萬元吉同守贛州。 已而新昌破,國士出降,泰來惡之。會上高舉人曹志明等 再擢右僉都御史,提督江西義軍。 已而大兵逼新 李自成

大計,補河南按察司照磨,累遷南康 王養正,字聖功,泗州人。 崇禎 知 元年進士。 府。 計殲 授海鹽知縣。 巨寇鄧毛溪、熊高,一方賴之。 遭父喪,服除,起官秀水,中

九日而 城望風潰。 三日,有客兵內應,城卽破。 福王時, 死。 養正乃與布政夏萬亨、知府王域、推官劉允浩、南昌推官史夏隆起兵拒守。 進副使,分巡建昌。 養正等被執,械至南昌,與萬亨等同死。 南都既覆,大兵下江西。 巡撫曠昭棄南昌遁,走瑞州 其妻張氏聞之,絕粒 列

閱

孫、 孫女先赴井死。 萬亨,字元禮,崑山人,起家舉人。南昌失守,避建昌,與養正同死。 僕婢死者復十餘 人。 妻顧、子婦陸及

主 邪 」悉歸之南京戶部。 事,権稅蕪湖。 域,字元壽,松江華亭人。 都城陷,諸権 尋由郞 舉於鄉,授宿州學正。流賊至,佐有司捍禦有功。 中遷建昌知府。 税者多以自入。 城破,械至南昌,與允浩、夏隆同 日 屢遷工部 死。

允浩,掖縣人。 夏隆,宜興人。 皆崇禎十六年進士。 時同死者六人,其一人失其姓名。

建昌人哀其忠,裒而瘞之,表曰「六君子之墓」。

爲國報仇。 初,建昌南城諸生有鄧思銘者,聞北都陷,集其儕數十人爲庠兵,期朔望習射,學技擊, 請於有司,有司笑曰:「庠可兵邪。」衆志遂懈。思銘鬱鬱不得志。明年,城破,

|伯昌皆死之。| 伯昌,字子期,唐王時,由舉人授兵部主事,改御史者也。 及大兵逼,家玉亦戰敗入關。 靖。 級,亂乃靖。 主徵租斛大,聚數千人,譟縣處。翔潛遣義兵三百,詭稱鄭彩軍,殺亂民。 唐王以邵武貢生李翔爲新城知縣。 建昌旣破,新城知縣譚夢開迎降,民潛導守關兵殺之。夢開黨與民互相殘,日司 彩兵數萬駐新城,畏大兵,遁入關。獨監軍張家玉、新城人徐伯昌與翔共守。 翔率民兵千餘出城拒擊。大兵從間道入城,民兵皆散,翔與 翔至,擒殺餘黨,衆遂散。然民習於亂,佃人 明日 復斬 一彌月不 百餘 以田

走謁 府事。 知縣,遷同 度不能守,自縊於萍鄉官舍,一僕亦同死。飛聲,字克正,長樂人。 王,而身守城死焉。 時江西郡邑更城守者,又有李時興、高飛聲。時興、福清人,舉於鄉,歷官袁州同知,攝 會城已降,時興力城守。 知,乞養去。 唐王時,黃道周出督師,邀與偕,令攝撫州事。 無何,守將蒲纓兵潰,湖廣援將黃朝宣五營亦譟歸。 崇禎中,由 大兵至,遣家人懷印 鄉舉授玉 時興 Щ

七一二八

主事。十五年秋,有詔起廢,亨應以毛士龍、李右讜、喬可聘等十人上。御史張懋爵劾其納 會亨應,字子嘉,臨川人。父棟,廣東布政使。 亨應舉崇禎七年進士。 歷官吏部文選

賄行私,亨應疏辨。

懋爵三疏力攻,遂被謫去。

掎角。 氏五節」云。 慶,乃拜辭其父,投井死。先是,棟弟拭爲蒲圻知縣,拭兄益爲貴州僉事,並死難,人稱「曾 被戮。 亨應顧筠曰:「勉之,一日千秋,毋自負」」筠曰:「諾。」先受刑死。釋亨應縛,諭之降,不答, 城守。 福王立之明年,江西列城皆不守。亨應命弟和應奉父入閩,而已與艾南英、揭重熙謀 一日,方置酒宴客,大兵至。亭應避石室,其從弟指示之,遂被執,幷執其長子筠。 和應聞兄死,曰:「烈哉!兄爲忠臣,兄子爲孝子,復何憾」旣奉父入閩,又走避之肇 會永寧王慈炎招連子峒土兵數萬復建昌,入撫州,寓書亨應。 亨應募兵數百,與相

始,亨應爲懋爵所訐,朝士頗疑之。 後亨應死節,而懋爵竟降李自成爲直指使。

揭 重 熙,字祝萬,臨川人。 崇禎 十年以五經登進士,授福 寧知 州

被執 湖 聯 絡 東 ,復用 兵事 建昌 福 王 兵 時 櫻薦,擢 瀘 糴 ,戰敗被劾 溪告警,冠 吏部 右僉都御史,代 考功主 ō 用大學士 不 事 能救, 外艱 廣胤 曾櫻薦, 重熙劾解 歸 攻撫州 撫 以考功員 州 冠任,兵事遂皆委重熙。 破, 了; 不 與同 克而 外郎兼兵科 里曾亨應先後 退。 俄聞 給 汀州 事 舉兵。 江 中, 西巡 失,解 從 撫劉 大 唐王命 學 兵 廣 土 入 Щ 以故官 傅 胤 冠 戰 敗 辨 永

明王

拜重熙兵部

尙

書兼右副都御史,總督

江西兵、召募萬餘人、薄邵武、敗還。

熙中項 熙走依 不改。 散 獨張自盛衆數萬走閩。 金 大鎬百丈際。 聲桓,左良玉將也,已降於大淸,復 執至建寧,下之獄。 適大鎬還軍鉛山,惟空營在,衆就營炊食。 重熙入其軍, 重 乘間 約廣信曹大鎬並進。 爲亂,據南昌。 至冬十一月,昂首受刃,顏色 大兵攻討之,聲桓死, 自盛掠邵武、戰敗被執。 大兵值得之,率衆至,射 諸軍 重 重

傅 鼎銓,字維新, 重熙同邑人。 崇禎十三年進士。 除翰林檢討。 李自成陷京師, 開鈴

出謁,賊敗南還。

唐王時、 列 傅 第 曾櫻薦鼎銓, 百 六 + 六 命予 曾 亨 知府銜,赴贛州軍自效, 随 揭 A 刨 尋復其故官。 赣州破, 退隱 Щ 中

0

銓往 H 灰 企壓桓 自盛 大编 叛 鼎銓 軍。 順 舉 治 兵 以 八 年,至 應。 永明王命爲兵部右侍郎兼 一廣信 張 村 爲 守將所 執 輸林院 繁南! 昌 侍讀 獄 學士。 諭之降 、不從。 聲桓 滅

鎬 相 繼 鼎 敗 銓 ,都昌督師余應桂 自 降流賊,爲 鄉 人 亦以是歲亡,江右 非笑,嘗欲求一死所。 兵逐 至是得死,鄉人更賢鼎銓。 重熙、大

書招

重熙,亦不從。

八月朔

,乃從容就

刑

陳 子壯,字集生,南海人。 萬曆四十七年以進士第三人授翰林編修。 天啓四年典浙江

,發策刺 閹 。劉 魏忠賢怒,假他事削 字壯 及其父給事 中熙昌 籍

職。 獄,坐贖徒 罪等十二事。 H 所 子壯 崇禎 急,在收 慮爲民患,立陳五不可。 初,起子壯故官,累遷禮 人心。 帝以海內多故,思廣羅賢才,下詔援祖訓,郡王子孫文武堪任用者,得考驗 久之,廷臣交薦,起故官,協理詹事府。 宜下罪己詔,激發忠義。」帝納之。 部右侍郎 會唐王上疏,歷引前 流 贼 犯皇陵, 代故事,詆子壯, 未上,京師 乃會諸臣,列 帝素服召 陷。 上蠲 對廷臣。 遂除子壯名,下之 租、清獄、使過、宥 子壯言:「今

福王立,起禮部尙書。 至蕪湖,南京亦失守,乃歸。 唐王立福建,召相子壯。 以前議

宗室事,有宿憾,辭不行。

建、江西、湖廣軍務。會大兵入廣州,聿鐏被執死,子壯止不行。 | **津**轉,子壯沮不得,退居邑之九江村。| 永明王授子壯東閣大學士兼兵部尚書,督廣東、福 順 治三年,汀州遘變,丁魁楚等擁立桂王子永明王由榔於肇慶。 蘇觀生又議立唐王弟

戰死。 |炫破高明,迎子壯,以故主事朱實蓮攝縣事。 洩,可觀等死。子壯駐五羊驛,爲大兵擊敗,走還九江村。長子上庸陣歿。 村。自五兵多蜑戶番鬼,善戰。乃與陳邦彥約共攻廣州,結故指揮使楊可觀等爲內應。 **廕子上圖錦衣衞指揮使。** 明年春,張家玉、陳邦彥及新會王興、潮陽賴其肖先後起兵,子壯亦以七月起兵九江 子壯、而炫俱執至廣州,不降,被戮。 實蓮,子壯邑子也。九月,大兵克高明,實蓮 子壯母自縊。永明王贈子壯番禺侯,諡文忠, 會故御史麥而

實蓮,字子潔。 而 |炫,字章闇,高明人。 由 舉人歷官刑部主事 由進士歷上海、安肅知縣。 唐王時,擢御史。

袁州 知府。 初,聿鐭之自立於廣州 及官太僕時,而 廣州不守。 也,召南海 霍子衡爲太僕卿。 子衡乃召妾莫氏及三子應蘭、應荃、應芷語之曰: 子衡,字覺商,舉萬曆 中 鄉試,歷

列

傅

及一女繼之,應荃、應芷偕其妻徐氏、區氏又繼之。惟三孫得存。 家」六字,懸中堂,易朝服,北向拜。 禮 『臨難毋苟免』,若輩知之乎。」三子皆應曰:「惟大人命」」子衡援筆大書「忠孝節烈之 又易緋袍,謁家廟,先赴井死。 有小姆見之,亦投井死。 妾從之,應蘭偕妻梁氏

張家玉,字元子,東莞人。崇禎十六年進士。改庶吉士。

自成曰:「當磔汝父母」乃跪。時其父母在嶺南,家玉遽自屈,人咸笑之。 自成大順皇帝。自成怒,召之入,長揖不跪。縛午門外三日,復脅之降,怵以極刑,卒不動。 景文、周鳳翔等,隆禮劉宗周、黃道周,尊養史可程、魏學濂。自稱殷人從周,願學孔子,稱 李自成陷京師,被執。上書自成,請旌已門爲「翰林院庶吉士張先生之廬」,而褒恤范

年,南都失守,脫歸。從唐王入福建,擢翰林侍講,監鄭彩軍。出杉關,謀復江西,解撫州

阮大鋮等攻家玉薦宗周、道周於賊,令收人望,集羣黨。

家玉遂被逮。

明

賊敗南歸。

走入關。令以右僉都御史巡撫廣信。 順治三年,風聞大兵至,彩卽奔入關,家玉走新城。 廣信已失,請募兵惠、潮,說降山賊數萬,將赴赣州 大兵來攻,出戰,中矢,墮馬折臂,

會大兵克汀州,乃歸東莞。

豹 士。 玉 奉 走 家玉 西鄉。 覺斯怨 甫 四 三日,大兵至,家玉敗走。 年 ·, 家 取新安,襲東莞,戰赤岡。 家玉甚,發其先壟,毁及家廟,盡滅家玉族,村市爲墟。 祖 玉 母陳、母黎、妹石寶俱赴水死,妻彭被執,不屈 一與舉 人韓如璜結鄉兵攻東莞城,知縣鄭霖降,乃籍前尚書李覺斯等貲以犒 奉表永明王,進兵部 未幾,大兵大至,攻數日,家玉敗走鐵岡,文豹等皆死 尚書。 死,鄉 無何,大兵來擊,如璜戰死,家 家玉過故里,號哭而去。 À 殲 焉。 西鄉大豪陳文

門,復募兵萬餘人。 道 得 衆數千,取龍門、博羅、連平、長寧,遂攻惠州,克歸善,還屯博羅。 家玉好擊劍,任俠,多與草澤豪士游,故所至歸附。乃分其衆爲龍、虎、 大兵來攻,家玉走龍

犀、象四營,攻據增城

明王贈家玉少保、武英殿大學士、吏部尚書、增城侯、諡文烈。其父兆龍猶在,以子爵封之。 鳥 竭 《用徘徊不決,以頸血濺敵人手哉!」因偏拜諸將,自投野塘中以死,年三十有三。 而敗,被圍數重。諸將請潰圍出,家玉歎曰:「矢盡礮裂,欲戰無具;將傷卒斃,欲戰無人。 十月,大兵步騎萬餘來擊。 家玉三分其兵,掎角相救,倚深谿高崖自固。大戰十日,力 明年,永

陳象明,字麗南,家玉同邑人。 列 傳 第 百 六 + 六 張 家 玉 崇禎元年進士。 授戶部主事,権稅淮安,以淸操聞。 屢

騰 遷 饒 蛟 令徵 州 知 餉 府 廣 件 巡 西 按 會永 御史, 明 王 被劾。 立,廣 東 謪 地 兩浙鹽運 盡 失。 象明 副使,這 徵調土兵, 累遷湖南 與陳 道 邦傳 副 使。 連 營, 唐王 東至 時,總 梧 督 州 榕 何

樹潭,遇大兵,戰敗,死之。

萬 日「此志士 爵 了字天若,唐王時舉人。 廣 東 之失 盡 節之秋 也,龍門破, 也」, 赴水 里人廖翰標以二幼子託從父,從容自縊死。 死。 翰標,天啓中舉人,官江西新城知 縣, 番禺破,里人梁萬爵 廉 惠, 民 爲 建祠

唐 事 王 聿 陳邦 廣西狼兵,援贛 鍵 讀 彦,字令斌,順德人。 加 偉之。 州。 旣自 至嶺 立, 卽其家授監紀推官。 ,聞汀州變,勸 爲諸生,意氣豪邁。 觀生東保潮、惠、不聽。 福王時,詣闕上政要三十二事,格不用, 未任 舉於鄉。 以蘇觀 生薦,改職

州 زن، /护 命南雄勍卒取韶,制粤東十郡之七,而委其三於唐王,代我受敵,從而乘其敝。王大悅, 中。 邦彦 T 甫 王 魁楚等已立永明 一太后 入謁 垂簾 而 觀生別立 坐,王西向 王監 唐王聿鐏於 國 坐,魁楚侍,語 於肇慶,觀生遣邦彦入賀。 廣州,邦彦不知也。 以廣州 事。 邦彦請急還肇慶,正 王因 夜二鼓, 王遣中使 破, 懼逼 大 己,西走梧 位 十 以 餘 輩召

列傳第一百六十六 陳邦彦

曉 立 利 擢 兵科給事中, 齎敕還諭 害 觀生 猶 豫 累 日 欲 議 觀 和 生。 ,會聞永明王 抵廣州,聞使臣彭耀被殺,乃遣從 兵 大敗,不果。 邦彦 遂 變姓 人授觀生敕,而 名 入 高 明 Щ 自以書 中

敗走治 取 西 卒多 遣 家 自 間 玉 順 桂 圖 族 於 德 林 附 廣 人 順 新安。 州 憪, 治 還救,揚言取甘竹灘,龍等顧其家,輒退, 萬年募兵於廣,得余龍等千餘人,未行 ,至二萬餘人。 間 而 三年冬十二月,大兵破廣州 無何,大兵至,龍戰敗,應芳被執,赴水死。 殺魁楚,前驅 可完葺, 己發高 邦彥乃棄高明、收餘衆,徇下江門據之。 明兵由 是我致力於此而收功於彼也。」 總督朱治間 抵平樂。 海道入珠江 永明王 招降之,旣 親生 與龍會。 一方自 死, 而 而 悟道平樂,走桂林,勢危甚。 列城悉下 課歸。 邦彦亦却 且遺張家 失。 四月,龍再戰黃連江,亦敗歿。 家玉以爲然。 四 , 年春,大兵定廣州 龍等無所歸,聚甘 歸。旣,乃遣門人馬應芳會 玉書曰:「桂林累卵,但得牽 邦彦乃謀起兵。 然龍卒故無紀律, 竹攤為盜 ,克肇慶、梧州, 初,赣州 邦彦乃說龍 大兵攻 萬元吉 一,他潰 龍 大兵 制 軍 乘

壯 判 先 書尾曰:「妾辱之,子殺之。 如 至 初 廣州 其計、果焚舟數十。 ,謀洩,將引退。 之圍,大兵知謀出邦彥,求其家,獲妾何氏及二子,厚遇之,爲書招邦彥。 邦彥軍亦至,謀伏兵禺珠洲側,伺大兵還救會城,而縱火以焚舟。 大兵引而西,邦彦尾之。 身爲忠臣,義不顧妻子。」七月與陳子壯密約,復攻廣州。 會日暮,子壯不能辨旗幟,疑皆敵舟 邦彦

迎邦彦。

乃入清遠,與諸生朱學熙嬰城固守。

也 陣動。 大兵順風追擊,逐大潰。 子壯奔高明,邦彥奔三水。八月,清遠指揮白常燦以城

踰月,家玉亦自沉。 走朱氏園,見學熙縊,拜哭之。 至是精銳盡喪,外無援軍。 邦彥自起兵,日一食,夜則坐而假寐,與其下同勞苦,故軍最强,嘗分兵救諸營之敗者。 永明王贈邦彦兵部尚書、諡忠愍、廕子錦衣指揮。 越數日,城破,常燦死。 旋被執,饋之食,不食,繫獄五日,被戮。 邦彦率數十人巷戰,肩受三刃,不死, 邦彦死,子壯被執

建。 催餉 完薦其才,進永平同 十二科,招四方士,令觀生領之。 廷臣右,乃超拜東閣 蘇州 與鄭芝龍、鴻逵兄弟擁立王,擢爲翰林學士,旋進禮部右侍郎兼學士。 蘇 觀生,字字霖,東莞人。 明年五月,南京破,走杭州。 大學士,參機務。 知,監紀軍 事,尋遷戶部員外郞。 年三十始爲諸生。 觀生矢淸操,稍有文學,而時望不屬。 會唐王聿鍵至,觀生謁王。 崇禎中,由保舉授無極知縣。 十七年,京師陷, 王與語大悅,聯舟入福 脫還南京, 王以故人,恩眷出 設儲賢館, 總督范志 進郎 中,

觀生數贊王出師。 見鄭氏不足有爲,事權悉爲所握,請王赴贛州,經略江西、湖廣。 王

乃議觀生先行。明年,觀生赴贛州,大徵甲兵。 餉不繼,竟不能出師。

皆引去。 月,大兵退屯水西,觀生發三千人助職守。久之,他將戰敗。九月,大兵再攻贛州,三千人 灘,過大兵,潰走。元吉乃退回赣州,大兵遂圍城。觀生走南康, 贛人數告急,不敢援。六 主事陳邦彥勸觀生疾趨惠、潮,扼漳、泉,兩粤可自保。觀生不從。 時順治三年三月,大兵破吉安,總督萬元吉乞援,觀生遣二百人往。元吉令協守綿津 時觀生移駐南安,閩中急,不能救。 聿鍵死於汀州,[B] 贛州亦破,觀生退入廣州。

東閣 除官數千,冠服皆假之優伶云。 卽 與吾騶及布政使顧元鏡,侍郎王應華、曾道唯等以十一月二日擁立王,就都司署爲行宮。 適唐王弟聿鐭與大學士何吾騶自閩至,南海關捷先、番禺梁朝鍾首倡兄終弟及議。觀生遂 日 封觀生建明伯,掌兵部事,進吾騶等秩,擢捷先吏部尚書,旋與元鏡、應華、道唯並拜 大學士,分掌諸部。時倉卒舉事,治宮室、服御、鹵簿,通國奔走,夜中如晝。不旬日, 會丁魁楚等議立永明王,觀生欲與共事。魁楚素輕觀生,拒不與議,呂大器亦叱辱之。

子於 觀生怒,執殺之,嘉謨亦不屈死。 次友人。 永 明王監國肇慶,遺給事中彭燿、主事陳嘉謨齎敕往諭。 至廣州,以諸王禮見,備陳天潢倫序及監國先後,語甚切至,因歷詆 乃治兵日相攻,以番禺人陳際泰督師,與永明王總督林佳 燿,順德人,過家拜先廟,託 觀生諸人。

黑戰於三水。兵敗,復招海盜數萬人,遣大將林察將。

捷先,由進士歷官監司,小有才,便筆札。 十二月二日,戰海口 ,斬佳鼎。 觀生意得,務粉飾爲太平事,而委任捷先及朝鍾。 朝鍾舉於鄉,善談論,浹旬三遷至祭酒。 有

楊明競者,潮州人。好爲大言,詭稱精兵滿惠、潮間,可十萬,即特 人:「內有捷先,外有明競,强敵不足平矣。」觀生亦器此三人,事必咨之。 授 惠 又有梁鍙者,妄人 潮巡撫。 朝鍾語

也,觀生才之,用爲夷科都給事中,與明競大納賄賂,日薦用數十人。

門以示威,城內外大擾。時大兵已下惠、潮,長東皆降附,卽用其印移牒廣州,報無警。觀 觀生本乏猷略,兼總內外任,益昏瞀。招海盜資捍禦,其衆白日殺人,縣肺腸於貴官之

生信之。

急易服踰垣匿王應華家。俄縋城走,爲追騎所獲。 出,倉卒不能集。 遽至此。 死,遂自經。 觀生慮其詐,稍留聽之。墜故扼其吭,氣湧有聲,且推几仆地,久之寂然。 是月十五日,聿鹤視學,百僚咸集,或報大兵已逼。觀生叱之曰:「潮州昨尙有報,安得 妄言惑衆,斬之! 如是者三。 大兵已自東門入,觀生始召兵搏戰。 兵精者皆西 明日,鍙獻其屍出降。 觀生走鍙所問計。曰:「死爾,復何言」」觀生入東房,灐入西房,各拒戶自 朝鍾聞變赴池,爲鄰人救出,自經死。聿鏄 饋之食,不受,曰:「我若飲汝一勺水,何 方事閱射, 觀生信為

激於義而衆心固也。 贊曰:自南都失守,列郡風靡。而贛以彈丸,獨憑孤城,誓死拒命。 迨汀、贛繼失,危近目睫,而肇慶、廣州日治兵相攻,自取兩敗。 蓋天 **豈其兵力果足恃哉,** 

#### 校勘記

速其禍,如發蒙振槁,無煩驅除矣。

夢開黨與民互相殘 黨 原作「等」。 按夢開已被殺,不能與民相殘。 據明史稿傳一五四、小腆

紀傳卷四三王養正傳改。

子壯亦以七月起兵九江村 七月、原作「八月」、據本卷陳邦彥傳、小腆紀年附考卷一四改。

= 謪 兩浙鹽運副使 兩浙,原作「兩淮」,據明史稿傳一五五、小腆紀傳卷五〇陳象明傳改。

四 **聿键死於汀州** 本書卷一一八建鍵傳作被執於汀州、死於福州。

列

傳

第

百六十

六

校

勘

記

# 明史卷二百七十九

### 列傳第一百六十七

呂大器 文安之 樊 蘅 范文光 詹天顏 吳炳 侯偉時

王錫袞 堵 胤 錫 嚴起恒 張孝起

## 楊畏知 吳貞毓 高動等

歸。 道參議,遷固原副使。 以邑城庳惡,倡議修築。 呂大器,字儼若,遂寧人。 巡撫丁啓睿檄大器討長武賊,用穴地火攻法滅之。 工甫竣,賊至,佐有司拒守,城獲全。 崇禎元年進士。 授行人,擢吏部稽勳主事, 韶增秩 更歷 等。 四 出爲 司, 關南 乞假

之。 時華乞兵 十四年擢右僉都御史, 洒部! 及 土魯番 爲變, 巡撫甘肅。 大器令世寵討敗時華及西部, 劾總兵官柴時華不法,解其職,立遣副將王 時華自焚死。 塞 外爾迭 一世龍代

列

傳第

百六

+

七

呂

大

器

叉 尼 遣 黄台吉等擁 總 兵官 馬 爌 衆乞賞 督 副 將 世寵 謀 犯 等討 肅州 羣 番 守臣 爲 亂 拒走之。 者 小斬 首七 大器假賞犒名, 百 餘級, 撫三十 毒 飲 八族 馬 泉, 而 還。 殺 其衆無算。 又擊 敗 其

餘

黨。

西

陲

略定。

戰 務。 亦 任 不至, 螺 力辭 時畿 山 五 應 命所司 , 輔未解嚴,大器及諸將和 年六月擢 且 薦 投 陣亡,他將亦多敗。 揭 ?察奏。 吏科, 兵部 言己 添註 明 年三月始至, 好酒色財, 右侍郎。 大器所部 應薦 大器 張 必 命以本官兼 不 無失 汝行 **資才**, 可 用 事 馳 r,增俸 o 性 扼 帝 右僉都御史, 剛 順義 躁, 趣 令入京, 牛 等。 善避事 欄 Щ ō 詭 0 總督保定、 總督 稱疾 見天下多故 趙光抃集諸 不 至。 Щ 東、 嚴旨切責, 懼當 鎭 河 師大 北 軍旅 軍

器 軍 昌 北 連 品品 暴 地 厢 已失, 破 楊 五 之樟樹鎮,峽江、永新 月, 前 廷議 與 武昌 以保定息警,罷總督官 、慰勞, 因改大器南京兵部右侍郎 亦陷,左良玉駐 疑稍 釋。 而 張獻忠大 郡皆復。 九江,稱疾不進。 ,特設江西、湖廣、應天、安慶總督,駐九江 躪湖南, ,以袁繼咸代 已而建昌、撫州陷, 分兵陷袁州、吉安。 以侯 恂 故疑大器圖 良玉、大器不和 己,語具 大器急遣部將及 ,大器任之。 9 (良玉 兵 私 (導 鬭 中。 焚南 良玉 湖

而 士英及劉澤清諸將擁福王至 十 七 年四 月,京師報陷,南京 大臣 福王立,遷大器吏部左侍郎。 議立君 大器主錢謙益、雷縯 大器以異議絀, 祚言,立 潞王。 自危, 議未 定 アケ

爲都督,女弟夫未履行陣,授總戎,婣婭越其杰、田仰、楊文驄先朝罪人,盡登膴仕,亂名器。 上疏劾士英。 ,夫吴甡、鄭三俊,臣不謂無一事失,而端方諒直,終爲海内正人之歸;士英、大鍼,臣不謂無 言其擁兵入朝,靦留政地,翻先皇手定逆案,欲躋阮大鍼中樞。 其子以銅臭

技長,而奸回邪慝,終爲宗社無窮之禍」。疏入,以和衷體國答之。

無他。 獨縯祚論死 無可蹤跡而 未幾, 士英憾未已,令太常少卿<u>李</u>沾劾之。 澤清人朝,劾大器、縯祚懷異圖。大器遂乞休去,以手書監國告廟文送内閣,明 止。 大器既去, 沾得超擢左都御史。 遂削大器籍,復命法司逮治之。以蜀 謙益亦以附士英、大鹹,得爲禮部尚書。 地盡失,

詣 從事。 海 擁永明王監國,令以原官兼掌兵部事。 久之,進少傅,盡督西南諸軍,代王應熊,賜劍,便宜 雲鳳討殺容藩。 、譚文以下,皆受大器約束。 明年,唐王召爲兵部尚書兼康閣大學士。道梗,久之至。汀州失,奔廣東,與丁魁楚等 至涪州,與將軍李占春深相結。 大器至思南得疾,次都匀而卒,王諡爲文肅。 宗室朱容藩自稱天下兵馬副元帥,據變州。 他將楊展、于大海、胡雲鳳、袁韜、武大定、譚弘 大器檄占春、大

文安之, 夷陵人。 天啓二年進士。改庶吉士, 授檢討, 除南京司業。 崇禎中,就遷祭

酒,爲薛國觀所搆,削籍歸。人之,言官交薦,未及召而京師陷。

福王時,起爲詹事。唐王復召拜禮部尙書。安之方轉側兵戈間,皆不赴。永明王以瞿

勢愈危,慨然思起扶之,乃就職。時嚴起恒爲首輔,王化澄、朱天麟次之,起恒讓安之而自 處其下。 順治七年六月,安之謁王悟州。安之敦雅操,素淡宦情,遭國變,絕意用世。至是見國

於都勻,邀止安之,追奪光興等敕印。 詣、譚文、党守素等公侯爵,即令安之齎敕印行。可望聞而惡之,又素衡前阻封議,遣兵伺 貴州,將謁王於安龍。 王光興、郝永忠、劉體仁、袁宗第、李來亨、王友進、塔天寶、馬雲翔、郝珍、李復榮、譚弘、譚 王從之,加安之太子太保兼吏、兵二部尚書,總督川、湖諸處軍務,賜劍,便宜從事。 <u>可望據,不可往。安之念川中諸鎭兵尙强,欲結之,共獎王室,乃自請督師,加諸鎭封爵。</u> 孫可望再遣使乞封秦王,安之持不予。其後桂林破,王奔南寧。大兵日迫,雲南又爲 可望坐以罪,戍之畢節衞。 留數月,乃令入湖廣。安之遠客他鄉,無所歸,復赴 進諸將

先是,可望欲設六部、翰林等官,慮人議其僭,乃以范鑛、馬兆義、任僎、萬年策爲吏、

待王入黔議之。 戶、禮、兵尙書,並加行營之號。 王久駐安龍,可望遂自設內閣六部等官,以安之為東閣大學士。 後又以程源代年策。 而僎最 寵,與方于宣屢勸進, 安之不爲 可望令

用,久之走川東,依劉體仁以居。

必正又死,其衆食盡,且畏大兵逼,率衆走川東,分據川、湖間,耕田 李赤心、高必正等久竄廣西賓、橫、南寧間。 赤心死,養子來亨代領其衆,推必正爲主。 自給。川中舊將王光興

譚弘等附之,衆猶數十萬

弘、譚詣殺譚文,諸將不服。 已入緬甸,地盡失,安之不久鬱鬱而卒。 順治十六年正月,王奔永昌。 安之欲討弘、詣,弘、詣懼,率所部降於大兵,諸鎭遂散。 安之率體仁、宗第、來亨等十六營由水道襲重慶。 會譚 時王

樊一蘅,字君帶,宜賓人。 父垣,常德知府。 蘅舉萬曆四十七年進士,知安義、襄陽。

累官吏部郎中,請告歸。

列傳

第

百

六十七

文 安

之

樊

蘅

殘,修戎備,計 崇禎 三年秋,遷楡林兵備參議。 斬 申 在庭、馬丙貴,平不沾泥。 流賊多楡林人,又久荒,饑民益相挺爲盜。 累被薦,遷監軍 副使,再遷右參政,分巡關南 蘅 撫創

星。 總兵曹文 賊 逼 漢 詔 中 敗 ٠, 歿 瑞 羣 王 戝 告急 迫 西 安。 蘅偕 總督洪承 副將 羅尚 ·疇令一蘅監 文 往 救 會 左 承 光先、張 疇大軍至, 派應昌 軍 賊 乃走。 連 破 賊,擊走混 進按察使,

偕副將馬科、賀人龍屢挫祁總管於漢中,降之。

+ 二年 擢 右愈都 御史,代鄭 崇儉巡 撫寧夏 ,被劾罷歸。 十六年冬,用薦起兵部 右侍郎,

總督川、陝軍務,道阻,命不達。

展等 參將 熊 天 避 顏 擊斬 繼 楊 其 順 展 治 至 地 斬 賊 元 游 將 年, 旣 馘 擊馬 拜命 王 福王立 數千級。 運行 應試 ,檄諸 沒 於南京, 龍安、茂州 郡舊 僞 余朝宗所攜 都督 將 張 復 會 申 師 化 龍走, 前 潰 大 舉。 卒, 命。 蘅 遂復 乃起舊 得三萬 會巡撫馬乾 時張獻忠已據全蜀, 其城。 | |將甘 人。 良臣 明年 復 蘅 重慶, 爲 乃犒 三月 總統, 師江上。 松 惟 攻 後州 潘 遵義未陷, 副 副將朱 以 侯天錫、 應試 化 、朝宗先登, 龍、 蘅 屠龍, 與王 同 知 詹 應 合

將曾 威 名大振 英 初 乾 與 一參政 諸 復 別將皆屬 重慶,賊將 劉麟長自遵義 ,兵二十餘萬,奉 劉 廷 至,日 舉 走,求救於 與部 將于大 蘅 、獻忠。 節 制 海、 獻 忠命 李占春、張 養子劉文秀攻重慶,水陸並 天相等夾擊,破賊兵數萬。英 進。 副

蘅 退屯 楊 展 古藺 旣 復 州 敍 州 展退屯江 が、財 將馮雙禮來寇,每戰 津。 賊退截朱化龍及僉事蔡肱明於羊子嶺,化龍率番騎數百衝 輒敗,孫可望以大衆援之。 隔江 持 月,糧盡,

列傳第一百六十七 樊一蘅

賊 兵,贼驚潰,死者滿山谷。 化龍以軍孤,還守舊地。 他將復 連敗賊於摩泥、滴水

明佐 瀘州,檄諸路刻期並進。 松、茂則監軍僉事詹天顏,夔、萬則譚弘、譚詣。 成都走川 取瀘州、占春、大海守忠、涪。 蘅乃命展、應試取嘉定、邛、眉,故總兵官賈連登及其 北。 獻忠頗懼,盡屠境內民,沈金銀江中,大焚宮室,火連月不滅,將棄 其他據城邑奉征調者,洪、雅則曹勛及監軍副使范文光, 一蘅乃移駐納溪,居中調度,與督師應熊會 中軍楊維棟取資 、簡,天錫、高

望、劉文秀、王尚禮、狄三品、王復臣等攻川南郡縣。 存志、莫宗文、張登貴連營犍爲、敍州以禦之。 慶,皆宿重兵。 可望等還。 明年春,展盡取上川南地,屯嘉定,與勛等相聲援。而應熊及王祥在遵義,乾、英在 又聞大清兵入蜀境,劉進忠降,大懼 賊勢日蹙,惟保寧、順慶爲賊將劉進忠所守,進忠又數敗。 財連戰不利, 英、祥乘問趨成都, 獻忠立召 應熊、一蘅急令展、天錫、龍、應試 獻忠怒,遣 及顧 孫 口

敗 應熊避之畢節衞 死者二三十萬。 七月,棄成都走順慶,尋入西充之鳳凰山。 踰月,賊陷遵義,入貴州。 可望等率殘卒南奔,驟至重慶。 大清兵追至重慶,巡撫乾敗死,遂入遵義。 至十二月,大清兵奄至,射殺 英出不意,戰敗,死於江 獻忠,賊降及 賊遂陷綦江, 以

餉乏,旋師。

字城 民。 宗室朱容藩、故偏沅巡撫李乾德並以總制至,楊喬然、江 黃諸家據夔州 於 永 而已。 明王 諸將袁韜據重慶,于大海據雲陽,李占春據涪州,譚詣據 ,侯天錫據永寧,馬應試據蘆衞,王祥據遵義,楊展據嘉定,朱化龍、曹勛仍據故地。搖、 王祥 等復 夾江兩岸,而李自成餘孽李赤心等十三家亦在建始縣。 取保、寧二郡。 一蘅再駐江上,爲收復全蜀計,乃列上善後 .爾文以巡撫至,各自署置,官多於 巫山,譚文據萬縣,譚弘據天 育差。 一蘅令不行,保敍州 事宜及諸將功狀 時應熊已卒,而

富,說解、大定殺展,分其貲。一蘅誚乾德,諸鎭亦皆憤,有離 敗,走死雲陽。 天顏巡撫川南、北,呂大器以大學士來督師,皆惡容藩,謀誅之。六年春,容藩遂爲占春所 順治五年,容藩自稱楚世子,建行臺夔州,稱制封拜。時喬然已進總督,而范文光、詹 初,展與祥有隙,遣子璟新攻之。璟新先襲殺應試,與祥戰敗歸。 心 乾德利展

劉鎭國守雅州。 東, 秋, 譚弘、譚詣、譚文盡降。 可望又使劉文秀大敗武大定兵,長驅至嘉定。大定、韜皆降,乾德投水死。文秀兵復 秋九月、孫可望遣白文選攻殺祥、降其衆二十餘萬、盡得遵義、重慶。 三月,大清兵南征,文選、鎭國挾曹勛走,文光、天顏、化龍相繼死。 占春、大海降於大清。 明年正月,文秀還雲南,留文選守嘉定, 一蘅益孤。七年

時 已謝事,避山中。 至九月,亦遘疾死。 文武將吏盡亡。

范文光,內江人。 天啓初,舉於鄉。 崇順中,歷官工部主事,南京戶部員外郎,告歸

州,敗績。 月,文光督參將黎神武攻雅州,不克。 使爲監軍,道貞等授官有差。 其仁等舉義兵,奉鎭 十七年,張獻 偽監司郝孟旋守縣州,文光、翔鳳遣問使招之,孟旋襲殺守雅州賊,以城來歸,文 忠亂蜀, 國將軍朱平檙爲蜀王,推黎州參將曹勛爲副總兵,統諸將,而 文光偕邛州舉人劉道貞,蘆山舉人程翔鳳,雅州諸生傅元修 勛敗賊 雅州龍鸛山,追至城下,反爲所敗,退守小關 明年九月,神武合雅州土、漢兵再擊賊將艾能奇於雅 文光 Щ 以副 十 洪洪

IJП 死。 制。 天顏兵敗被執,亦死之。天顏,龍巖人,起家選貢生。 獻忠死,文光保境如故。 總督李乾德殺楊展,文光惡之,遂入山不視事。 永明王命爲右僉都御史,巡撫川南,而以安縣道詹天顏巡撫 大清兵克嘉定,文光赋詩一 章,仰藥

光等入居之。

吳炳, 列 傳 宜興 第 人。 百 六 萬 + 曆 七 末進士。 吳 炳 授蒲圻知縣。 崇禎中, 歷官江西提學副使。 江西地盡

城已爲大兵所據,遂被執,送衡州。 從至武岡。 失,流寓廣東。 大兵至,王倉猝奔靖州,令炳扈王太子走城步,吏部主事侯偉時從之。 永明王擢爲兵部右侍郎,從至桂林,令以本官兼東閣大學士,仍掌部事。 炳不食,自盡於湘山寺,偉時亦死之。 旣至, 叉

偉時,公安人。 崇禎中進士,歷官吏部考功主事,罷官。 至是補官數月,卽遘難。

王錫袞,祿豐人。 天啓二年進士。改庶吉士,授檢討。 <u></u> 崇禎中,累官少詹事。十三年

擢禮部右侍郎。

樂生。 周永戍。 永樂十八年,國朝典彙可據。禮官覆議不及,請解臣職,停廠不設。」錫袞等言:「典彙雖載 不允。二月,帝再耕耤田。錫袞因言頻歲旱蝗,三餉疊派,請量除加徵,嚴核蠹餉,俾農夫 先朝典制以聞。 此條,但係下文箋註。 明年秋,尚書林欲楫出視孝陵,錫袞以左侍郎掌部事。帝禁內臣干預外政,敕禮官稽 又以時方急才,請召還故侍郎陳子壯、顧錫疇,故祭酒倪元璐、文安之,且乞免黃道 給事中沈胤培請增天下解額,錫袞因言南畿、浙江人文更盛,宜倍增。又言舉人 錫袞等備列諸監局職掌,而不及東廠。提督內臣王德化言:「東廠之設,始 臣等以正史無文,故不敢妄引。」帝不聽。錫袞復抗疏,請罷廠,亦

不第,有三十年不謁選者,宜定制,數科不售,卽 令服官。 從之。

孝純 欲楫還朝, 太后,遂欲終身蔬食。 錫袞調吏部尙書。 錫袞疏諫,帝嘉其寓愛於規,進秩 李日宣 下 獄, 逐掌部 事。 帝性純孝,嘗以秋 等。 尋解部務,直講筵。 夜感念聖 母

六年憂歸

衰大恨, 愬上帝祈死。 執至會城,詭草錫袞疏上永明王,言定洲忠勇,請代黔國公鎭雲南。 唐王立,拜禮部尚書兼東閣大學士。 居數日,竟卒。 永明王立,申前命。 皆不至。 疏旣行,以稿示之。 

亂

錫

數敗,胤錫督鄉兵破滅之,又殺醴陵賊魁,遂以知兵名。 **堵胤錫,字仲緘,無錫人。** 崇禎十年進士。 歷官長沙知府。 山賊掠安化、寧鄉,官軍

昌、黄州、漢陽。 十六年八月,賊陷長沙。 左良玉稱兵,總督何騰蛟奔長沙,令攝湖北巡撫事,駐常德。 胤錫朝觀還,賊已退。 明年六月,福王命爲湖廣參政,分守武 唐王立,拜右

李自成死,衆擁其兄子錦爲主,奉自成妻高氏及高氏弟一功,驟至澧州。 列 俳 第 百 六 + 七 Ŧ. 釼 袞 妳 船 鈮 **擁衆三十萬** 

副都御史,實授巡撫。

以 封 軍, 喜, 服 日 言乞降 高 自 並 錦 高 加 强 氏 氏 掛 胤 貞 龍 出 遠 錫 義 功 然 拜 虎 兵 近 赤 夫人,賜 蟒 將 謂 部 大 心 玉 軍 右侍 書疏 金 錦 即 日 銀 珠 鄎 胤 器 獪 封 冠 兼 錫 稱 堵 , 列 綵 犒 右 議 自 公,天 侯。 幣, 愈都 撫 其 成 軍 之, 先 命 賜 人 御 , 帝 有 錦 皆 也, 騰 史, 稱. 司 名赤心 踴 蛟 建坊, 汝 躍 總制 高氏 亦 不 拜 馳 謝 口 太后 題 其 檄 )目「淑 負 軍 至。 功 乃 \_! 云 名 手 刨 别 乃 贊 必 書 軍 部 躬 中 正 獎 中 田 入 興。 , 勞。 宴之, 其 見 他 秀 營, 部 授錦 胤 賞 劉 導 開 錫 資 汝 以 御 誠 遂 有 魁 忠 營前 慰 與 差, 等 孝 赤 諭 大 亦 部 心 號 稱 來 義 等深 左 其 歸 數 詔 軍 營 千 賜 相 日 一功右 唐 言 高 結,倚 忠貞。 E 氏 大 明 命

處 立 江 北 已 進 就 而 胤 袁宗 食。 錫 兵部 明 第 年正 劉體 尙 書, 月,騰 仁 總 諸營先歸騰 制 蛟 如 大 故。 舉 ٠, 期諸 蛟 者,亦 軍 盡 會 引 與 岳 赤 州 心 合,衆 獨 赤心先至, 益 盛。 胤錫 餘 逗 遛 以 芻 卒 糧難 亦 進。 繼,令 永 散 明

秦 不 日 中 能 不 舉 禦 得 順 兵 食。 治 乃 匹 加 年 乃散 時 胤 頗 錫 永 入施 明王 東 議 閣 其 州 大學 專。 令赤心等攻 衞 ,聲言就 承胤 士,封光化伯,賜 欲殺 荆 食湖南 腦 州 蛟,胤 月餘 時 劍 錫 王 ,大清兵援荆 • 劾其罪 便 在 宜 武 從 岡 事 劉 州 承 胤 胤 錫 赤心等大敗,步 懼爲 疏 請 赤心 得 給 所 空敕 幷, 鑄 走 計 入 即 非 蜀 颁 胤 賜 錫 數

八 月,大 兵破 武岡 及寶慶、常德、辰、沅,胤錫走永順 土司。 尋赴<u>貴</u>陽,抵遵義,乞師於

皮熊王 祥 叉 入施州, 請忠貞 營 軍 o 會楚宗 人朱容藩 偽 稱 監 國 天下 兵 馬 副 元 帥 , 擅 居

州 御 史錢 邦芭 傳檄 討 之。 五. 年 正 月 胤 錫 見容藩 一責以 大義 ,曉譬利 害,散 共 黨

進 心 而 建 忠 去。 等入湘 李赤心 、赤心、必正 未 赤心 幾 潭,與騰 金聲桓 等棄空城 高 必正 皆 蛟 封 等 會 李成 引 公。 乘 而 間 騰 棟 東,所 胤 取 蛟 叛 錫 常 令 我 與 德、 大清, 胤 至守將皆燒營棄城走, 進忠有 錫 桃 向 源 以 江 隙, 江 澧州 西 西、 而 令赤心、必正 自率 臨 廣 東附 武 進忠等 藍 湖南 永明 Щ 爭 道州 已復 王 向 進忠 0 長 沙 、靖州 州 於是馬 所取 縣 爲 常 荆門、 進忠 德 空。 進 宜城 王進 忠 胤 盡 錫 諸 才、 焚 乃 州 曹 率 廬 赤 舍

年正 月, 兵 方 逼 長 沙 騰 蛟 在 湘 潭被 執, 諸 軍 逐散 赤心 等 走 廣西, 緣道 掠 衡 永、

郴 桂 胤錫 與 胡 靑 守衡州 戰 敗 走 桂 陽

門俱 忠 建索 胤 貞 錫 之急 將 盡 初 召忠貞營圖 赤 至梧 ۱Ļ) 瑤潛送 等 而 入 赤 廣 胤錫 心 志 西 等已走賓 建 於 龍 監軍 志建 虎 關 僉事 横 夜 守 發 將 何圖 兵 曹 州 圍 志 復 乃 胤 建 載 錫 惡 間 胤 其淫 關 錫 殺 達 掠, 謁 從 悟州 王 卒千 並 於 惡 肇慶。 餘 會 胤錫, o 王 胤 遣大臣嚴起恒 錫 志 胤 建 及子逃入富 錫 遷怒圖 不 知 也。 復 劉 ]]] 誘 或 湘 瑶 殺 說 客安輯 峒 之,闔 志 建, 志

胤 列 傳 至 第 百 時馬 六 + 吉翔 七 及李元胤 塎 胤 錫 袁彭年等皆專柄,各樹黨。 胤 錫 乃結歡於吉鄉

心 足 不 侍 悅。 等 東 欲遙結 潯 來 元 胤 與 黨 元 孫 諡 1 可 胤 時 文忠 望爲 爲 魁 難 强 金 0 援 堡 移 , 矯 書瞿式耜,欲 叉 論 王 其 一命封 喪 師 爲 失 平 間 地, 遼 元 胤, 功 今總統 託言 胤 錫 尋至 王有密 兵馬 潯 , 敕, 州 移 駐 自 令已與 梧州 恨 後務病 式 胤 耜 錫 圖 以 元 月卒。 赤心 胤 王 等不 頗 王

澗 法 湖 嚴 南 起 怕 吏 一,浙 民 江 悉 Щ 逋 陰人。 氲 0 起 崇禎 恒 獨 四年 堅守永 進 士。 州 歷廣: 贼 亦 州 不 至。 知府,遷衡永兵備副使。 唐 王 時 擢 戶 部 右 侍 十六 郎 總 年, 張 湖 獻

忠

贈

胤

錫

國

公

錢

直 至 領 柳 銭 無何 州 法 永 明 南寧。 Ŧ. 王 化澄、天麟 走 立, 靖州 令兼督湖 李 成 起 棟叛 相 恒 繼 從 南 大清, 能。 軍餉。 不 及,避難萬村。 黄土 以 廣 順治 俊繼 東附於 四年,王駐 何吾 玉。 賙 已知 爲首輔,起恒 起 武岡 王 恒 在 從 7, 拜起 柳州 王至肇 次之。 別 恒 慶, 禮 道 往 部尚 與 從 Ī 書兼 之。 化 澄、 東閣大 從返 朱天麟同 桂林 學士 , 復 仍 從

五 人附 時 之, 朝 政決於 攬權植黨,人目爲五 成旗 子元 胤 都御 虎。 史袁彭 起恒居其間, 年,少 /詹事 不能有所匡 劉 湘 客, 給 事 然起恒潔廉 中丁時魁、金堡、蒙正 遇 事

列傳第一百六十七 嚴起恒

悟州,尚書吳貞毓等十四人合疏攻五虎,下湘客等獄, 與文安侯馬吉翔、司禮中官龐天壽共患難久,無所忤。 毓等並惡之,乃請召還化澄,而合攻起恒。 給事中雷德復劾其二十餘罪, 欲置之死。 而五虎憾起恒,競詆爲邪黨。 起恒 顧跪王舟力救 比之嚴嵩。 王在 貞

悦,奪德復官。

起恒力求罷,王輓留之不得,放舟竟去。

也。 嚴公反力救五虎。 公人見,請除君側奸,數言決矣。」必正許之。 會鄖國公高必正人覲王,貞毓欲藉其力以傾 此長者,奈何以爲奸。」必正見王,乃力言起恒虚公可任, 起恒, 有爲起恒解者,謂必正曰:「五虎攻嚴公, 言三朝事壞於五虎,主之者,起恒 請手敕邀與俱

還。

文安之人朝,起恒讓爲首輔。

桂林破、從王奔南寧。

Ш 阻封議故。 殺之,投屍於江。 恒曰:「君遠迎主上,功甚偉,朝廷自有隆恩。若專問此事,是挾封,非迎主上也。」九儀怒,格 賀九儀、張勝等率勁卒五千,迎王至南寧,直上起恒舟,怒目攘臂,問王封是「秦」非「秦」。起 王,可望知其僞,遣使求真封。 麓 先是,孫可望據雲南,遣使乞封王。 時順治八年二月也。起恒既死,屍流十餘里,泊沙渚間。 遂殺給事中劉堯珍、吴霖、張載述, 起恒又持不可,可望大怒。至是, 天麟議許之,起恒持不可。 追殺兵部尚書楊鼎和於崑崙關,皆以 可望知王播遷,遣其將 後胡執恭矯詔封爲秦 虎負之登崖,

朱天麟,字游初,崑山人。 崇禎元年進士。 授饒州推官,有惠政。 考選入都,貧不能行

胳 ,擬授部曹。 帝御經筵,講官並爲稱屈。 及臨軒親試,乃改翰林編 修

十七年正月奉命祭淮王,抵山東而京師陷。

及南都破,走福州,唐王擢少詹事,署國子

監事。天麟見鄭芝龍跋扈,乞假至廣東。 聞汀州變,又走廣西,入安平土州

順治四年,永明王居武岡,以禮部侍郎召。 天麟疏請王自將,倡率諸鎭,毋坐失事機

辭不至。

允。 謁王。 天麟謂機 邦傳怒,以慶國公印、尙方劍擲天麟舟中, 明 年,王在南寧,擢禮部尙書,尋拜東閣大學士。天麟請親率土兵略江右,不聽, 會李成棟反大清,從王至海州。 可乘,復勸王 亟頒親征詔,規取中原。 而潯帥陳邦傳請世居 要必得,仍執不允。 王優詔答之。 廣西 加黔 已而 國 成棟奉王駐肇慶, 公故事,天麟執不 乃趨

彭、雷德復、尹三聘、許兆進、張孝起, 反正功,氣凌朝士。 當是時,朝臣各樹黨。 從廣西扈行至者,天麟及嚴起恒、王化澄、晏淸、吳貞毓、吳其雷 從成棟至者,曹曄、耿獻忠、洪天擢、潘曾緯、毛毓 自恃舊臣,祗曹、耿等嘗事異姓。 久之復分吳、**楚兩** 祥、李綺 ,自誇 八洪土

胤 翔,外結陳邦傳。 。元胤者 主吳者, ,惠國公成棟子,爲錦衣指揮使,進封南陽伯,握大權 天麟、孝起、貞毓、李用楫、堵胤錫、王化澄、萬翺、程源、郭之奇,皆 主楚者、袁彭年、丁時魁、蒙正 發、劉湘客、金堡,皆外結瞿式耜,內 。彭年等倚爲心腹,勢張甚。 內結 結李元 馬吉

罪言者,而彭年輩怒不止。王知羣臣水火甚,令盟於太廟,然黨益固不能解 鼓 恒、化澄與焉。 言 無已。 [路,有鋒氣,乃疏陳八事,劾慶國公邦傳十可斬,文安侯吉翔,司禮中官龐天壽,大學士起 行 而 彭 西, 年嘗論事王 太后召天麟面諭,武岡危難,賴吉翔左右,令擬諭嚴責堡等。天麟爲兩解,卒未嘗 君臣義安在。」王變色,大惡之。一彭年等謀攻去吉翔、邦傳,權 起恒、化澄乞去,天麟奏留之。堡與給事中時魁等復相繼劾起恒、吉翔、天 一前,語不遜。 王責以君臣之義,彭年勃然曰:「儻向者惠國以五 可獨擅也。而 千鐵騎, 堡居

憤 可。 臣 論 陛解。 事,大驚,兩手交戰,茶傾於衣,急取還天麟所擬而罷。 時魁乃鼓言官十六人詣閣詆天麟,至登殿陛大譁,棄官擲印而出。 明 年春,邦傳訐堡官臨淸嘗降流賊,受其職,且請堡爲己監軍。 卯頭 泣 王亦泣曰:「卿去,余益孤矣。」 天麟遂辭位,王慰留再三,不 天麟因擬 王方坐後殿,與侍 諭譏堡,堡大

逐之去,天麟移居慶遠 初 ,時魁等謂所擬出起恒意,欲入署毆之。是日,起恒不入,而天麟獨自承。 化澄貪鄙無物望,亦爲時魁等所攻,碎冠服辭去。 遂移怒天 王乃召何

列

傳

Ti

侍坐擬旨以避之。堡又連劾堵胤錫及侍郎萬翺、程源、郭之奇,尚書吳貞毓。 等旣連逐三相,益橫,每闌入閣中,授閣臣以意指。 吾騶、黃士俊 去之,畏元胤爲援,不敢發。 入輔。未幾,吾騶亦爲堡等排去,獨士俊、起恒在,乃復召天麟,天麟不至。 王不得已,建文華殿於正殿旁,令閣 貞毓等欲排

獄。 主持政本,今政本安在乎。」 史劾彭年、湘客、時魁、堡、正發把持朝政,罔上行私罪。王謂彭年反正有功,免議,下堡等 臣盡擐甲胄。 來百爾搆爭,盡壞實事。 堡又以語觸忌, 與時魁並謫戍。 七年春,王赴梧州,元胤留肇慶,陳邦傳適遣兵入衞。 臣亦抽峒丁,擇土豪,募水手,經略嶺北、湖南,爲六軍倡。 昔宋高宗航海, 猶有退步。 湘客、正發贖配追贓。王乃再召天麟,天麟疏言:「年 今則何地可退。當奮然自將, 貞毓、之奇、翔、源乃合諸給事御 若徒責票擬,以爲 文武諸

使至,天麟力請從之。 駐安龍。 勤王之功。 時大兵益逼,孫可望請王赴雲南。 天麟病劇,不能入覲,卒於西坂村。 兵未集,大兵逼南寧, 諸臣以起恒被殺故、皆不可。 王倉皇出走,天麟扶病從之。 初,起恒持可望封,天麟及化澄獨謂宜許。 天麟乃奉命經略左、右兩 明年四月抵廣南,王已先 江 土司,以爲 及可望

妾俱 投海死。 張 孝起, 吳江人。 孝起羈軍中,會李成棟叛大淸,孝起乃脫去。 舉於鄉,授廉州推官。 大兵至, 逼海 濱,舉兵謀恢復。 永明王以爲吏科給事中。 戰敗被 (獲)妻 清眞

介直,不與流

俗伍

怒罵於朝,王爲 時魁,掌吏科印。 王至梧州。 島破,被執,不食七日 解乃已。 劉湘客、丁時魁、金堡、蒙正發以失李元胤援,並辭職。 俄與廷 臣 久之, 擢<u>孝</u>起右愈都御史,巡撫高、雷、廉、瓊四府。 共排 死。 去湘客等,遂爲其黨所疾。 高必正, 湘客鄉 王報許,以孝起代 人也,尤疾之, 城破、走避龍

波,畏知說天波走永昌,而己以楚雄當定洲。 恐失天波,與盟 今已西。待 亂 陷祿豐、廣通諸縣及楚雄府。 ,據雲南,黔國公沐天波走楚雄。 楊畏知 爾定永昌還,朝命當已下,予出城以禮見。 寶雞 面 去。 人。 崇禎 分兵陷大理、蒙化。 中,歷官雲南副使, 畏知督兵復楚雄,駐其 巡撫吳兆元不能制,許爲奏請鎮 畏知乘間清野繕堞,徵隣境援兵, 定洲至,畏知復紿之曰 分巡金滄。乙酉秋,武定土官吾必奎反,連 今順逆未分,不能 地。 必奎伏誅,而阿迷土官沙定洲 雲南。 「若所急者 爲 不義屈也。」定洲 定洲 姚安、景東俱 遂西追天 ,黔國爾, 繼

救,大敗,遁歸阿迷,可望等逐據會城。 攻石屏、寧州、嶍峨,皆陷之。〔三〕復西攻楚雄,迄不能下。明年,孫可望等入雲南,定洲還 定洲聞,不敢至永昌,還攻楚雄,不能下。 畏知伺賊懈,輒出擊,殺傷多。乃引去,還

永昌迎天波歸。迤西八府殆屠戮,畏知力也。 至,以畏知同鄉,甚重之。尋與劉文秀西略,畏知拒戰敗,投水不死,踞而罵。 二不得殺人,三不得焚廬舍,淫婦女。」可望皆許諾。乃與至楚雄,略定大理諸郡,使文秀至 之曰:「聞公名外。吾爲討賊來,公能共事,相與匡扶明室,非有他也。」 畏知瞪目視之曰: <sup>「</sup>紿我爾。」<u>可望曰:「不信,當折矢誓。」畏知曰:「果爾,當從我三事:一不得仍用僞</u>西年號, 初,唐王聞畏知抗賊,進授右僉都御史,巡撫雲南,以巡撫吳兆元爲總督。 可望下馬慰 及可望等

及永昌故兵部郎中襲彝赴肇慶進可望表,請王封,爲金堡等所持。 爵,念得朝命,加王封,庶可相制,乃議遣使奉表。 護得免。可望與劉、李同輩,一旦自尊,兩人不爲下。 出劉、李上爾。 年,鑄興朝通寳錢。 時永明王已稱號於肇慶,而詔令不至。前御史臨安任僎議尊可望爲國主,以干支紀 今晉之上公,而卑劉、李侯爵可也。」乃議封可望景國公,賜名朝宗,定國、文 畏知憤甚, 有所忤, 輒抵掌謾罵。 畏知亦素以尊主為言。 歲己丑, 遣畏知 聞肇慶有君,李錦、李成棟等並 可望數欲殺之,李定國、劉文秀爲 畏知乃曰:「可望欲權 加 封

執恭獄,而遣使至悟州問故,廷臣始知燆詔事。 文安侯馬吉翔請封可望澂江王,使者言,非 令執恭齎行。可望大喜,郊迎。亡何,畏知等至。可望駭不受,曰:「我已封秦王矣。」畏知 武康伯胡執恭者,慶國公陳邦傳中軍也,守泗城。州與雲南接,欲自結可望,言於邦傳,先 退,議遂寢。必正者,李自成妻弟,同陷京師者也。 國,洗去賊名,毋欺朝廷孱弱,我兩家士馬足相當也。」又致書可望,詞義嚴正。使者唯唯 嬌命封可望秦王, 曰:「藉其力可制率赤心也。」邦傳乃鑄金章曰「秦王之寶」, 填所給空敕, 赦,亦止公爵爾。 公高必正等人朝,召使者言:「本朝無異姓封王例。我破京師,逼死先帝,滔天大罪,蒙恩宥 曰:「此僞也。」執恭亦曰:「彼亦僞也,所封實景國公,敕印故在。」可望怒,辭敕使,下畏知及 「秦」不敢復命。大學士嚴起恒持不可,兵部侍郎楊鼎和助之,且請却所獻白金玉帶。會鄖國 時堵胤錫曾賜空敕,得便宜行事。昱乃就與謀,矯命改封可望平遼王, <u></u>可望不得封,益怒。 其年九月親率兵至貴州。十一月,大兵破廣州、桂林, 王走南寧。 遣大理卿趙昱爲使,加畏知兵部尚書,彝兵部侍郎,同行。 張氏竊據一隅,罪固減等,封上公足矣,安敢冀王爵。 自今當與我同心報

易敕書以往。

聽。定國等勸可望遣畏知終其事,可望許之。明年二月先遣部將賀九儀、張勝、張明志赴南寧 事急,遣編修劉茝封可望冀王,可望仍不受。 畏知曰:「『秦』『冀』等爾, 假何如真。」可望不

貴陽 索沮「秦 至 一,痛 一面 哭自劾 責數之。畏知大憤,除頭上冠擊可望,逐被殺。楚雄 封 者起恒 語 多 侵 、鼎和及給事中劉堯珍、吴霖、張截述殺之,乃真封 可望。 遂留 為東閣大學士,與吳貞毓 同 人以畏知守城功,爲 輔政。 可望聞之怒,使 可望秦王 0 立 nía 祠 畏知旋 人召至 以祀。

封, 明王 王 可望殺起恒,貞毓 一,進郎 自近,挾以作威。 吳 東 貞 觞 西 中。 ,字元聲,宜興人。崇禎十六年進士。 會城先後失,王徙潯州,再徙南寧,貞毓並 王駐 全州,加太常少卿,仍掌選事。 其將掌塘報者曹延生惎貞毓,言不可移黔。 以奉使獲免。 及還,進東閣大學士,代起恒。 已,擢 事唐王爲吏部文選主事。 從。 更部右: 貞毓與嚴起恒共阻孫 侍郎,從至肇慶,拜戶 可望自 雲南遷貴陽,議 事敗,擁 可望秦王 立永 部

亡何,開國 澼 難者,有議泛海抵閩依鄭成功者。惟馬吉翔、龐 且 時 二將報大兵益近,相距止百里。 入延生言,不敢決。元胤疏請出海。 順 公趙印選、衞國 八年,大兵南 征,勢日迫。 公胡一青殿後軍,戰敗奔還。 上下失色、皆散去。已、次羅江土司、追騎相距止一 王召諸臣議,有請走海濱就李元胤者,有議入安南 王不 欲就可望,而以海濱遠,再下廷議,終不決。 天壽結可望,堅主赴黔。貞毓因 請王 速行,急由水道走土司,抵瀨 前 阻 封

告。會日晡引去,乃稍安。次龍英,抵廣南,歲已暮。

是士瑞與給事中徐極,員外郎林青陽、蔡縯,主事張鐫連章發其奸謀。王大怒。兩人求救 圖以獻可望,其品拒不從。吉翔譖於可望,杖殺其品,而可望果以朝事盡委吉翔、天壽。於 說主事胡士瑞擁戴秦王。士瑞怒,厲聲叱退之。他日,吉翔遣璘求郎中古其品畫堯舜禪受 以內外事盡付戎政、勇衞二司。大權歸我,公等爲羽翼,貞毓何能爲」,吉翔遂遣門生郭璘 不附己,令其黨冷孟錐、吳象元、方祚亨交章彈擊。且語孟銋等曰:「秦王宰天下,我具啓, 護將悖逆無人臣禮,王不堪其憂。吉翔掌戎政,天壽督勇衞營,諂事可望,謀禪代。惡貞毓 於太后,乃免 可望 遺兵以明年二月迎王入安隆所,改爲安龍府,奉王居之。 宮室庳陋、服御粗惡、守

晉王李定國已定廣西,軍聲大振。欲密下一敕,令統兵入衞。若等能密圖乎。」二人言除 廟,定朝儀,擬改國號曰「後明」,日夕謀篡位。王聞憂懼,密謂中官張福祿、全爲國曰:「 令佯乞假歸葬,而使員外郎蔣乾昌撰予定國敕,主事朱東旦書之,福祿等持入用寶**。** 以告貞毓 極、林靑陽、張鐫、蔡縯、胡士瑞曾疏劾吉翔、天壽,宜可與謀,王卽令告之。 五人許 諾,引 前御史任僎、中書方于宣勸可望設內閣九卿科道官,改印文爲八疊,盡易其舊,立太 貞毓曰:「主上憂危、正我輩報國之秋。 諸君 中誰能充此使者。」青陽 詩行。 青陽 聞 乃

列傅

第

百六十七

吳貞鐵

於 盡間 道 馳至定國所。 定國接敕感泣,許以迎王

官。 貞 鄭 晨 **倉皇刻吉翔、天壽表裏爲奸。** 意其必預謀也,告以兩使齎敕狀。 周官詣定國。 毓 國 (夕在側,假他事出之外,庶有濟。」王乃令吉翔奉使祭先王及王太后陵於悟州、南寧,而遣 赴南寧逮之。 再 天壽及吉翔弟都督雄飛忌甚,與其黨郭璘方謀陷之。 初 明 一青陽 撰敕,鑄「屛翰親臣」金印,令吉還付靑陽。 夏,靑陽久未還,王將擇使往促,貞毓以翰林孔目周官對。 還至南寧,爲守將常榮所留,密遣親信劉吉告之王。 吉翔在道,微知靑陽密敕事,遣人至定國營偵之。主事劉議新者,道遇吉翔 會鐫、士瑞及李元開以王親試,極、縯、東旦及御史林鍾以久次,皆予美 王見事急,卽下廷臣議罪。 吉翔驚駭,啓報可望。 至廉州,周官與靑陽遇,偕至高州賜定 天壽懼 可望大怒,並疑吉翔預謀,遣其將 而鍾、縯、極、鐫、土瑞亦知事洩 ,與雄飛馳貴陽, 王喜,改青陽給 都督鄭胤元曰:「吉翔 事 告可望 中,諭

國,定國拜受命。

至朝房,械貞毓並胤元、鍾、縯、乾昌、元開、極、鐫、土瑞 殿 而 , 迫脅王, 索主謀者。 是時鄭國 已械吉翔至安龍,與諸臣 王懼 ,不敢正言,謂必外人假敕寶爲之。 面 質。 貞毓 又入宮擒福祿、 謝不 、東旦及太僕 知, 國怒, 爲國而出。 少卿趙賡 因挾貞毓直入王 國 逐 一努目 其黨冷孟銋 出 御 史周允 與天壽 一所居

大臣, 言於可望罪絞。 後患。」於是御曦執筆,佐辰擬旨,以鐫、福祿、爲國爲首罪,凌遲,餘爲從罪,斬。 部侍郎張佐辰及纓、德亮、孟銋、企鋘、蔣御曦等謂國曰:「此輩盡當處死。 儻留 一人,將爲 明。」乃復收繫,以欺君悞國盜寶矯詔爲罪,報可望。 承此獄,稍見臣子報國苦衷。」由是衆皆自承。 國又問曰:「主上知否。」 縯大聲曰:「未經奏 蕭纓、宋德亮、朱企鋘等迫王速具主名, 后泣訴於王,乃已。諸人就刑,神色不變,各賦詩大罵而死。 衆不勝楚,大呼二祖列宗,且大罵。 吉翔以福祿等內侍,謂王后知情,將廢之,令主事蕭尹歷陳古廢后 王悲憤而退。 時日已暮,風雷忽震烈。 可望請王親裁,王不勝憤,下廷議。 翊日, 國等嚴刑拷掠,獨貞毓以大臣 其家人合瘞於安龍北關 縯厲聲曰:「今日縯等直 王以貞毓 吏

士,賜祭,諡文忠,廢子錦衣,世千戶,餘贈恤有差。已,建廟於馬場,勒碑大書「十八先生成 居二載,定國竟奉前敕護王入雲南。乃贈貞毓少師、太子太師、東部尙書、中極 一殿大學

已而靑陽逮至,亦被殺,獨官走免。時順治十一年三月也。

仁處」以旌其忠

卽 定國客詣統武,吉翔復媚之。 叩頭言:「王再造功,千古無兩。 定國旣奉王居滇,即捕吉翔及其家人,令部將斬統武收繫,將殺 因相與譽吉翔於定國 吉翔幸望見顏色,死且不朽,他是非,何足辨也。」定國乃 ,而微爲辨冤。 定國召吉翔,吉翔 之。 吉翔日媚統武,

列傅

大喜。 用 事 吉翔 後 從 王 因 入緬甸 H 諂 定國 ,天壽先死 客, 令說定國薦己入內閣,遂與定國客蟠結,盡握 一吉翔 爲緬 人所殺 中外權 大壽· 亦復

朝。 定國 天壽 可 有 合疏言二人功高 亦用 殺 吉翔 奉 高 微練官 勣 Ī 激 至 事。 ,字無功,紹興人。 王怒,命各杖一百五十,除名。 雲南,捕 名。」定國 定國 與劉文秀時詣 望重,不當往來權 吉翔將殺之。 即偕文秀入救,乃復官。 事永 二人家,定國 明王,歷官光祿少卿。 已,爲 佞之門,恐滋奸弊,復蹈 其所諛, 定國 時封晉王,文秀蜀王也。 客金維新 遂発 死, 馬吉翔、龐天壽搆殺吳貞毓等, 走告定國 且薦 秦王故轍。疏上,二 入閣, 日、一動等誠 遂得 動與御· .盡握 史 有 中 2罪,但 鄔 王遂不 外 昌期 權, 不 患 而 入

時 外 王 未 老 憂 於兵 能 方 及 定國 決。 大。 事 胡胡 敗 伺 而 三路敗 我 孫 泄泄 者 可望 頓 如 書至, 兵,自以爲無他 刃待兩虎之斃,而 此。」定國愬之王前,頗激。 定國始逡巡引謝,二臣獲免。 息,武備 我 引酣歌漏台 虚 弛。 舟 王擬杖二臣 之中, **動與郎官金簡進諫曰:「今內** 熟 簡, 寢 熱薪 字萬藏,勣鄉 以解之,朝 之上,能 士 人。 多 旦 爭 夕 難 後王入緬 安耶?二 不 ·可,移 雖

甸

`二人扈行,並死之。

抑言官使不言耶」 解,中言禍急然眉,當思出險。 侍郎楊在抗疏劾之。 之,歸泣告衆曰:「我所以屈辱者,懼驚憂主上耳。否則彼將無狀,我罪益大。」國璽與禮部 甸。 定國等言:「行人議是。但前途尙寬,暫移蹕,捲土重來,再圖恢復,未晚也。」乃扈王入緬 將解可望。 望 書,進之王,吉翔深恨之。王覽止一日,國泰卽竊去。 安龍 皇帝,極口大罵。其人遂剔其皮,斷手足及首,實草皮內紉之,懸於通衢。 必怒,留其疏。 時 緬俗以中秋日大會羣蠻,令黔國公沐天波偕諸酋椎髻跣足,以臣禮見。天波不得已從 又有任國璽者,官行人。順治十五年,永明王將出奔,國璽獨請死守。章下廷議,李 龐天壽已死,李國泰代掌司禮監印,吉翔復與表裏爲奸。 如 而可望大怒,遣人至王所,執如月至朝門外,抑使跪。 月刻可望不請旨,擅殺勛鎮,罪同莽、操,而請加邦傳惡諡,以懲不忠。 召如月入,諭以諡本褒忠,無惡諡 吉翔不悅,即令國璽獻出險策。 理。小臣妄言亂制,杖四十,除名,意 國璽尋進御史,疏論時事三不可 國璽忿然曰:「時事至此,猶 國璽集宋末大臣賢奸事爲 如月向闕叩頭,大呼太祖

有

李如月者,東莞人,官御史。王駐安龍時,孫可望獲叛將陳邦傳父子,去其皮,傳屍

王知可

列

你

皆預焉。惟都督同知鄧凱以傷足不行,獲免。時順治十八年七月也。自是由榔左右無人。 水。」吉翔、國泰邀諸臣盡往。至則以兵圍之,令諸臣以次出外,出輒殺之,凡殺四十二人。 至十二月,緬人遂送之出境,事具國史。 國璽及在、天波、吉翔、國泰、華亭侯王維恭、綏寧伯蒲纓、都督馬雄飛、東部侍郎鄧士廉等 ·緬甸弟弑兄自立,欲盡殺文武諸臣,遣人來言曰:「蠻俗貴詛盟,請與天朝諸公飲呪

能死,甚善。」於是五人偕赴城北黑龍潭死。 堅抱如故。 孝,吾兩人獨不能死節義耶。]其侍女方抱幼子,問曰:「主人皆死,何以處我。]大觀曰:「爾 邦以苟活,不重可羞耶!顧子之翰曰:「吾不惜七尺軀,爲天下明大義,汝其勉之!」之翰曰: 「大人死忠,兒當死孝。」大觀曰:「汝有母在。」 時其母適在旁,顧之翰妻曰:「彼父子能死忠 初,由榔之走緬甸也,昆明諸生薛大觀歎息曰:「不能背城戰,君臣同死社稷,顧欲走蠻 大觀次女已適人,避兵山中,相去數十里,亦同日赴火死。 次日,諸屍相牽浮水上,幼子在侍女懷中,兩手

迎謁 定國號召諸土司兵,嵩卽起兵應之。已而城破,登樓自焚,闔家皆死,其士民亦多巷戰死。 ,供奉甚謹,設宴皆金銀器。 有那嵩者,沅江土官也。 世爲知府。嵩嗣職,循法無過。 宴畢,悉以獻,曰:「此行上供者少,聊以佐缺乏耳。」後|李 王走緬甸,過沅江,嵩與子燾 列傳第一百六十七 校勘記

社稷之淪胥,而不能破除門户之角立。故至桂林播越,旦夕不支,而吴、楚之樹黨相傾,猶 贊曰:明自神宗而後,寖微寖滅,不可復振。 揆厥所由,國是紛呶, 朝端水火, 寧坐視

顛覆之端,有自來矣,於當時任事諸臣何責哉。

校勘記

仍南都翻案之故態也。

(一) 副將曾英與參政劉麟長自遵義至 曾英、原作「曹英」。本書卷二五三王應熊傳作「曾英」。 }明

通鑑附編卷一上附記一上、綏寇紀略卷一〇、懷陵流寇始終録卷一八、南疆逸史列傳第四七、小

**腆紀年附考卷六等書也都作「曾英」。據改。** 

(三) 還攻石屏寧州嶍峨皆陷之 本書卷三一三雲兩傳作「攻石屏不下」。



## 明史卷二百八十

## 列傳第一百六十八

何騰蛟章曠 傅作霖 瞿式耜 汪皡等

遷兵部主事,進員外郎,出爲懷來兵備僉事,調口北道。 撫劉永祚薦其賢,乞奪情任事。 出沒其間 何騰蛟,字雲從,貴州黎平衛人。 ,數被挫去。 已,從巡撫陳必謙破賊安皐山,斬首四百餘級,又討平土寇,益知名。 騰蛟不可,固辭歸。 天啓元年舉於鄉。 服除,起淮徐兵備僉事。 才諝精敏,所在見稱。 崇禎中授南陽知縣。 討平土寇,部 遭母憂,巡 地 四達,賊

軍,軍橫甚。 十六年冬,拜右僉都御史,代王聚奎巡撫湖廣。 騰蛟與良玉交歡,得相安。 明年春,遣將惠登相、毛憲文復德安、隨州 時湖北地盡失,止存武昌,屯左良玉大

内宴然

五月,福王立。 韶至,良玉駐漢陽, 其部下有異議,不欲開讀。 騰蛟曰:「社稷安危,紫

列傳

第

百

六

+

八

何腾

蛟

湖 良 此 廣 玉 所置 舉 四 JII 官 倘 、雲南、貴州、廣 名 不 也。 奉 詔 八月 吾以 , 死殉之。」抵 福 西軍務, 王 命 加 召總督楊鶚 騰 良玉 蛟 兵部 一所,而 右 侍郎 還。 良玉 明 , 已聽正紀盧鼎 **兼撫** 年三月, 湖南 南京 代代 李 言 有 乾德。 北來 開 讀 太子 如 尋 禮。 以 事 故 中,中, 正 官 紀 外以 總 督

爲

眞

朝臣

皆

目

爲。

騰蛟力言不可殺,與當

或

者

大

作

江 玉 坐 懷印 水。 部 大門縱之入。 將 無 者 擁 匹 何 亦 去。 人 良玉 懼 至, 誅,亦赴 良 相 舉兵反,邀 良玉 玉欲 視 大驚。 破 與 水。 同 垣 舟 舉 騰蛟偕行, 覓漁 騰 火 ,不從,乃置之別舟,以 蛟 ,避難者悉焚死。 漂 舟,忽不見。 十餘里,漁舟 不 可 , 則 遠近謂騰蛟 盡 救之起, 騰 殺城 蛟急 副將四人守之。 中人以 解 則漢 忠誠 印 付家 分劫之。 前 得 神 將 人,令速走,將· 佑 軍 舟次漢陽門,乘 士民爭匿 ·關壯 益 歸 繆侯廟 心焉 一其署 自剄 前 中 也。 間 為 躍 騰 良 家

至 卽 總 錫 造 等, ,兵勢稍 督 曠 鵩 監 痛 蛟 調 軍 哭 副 乃 ·,大啓提督 盟誓。 振 從 將 黄 寧 而 州 朝宣、張先璧、劉 是時 分士 轉瀏陽,抵 [學政。 良玉 **声**角 巳 艦 起恒 死 長 糗糧,各任 沙。 故 承 胤 衡 集諸 永道 兵。 其 屬 , 朝宣 \_\_<u>-</u> 吏堵胤 刨 督 自燕子窩 令胤錫 二郡軍食,晉錫以 錫 傅 攝 湖北 上瑞 ,先璧自 巡撫 、嚴起恒、章曠、周大啓、吳晉 漵 ( )上瑞 長沙 浦 承胤 攝 推官攝 湖 自 南 武 郴 巡 岡 桂 撫 道事 先後 曠 o

順治二年五月,大兵下 南都。 唐王聿鍵自立於福州。 王居南陽時, 素知騰蛟賢, 列傳第一百六十八 何陰蛟

謂 十餘萬,聲威大 富 避,騰 三萬馳 言 益 貴。」 督 往 其 師 撫。 迎 距 蛟曰:「死於左,死於賊,一也,何避焉。」 | 搖旂等大喜,與大鵬至長沙。 以湘陰編 敵 射,旌旗蔽天。 李自成斃於九宮山,其將劉體仁、郝搖旂等以衆無主,議歸騰蛟。 長沙百 賊 也,射殺之,從行者盡 見止二騎,迎入演武場,飲之酒。 震。 餘 小,不 里。 城中人不 足容大軍,請卽移長沙。 搖旂等大悅,招其黨袁宗第、藺養成、王進才、牛有勇皆來歸,驟增兵 死。 知 其來 城中益懼,士女悉竄。 騰蛟開誠撫慰,宴飲盡歡,犒從官牛酒。 歸 也,懼甚。 二人不交一言,與痛飲。 長沙 因致騰蛟手書召之曰:「公等歸朝,誓永保 知府周二南請往偵之,以千人護 朝宣 卽引兵還燕子窩 鵩 蛟與曠謀、遣部 飲畢, ō 率四五萬人驟入 賊 將萬大鵬等二 Ŀ 瑞請 命先璧以卒 問 來意,答 騰 行 蛟 城 鱼

忘 也 邪 成 1。」錦曰:「諾。」騰蛟慮錦跋扈,他日過其營,請見高氏,再拜,執禮恭。 何公,錦自是無異志。 ·] |錦曰:「何謂也。」曰:「爲賊無論,旣以身許國,當愛民,受主將節制, 從子,後賜名赤心。 未幾,自成將李錦、高必正擁衆數十萬逼常德。 必正則自成妻高氏弟也。 高氏語錦曰:「汝願爲無賴賊、抑願 騰蛟令胤錫撫降之,置之荆州。 有死無二, 吾所 高氏悅,戒其子毋 爲大將 錦,自 願

自成亂天下二十年,陷帝都,覆廟社,其衆數十萬悉歸騰蛟。 而騰蛟上疏,但言元兇已

除,稍洩神人憤,宜告謝郊廟,卒不言己功。唐王大喜,立拜東閣大學士兼兵部尚書,封定 興伯,仍督師。而疑自成死未實。騰蛟言自成定死,身首已糜爛。不敢居功,因固辭封爵。

不允,令規取江西及南都。

永忠、宗第、進才及董英、馬進忠、馬士秀、曹志建、王允成、盧鼎並開鎭湖南、北,時所謂十 三鎭者也。永忠卽搖旂,英,騰蛟中軍,志建則故巡按劉熙祚中軍,餘皆良玉舊將也。 當是時,降卒旣衆,騰蛟欲以舊軍參之,乃題授朝宣、先璧爲總兵官,與承胤、赤心、郝

楊鶚者,剋餉失軍心,至是復夤緣爲偏沅總督。 諸將皆驕且貪殘,朝宣尤甚,劫人而剝其皮,永忠效之,殺民無虛日,騰蛟不能制。 逗遛,諸營亦觀望,獨赤心自湖北至,爲大兵所敗而還,諸鎭兵遂罷,騰蛟威望由此損。 騰蛟銳意東下,拜表出師。 明年正月與監軍御史李膺品先赴湘陰,期大會岳州。 騰蛟以爲言,乃召鶚還。 故總督 先壁

騎 五千往。 數議出關,爲鄭氏所阻。 永忠不肯前 ,五月始抵郴州。 騰蛟屢請幸贛,協力取江西。王遣使徵兵,騰蛟發永忠精 會大兵破汀州,聿鍵被執死,贛州亦失。 騰蛟聞

王死,大慟,厲兵保境如平時。

陽,聞大兵漸逼,還長沙。

一聞永明王立,乃稍自安。 王尋以騰蛟爲武英殿大學士,加太子太保。 王進才故守益

爲 州 單 盜 壁遂 騎 騰蛟 贼。 走 170 衡 挾 年 與侍郎 大兵入衡州,守將黃朝宣降。 州 騰蛟走祁陽, 春,進才揚言乏餉,大掠,幷及湘陰。 長沙 嚴起恒 、湘陰並失。 走白牙市,大兵遂下衡 叉間 道 走辰州。 盧鼎 時 守衡州 數其罪,支解之,遠近大快。 騰 蛟脱 泳。 還,走永州。 而 適大兵至長沙,進才走湖北。 先璧兵突至, 初, 騰蛟建十三鎭以 甫至,鼎部 大掠。 大清以一知府守永州 鼎不 將復大掠。 衞 長沙,至是皆自 ·能抗, 騰蛟不能守, 走永州 鼎走道

副

將周

金湯間

城

虚,夜鼓躁而登,知府出走,金湯遂入永。

辭 專領餉務,王不許。 至是爵安國公,勛上柱國,賜尙方劍,益坐大。忌騰蛟出己上,欲奪其權 訴 太后皆召見。承胤 先調朝宣、先壁軍 朝 騰 蛟, ,賜銀幣,命廷臣郊餞。 六月, 騰蛟遣曠行,承胤乃以衆至。 騰 蛟在白牙。 ·,皆章曠親行,今乃折箠使我。」遂馳至黎平,執騰蛟子,索餉數萬。 子走 由小校,以騰蛟薦至大將,已漸倨。 王召騰蛟圖承胤,騰蛟無兵,命以雲南援將趙印選、胡一青兵隸之。 王密遣中使告以劉承胤罪,令入武岡除之。 承胤伏千騎襲騰蛟,印選卒力戰,盡殲之,騰蛟乃還駐白牙 騰蛟為請於王,得封定蠻伯,且與爲姻,承胤 騰蛟在長沙徵其兵,承胤大怒,言: 騰蛟乃走謁王,王及 ,請用爲戶部尙書, 益驕。 及

將返桂林,而城中止焦璉軍,騰蛟率印選、一青入爲助。 王走靖州 而南安侯郝永忠忽擁衆萬餘至,與

月,大兵破武岡,承胤

降。

,又走柳州。

時常德、寶慶已失,永亦再失。

 $\pm$ 

列

傳

第

百

漣 扼 兵 、欲鬭 穴 靈 川 ,會宜章伯 、永寧 、義寧諸州 盧鼎 兵亦 縣。 騰蛟為調 <del>|</del> 月,大兵逼 劑, 桂林以安。 全州,騰蛟督五將 乃遣璉、永忠、鼎、印選、一青分 合禦

永州 南者姑退,騰蛟遂取 永忠 取寶慶,諸將亦取衡州,馬進忠取常德,所失地多復 蛟督璉、一青等 國 兵大潰,奔桂林,逼王西,縱兵大掠。 Ŧi. 年正月,王居 城三月,大小三十六戰,十一月朔克之。 分三門拒守,大兵乃還全州。 桂林 全州。 ,加騰蛟太師,進爵爲侯,子孫 復遺保昌侯曹志建、宜章侯盧鼎、新 騰蛟自永福至。 會金聲桓、李成棟 未幾,監軍御史余鯤起、職方主事 世襲。 大兵 二月,大兵破全州 叛 興侯焦璉、新寧侯 知桂林有變,直抵 大清,以兵附。 大 趙 北 , 至興安 八兵在湖 李 即 門。 甲春 選 文 騰

行,止 潰。 騰蛟降。 騰蛟乃入居之。大兵知騰蛟 陽 與之。 出 長 赤心等所至皆空城, 騰 攜 沙 進忠大怒,盡驅居民出城, 蛟議進兵長沙。 吏卒三十人往。 騰蛟大叱,勇遂擁之去。 期諸將畢會, 會督師堵胤錫惡進忠,招忠貞營李赤心軍自夔州 间 將至,聞 旋棄走,東趨 親詣忠貞營,邀赤心入衡。 入空城,遣將徐勇引軍入。 其軍已東,卽尾之至湘潭。 絕食七日,乃殺之。 焚廬舍, 走武岡。 長沙。 騰蛟時駐衡州,大駭。六年正月檄進忠 寶慶守將王進才亦棄城走,他 |永明 部下卒六千人,懼忠貞營掩襲,不護 勇,騰蛟 、王聞 湘潭空城也,赤心 舊 之哀悼,賜祭者九,贈中湘 部將也,率其卒羅拜 至,令進忠讓 不守 守 而 由 將 常 皆

西道 州 基令署分巡道事。 人 文 陷 其城, 、馬進忠、 事 章曠, 用 騰 送賊將白旺。 曠去 同 蛟薦,令戴罪立 字于野, 知馬飇死之。 王允成等復漢陽。 ,藻失將士心,城復陷。 明年四月、憲文偕惠登相復德安、 松江 曠收斬之,日夕 華亭人。 功 曠走 発, 武昌巡按御史黃澍令署漢陽推官 崇禎十年進士。 謁總督袁 爲警備。 給事中熊汝霖、御史游有倫劾曠沔陽失城罪,候訊黃 後 成於 居三月,代者李藻至, 授沔陽知州。 九江 揚基檄曠往守。 , 署爲 監 「兼攝· 紀。 十六年三月, 賊將郝搖旂 巡撫 城空無 府事 從諸 何騰蛟檄曠 將 承德巡撫 人,衞官 方國安 十數 署 毛 王 荆 揚 憲

也。」入其營,與進忠握手,指白水爲誓,進忠等皆從之。進忠卽賊中渠魁混十萬也。 養 部 其將馬進忠、王允成無所 而 成 將 以 朝宣 、王進才、牛有勇六大部各擁數萬兵至。 福王立南京,左良玉將犯 駐燕子窩, 成茶陵。又令曠調劉承胤兵於武岡。會李自成死,其下劉體仁、郝搖族、袁宗第、藺 騰蛟令曠召之來。副將張 歸, 突至 闕。騰蛟至長沙,以曠爲監軍。副將黃朝宣者,故巡撫宋一鶴 岳州。 偏沅 先璧屯精騎三千於漵浦 騰蛟與曠計、盡撫其衆、軍容大壯。 巡撫傅上瑞大懼,曠曰:「此無主 ,復屬曠召之,留爲親軍, 一之兵,可撫 左良玉死, 時南京

列

傳

舘

百

六

+

八

何

脸

蛟

破, 大兵逼 湖南 ,諸將皆畏怯,曠獨悉力禦。 唐王擢 爲右僉都 御史,提督軍務,恢剿湖北

大掠 繼 丽 謁 而 還。 王 而 曠 武 去。 有 已, 岡 智略,行 騰 叉大戰 曠 蛟奔衡州 移駐永州 軍 大荆 亦 避鋒銷 ,曠亦 驛。 見諸大將擁兵,聞警輒 永 走寶慶,長沙 明 身 Ī 扼 加 湘 兵部右侍 陰、平江 逐失。 之衝, 郎。 走,抑 騰 蛟駐祁陽,曠 湖南 長 鬱 沙 而卒。 守將 恃 以 王 無 來會。 進 恐。 才 與狼 嘗戰 騰 蛟 兵將 岳 州 以 兵 覃遇春鬨, 以以 事 後 屬 軍不

驅 使 時 何 之過橋 納 劉 騰 款, 蛟長 承 傅 胤 作霖,武陵人。 大兵入 擅 沙 ,躍入水 」,改監 政,作霖 城, 中 軍 作霖 死 御 與相善,故驟遷。 史。 由鄉 冠帶坐堂上。 舉仕唐王,大學士蘇觀生奏爲職方主事,監紀其軍 永明王在 全州,超拜 及大兵逼武岡,承胤 承胤力勸之降,不從,遂被殺。 兵部 左侍郎、掌部事、尋進尚 議迎降,作霖勃然責 妾鄭有殊色,被執, 書,從至武岡 之。 觀生 承胤遣 一歿,倚

令降將陳友龍 有 蕭 曠者, 招曠,曠不從。 武昌諸生、為承胤坐營參將。 已而城破,死之。 騰蛟題爲總兵官,管黎平參將事。 及承胤降,

勸 騰蛟設十三鎮,卒爲湖南大害。 傅 上 瑞 初為武昌 推官 ,贼圍 城,遁走。 唐王時,用騰蛟薦,擢右僉都御史,實授偏沅巡撫。 久之,騰蛟薦爲長沙僉事,又令攝偏沅巡 撫事

瞿式耜,字起田,常熟人。 禮部侍郎景淳孫,湖廣參議汝說子也。 學萬曆四十四年進

授吉安永豐知縣,有惠政。

天啓元年調江陵。永豐民乞留,命再任。以憂歸。

錄,昭示朝野。」 遷不可不漸,會推不可不慎。諡典宜嚴,刑章宜飭,論人宜審,附璫者宜區分。」又極論館選 中、周順昌爲清中之清,忠中之忠,三人遂賜諡。 化實主之。 奔競之弊,請臨 論來宗道、楊景辰附逆不可居政府,二人旋罷去。御史袁弘勛劾大學士劉鴻訓,逆黨徐大 立極之罪。 行訟冤,速楊鎬、王化貞之誅,白楊漣、左光斗結毒之謗,追論故相魏廣微、顧秉謙、馮銓、黃 俊、畢懋良宜總版曹,李邦華宜主戎政。帝多采其言。俄陳朝政不平,爲王之寀請恤,孫愼 崇禎元年擢戶科給事中,疏言李國槽宜留內閣,王永光宜典銓,曹于汴宜秉憲,鄭三 川貴總督張鶴鳴先已被廢,其復用由魏忠賢。 因言奪情建祠之朱童蒙不可寬,積愆久廢之湯賓尹不可用。帝亦納之。又極 「軒親試。末言:「古有左右史,記天子言動。 事多議行。 時將定逆案,請盡發紅本,定其情罪輕重。 未幾,陳時務七事,言:「起廢不可不覈,陞 。式耜並疏論。 今召對時勤,宜令史官入侍紀 又言宣府巡撫徐良 已,頌楊漣、魏大

列傳

第

百

彦 不附逆奄,爲崔呈秀誣劾遣戍,亟當登用。 良彥遂獲起。

位,獄稍解。 之,下法司逮治。 謪。 當 再貶二秩,遂廢於家。久之,常熟奸民張漢儒希體仁指,訐 部侍郎錢謙益以同官周延儒方言事蒙眷,慮並推則己絀,謀沮之。 事者,擯延儒弗推,而 式耜嘗頌貴寧參政胡平表殺賊功,請優擢。 式耜矯矯立名,所建白多當帝意,然搏擊權豪,大臣多畏其口。 謙益 坐削籍,式耜贖徒。言官疏薦,不納。 巡撫張國維、巡按路振飛交章白其冤,不聽。 列謙益第二。溫體仁遂發難,延儒助之。 其後平表為貴州 謙益、式耜貪肆不法。 比兩人就獄,則體仁已去 布政使,坐不謹罷。 謙益奪官閒住,式耜坐貶 式耜 十月詔會推閣 ,謙益門人也,言於 體仁 臣, 式耜 禮

璉召邦傳共執亨嘉, 幽 議立桂端王子安仁王。 西。 邦傳助防。 ,乃遺使賀王,因乞援。 明年夏,甫抵梧州,聞南京破。靖江王亭嘉謀僭號,召式耜。 十七年,福王立於南京。八月起式耜應天府丞。 止狼 兵,勿應亨嘉調。 亂遂定。 及唐王 王喜,而亨嘉爲 唐王擢式耜兵部右侍郎, 監國,式耜以爲倫序不當立,不奉表勸進。 亨嘉至梧,劫式耜,幽之桂林,遣人取其敕 丁魁 楚所攻, 已, 擢右僉都御史, 代方震孺巡撫 協理戎政, 勢窘,乃釋式耜。 拒不往,而檄思恩參將 以晏日曙來代。 式耜 至是 即。 與 爲 中 初,式耜 式耜不 亨嘉 軍 官焦 所 陳 廣

入朝,退居廣東

議 迫 H 監 迎 王 非 Ŧ 或 順 還肇慶 肇 梧 治 州 三年 式耜 一造 進式 九 月,大兵破 總督林佳 耜 力 争,不 吏部 右侍 | 鼎樂 得。 汀 州 郎 + 觀 東閣 式 一月 生 兵,敗 耜 朔, 大 與魁楚等議 學士, 蘇觀 歿。 式 生 兼掌 耜 立 立水 唐王 吏 視 部 師 明王 峽口 聿 事 鑏 o 由 於 未 榔, 十二月望,大 幾 廣 州 乃 赣州 ó 迎 王 式 敗 梧州 耜 報至 乃 兵破 與 了; 以 一,司 魁 廣州 + 楚等定 禮 月 王 坤 +

坤

趣

王

西走。

式耜

趨赴王

,王已越梧

而

西

耜 代 !)[[ 學 瞰 分兵 大器、王化 盛 式 士,兼 與 巡按 耜 濃 通 趨桂林。 四 圳 年正 公署。 御 兵 御 鄭 史魯 部 澄皆棄王去,止式耜及吳炳 史辜延 月 或 尚書, 式耜急令援將 藩 王將走全州 可藻代 大兵破肇慶, 縣 泰走融 賜 丞 劍, 延泰。 李世 縣, 便宜 、式耜 榮 焦璉 未赴 布政 逼梧州 及 從事。 極陳桂林形 都 拒 使朱盛 而 司 ,巡撫曹曄 大兵已於三月薄 林 平樂、海州 、吳貞毓等從,乃由 應昌 調 副 勢,請留 一、李當 使楊 迎降。 相 瑞、 繼 ,不許。 垂雲、桂林 桂林 破 王欲 沈煌在焉。 大桂林 平 走依 樂 以 自請留守,許之。 危甚。 抵 騎 知府 桂 何騰蛟於 數十突入文昌門, 林 王令兵部右侍郎 王惠卿 總督: 月,大 湖 侍郎朱盛濃 以下 廣,丁 進文 兵襲平樂, 皆遁,惟 魁楚、呂 登 丁元 淵閣 城 走 曄 式 靈 大

) 璉, 用破 初 靖 永 江 明 王 王 爲 功,命爲 賊 執,連 參 將。 率 衆攀 及是 城上 、戰守三月,璉功最多,元曄、 ,破械出之。 王病 不能行,璉負王 可藻 亦盡 以行。 力。 |式||耜 王 身 以 立 此 矢

列

傅

第

百

六

+

八

雤

大

耜

彦等攻 講, 式 石 中, 耜 與 廣州 括庫 土 卒 不 同 兵引 甘苦。 足,妻邵 而 東 積 捐 雨 |桂 簪 城壞,東士無人色,式耜督城守自如,故 林 珥 佐 獲 之。 全。 璉亦 旣 而 復 璉 陽朔 兵主 及平樂,陳邦傳亦由 客 示 和 課 而 去,城 人 無 幾破 潯復 叛 者數 志。 梧 州 矣。 援兵 、索餉 會 聞 陳 邦 而

封式 耜 式 臨 耜 初 桂 伯 請 河 璉 新 王 返 全州 興伯 了, 不 ,元曄等進秩 聽 0 已, 請還桂林。 有 差 王已許之, 會武岡破, 王由靖州走柳州,

式耜 復 請還桂林。 十一月,大兵自湖 南逼全州,式耜偕騰蛟拒却。 已,梧州復破,王方在象

州 走 南寧。 以

| 耜遣使慰三宮起居。 亦 城。 下沾 搆 H 至 , 式 難 |式|| 衣。 日 五 耜 中 式耜 年二月,南安侯郝永忠駐桂林,惡城外團練兵,盡破水東十八村,殺戮無算,與式耜 三月,大兵知桂林有變,來襲, 息城 , 力爭,不聽。 王甫行、永忠卽大掠、捶殺太常卿黃太元。 趙 力 中餘燼,安撫遠近。 印選諸營自靈川至,亦大掠, 調劑, 大臣力爭,乃以十二月還桂林 永忠 王始知式耜無恙,爲泣下 左右皆請速駕,式耜 乃駐 興安。 焦璉及諸鎭周金、湯兆佐 抵北 大兵前 又爭。 門。 城內外如洗。 驅至靈川, 騰蛟督諸將拒戰,城獲全。 王曰:「卿不 式耜家亦被掠,家 永忠戰敗,奔入桂林,請王 一、胡一 永忠走柳州,印選等走永寧。 過欲予死社稷爾。」式耜 青等各率所部 人矯騰蛟令箭,乃出 時王越南寧、武 至,騰蛟 卽 爲 夕 明 泣

閨 月 廣 東 李成棟、江 西 金 , 聲 桓 一皆叛 大清, , 據 地 歸 , 式 耜 請王 還 桂 林。 王 從 成 棟請り

署 危。 式 輔。 休 世 州 將 耜 守 戚 銜 並 赴 ,袁彭 朝 巡 廣 廣 召 與 復 式 州 共 撫 士 西 耜 式耜 方 网 年、 不 欲 廣 入直 式 植 如 同 式 黨 1 以 耜 黔 他 一,以文 時魁 機 相 慮、 耜 國 臣 角 會 成 亦 公 0 式式 金金 棟 可 淵 疏 例 乘 挾 印畀之, 駁 耜 堡等遂 切 , 王 式耜 不能 之。 請 大 自 政, 王 專 禁。 爭 式 特 還 式 耜 相 自 疏 如 相終 桂 劾之, 身 劉 倚 得 林 附。 在 與 承 , 不 聞 外, 圖 胤 入 會中 六年 出 事 也。 政 王 楚 有 外 力爭之,乃 之計, 正 爲 未幾, 闕 多 月, 褒 爭 必 納 時 者, 不 騰蛟 疏 魁 納 駐 諫 而 邦 等 是 肇 聲桓、成棟相繼 傳 逐朱 慶 嘗 時 慶。 乃 或 成棟 目 天麟 止 公 + 陳 子 臣 廣 邦傳 元胤 月 與主上 不欲 远 巡 宁 永 敗 專 一撫魯可 州 何 潯 及 思難 朝 吾 州 政, 寶 國 鷌 慶 相 藻自 勢大 爲 自 知 随, 衡 敬 稱

府 擅 中 靑 封 家家 **凌**侯 無 寸 孫 七 戍 榕 年 可 人 楊 兵, 望 江 正 、亦散。 與與 月 國棟、綏寧伯 11 大兵 〈寧遠伯 式 南 益 部 耜 雄 深 將 疏 破。 請 戚 入。 王 浦 永 良 斬 王 纓、 勛 <del>+</del> 祚 之。 懼 請式耜 皆 寧 月五 懼 皆 走 武伯馬養麟 不 不 梧 納 州 上馬速走, 日 出 兵, 式組繳印選出 O 諸 九 大兵遂 月, 大 亦 臣 式耜堅不聽,叱退之。 逃 全州 許 去。 入 時魁 嚴 破 不 關 永 等下 祚 肯行 開 迎降, 十月 或 獄 , 公 ,式耜七疏論救。 再趣之, 趙 一青、 城 E[] 中無 選 俄 居 總 永 則 一 兵。 督張 桂 祚 盡 林 入 室 性林 同 式耜 逃。 衞 胡執 敞至 國 分 端 恭 公 餉 胡 青 坐 之

列

僔

舍。 偕 明,數騎 死,乃 遠近 兩 人日 相對 稱異,遂 至。 賦詩倡 式耜 飲 酒,一 與同 曰「吾」 和,得百 敞俱 老兵侍。 兩人待死 死。 I餘首。 召中軍徐高付以敕印,屬馳送王。 同敞,大學士居正 久矣」, 至閏十一月十有七日, 遂 與偕行,至 曾孫,事 則 見居正傳 將 踞坐於 就 刑,天 地。 是夕,兩 諭 大 之降,不聽,幽 雷 人 電, 秉燭危 空中 震擊者 坐。 於民

鼎自全州撤兵還桂林。 死 拒守。 時桂 有 周 震 林殉難者光祿少卿汪皡投水死。 條城 者,官中書舍人,居 守事宜,上之留守瞿式耜。 守全諸將議舉城降,震力爭不可,衆怒殺之,全州遂失。 全州,慷慨尚氣節。 其破平樂也,守將鎭西將軍朱旻如 式耜 刨 題爲 武岡失,全州危,震邀文武將 御史、監全州軍。 無何 自剄。 郝 吏盟 永 忠、盧 於神,

見,如二人之竭力致死,靡有二心,所謂百折不回者矣。 要亦時勢使然。 目 何騰蛟、瞿式耜崎嶇危難之中,介然以艱貞自守。雖其設施經畫,未能 其於鞠躬盡 瘁之操, 無 少虧損, 固未可以是爲訾議也。 明代二百七十餘年養士之報,其在 夫節 義 必 一覩厥效, 窮 而 後

斯乎!

其在斯乎!

